

جائزة ...نت !!

بقلمي / احكى يا شهرزاد (منى لطفى)



الإنترنت ..أو الشبكة العنكبوتية ...تلك الشبكة التي جعلت من
العالم أجمع ..قرية صغيرة !! ...

لم يعد هناك معها ما هو صعب او مستحيل ...فمعها أصبح
أصعب الاشياءأهونهالا يقف في طريقها شيئا فالمُحال
أصبح مُتاحوالجميع ...فلم تدع شيئا صعبا أو مستحيلا أو
...خطيرا إلا وأصبحسهلا يسيرا ..بما في ذلكالخيانة!!

لم تكن " منة " تعتقد أنها قد تقع في الفخ المسمى " بالحب " بل
والأنكى انها قد وافقت بإرادتها على الدخول بقدميها الى

مصيدة " الزواج " !! ... , ولكن أيضا لم يكن " سيف " يؤمن
بما يسمى المستحيل .. وفعلها واصطاد غزاله الشارد .. " منة " !!

ولكن ... ماذا سيحدث عندما تتعرض حياتهما سوية الى تلك
اللعنة المسماة " نِتْ " !! ... هل سيكون الفراق هو نهاية المطاف
لرحلتها سوية أم سيكون للقلب رأياً آخر ؟ !!

الحلقة الأولى:

- يا اهل الدار أين أنتم ؟ , باركوا لي يا قوم بنيت الباش -
مهندسة منة عبد العظيم بامتياز مع مرتبة الشرف " , صاحت
منة بهذه العبارة ما ان فتحت لها الباب أمها التي سرعان ما
اطلقت زغرودة كبيرة تصدح في الاجواء معلنة فرحتها بنجاح
ابنتها منة وحصولها على بكالوريوس الفنون الجميلة قسم
ديكور , حضر والدها سريعا على صوت الجلبة التي أحدثتها
كلاً من ابنته وزوجته , تكلم ما ان شاهدهما :

- ايه ايه مش تفرحوني معكم طيب ؟ ايه الاخبار يا بنت
عبدالعظيم سبع ولا ضبع ؟؟ , أجابته منة بمرح وهى تطوق
كتفيه بذراعاها :

- عيب يا أبو منة دا انا بنتك بردو ... امتياز يا باشا مع مرتبة الشرف كمان, قبلها والدها بحب وهو يقول بفخر:

- ألف ألف مبروك النجاح يا حبيبتي هو دا النجاح اللي يشرح القلب ويشرف بصحيح... , اقتربت منهما والدتها وعيناها تذرفان دموع الفرح وقالت لزوجها وهى تجذب يد ابنتها دافعة بها الى احضانها:

- أومال ايه.. بنتي دايم رافعه راسي عقبال ما افرح بيكي كدا مع واحد ابن حلال يعزك ويصونك... , قلبت منة عينيها مخاطبة امها :

- يا توفي الزمن ما بقاش هو الزمن... دلوقتي لو الجواز مش هيكون فيه كل مقومات النجاح ويغير حياة الواحدة للأفضل يبقى بلاش منه احسن! , عموما سيبينا من الكلام دا , .. وقفت واضعه يديها في خصرها وتكلمت بثقة قائلة وهى ترفع رأسها الى أعلى:

- يا ترى النجاح المشرف دا هديته هتكون ايه؟.

ضربتها امها بخفة على كتفها قائلة بجدية مفتعلة:

- ايه توفي دي يا بنت؟! , حد يقول لمامته توفي؟ , وبعدين باباكي وعدك بهدية كبيرة لما تنجحي وهو عند وعده وانا بقة ليكي عندي احلى حفلة لنجاحك.... ,

ضحكت منة ومالت على والدتها قائلة بغمزة من عيناها:

- ايه بس يا أم منة.. زعلانه من ايه يا قمر؟ هي توفي وحشة؟
انت مش اسمك عواطف تبقي توفي على طول يا أحلى توفي
بالكراميل انت يا جميل...

تعالت ضحكات والديها التي قطعها صوت ضاحك آت من
الداخل يقول :

- أيوة أيوة كوليا بكلمتين! , واقترب منها يشد أذنها بمرح
محبب مكمل:

- وبعدين ايه أم منة دي يا هانم؟, اسمها أم أحمد! , انت نسيتي
أخوكي الكبير ولا ايه يا آنسة؟,

ضحكت منة وقالت بمرحها المعهود متصنعة الألم من مسكته
لأذنها:

-آي آي خلاص خلاص حرمت يا أبو حميد.... سماح
النوبة دي..

ترك أذنها وهو يضرب كفا بكف ويقول بدهشة ضاحكة:

- أبو حميد؟ انت يا بنتي انت مش ناوية تبطلي تهريجك دا؟
وبعد دا كله تقولي سماح؟ سماح ماتت الله يرحمها !!...

تصنعت منة الحزن قالبة شفتها السفلى وهى تقول:

- ماتت!! , تصدق زعلتني!.

قاطع مشاغبتهما المرححة صوت والدهما الوقور الذي يحمل رنة
الفرح بولديه:

- خلاص بطلوا انتم الاتنين تهريج, وانت يا باش مهندسة ,
واشار الى الاريكة المغطاة بكسوة قماشية فاخرة:

- على مامتك ما تحضر الغدا تعالى قوليلي يا ترى فكرت
هتعملي ايه بعد ما اتخرجت...

ذهبت الأم لتحضير طعام الغداء بينما جلس عبد العظيم مع
ولديه واجابت منة سؤاله بحماس:

- انا طبعا عارفة انى ممكن جدا يبجي لي تعيين معيدة في
الجامعة لكن انا عمري ما فكرت انى ادخل سلك التعليم دا...

انا بحب الشغل.. عاوزة انزل مواقع واشتغل واشوف
رسوماتي وهى بتننفذ على الواقع... عمري ما شوفت نفسي
دكتورة جامعه وقاعده على مكتب... ماليش في اللون دا!

احمد وهو يضربها بخفة على رأسها:

- يا بنتي انت بنت! , لا الاله الا الله.. شوية انوثة شوية! , ايه
متعرفيش تتكلمي زي البنات ابدأ؟! , حاسس انى بكلم واحد
صاحبي ومش أي صاحب كمان... لا صاحب ضايع على
الاخر!...

ابتسم الوالد لقول ابنه ووجه حديثه الى منة قائلاً:

- هتضيّعوا الوقت في الهزار! , بردو مفهمتش عاوزة تشتغلي
في مكتب هندسي يعني؟.

منة بانفعال حماسي:

- عارف بجد يا بابا نفسي في ايه؟ , نظر اليها والدها في
تساؤل بينما ارتسمت شبح ابتسامة حانية على وجه شقيقها الذي
يكبرها بخمس سنوات وهو يرى شقيقته الصغرى تخطط
لمستقبلها بحماس ولمعت عيناه بفخر للثقة التي تتحدث بها فهي
تعلم موضع قدميها تماما بل وتعلم بكل وضوح ما تريد القيام به
الايام القادمة...

منة متابعه بحماس:

- نفسي اسافر بره يا بابا... ايطاليا او باريس... بلاد الفن
الحقيقي... انت عارف انى فنون جميلة قسم ديكور.. عاوزة
اتعمق اكتر في دراستي وبفكر اسافر اكمل دراسات عليا هناك
..انا حاسة انى هتعلم هناك حاجات هتنفعني في شغلي بجد...ايه
رايك يا بابايا؟, موافق؟..

ليقاطعها صوت عال بصرامة:

- طبعاً... لا !! .

شهقت منة والتفتت الى امها التي نمت وقففتها عن جديتها البالغة
وكانت قد أتت لآخبارهم بأن الطعام أصبح معدا على مائدة
السفرة, قامت منة من مكانها واتجهت الى والدتها محاولةً تليين
قلبها بدلالها المعهود بينما تبادل الاب وابنه نظرات تدل على
معرفتهما برأي الام مسبقا...

منة بدلال وهى تحيط كتفي أمها بذراعها:

- ليه بس يا توفي؟, انا مابقيتش صغيرة.. دي فرصة يا مامتي
حبيبتي علشان خاطري وافقي..

الأم بجدية بالغة:

- عاوزة تسافري يبقى مع جوزك... تتجوزى الأول وبعدين
تبقى تسافري مطرح ما انت عاوزة انما غير كدا مالكيش كلام
في الموضوع دا ... ودلوقتي ياللا علشان نتغدى قبل ما الاكل
يبرد..

اجابت منة بنزق :

- ايه دا؟! , انا اعرف الواحد يسافر بجواز سفر مش بجواز
بحق وحقيقي! , والبيه هاخده ايه بقه ان شاء الله التأشيرة بتاعت
السفر؟ ولا هاند باج في ايدي على الطيارة وأسرّبه أول ما
انزل منها؟!..

قالت الأم وهى تتأفف بغیظ:

- ايه؟ تسرّبيه! انت يا بنتي انت بتجيبى الكلام دا منين؟, اهو
دا اللي انت فالحه فيه التريقة!!.

الاب تدخل مانعا ابنته من الرد على امها قائلا بجدية ونظرة
صارمة على وجهه:

- منة... خلاص اقفلي الموضوع دا دلوقتي.. يعني هي التأشيرة
على الباب والطيارة مستنية؟! , ياللا نتغدى وابقى فكري كويس
عاوزه تعمل ايه وانا ممكن اكلمك عمك فخري الشركة اللي
هو بيشتغل فيها رئيس للشؤون القانونية شركة هندسية كبيرة
بتبني مجمعات سكنية وبيحتاجوا مهندسين ديكور في تنفيذ
التشطيبات الداخليه.. هكلمهولك وان شاء الله خير..

رد احمد ضاحكا محاولا ترطيب الاجواء:

معلش يا والدي العزيز.... اذا كانت منة هتشتغل يبقى مع
اخوها! , مش معقولة يبقى اخوها عنده مكتب هندسي واكون
مهندس انشاءات اسمه ابتدا يلمع وهى تسيبني وتشتغل عند
الغرب دي حتى كدا تبقى عامله زي القرع يمد لبره!!

كتفت منة ذراعيها وطالعتة بسخرية قائلة:

- يا عم الغرور دا كله.. شوية تواضع علشان الغلاية اللي
زيي... وبعدين هو كان مكتبك لوحدك انت معاك اتنين غيرك..

أحمد بثقة تامة:

- مالكيش دعوه اعتبري نفسك في فترة تمرين من بكرة... انت عارفة عمر وسيف عمرهم ما هيقلوا لأ..

منة وهى تصطنع المرض:

- يا خرابي هو انا قادرة عليك انت لوحذك علشان تجيب لي احمد وشركاه؟!...

الاب بجدية :

- خلاص نقفل الموضوع دا دلوقتي ويا للا علشان نتغدى وابقوا اتجادلوا بعدين..

واتجه الاربعة حيث غرفة الطعام لتناول الاصناف الشهية التى تبرع في اعدادها الأم.....

استيقظت منة في صباح اليوم التالي ونظرت الى الساعة الموضوعه فوق الجارور بجانبها والتي تشير عقاربها الى السابعة والنصف صباحا, شهقت ونفضت الغطاء من فوقها لتقوم سريعا وتناولت منشفتها متجهة الى خارج الغرفة بخطوات سريعة وهى تقول :

- مش هخلص من أحمد, هيقعد يقوللي هتأخريني وأخرتيني..

قابلت أم محمود السيدة الممتلئة البدن الخمسينية العمر والتي تأتي يوميا لمساعدة والدتها في شؤون المنزل ولم تكن موجودة

بالأمس حيث صادف يوم أجازتها الاسبوعية, ابتسمت منة
ملقية عليها تحية الصباح:

- صباح الفل يا أم محمود..

أم محمود ببشاشة:

- صباح الورد والياسمين على عيونك يا ست منة... ياللا على
ما تخلصي حمامك يكون الفطار جاهز..

منة بابتسامة وهي تخطو سريعا للذهاب الى الحمام:

- أوكي يا قمر..

أم محمود تبادلها المزاح:

- أوكيك يا عسليتنا....

منة بتقطيبة جبين ونبرة جدية مفتعلة:

- كيك؟, كيك بالشوكولاتة ولا البرتقال؟, انت عارفاني
الشوكولاتة حبييتي أنا أنما البرتقال..... وحركت كتفها بدلال
متابعة وهي تمط شفتيها المكتنرتين:

- أحبوووش!!..

دخلت الحمام وسط ضحكات ام محمود...

وقفت منة أمام مرآة الزينة في غرفتها تطالع شكلها النهائي,
اختارت طقما عمليًا للذهاب الى المكتب الهندسي مع شقيقها,

يتكون من فستان قطني ابيض اللون يصل الى الركبة ذو نقوش
من الازهار الصغيرة زرقاء اللون المطبوعة على حواف الفستان
من الاسفل وذات النقوش مطبوعة على حواف الكم القصير
للفستان ومن الاسفل بنطالا من الجينز الازرق وفوق الفستان
سترة قصيرة بأكمام طويلة من الجينز الازرق ايضا وانتعلت
حذاء رياضيا ابيض اللون, ثم عكست شعرها الكستنائي
الناعم الذي يكاد يصل الى خصرها على هيئة كعكة صارمة
لتغطيه بعد ذلك بحجاب رقيق عبارة عن وشاح من القماش
الناعم ابيض اللون موشي بتعاريج زرقاء بسيطة في لفة
محتشمة, ابتسمت لما رآته امامها فهي أنيقة ولكن بغير اسفاف
وضحكت عيناها اللوزتين المكثنتين برموش طويلة معقوفة الى
اعلى وكأنها موشاة بأداة تلوين الرموش ولكنه صنعة رب
العالمين, اسفلها أنف صغير مرفوع الى الاعلى دليل للعناد
الذي هو خصلتها المتأصلة فيها ويعلو هذا الانف شفتين
مكتنزتين حمراوين بلون ثمرة الفراولة الطازجة, نظرت الى
وجهها يمينا ويسارا ببشرته الذهبية والتي كانت تفخر بها فمن
يراها يصفها دائما بأنها تملك الجمال المصري الاصيل وهذا
الامر كان يبهجها فهي لم تكن كباقي فتيات جيلها ممن يصبغن
شعورهن بالوان صارخة ويرتدين العدسات الملونة فبرأيها ليس
هناك أجمل من الهيئة التي خلقها الله عليها...., كان جسدها
متناسق ومع أنها لم تكن من ذوات ممارسة الحمية بشكل دائم

ولكن ممارستها لرياضة السير بشكل يومي في النادي الرياضي
المشترك به عائلتها ساعدها في الحفاظ على لياقتها البدنية..

لم تضع أي زينة كعادتها فهي ليست من هواة هذه الالوان التي
يضعنها صديقاتها وكأنهن ذاهبات الى حفل ليلي وليس للدراسة
او العمل او حتى يصلح للخروج نهارا, واكتفت بمرطب للشفاة
عديم اللون وارتدت حقيبتها القماشية بشكل عكسي كما تحب
دائما كي يسهل عليها الحركة....

أحمد ينادي بصوت عال:

- ياللا يا برنسيصة... هنتأخر كدا.. مش معقول أبقى أنا المدير
وأتاخر شكلك من أولها هتجيبني لي الكلام!.

اتجهت اليه مئة في خطوات سريعة مجيبة بلهجة واثقة:

- مين دا؟, ان ما كونتش أخليك تاخذ بونط عن باقية مثلث
برمودا بتاعكم دا مابقاش أنا!, هخليهم يقولوا لك جبتها منين دي
يا أبو حميد؟!.

ضربها اخوها بخفة على رأسها وقال بحنق مفتعل:

- بس بس بس..ايه... راديو واتفتح!, اما نشوف يا ختي... يا ما
انا خايف اقول انا اللي جبت دا كلو لنفسى....

نظرت اليه مئة بنصف عين واضعة يدها في منتصف خصرها
مجيبة :

- والله احنا لسه فيها وان كنت ناسي أفكرك!, انت اللي عرضت عليا انى اشتغل معكم ومش بس كدا انت كنت هتبوس الايادي كمان ان بابا ما يكلمش عمو فخري... صح ولا بتبلا عليك?.

دفعها احمد امامه بينما أتت والدته على صوت جدالهما العالي وقالت بابتسامة:

- انتو مش هتكبروا ابدأ؟!....

قال احمد وهو يدفع شقيقته المشاغبة خارجا:

- مين دي اللي تكبر؟ بنتك؟, دا انا بيتهيا لي ان طفلة اربع سنين ممكن تكبر الا دي!!, سلام عليكم يا ماما...

ردت أمهما السلام وهى ترفع يديها داعية الله يوفقهما ويحفظهما لها...

نادت أم محمود التى أتت سريعا تلبية لنداء سيدتها:

- ياللا يا ام محمود شهلي شوية... عاوزاكي تنزلي تيجيبي الطلبات اللي قلت لك عليها بسرعه على ما انا اجهز حاجة الغدا انت عارفة الأستاذ عبد العظيم بييجي 3 بالظبط, تطبطي عليه الساعة..

اتجهت ام محمود الى الباب وهى تنزل أكمامها المرفوعة توميء برأسها بالايجاب بينما يتبعها صوت عواطف يقول:

- آه وما تنسيش ورق العنب يا ام محمود انت عارفة منة بتحبه
أد إيه..

" عبد العظيم الأب: موجه أول لغة عربية.. رجل وقور محترم
من عائلة عريقة تمتد أصولها الى الريف المصري ولكن عائلته
سكنت المدينة منذ زمن طويل... يملك قطعة أرض هي ميراثه
عن والده في بلده الريفي يرعاها شقيقه الذي يعيش هناك مع
عائلته كما تعيش شقيقته في بلدتهما مع زوجها وعائلتها
الصغيرة وشقيقة اخرى تعيش في الخليج مع زوجها واسرتها...

عواطف الأم: حاصلة على بكالوريوس تجارة.. تزوجت من
عبد العظيم زواجا تقليديا.. عاشت طوال عمرها في القاهرة لا
تملك من الاشقاء سوى واحدة وتلك الاخيرة تعيش مع عائلتها
في الاسكندرية حيث عمل زوجها, أثرت عواطف عدم العمل
وانشغلت برعاية شؤون أسررتها الصغيرة فأصبح شغلها الشاغل
مساعدة زوجها في تأمين راحة ولديها, وتدعو الله ليل نهار أن
يوفق كليهما في اختيار شريك حياته لتكتمل بذلك سعادتها هي
وزوجها"...

- اتفضلني يا ستي...., دخلت منة حيث يشير احمد لتجد نفسها في بهو واسع لشقة كبيرة, حيث لاحظت ثلاثة أبواب, تقدم أحمد مشيرا الى أول باب الى اليمين قائلاً:

- دا مكتب الموظفين اللي معنا, هعرفك عليهم دلوقتى, والباب التانى دا مكتبي أنا وعمر والباب الأخير اللي في الوش يبقى مكتب الاستاذ سيف..

قطبت منة متسائلة:

- وايش معنى سيف صاحبك مكتبه لوحده؟.

احمد بتلقائية:

- طبيعى... سيف هو المهندس المسؤول هنا صحيح المكتب انا وهو وعمر شركا فيه لكن هو اكبر منا سواء في السن اكبر منا بتلات سنين وسواء في الخبرة عنده خبرة اكثر منا بكثير وبعدين هو مش غريب دا ابن خالة عمر فبالنسبة لنا عادي وكويس انه وافق يشاركنا سيف عنده خبرة كويسة اوي وعمل علاقات في السوق مش بطالة...

هزت منة برأسها ايجابا ولم تُعقب, أشار اليها احمد لتتقدمه حيث دخلا الى غرفة الموظفين فطالعتهما زوجين من الأعين اشار اليهما احمد مبتسما:

- المهندسة سحر... زميلتنا هنا ودفعتنا في الكلية... مهندسة
انشاءات, تقدمت اليها منة مصافحة وقد شعرت بالراحة اليها
فوجهها تعتليه براءة طفولية محبة كما انه غير متكلف خال من
أي زينة.., وملابسها بسيطة بعيدة كل البعد عن البهرجة
وشعرها القصير الذي يصل حدود أذنيها يُكسبها مسحة من
الجمال البريء مع عينيها الواسعتين بلونهما البندقي...
أكمل احمد التعريف مشيرا الى الأخرى قائلاً:

- المهندسة ايناس... مهندسة كمبيوتر واوتو كاد وحاجات كثيرة
اوى هتلخبط لك دماغك.. من الاخر مهندسة تصميم ما
حصلتش...

اتجهت ايناس للسلام على منة وقد احمرت وجنتيها لمدح أحمد
لها مما لفت نظر منة التي نقلت نظراتها بينهما هما الاثنتين
لتشاهد لمحة خاطفة من حنان عبرت وجه اخيها سريعاً ولكن لم
تكن لتفوتها!!...ولكنها عذرت شقيقها في اعجابه الملاحظ بها
فهي كالنسمة الهادئة التي تشعر بها لتريح اعصابك بعينيها
العسليتين كبحر من العسل المصفى وبشرتها القمحية وشعرها
الطويل نسبياً الذي يصل نهاية اكتافها بلونه الشوكولاتة الجذاب
ولم تكن متكلفة ايضاً لا في زينتها او ثيابها....

قالت ايناس بخفر:

- ما تبالغش يا باش مهندس... نورتيينا يا...

ضحكت منة مجيبة وهى تصافحها:

- منة... مهندسة ديكور, وأخت الباش مهندس..

رحب الجميع بها وفجأة فاح في الهواء رائحة عطر ثقيل جعلت منة تنظر مشدوهة لتلاحظ سحر ترنو ببصرها الى شيء خلفها فاستدارت لتطالعها صورة من عارضة ازياء خرجت حديثا من مجلة للموضة والجمال...

احمد بجدية استغربتها منة:

- نشوى.... سكرتيرة المكتب او مديرة المكتب زي ما بتحب تقول..

اجابت نشوى في غنج لم تستسغه منة:

- تقدرى تقولى الكل في الكل!, من غيرى المكتب يتلخبط, انا اللي بظبط مواعيد العملاء والطلبات اللي بتجيلنا وكل الشغل الاداري عليا انا لوحدي ... ابقى اهم واحده ولا لأ؟!...

انتهت عبارتها وهى ترنو لأحمد بدلال مقزز جعل منة ترغب بلكمها على أنفها المرتفع عاليا علّه ينزل الى الاسفل قليلا!!....

فحصتها منة بنظراتها بدءا من شعرها الاشقر المصبوغ مرورا ببشرتها البيضاء الخالية من العيوب مرورا بجسدها المثالي حتى اصابع قدميها الظاهرين من فتحت حذاءها ذو الكعب

المرتفع جدا والمطالية بلون احمر قان كما اظافر يديها بينما
طالعتها نشوى بنظرات زرقاء مغرورة!!..

همست منة في سرها:

- اتحدى انه عينيكي عيرة تمام كدا زي شعرك... وربنا يستر ما
يكونش فيه حاجات تانية عيرة!!..

مالت على احمد هامسة له فلم يسمعها سواه:

- انت قلت لي هشتغل في مكتب مع موظفين عاديين زيينا كدا
اقدر اعرف الساحرة الشريرة اللي واكله ولادها دي على
الصبح بتعمل هنا ايه؟ , في اشارة منها الى اللون الاحمر الفاقع
الذي تظلي به شفيتها!, قاطعته قبل ان يقوم بالرد عليها متابعة:

- آه.. بس.. فهمت, جايبيها تخوفوا بيها الزباين صح؟!..

كتم احمد ضحكته بصعوبة ونظر اليها نظرة زاجرة بعينيه
وقال بخفوت مصطنع الجدية:

- منة بقولك ايه ابعدني عن دي خالص.. انا مش ناقص وش!,
خليكي مع سحر وايناس ونشوى ابعدني عنها انا ماليش دعوه
علشان ما تجيش تشتكي بعد كدا!..

منة بحلق هامس:

- مين دي اللي تشتكي؟ أنا!.... لا معلش يا استاذ, اختك عندها
المقدرة بعون الله انها تحط كل واحد في حجمه الطبيعي ولو

عاوزني اخليها لك ماشية والعه والدخان طالع من ودانها
ومناخيرها كدا ولا يهملك... أنا لها! , واشارت لنفسها بثقة...

اجاب احمد بذعر فهو يعلم شقيقته تماما ومقدرتها على حرق دم
من يقف امامها وهي ببرود ثلجة!:

- لالا لا .. الطيب احسن... ابعدني عنها وخلص... مش عاوز
عمر أو سيف يتضايقوا هي يمكن مغرورة شوية انما شاطرة
وممشية المكتب زي الساعة..

قاطع استرسالهما صوت ضاحك:

- ايه يا عم وانا ماليش في المعرفة جانب ولا ايه؟

تقدم عمر بوجهه البشوش الضاحك من احمد الذي خبط بيده
على ظهره بمرح قائلاً:

- ودا طبعا عمر باشا.... انت عارفاه..

قالت منة ولم يصافحها عمر فهو يعلم انها لا تصافح رجال من
المرات القليلة التي شاهدها فيها لدى زيارة احمد وكان نادرا ما
يزوره فأحمد على قدر مرحه ولكنه غيور جدا ولم يكن يدعو
احد من اصدقائه لزيارته بالمنزل حيث والدته وشقيقته, ولكن
كان عمر يصادفها لدى مروره على احمد في أمر طاريء....

قالت منة بابتسامة صغيرة فمرحها مقتصر فقط مع شقيقها
وصديقاتها ولكن ليس مع أي زميل مهما بلغت درجة معرفتها
به:

- اهلا وسهلا يا عمر.. اتشرفنا..

مال احمد على عمر هامسا بتساؤل وصل اسماع منة القريية
منهما:

- هو البوس لسه ما وصلش ولا ايه؟.

عمر بتلقائية :

- انت عارف انه مسافر البلد علشان والده تعبان, وبعدين خلينا
يا عم نشم نفسنا شوية, دا ميعرفش حاجه في حياته غير العمل
فالعمل ثم العمل!!..

فهمت منة ان الحديث الدائر يخص الغائب والذي بالتأكيد لن
يكون سوى....سيف!.

في وقت لاحق وبعد استقرار منة في المكتب مع زميلاتها سحر
وايناس وذهاب احمد الى مكتبه مع عمر... كانت منة تقوم
برسم لديكور غرفة اطفال في تدريب لها كما سبق واتفق معها
شقيقها ان الفترة الاولى ستكون بمثابة تدريب لها حتى تعلم
تماما كيفية سير العمل...، أرادت منة الاستفسار عن بعض

الامور ولكنها وجدت كل من سحر وايناس منخرط في عمله
ففضلت التوجه الى شقيقها لسؤاله...قائلة في سرها:

- ماليش غيرك يا ابو حميد ,ثم استأذنت زميلاتها وخرجت
متجهة الى مكتب اخيها... , كانت قد صادفت عمر في طريقها
وهو يتجه خارجا من المكتب فعلمت ان شقيقها بمفرده هناك
فدخلت بمرحها المعهود قائلة:

- معلش يا حمادة هعطاك شوية...ممك...

لتبتر عبارتها عندما طالعتها هيئة طويلة من الخلف وجسم
رياضي, قطبت باستغراب هامة بصوت مسموع:

- أحمد! , انت ايه اللي طوّلك كذا؟!...ايه حطوك في الرّدّة ولا
ايه؟!...

لتشقق عاليا ما ان التفت هذا الجسد الضخم الذي كان موليا
اياها ظهره قائلا بفكاهة:

- لا معندناش ردة هنا!!!...

نظرت مشدوهة الى هذا الوجه الرجولي الشديد الجاذبية المائل
امامها, قد لا يكون وسيما بالمعنى المفهوم للكلمة ولكن هناك
جاذبية رجولية فجّة تنضح منه تُجبر من حوله على الالتفات
اليه, كان يطالعها بنظرات سوداء عميقة كبحر عميق في ليل
حالك السواد, بينما هناك خصلة سوداء شاردة تغفو على جبينه

العريض تستفز من يراها كي يعيدها مكانها الى اعلى مع باقي
الخصلات, وانف طويل شامخ يعلو فم حازم ونبغة عميقة في
ذقنه المغطى بلحية خفيفة غير مشدبة او كما يقال هذه الايام
"ديرتي", هذا كله يعلو جسد عضلي يدل على ممارسة صاحبه
للرياضة بشكل دائم وطول يصل قرابة الـ 190 سم, مما جعلها
تشعر بأنها قزمة أمامه علما بأن طولها يقرب لـ 173 سم,
وكثيرا ما لقبها صديقاتها بـ " النحلة ", على سبيل المزاح بينهم
فقد كانت اطول واحده في مجموعتها....

تحدثت منة بتلعثم قائلة:

- م...مي...مين؟! أنت.....

ابتسم صاحب الجسد الضخم قائلاً:

- بالتأكيد أنا مش حمادة!!

قطبت منة غاضبة من هذا المتحذلق المغرور الذي يسخر منها:

- ولما انت مش حمادة تقدر تقوللي بتعمل ايه في مكتبه؟

رفع حاجبه باستفزاز مجيباً بسخرية:

- معلش ممكن اعرف الاول انت مين وانت داخله زي القطر

كدا ومن ساعة ما دخلت ما بطلتيش كلام زي ما يكون راديو

واتفتح؟!..

استهجنت منة حديثه وخاطبت نفسها قائلة :

- راديو وافتتح! دا نفس كلام احمد!..

قالت وهى تستدير مبتعدة ببرود:

- معلهش هاجي بعدين يكون الباش مهندس احمد جه..

ليقاطعها ذاك الرجل بسرعه:

- لالا لا خليكي احمد أكيد راح هنا ولا هنا وجاي على طول,....
انما متعرفناش..

منة بدون نفس وهى تنظر الى ناحية بعيدة عنه:

- مبتعرفش بناس اغراب....

الصوت ساخرا:

- ايه ماما قالت لك ماتكلميش حد متعرفهوش؟!..

منة بغيط مكتوم استغربته من نفسها فهي قلما استطاع أحد ان
يخرجها عن طورها, ولكن هذا الكائن الضخم المائل امامها
يُخرج أسوأ ما فيها فأجابت بابتسامة صفراء وبرود تلجي
يقطر من كلماتها:

- آه فعلا..

ليقاطع نقاشهما صوت احمد الضاحك:

- سيف!.. حمدلله على السلامة .. جيت امتى؟

سيف وهو يتلقى احتضان صديقه اليه بينما ينظر الى وجه منة
المتعق خجلا المائل وراء احمد بينما عينيه تطالعانها بنظرات
غيظ ساخر:

- لسه من دقائق مالاقتكش ولا لاقيت عمر..

ابتعد احمد قائلا:

- انا نزلت اجيب موبايلى من العربية كنت ناسيه وعمر تلاقيه
هنا ولا هنا انت عارفه مش بيثبت في حته واحده.., ثم تذكر
وجود منة فاستدار مطالعا اياها وهو يقول باستفسار وابتسامة
تعتلي محياه :

- منة فيه حاجه؟ , همت منة بالكلام ليقاطعها صوت سيف:

- طيب مش تعرفنا الأول يا احمد؟, كان سيف يتحرق شوقا
لمعرفة من تكون هذه اللبوءة الشرسة التي تنفث نارا من عينيها
الرائعتين وكما كان رغبته لمعرفة من هذه الطفلة الفاتنة الواقعة
امامه كان يخشى من سبب تواجدها في مكتب احمد او من
درجة قرابتها له!!...,, وتنفس الصعداء عندما سمع احمد يقول,
احمد بتلقائية:

- أه صحيح... انتو متعرفوش بعض ما سبقلكش شوفتها,...

اعرفك يا منة... المهندس سيف صديقي وشريكي والمدير
التنفيذي للمكتب, ثم اشار الى منة قائلا بابتسامة:

المهندسة منة... اختى واول يوم تدريب ليها هنا في المكتب!!

أوما سيف بتحية من رأسه قائلا بابتسامة صغيرة:

- اتشرفنا يا منة, ومد يده مصافحا فطالعتها منة ببرود لتقول
دون ان تمد يدها للمصافحة:

- آسفة ما بسلمش...., ثم انصرفت وهى تقول :

- أستأذن يا احمد لما تفضى هبقى اجيلك..

ابتسم احمد معتذرا من سيف الذي برقت عيناه متابعا لهذا
الغزال الهارب من امامه وهو يهمس في نفسه:

- واضح كدا ان الايام الجاية هتبقى مش مملة ابداء!!

- يتبع -

الحلقة الثانية:-

مرّ أسبوعان منذ ان بدأت منة التدريب لدى مكتب شقيقها احمد
الهندسي, وطدت علاقتها مع سحر وايناس زميلاتها في العمل,
كما كان عمر بمثابة أخ ثانٍ لها فهو انسان خفيف الظل ومحترم
لم يتجاوز حده معها, ولكن تبقى نشوى التي لم تستطع الاندماج
معه ليس عن كره لها ولكن شفقة عليها!! , نعم... فهي كانت

تشعر بالعطف عليها مما تراه من سلوك نشوى المنفتح لدرجة
كبيرة تخالف ما تربت عليه منة, لذلك أثرت عدم الاحتكاك
معهما الا في اضيق الحدود ولكنها لا تستطيع منع نفسها من ان
ترد لها الصاع صاعين اذا ما تجاوزت الاخرى حدودها معها!
يبقى.....سيف!, لم تشاهده الا لماما طوال الايام السابقة ولكنها
لا تعلم لما هذا الشعور الذي يلزمها من ان هناك من يراقبها!,
كانت تتلفت حولها دائما ما ان يداهما هذا الاحساس لتجد ان
ما يخالجها وكأنه وهم في عقلها الباطن فقط ولكنها تكاد تقسم
انها مراقبة!!...

- سحر تعالي شوفي كدا الديزاين دا قبل ما اسلمه لعمر..
اقتربت سحر لتطالع ما اشارت اليه منة وقالت وقد اعتلت
ملامحها البريئة ابتسامة فرحة:

- جميل يا منون... بجد انت فنانة يا بنتي... انا متأكده لما
أصحاب الشقة هيشوفوا الديكور اللي انت عامله هيتهلوا
عليه...

ابتسمت منة وقالت بلهفة:

- بجد يا سحر ولا بتجامليني؟

سحر مقطبة جبينها:

- انت هبله يا بنتي?, هجاملك في الشغل!..

قامت منة وتناولت لوح الرسم العريض الموضوع على الحامل الهندسي امامها وقامت بطيّه بشكل اسطوانى وقالت بحماس:

- اذا كان كدا يبقى هوريها حالا لعمر لانه لسه سألني على الشغل دا امبارح وقلت له انى هسلمه انهرده..

سحر بدهشة:

- مش هتوريه لأحمد الأول؟

منة باستهجان واضعة يديها في خصرها:

- نعم! علشان يعدّلي فيه وبعدين لو عجب عمر يقول بفضل توجيهاتي! ثم اشارت اليها براحتها الصغيرة متابعة:

- لا يا ستي.. انا عندي عمر يشوفها ويقول لي ملاحظاته كدا احسن...

سحر وهى تهز كتفيها بلامبالاة:

- خلاص براحتك..

انصرفت منه متجهة لمكتب احمد وعمر لتعرض لوحتها على الاخير بينما لم يكن احمد متواجد فقد اخبرها صباحا انه سيذهب الى موقع من مواقع البناء لمباشرة العمّال والاطلاع على كيفية سير العمل..

طرقت منة الباب بخفة فسمعت صوتا مُرحبا يدعو الطارق
للدخول, فتحت منة الباب وما ان ابصرها عمر حتى انفرجت
اساريره و اشار اليها بالتقدم قائلا ببشاشته المعهودة:

- اهلا... اتفضلي يا منة تعالي..

لاحظت منة ان الجميع يستخدمون أسمائهم المجردة بدون ألقاب
فحذت حذوهم مرحبة بهذا الاسلوب الذي أشعرها انها بين
أسرتها واصدقائها...

دخلت منة تاركة الباب مفتوح جزئيا خلفها وتقدمت راسمة
ابتسامة صغيرة على شفتيها النديتين وهي تقول:

- معلش لو هأخذ من وقتك شوية... بس انا خلصت الشغل
اللي انت كلفتني بيه وجيت اعرضه عليك...

قام عمر متجها اليها قائلا بحماس وهو يمد يده ليتناول منها
لوحتها الاسطوانية الشكل:

- والله؟! اتجه عمر الى الحامل الهندسي ليضع عليها اللوح
وهو يهنئها بصدق:

- هايل يا منة.. برافو..

اقتربت منة من عمر لتستطيع مشاهدة اللوح والاستماع الى
ملاحظاته, قال عمر بإشادة:

- جميلة يا منة.. فعلا تستحقى تنجحي بامتياز مع مرتبة الشرف.., دا غير انك فنانة بجد ودا باين في اختيارك للألوان..

اصطبغ وجه منة بحمرة خجل طبيعية لاستماعها مديح غير مديح اساتذتها وأخيها أو أبيها, فمديح عمر يدل على نجاحها في مضمار العمل, سألت بابتسامة متلهفة تشق وجهها الملائكي:

- بجد يا عمر؟, رفع عمر رأسه ناظرا اليها بابتسامة:

- وأبو الجد كمان!, شوفي هو فيه طبعا كم ملاحظة كدا لكن مبدئيا انت موهوبة وفنانة بجد...شكلي كدا هخليكي انت الديزاينير بتاعتي, المسؤولة عن ديكورات المشاريع اللي ماسكها, ايه رأيك نبقى فريق؟, ها... موافقة؟!..

ما ان همت منة بالكلام حتى قاطع حوارهما صوت يتحدث بجدية ممزوجة بسخرية طفيفة لم ينتبه اليها عمر ولكن منة التقطت رنتها الواضحة, قال الصوت:

- موافقة على ايه بالظبط يا عمر... مش ممكن نعرف ولا دا سر؟!..

نظر عمر خلفها في حين تسمرت هي مكانها وأصبح جسدها بأكمله مشدودا كالوتر في حين تحدث عمر بمرحه المعهود غير منتبه للشرارات التى تطاير من حوله:

- سيف!, تعالى يا سيف.. شوف فنانتنا الجديدة مبدعة ازاي..

اقترب سيف بخطوات بطيئة كالصياد الذي يقترب من فريسته
على مهل خشية هروبها, وقف بجوار منة ونظر الى اللوح
المعروض امامه ثم نقل نظره الى منة التي لم تلتفت اليه, وبدلاً
من ذلك سلطت نظاراتها على نقطة وهمية امامها زامة شفيتها
بغير شعور, قال سيف بلامبالاة :

- اممم... كويس.. مش بطال!..

تحدث عمر بدهشة بينما طالعت منة بنصف عين:

- ايه؟ مش بطال؟, ايه يا بني تكسير المجاديف بتاعك دا؟
بالنسبة لمنة وانها لسه مبتدئة فدا يعتبر فوق الممتاز!..

حرك سيف كتفيه بلامبالاة مجيباً وهو يلقي الى منة بنظرة
غامضة بادلتها اياه بأخرى غاضبة من عينيها اللتين أطلقنا
شرارات نارية باتجاهه, قال سيف ببرود:

- والله انا بقول رأيي... لو من دلوقتي سقفنا وهللنا وقولنا واو
وتحفة وجميل يبقى هتفضل على كدا ومش هتحاول تطلع
احسن من كدا...

هم عمر بالكلام فقطاعته منة رافعة راحتها الصغيرة بصوت
حاولت اخراجه ثابت وبصعوبة ولكنها نجحت في ابرازه
واضحا وواثق:

- معلّش يا عمر, انا مش متضايقه بالعكس!, من حق كل واحد انه يقول رأيّه بحرية مطلقة,, ثم وجهت حديثها الى سيف الواقف امامها يطالعها بنظرة حملت اعجاب بثقتها الواضحة في نفسها سرعان ما اخفاه مستبدلا اياه بأخرى متحدية وهو يسمعها تتابع بثقة وتحد:

- أوعذك يا باش مهندس سيف ان المرة الجاية هتكون احسن, ثم حملت اللوح معيدة ربطه ثانية وقالت وهى تهتم بالانصراف:

- عن اذنكم, وغادرت من غير ان تعير هذا الواقف يراقبها بنظرات كالصقر أي اهتمام...

ألقت منة ما بيدها بنزق على مكتبها وهى تتأفف بحنق, تبادلت كلا من ايناس وسحر نظرات الحيرة والتساؤل قبل ان تقترب منها ايناس مستفسرة بدهشة:

- مالك يا منون؟, حد زعلك؟, لتتضم اليها سحر في استفسارها باهتمام صادق:

- عمر قالك حاجه على الرسم؟, معقولة يكون معجبوش؟!.

اجابت منة وهى تنفخ غيظا وكمدا:

- بالعكس!, الشغل عجب عمر اووي وكان طاير بيه كمان!.

قطبت سحر وتوجهت اليها بالسؤال:

- او مال ايه اللي مضايكك اوي كدا؟

منة بغيط وقهر:

- اللي مضايقتني وحارق دمي انه حد يتدخل في شغلك
ويسفه.. في الوقت اللي غيره بيحييكي عليه!, يبقى دا قصده
ايه غير انه يحسسك انك فاشلة ويحبطك وخلاص!..

ايناس في محاولة لتهدئة منة فهما قد علما طبعها جيدا فمع انها
مرحة وعطوفة ولكن عصبيتها مفرطة وكالأطفال تماما حين
تغضب حيث يغلب انفعالها على تفكيرها العقلاني وتحتاج
للمداينة كالصغير المشاغب تماما!!...

قالت ايناس:

- قصدك مين يا منة؟, وبعدين يا ستي مهما كان اللي قال كدا
لازم تكوني واثقة في نفسك وشغلك اكثر من كدا, انت يا ما
هتقابلي ناس هيحاولوا يحبطوكي ويكسروا مجاديفك لو كل مرة
هتعملي كدا يبقى احسن لك تعتزلي من قبل ما تبتدي زي ما
بيقولوا!!...

منة في محاولة للتماسك وبنبرة خرجت قوية ونظرة واثقة
لمعت في بركتي العسل في عينيها:

- لا من الناحية دي اطمني يا ايناس, مش منة اللي تخاف ولا
تتعقد وتبعد, انا بس مش بحب النقد الهدام, أنا مش غبية
وبعرف أميز كويس أوي من اللي عاوز ينصحنى بجد او اللي
عاوز...يحبطني!..

همت سحر بالكلام عندما صدح صوت سيف من امام غرفة
مكتبهن مقاطعا نقاشهما الدائر بنبرة جدية صارمة لا تقبل
النقاش:

- منة... عاوزك في مكتبي!... ثم استدار مغادرا قاطعا عليها
أي محاولة للرفض....

راقبته منة الى ان اختفى تماما وهي تخطب بقدمها الأرض في
اشارة الى مدى سخطها, اقتربت منها ايناس وقالت مهادنة:

- منون حبيبتي.. مهما كان سيف يبقى المدير بتاعك ومهما
اختلفت معاه او اتضايقت من كلامه لازم تبيني انك فاهمه يعني
ايه رئيس ومرؤوس... روعي له دلوقتي وشوفي هو عاوزك
ليه, وعلشان خاطري اهدي خالص وفكري كويس اوي قبل ما
تتكلمي ممكن؟..

نظرت منة الى ايناس وقد برقت عيناها بالعزم والتصميم قائلة:

- ما تخافيش يا ايناس... صاحبك مش غبية... عن اذنكم..

وانصرفت مغادرة حيث ينتظرها هذا المتحذلق المغرور والذي
عزمت على ايقافه عند حده!

طرقت منة الباب فسمعت اذنه بالدخول بصوته القوي الرخيم,
جذبت نفسا عميقا وشدت قامتها ودخلت الى عرين الأسد
بقدميها!..

تقدمت منة بخطوات واثقة فرفع سيف رأسه من فوق الاوراق
التي كان يطالعها ثم أشار اليها بمهنية للجلوس, جلست منة
ونظرت اليه في انتظار سماع ما سيقوله..

امسك سيف بقلم مذهب وتلاعب به بين اصابعه الطويلة
الضخمة, ونظر اليها من بين رموشه الكثيفة والتي استغربت
منة لها اول ما رأتها فكأنها رموشا اصطناعية, تحدث سيف
بنبرة رخيمة قائلاً:

- انا حبيب أوضح لك شوية نقاط واضح انه احمد ما لفتش
نظرك ليها خصوصاً وانك لسه متخرجة جديد ودي اول مرة
تشتغلي فيها, انتظر لسماع ردها ولكنها واصلت النظر الى
نقطة وهمية امامها وتعبير جدي يرتسم على ملامحها الفاتنة,
تابع سيف حديثه بجدية:

- لما الشغل اللي انت بتعمله رئيسك يلفت نظرك لحاجات فيه
ما ينفعش تزعلي وتبوزى وتاخديه بمحمل شخصي!, دا
شغل... وفي الأول والآخر.. مصلحة الشغل هي اللي بتهمنا
كلنا..

نظرت اليه منة وقد كتفت ذراعيها وقالت بنظرة جامدة ونبرة صوت باردة:

- اولاً... انا رئيسي عجبه الشغل جدا, ثانياً.. انا عارفة كويس انه مش لازم شغلي يكون بيرفكت خصوصاً وانا زي ما انت قلت بنفسك انى لسه جديدة...., ثم اعتدلت ناظرة اليه متابعة بقوة وثقة جعلت لمحة اعجاب خاطفة تمرق بين فحم عينيه ولكنها سرعان ما غابت تاركة نظرة يشوبها الغموض بينما لم تنتبه هي الى ما شاب نظراته من غموض واستمرت متابعة باندفاع تلقائي شابهته بعض السخرية الطفيفة:

- وبعدين تسمح لي أسألك سؤال؟,.... وبدون ان تنتظر اجابته قالت:

- هو حضرتك متعود ترفع معنويات اللي بيشتغل معاك بالشكل دا؟, اسمح لي لأنه لو كدا انا متأكده انه كله هيجري بالمشوار من عندك, ولو دا مفهومك لرفع المعنويات يا ريتك تعفيني من الشرف دا...., واذا حصل واضطريت اوي للرفع فيا ريت تنزل من معنويات اللي معاك, يمكن ساعتها تجيب نتيجة أفضل!.

لم يستطع سيف تمالك نفسه وانطلقت ضحكة رجولية عميقة راميا برأسه الى الوراء, بينما لا تدري منة ما هذه الدغدغة التي شعرت بها كتيار كهربائي يمر بها من أخمص قدميها وحتى منابت شعرها!, نفضت هذا الاحساس العجيب الذي خامرها وحاولت تمالك نفسها وهى تتحدث في سرها انه لا بد

من منع ضحكته هذه بل وتجريمها قانونيا! , لما قد تتسبب فيه
من سككات قلبية مفاجئة! , هدأت ضحكات سيف ثم نظر اليها
مليا قبل ان يتحدث بابتسامة خفيفة:

- الاله... , انت دمك خفيف أهو! , او مال على طول ليه شايفك
مبوزة لدرجة انى حاسيت انى مع أبلة كشر؟!..
قطبت منة قائلة باستهجان:

- أفندم! , أبلة مين؟ , كشر!! , واصلت باندفاع غير أبهة
بمحاولاته مقاطعتها:

- عموما حضرتك شكلك كدا بتطفشني ومش عاوزني أشتغل
معكم هنا وشكلك عاوزها تيجي مني لأنك مكسوف من احمد
أخويا! , ... هزت كتفيها بلامبالاة وقامت من مكانها واقفة امامه
متابعة ببرود:

- عموما انا كنت أفضل انك ترفض شغلي معاكم هنا بدل
الحركات دي... , واوعدك انى همشي ومش هتشوفني معكم هنا
تاني... , واطمن هقول لأحمد انى انا اللي مش عاوزة أشتغل
هنا , عن إذنك! .

استدارت منة مغادرة حين صدح صوت سيف بصرامة وأمر:
- استني عندك...

وقفت منة مكانها دون أن تلتفت اليه بينما شعرت به يقترب حتى وقف على بعد خطوات منها واشتمت رائحة عطر رجولي ثقيل في الجو حولها, تحدث سيف بصرامة بالغة:

- أظن مش من الزوء انك تسيبي المدير بتاعك وهو بيكلمك وتقومي وتديلو ضهرك وتمشي!, اتفضلي ارجعي مكانك ويا ريت تتكلمي كانسانة ناضجة مش طفلة خدوا منها اللعبة بتاعتها!...

كتمت منة شهقة كادت أن تفلت منها والتفت ناظرة اليه بغضب شديد فيما كان هو واقفا امامها واضعا يديه في جيبي بنطاله يطالعها ببرود, قطبت منة جبينها دليلا على سخطها من طريقته الاستفزازية في الحديث... سارت حتى وقفت امامه وقالت له وهي تضغط على مخارج حروفها من بين اسنانها:

- اولا انا ما اسمحكش انك تتعدى حدودك في الكلام معايا!, ثانيا انا قمت ومشيت بعد ما استأذنتك وقتلتك رأيي بكل صراحة في طريقتك في التعامل مع الناس اللي بيشتغلوا معاك, كون بقه انك مش عجبك الكلام دي مش مشكلتي, ولا انت تقول رأيك وتجرح في الناس عادي ولما حد بيجي يقولك رأيك تغضب وتثور وتقول انا المدير ومحدث يكلمني بالاسلوب دا؟!...

كتم سيف بصعوبة شتيمة كادت تفلت من بين شفثيه, واقترب منها حتى غدا وجهه على بعد انشات قليلة من وجهها وقال

وهو ينظر جيدا في بركتي العسل خاصتها بينما فحم عينيه
يشتعل بقوة دليلا على غضبه الشديد والذي يحاول التحكم فيه
بصعوبة شديدة:

- ما اعتقدش ان كلامي معناه انى رافض كلامك مع انه معظمه
ان لم يكن كله... تجريح واستخفاف مش رأي موضوعي ممكن
أقبله وأسمعه! ثانيا بقة... انا تعليقي كان على طريقتك في
الكلام, انك تقطعي النقاش اللي بيننا بالطريقة دي وتقومي
وتدينني ضهرك من غير ما أكمل كلامي, أعتقد أنه دا مش من
أبسط قواعد الزوء..... سكت قليلا ثم تابع بسخرية:
- ولا انت رأيك ايه يا باش مهندسة?..

زفرت منة بعمق وقالت وهى تنظر اليه ببرود حاولت التظاهر
به لأن البديل كان أن تختبر المطفأة الكريستال الخاصة
بالسجائر على رأسه! وهى أكيدة أنها ستثبت فاعلية شديدة فهي
من نوع جيد من الكريستال الفرنسي! قالت منة :

- بقول ايه اعتقد انه الكلام في الموضوع دا خد مننا وقت كثير
اوي, ممكن بقة تقوللي انت عاوز ايه بالظبط?, علشان انا ورايا
شغل كثير عمر مكلفني بيه, وعاوزة أفنشه قبل ما أمروح
انهرده علشان أعرضه عليه...

سكت سيف لوهلة ولم يعقب في حين شعرت هي بأنها تكاد
تغرق في لجة عينيه اللذان يبعثان اليها برسائل تدغدغ

مشاعرها, بينما سيف أغمض عينيه لثوان يتنسم فيها عبيرها الذي هاجمه ما ان اقترب منها, هو ليس بعطر.... ولكنه عطر خاص بها, حيث تشيع فيه خليط من رائحة الورود ممتزجة بأخرى من عبير الفواكه, كل هذا قد اختلط برائحتها الأنثوية الخاصة ليصنعوا مزيجا مثيرا لعبير منعش يكاد يُقسم أنه يضاهي أغنى وأجمل العطورات الأكثر شهرة على مستوى العالم!, همس في نفسه... انه لو كان يملك الخيار لكان منعها تماما من استخدام هذا الصابون برائحته المنعشة التي تشعر من يشتمها بأنه وسط حديقة غناء مليئة بشتى أنواع الورود والأزهار النضرة الفواحة..

قطبت منة حائرة من صمته الذي طال, وكانت قد أشاحت ببصرها بعيدا فهي لم تعتد على النظر الى أي رجل بشكل مباشر أثناء محادثته, كانت توشك على مخاطبته لتقطع هذا الصمت الذي ران عليهما عندما سعل سيف ليجلي حنجرته محاولا التحدث بطبيعية لا تشي بما يعتمل داخله من أحاسيس غريبة لأول مرة يشعر بها!..

أشار سيف بيده الى المقعد الجلدي الذي كانت تجلس عليه سابقا فزفرت بياس وتوجهت اليه لتجلس وقالت بملل:

- نعم أفندم..

فاجأها بأن جلس في المقعد المقابل لها وليس في مقعده الرئيسي خلف المكتب, شعرت بارتباك لجلوسه مواجهها لها, في حين

استند هو بمرفقه على سطح المكتب واضعا ساقا فوق ساق وقال بجدية:

- ممكن نبتدي من الأول؟.

قطبت حائرة ونظرت اليه وهي تكثف ساعديها مستفهمة:

- نعم؟, نبتدي من الأول ازاى يعني؟.

ابتسم سيف قليلا واجاب:

- يعني... اشرح لك سوء التفاهم اللي حصل,... وبدون ان ينتظر اجابتها شرع في الحديث موضحا:

- شوفي يا منة, انا منكرش ان شغلك كمبتدئة كويس لكن انا ضد الطريقة بتاعت عمر, عمر مدح في شغلك بشكل يحسسك انه بيرفكت وانه مافيش بعد كدا!, بالتالي انت مش هتحاولى تطوري ولا تعملي أحسن من كدا, واياه اللي يخليكي تتعبي نفسك وتحاولى تبقي افضل اذا كان شغلك جميل وفل الفل وما حصلش؟!....., غير سيف جلسته واستند بمرفقيه على ركبتيه بعد أنزل ساقه ومال اتجاهها متابعا:

- انا في شغلي يمكن أكون جامد, احيانا بيقولوا عليا ما برحمش, لكن أنا بكون عاوز اللي بيشتغل معايا يطلع أحسن ما عنده, وصدقيني اللي انا بكون واثق ومتأكد انهم أفضل وانه بييجي منهم بكون ناشف عليهم شوية.., لكن اللي انا عارف انهم

مهما عملوا دا آخرهم مابتعش نفسي معهم وتلاقيني أقولهم
كويس وما حاولش اضغط عليهم لأن دا آخرهم!... صمت
ناظرا اليها مليا ثم تابع بهدوء:

- فهمتيني يا منة؟..

كانت منة تنظر الى البعيد ولم تستطع النظر اليه وجها لوجه
ولم تستطع تجاهل الصدق الذي استشعرته في حديثه فاجابته
بجدية وهدوء:

- فهمت!، بس أنا كمان معذورة...، انت بنفسك سمعت عمر
بيمدح في شغلي ازاي لما الاقايك انت بتقل من شغلي
ومجهودي طبيعي أزعل واتضايق كمان خصوصا ان الشغل دا
عمر اللي مكلفني بيه، يعني لو فيه أي شيء مش كويس اكيد
هيو جهني...

ابتسم سيف قائلا:

- انت طبعا كان نفسك تقولي لي وانت مالك مش كدا؟.

نظرت اليه منة واجابت بينما ارتسمت شبح ابتسامة على
شفتيها:

- وانت الصادق كنت هقولك مالکش فيه!..

انطلقت ضحكة سيف عميقة لتجعل دقات قلب منة تتسارع
وقلبها يتخبط بقوة بين جنبات صدرها وقد أحمرت وجنتيها

المرمرتين فغدا وجهها كثمرة الفراولة الناضجة! , هدأت
ضحكات سيف ونظر اليها بمرح ساخر قائلاً:

- طيب يعني نقدر نقول عفا الله عما سلف؟! ..

ارتسمت ابتسامة خجولة على شفثيها الكرزتين وقالت وهي
تشيح بنظرها بعيدا عن مرمى عينيه:

- عفا الله عما سلف, بس يعني أفهم من كلامك دا ان شغلي
كويس؟! ..

لا تعلم منة لما اهتمامها لمعرفة رأي سيف في عملها؟! , ولكنها
عللت لنفسها اهتمامها ذاك بأن سيف ذو خبرة واسعه وأنه لن
يجاملها فكأنه كأستاذها الذي تنتظر رأيه فيما بذلته من مجهود!.

ابتسم سيف وأجاب رافعا حاجبه بمرح:

- شغلك لو ماكانش كويس ما كنتش اهتميت انى أشرحك وجهة
نظري, ودلوقتي اتفضلي...

وناولها رسم هندسي طالعتة وقالت مقطبة:

- دا ايه دا؟

اجاب سيف:

- دا رسم هندسي لفيلا انا المسؤول عنها, صاحب الفيلا عاوز
ديكور جديد, من الآخر عاوز حاجه جديدة ما سبقش لحد انه

شافها قبل كدا, وانا عاوزك تعملي ديزاين لديكور الفيلا الداخلي, ممكن تبتي بالدور الارضي وتوريهوني..., ايه رايك؟.

طالعه منة بدهشة واجابت:

- انت عاوزني بجد اشتغل على الفيلا دي؟

هز برأسه ايجابا, فتابعت منة :

- طيب يعني هشتغل لوحدي خالص ولا كل ما أخلص جزئية لازم أرجعك فيها؟.

سيف بهدوء:

- اتصرفي براحتك, المهم انك تبهريني في الآخر!..

قامت منة بحماس وهى تحمل الرسم الهندسي وقالت بابتسامة:

- وهو كذلك, عن اذنك بقه هخلص الشغل اللي في ايدي, واسلمه لعمر, علشان أبتدي في الشغل الجديد دا....

واستدارت لتغادر مولية اياه ظهرها وقد رفعت يدها اليمنى ضامة السبابة والابهام مشيرة بالوسطى والخنصر والبنصر في اشارة لرقم ثلاثة باصابعها وهى تقسم في سرها:

- أبهرك؟! , عليا الطالبات أنى هجنك مش هبهرك بس!..

ما ان تحركت خطوتين حتى سمعت صوت سيف يأتيها من خلفها يناديها فثبتت في مكانها مقطبة جبينها دهشة, في حين تقدم سيف منها بضعة خطوات حتى وقف وراءها وقال بتساؤل:

- معلش يا منة ممكن سؤال؟.

استدارت منة وطالعه بحيرة ثم أومأت بالايجاب قائلة:

- اتفضل...

قال سيف بتؤدة:

- انا ملاحظ انك شايلة الرسميات زي زمايلك بينكم وبين بعض ومع احمد وعمر كمان وهما بيتعاملوا معايا كدا بردو, لكن ليه أنا الوحيد اللي بتتكلمي معايا بالألقاب؟!...

ضحكت منة ضحكة صغيرة مندهشة وقالت:

- نعم؟, ثم حركت كتفيها بلامبالاة واجابت:

- اعتقد الاجابة واضحة!, انت اولا المدير المسؤول هنا, ثاني حاجه هما متعودين عليك وبيتعاملوا معاك عادي.. انا لسه جديدة هنا,.....قاطعها مستفهما ولم يروقه اجابتها:

- بس عمر مدير بردو, وانا شايفك بتتعاملى معاه كأنكم تعرفوا بعض من زمان!!.

منة بتلقائية:

- انا فعلا أعرف عمر من زمان!..

سيف باستنكار:

- نعم؟! , تعرفيه ازاي يعني؟

منة بحيرة لا تعلم أين الخطأ فيما قالتها:

- هو ايه اللي ازاي؟, عمر يبقى صاحب احمد اخويا من ثانوي, وكنت بشوفه في المرات اللي كان ببيجي لأحمد فيها, صحيح نادر لما كان ببيجي, لكن احمد على طول بيتكلم عنه والبيت عندنا كلهم يعرفوا مين عمر, جات عليا أنا يعني؟!..

قال سيف ببرود:

- آه, فهمت....

منة بهدوء:

- وبعدين ما تنساش حضرتك فرق السن اللي بيننا يحتم عليا انى ماشيلش الرسميات واتكلم بحدود معاك..

اجاب سيف بنزق واستنكار:

- اللي يسمعك يفتكر انى عجوز بالنسبة لك!!..

منة بابتسامة مستفزة:

- أظن 8 سنين مش شوية؟! , عن اذنك بقه علشان ألحق أخلص الشغل اللي ورايا..

وانصرفت مولية اياه ظهرها وقد ارتسمت على شفتيها النديتين ابتسامة نصر صغيرة فعلى أقل تقدير شعرت أنه كان لها الكلمة الاخيرة ولم يستطع سيف العظيم الرد على ملاحظتها الاخيرة بشأن السن! ,.... تاركة سيف يرغي ويزبد خلفها متوعدا اياها بأنه لن يمر وقت طويل قبل أن يصبح هذا الغزال الشارد بين يديه!!....

عادت منة الى المكتب فتبادل كلا من سحر وايناس نظرات الدهشة فقد خرجت منة وهى في أقصى درجات الغضب والانفعال لتغيب وقتا طويلا نسبيا وتعود مرتسما على وجهها ابتسامة فرح صغيرة! ,.... ترى ما السبب؟! ..

اقتربت سحر منها قالت بابتسامة:

- ايه الاخبار يا منون؟ شايفاكى راجعه مبتسمة وسعيدة يعني؟

منة بغرور:

- طبعا يا بنتي,.... كفاية انه الباش مهندس البوس بتاعكم بنفسه اعترف ان شغلي عجبه ومش بس كدا لا ...كلفني بشغل جديد كمان!!..

ايناس تقدمت منها وبدهشة:

- ايه دا! , معقوله سيف اعترف انه كان غلطان وان شغلك عجبه؟! ..

منة مقطبة وبتساؤل:

- وفيها ايه يعني لما يقول انه غلط? , ايه عجة؟! ..

ايناس تحرك رأسها يمينا ويسارا:

- لا مش القصد, بس أنا مستغربة! , سيف عمره ما عملها!.

منة بسخرية:

- ايه فيه ايه مالكم? , سيف عمره ما عملها! , معقوله سيف يعملها?! , ايه المدهش انه يشرح لي وجهة نظره يعني أنا مش فاهمه? , عادي انا شايفها حاجة عادية! , دا سيف عبدالهادي مش سيف الخديوي! ...

اطلقت سحر وايناس ضحكات عالية وقالت سحر من بين ضحكاتهما:

- ايه؟ وايه سيف الخديوي دا كمان؟

منة باستخفاف:

- أصلكم مذهولين ومش مصدقين... , معقول سيف قال , معقول سيف عمل, زي ما يكون سيف دا مش انسان طبيعي

زيينا! حسستوني انه مش سيف عادي, كانى بتكلم عن سيف
الخدوي مثلاً!!..

تبادل الصديقات الثلاث الضحكات حتى سألت ايناس:

- المهم هنتغدى فين انهرده؟

منة وهى تهز برأسها يمينا ويسارا:

- لالا اسمحوا لي, انا هبعت اجيب اكل واتغدى هنا, مش
عاوزه اضيع ولا دقيقة واحده تانى, عندي شغل كتير اووى
عاوزه أسلمه لعمر قبل ما ابتدي في الشغل اللي كلفني بيه سيف
الخدوي!..

سحر وهى تضحك:

ماشي يا ستي, مافيش مشكلة, نتغدى هنا, ها تتغدوا ايه؟

منة باندفاع حماسي:

بصوا بقه, انا عزماكم انهرده, ومش هرضى بأي اعتراض,
ايه رأيكم هنضرب شوية كشري مادوقتش ومش هتدوقوا زيه
لا قبل كدا ولا بعد كدا ولا فيه زي كدا!!!...

وافقت سحر وايناس وسط ضحكاتهم, نادت منة على ساعي
المكتب.. عليّ الفتى ذو الخامسة عشر عاما, وقالت وهى تناوله
النقود وورقة بالمطلوب شرائه:

- الورقة دي فيها اللي احنا عاوزينه يا علي, وأدي الفلوس
أهي...

تناول علي الورقة والنقود وقرأ المطلوب فهو حاصل على
دبلوم الثانوية التجارية ولكن نظرا لضعف امكانياته المادية لم
يستطع الالتحاق بكلية التجارة مع العلم أنه حاصل على مجموع
يؤهله لدخولها..

علي مقطبا:

- معلش يا باش مهندسة , حضرتك كاتبة كشري وبين قوسين
اسمي يعني ايه؟

منة بابتسامة:

- ابدأ يا علي, قصدي عاوز كشري مخصوص ولا عادي
وكنت هسألك..

حاول علي الاعتراض ولكن منة أصرت ان يجلب لنفسه طلبا
من الكشري , ذهب علي لاحتضار الطعام في نفس الوقت الذي
دلفت فيه نشوى الى الداخل وهى تقول بغرور:

- ايه على فين يا علي؟.

قاطعت منة علي قبل ان يقوم بالرد عليها قائلة بسخرية:

- باعتين علي يجيب لنا غدا, ايه رأيك تتغدي معانا؟, نظرت اليها ايناس وسحر بدهشة فغمزت لهما بعينها اليمنى في غفلة من نشوى التي قالت بدلال ثقيل:

- مافيش مانع مش هكسفكم..

كادت أن تلطمها على وجهها لتعيد تشكيله ثانية لعلها تقلل من غرورها الثقيل ذاك.....

حضر علي بالطعام الذي فاحت رائحته عاليا , تجمع كلا من منة وايناس وسحر وقامت منة بتوزيع اطباق الطعام عليهم واعطت علي طبقه الذي تناوله وانصرف شاكرا لها كرمها, أمسكت منة بطبق واقتربت من نشوى لتناولها اياه, قامت نشوى من مكانها وكانت تجلس معهم في غرفتهم, أشارت بقرف الى الطبق الذي تحمله منة قائلة باستهجان:

- أيه دا؟..

اجابت منة ببراءة:

- دا كشري!.

نشوى بقرف واضح وهى تضغط على انفها بأصبعيها السبابة والابهام:

- ياااي!, كشري!, بتاكلوه ازاي دا!?, دا كفاية ريحته!..

منة ببراءة مصطنعه:

- لا...الكشري مش بيتاكل, الكشري بيتضرب!, احنا بنضرب
كشري مش بناكل كشري!, وبعدين مالها ريحته?, شمي
كدا,...ورفعت الطبق الى أنف نشوى التى حاولت الابتعاد
برأسها وهى تقول:

- أوه... مونديو...., ابعدى البتاع دا عني...

منة وهى مصرة على أن تتذوقه:

- ايه يا بنتي هو هيعضك!, نظرت اليها نشوى بريية في حين
تابعت منة بجدية مبالغ فيها:

- انت ماتعرفيش فوائد الكشري ولا ايه?, هزت برأسها نفيا في
حين تبادلت كلا من ايناس وسحر النظرات وهما مشغولتان
بالتهام طبقهما من هذه الاكلة الشعبية اللذيذة..

منة وهى تعدد فوائد طبق الكشري:

- عندك مثلا الطماطم اللي في الصلصة بتاعته, هما مش
بيقولوا حمرا يا طماطم?, نظرت اليها نشوى مقطبة فتابعت
منة:

- علشان كدا الطماطم بتجري الدموية في الوش وتخليه أحمر
زي الطماطم!,...وبعدين عندك المكرونة... بتكون مسلوقة
يعني من غير نشا وتشبع وما تتخنش, وعندك بقه العدس أبو
جبة... عدس مؤدب ولابس جبة مش مكشوف!, وعلشان كدا

مش بيثعب ولا حاجه! , نشوى بشك وهى تشير الى الطبق بين يدي منة:

- بجد؟, انت بتتكلمى بجد؟

منة وهى تهز برأسها بقوة وبالانجليزية:

- شور دارلينج (مؤكد عزيزتي) ...

تناولت نشوى الطبق وتذوقت المعلقة الاولى بتخوف وعلى مهل مغمضة عينيها, لتفتحهما على وسعهما وتنظر الى منة التي تنظر اليها مستطلعة رأيها فقالت بابتسامة واسعه:

- امممم, جميل فعلا, وأنكبت على طبقها تأكله بحماس فضحكت منة وايناس وسحر وتابعوا تناول طعامهم...

بعد أن فرغوا من تناول طعام الغداء, أحضر لهم علي الشاي, قالت سحر أثناء احتسائهم للشاي بأوراق النعناع:

- الله... تصدقي الكشري دا فعلا عمري ما اكلت في طعامته, صحيح يا منة هو من عند مين علشان أبقي اجيب منه؟.

منة بتلقائية طبيعية:

- نزلة معوية!...

صرخت نشوى في حين تبادل كلا من ايناس وسحر النظرات وقالت سحر بشبح ضحكة:

لالالا.. احنا بنتكلم بجد يا منون..

منة بتلقائية:

- ومين قال انى بهرج؟, الكشري من عند نزلة معوية, انتو مش بتشوفوه؟, دا واقف بعربيته على طول على ناصية الشارع اللي ورانا؟

صرخ الثلاثة في صوت واحد:

- ايبيبه؟, عربية!!!!!!...

استغربت منة وقالت:

- آه, عربية!, ايه مالكم؟

أمسكت كل واحد منهن بطنها في حين تأوّهت نشوى قائلة:

- حرام عليكى, كشري من على عربية واسم صاحبها
كمان...نزلة معوية!!!!...

تعالّت ضحكات منة, وسط السباب الغاضب الذي أنطلق من فم
البقيات..

انجرت منة ما طلبه منها سيف وترددت قبل ان تعرضه عليه
ولكنها شدت من أزرها وقررت الذهاب اليه ودعت ألا يمارس
عليها احدى نظرياته العبقرية في كيفية رفع معنويات من يعمل
لديه..

وقفت منة بجانب سيف وكان يطالع لوحها الهندسي, كانت تقضم في شفتها السفلى علامة على توترها, رفع سيف رأسه وشاهد وقفها التي تتم عن قلقها, قال بهدوء:

- ايه يا منة...قلقانة؟, رفعت منة كتفيها واخضتتهما وقالت محاولة ادعاء اللامبالاة:

- لا عادي يعني,, ولم تستطع تمالك نفسها وسألته:

- عجبك؟,نظر اليها سيف قائلاً بابتسامة صغيرة:

- ممتاز,

لم تصدق منة ما سمعته أذنيها فقالت بدهشة:

- قول كدا تاني اللي انت قلته كدا!!!...

ضحك سيف وأعاد قوله بابتسامة:

- بقول شغلك ممتاز, وعلشان كدا ليكي عندي مفاجأة!!

ابتسمت منة بسعادة واجابت :

- الحمد لله, ويا ترى ايه هيّ المفاجأة؟, شغل تاني هتكلفني بيه؟

هز سيف رأسه يمينا ويسارا وقال:

- لا.....انت اللي هتشرفي على تنفيذ الشغل دا, بنفسك!

كادت منة ان تقفز فرحا وقالت:

- بجد؟. ابتسم سيف لمرآى سعادتها التي لم تستطع مدارتها,
وقال:

- وجد الجد كمان, من بكرة تجهزي هفوت عليكي الساعة 7
ونص الصبح علشان الطريق طويل شوية!.
قطبت منة وقالت بتساؤل:

- تفوت عليا؟, هو انا مش هروح لوحدي؟
سيف بهدوء:

- لا هنشتغل سوا, مش انا قلت لك ان الفيلا دي انا اللي
بنفذها؟!,

منة وقد ازدرت ريقها بصعوبة وقالت:

- طيب ونروح سوا ليه؟, ما هو ممكن انا اروح في الوقت اللي
يناسبني انا!.

شعر سيف بتوترها وقال بهدوء محاولا افهامها:

- لما نروح سوا احسن, اولاً انت لسه متعرفيش المنطقة هناك
كويس, ثانيا... المشروع دا يعتبر بيننا احنا الاتنين يعني لازم
ناخد رأي بعض في كل حاجه, وبعدين احمد وافقني على رأيي!
منة مقطبة:

- المنطقة بعيدة؟, ليه.. هي الفيلا دي فين بالضبط؟

سيف بتلقائية:

- في العين السخنة!..

منة بصرخة دهشة:

- فين؟ العين السخنة؟ واحد موافق؟ هي العين السخنة دي مش
سفر بردو ولا انا غلطانه؟

سيف بتمهل:

- ايوة يا منة, واحد مقتنع انك تسافري معايا بدل ما تسافري
لوحذك, وبعدين انت قلقانه من ايه؟, احنا مش هنكون
لوحدنا... فيه اصحاب الفيللا والمشوار كله ساعه رايح وساعه
راجع وهنروح ونرجع في نفس اليوم, يبقى قلقانه من ايه؟!..
هزت منة رأسها بنفي بثقة مهزوزة قائلة محاولة التماسك:

- وانا هقلق من ايه يعني؟, ثم همست بينها وبين نفسها:

- العين السخنة يا احمد؟, وجالك قلب توافق؟, هتجنن واعرف
أقنحك ازاي؟, واذا انت اقتنعت بابا وماما وافقوا ازاي؟..

سيف مقطباً بتصنع وهو يكبت ضحكته بصعوبة:

- بتقولي حاجه يا منة؟..

انتبهت منة من شرودها وقالت وهى تحرك رأسها يمينا ويسارا
بشدة:

- ها؟, لا لا لا ولا حاجة, ولا حاجة ابدا!..

سيف بجدية مزيفة:

- تمام, ممكن تروحي انهرده بدري شوية علشان ترتاحي و7
ونص الصبح بإذن الله هكون عندك...

منة وهى تهز راسها بذهول:

- إن شاء الله... وانصرفت وهى تحدث نفسها غير مصدقة ان
أخيها وأبيها بل وأمها قد وافقوا على ذهابها مع سيف الخديوى
هذا وبمنتهى السهولة؟, لا بد أن في الأمر سر... لعلهم فهموا
الموضوع خطأ وظنوا أنها ستذهب معه الى عين الصيرة وليس
العين السخنة!!...

في حين راقب سيف خطواتها وهى تبتعد عنه وهو يهمس في
سره وعينية تومضان ببريق غامض ان كان وقع أنظار منة
عليه كان ألقى في قلبها الخوف مما هو آت, قال سيف:

- ما تستعجلش يا منة, بكرة تعرفي ازاى وافقوا وليه؟! ,
علشان تصدقيني أنه مافيش حاجة اسمها صعب عندي وان
اقدر اتحدى المستحيل..... علشان تكوني بين ايديا!!...

- يتبع -

الحلقة الثالثة:-

استيقظت منة صباح اليوم التالي وكانت قد ضبطت منبهها على وقت صلاة الفجر, بعد ان اغتسلت وصلّت فريضةها, قرأت قليلا في كتاب الله الى أن أشرقت الشمس وانتظرت قليلا ثم صلت ركعتي الضحى كعادتها يوميا, ارتدت ملابسها وهي في حالة وجوم وعدم فهم فبالأمس لم يُرضي فضولها أيّا من أهلها, فقد أخبرتهم بنباً سفرتها القصيرة الخاصة بالعمل مع مديرها وتفاجأت بقبولهم للنباً من دون أدنى اعتراض, مما جعلها تصمت و تقرر مُفاتيحة احمد شقيقها في الامر فيما بعد كي تفهم كيف وافقوا على هذا الأمر؟..., ولكن أحمد خرج في المساء وهي كانت من التعب فلم تستطع انتظاره ونامت, والآن هي لا بد لها من أن تفهم كيف؟, ولما؟....

نظرت الى نفسها في المرأة بعين راضية لملابسها المكونة من قميصا ابيض فضفاض يصل الى فوق الركبة بقليل وأسفل منه بنطال قماشي أسود اللون, وانتعلت حذاء رياضيّا أبيض ولفت وشاحا أبيض يداخله تعاريج سوداء اللون بطريقة محتشمة وانيقة في ذات الوقت واكتفت بارتداء ساعتها الجلدية السوداء اللون, كما ارتدت حقيبتها اليدوية السوداء الجينز بشكل عكسي كالمعتاد, ولم تضع سوى واق للشمس نظرا لحساسية بشرتها تجاه اشعة الشمس الحارة.....

انضمت الى أمها في المطبخ وكانت تقوم باعداد الفطور مع ام محمود والتي تأتي مع نسيمات الفجر وتعود الى بيتها بعد العشاء..

تقدمت من امها وقبلت رأسها ملقية تحيه الصباح عليها وكانت الاخيرة واقفة امام الطاهي تصنع قرص البيض المقلي الذي يحبه افراد عائلتها , ابتسمت الأم وقالت:

- صباح النور يا منونتي, التفتت منة الى ام محمود ملقية تحية الصباح والتي ردتها بصوتها الحنون..
سألت منة أمها:

- هو احمد لسه نايم يا ماما؟

الأم :

- لا بيتهيايالي يا حبيبتي صاحي من ساعة ما رجع من صلاة الفجر مع باباكي ما نمش...
قالت منة بابتسامة:

- طيب هروح احضر السفرة علشان ما اتأخرش انت عارفة مشواري طويل انهرده..

حاولت منة التلميح لأمها علّ وعسى يصدر منها أى اشارة تجعلها تعرف الاجابة عن سؤالها ولكن امها لم يصدر منها أي شيء وتابعت تحضير الفطور بشكل طبيعي...

تجمعت العائلة حول مائدة الطعام, يتناولون إفطارهم وسط
مشاغبات منة واحمد المرحه وان كانت منة تكاد تتحرق غيظا
للانفراد بأخيها فاحساسها يخبرها انه يعتمد الهروب من سؤالها
الظاهر في عينيها وكلما بادرت بالحديث في موضوع سفرها
يقوم بتغيير الكلام فوراً!!!....

انطلقت رنة المحمول الشخصي لأحمد فطالع الرقم ثم نقل
نظره الى شقيقته قائلاً بابتسامة:

- اجهزي يا منون, دا سيف اتفقت معاه انه يديني رنة لما ييجي
تحت...!

ابتعلت منة باقي الطعام في فمها بصعوبة ثم شربت جرعة ماء
كبيرة كادت تسعل على أثرها, انها اول مرة ترافق رجلا غريبا
عنها لأي مكان!, دائما تنقلاتها كانت مع صديقاتها او شقيقها
وأبيها, حتى عندما كانت تصدف الظروف وتضطر للعودة من
كليتها مع صديقة لها وشقيق الأخيرة لم تكن بمفردها, كانت
برفقة صديقتها, كتمت تأفف بداخلها وقامت محاولة عدم
الظهور بمظهر المغلوب على أمره....

قبّلت رأس والديها قبل ان تستدير منصرفه يتبعها احمد
بنظرات شقية تلمع في عينيها وقد ابتسم لذويهما ابتسامة مشاغبة
جعلت كلا من الاب والام يبتسمان بالمقابل ملوّحين له بالتحية..

خرجت منة من باب العمارة السكنية التي تقطن فيها مع أهلها،
شاهدت سيف وهو يقف امام سيارته الرياضية مستندا بجذعه
على مقدمتها ناظرا الى اللا مكان أمامه، وكان يرتدي ملابس
غير رسمية لم يسبق لها وان رآته يرتدي مثلها من قبل، فهو
دائما ما يرتدي حُلل كاملة واحيانا يستغني عن ربطة العنق، اما
اليوم فهو يرتدي زيا عاديا، جالت بنظراتها فيما يرتديه ابتداء
من سرواله الجينز الاسود اللون مرورا ببلوزته القطنية
البيضاء اللون والتي تحمل ماركة ثياب معروفة على جانب
منها، وكان رافعا لنظارتها الشمسية اعلى رأسه، بينما لحيته
الخفيفة قد أكسبته منظرا رجوليا ساحقا، اندهشت منة من ألوان
ثيابه فهي ذات الالوان التي تترجئها ودعت الله ألا ينتبه الى هذه
المصادفة، وسرعان ما نفضت هذه الافكار جانبا وحمدت الله
لارتدائها نظارتها الشمسية، لاختفاء نظراتها المشدوهة عنه،
شدّت منة قامتها وخرجت من ظلال بوابة العمارة متجهة حيث
كان سيف في انتظارها..

اعتدل سيف واقفا ما ان ابصرها خارجة راسما ابتسامة مرحبة
على فمه الحازم وقال:

- صباح الخير يا منة...

اجابت منة بهدوء:

- صباح الخير يا باش مهندس...

اخفى سيف امتعاضه من طريقته الرسمية في الرد عليه, وتابع ببشاشة:

- اتأخرت عليكي؟

قطبت منة ونفت بهزة من رأسها, فتح سيف الباب المجاور للسائق داعيا اياها للدخول وهو يقول:

- طيب اتفضلي...

تقدمت منة بخطوات بطيئة وما ان همت بالدخول الى سيارته وقد كانت قاب قوسين او أدنى من ان ترفض الركوب بجواره مفضلة الركوب في الخلف ولكنها خجلت فهو ليس سائقها الخاص لتفعل ذلك!!....

دعت الله في سرها أن يخرجها من هذا المأزق وتأففت بداخلها للمرة الألف لاعنة نفسها انها لم ترفض هذا المشوار من الأساس...., وكأن الله استجاب لدعائها فما ان همت بالدخول حتى فاجأها من تقدم سريعا للجلوس في المقعد الامامي مما جعلها تفغر فاهها دهشة, ثم ما لبثت ان افترت أساريرها عن ابتسامة واسعه وكادت ان تميل على هذا الراكب تشبعه قبلات, فلم يكن سوى.....أحمد!!....

قطب سيف ناظرا الى احمد الذي جلس بكل أريحية في المقعد المجاور للسائق, مال عل النافذة المفتوحة بجواره ونظر اليه شزرا هامسا من بين اسنانه بحدة مكبوتة محاولا ألا يصل أسماع منة شيئا مما يقولانه:

- أفهم حضرتك بتعمل ايه هنا؟

أحمد ببراءة مزيفة:

- ايه انت مش هتسافر انت ومنة وقلت لي امبارح وانا وافقت؟! , مسافرين زي ما انت طلبت!!...!

سيف وقد بدأ غضبه بالاشتعال:

- ايوة بس احنا ما اتفقناش على كدا!, انا قلت لك انا ومنة مسافرين واطن انت عارف كويس اوي سبب طلبي دا, ايه اللي حشرك معانا?!..!

كتم أحمد ضحكة كادت تفلت بصعوبة وبدلا من ذلك رسم الجدية على ملامحه وهو يجيب بخفوت مماثل:

- بديهي انى اسافر معاها!, انت قلت لي انه فيه شغل عاوز منة معاك فيه وانا وافقت, ماجتش مناسبة انى اقولك انى هسافر معاكم, وبعدين السبب اللي انت قولتهولي هو اللي خلا الحاج عبد العظيم يوافق على سفرها علشان يديكم فرصة زي ما طلبت قبل ما تتقدم لها رسمي!, ولولا انى معكم دلوقتي كنت

تحلم انها تقرب من عربيتك بس, ودلوقتي اتفضل علشان نلحق
نروح ونرجع في النور....

خبط سيف باب السيارة مغلقا اياه بشدة بعد ان همس له من بين
اسنانه:

- ابقى فكرني أقتلك بعد ما نرجع!, عموما مردودالك... انا
مابسييش حقي ابدأ!!..., ارتسمت على شفاه احمد ابتسامة
مغيظة ولم يُعقب, فتح سيف الباب الخلفي مشيرا لمنة بالجلوس
والتي كانت تقف على بعد خطوات منهما فلم تسمع شيئا من
الجدل الذي دار بينهما, فدخلت وابتسامتها تنير وجهها بعد ان
أطلقت أنفاسها المحبوسة ترقباً!!.....

انقضت الفترة الاولى من الرحلة في هدوء لا يقطعها سوى
بعض الاحاديث الخفيفة بين احمد وسيف والذي كان يجيب
ببرود وقد أوشك في مرة من المرات على دفع أحمد من
العربة, فكلما وجه عبارة ما الى منة وجده هو من يقفز مجيبا
عليه!..., حتى أوشك على رميه من السيارة عدة
مرات!..., وكل مرة ينظر اليه شزرا بينما الآخر يلاعب له
حواجبه الكثيفة بإغظة!..., ومنة لا تشعر بأي شيء غريب,
فهي لم تكن مولية اياهما أي اهتمام...., وكانت جلستها خلف
شقيقها, وحدث في مرة من المرات ان صاح احمد بحدة:

- سيف, حاسب... انت رايح فين؟!!, مش شايف النص نقل اللي
على يمينك؟!!, داخل رشق فيها كدا ليه?!..

كاد سيف ان يتسبب في حادثة مروعة عندما جنح الى اليمين
بشرود غير منتبه الى هذه سيارة النقل الضخمة والتي أطلق
سائقها بوق عال مع سباب صارخ متدافع! , فما كان من سيف
الا ان أوقف السيارة جانبا قليلا ريثما يلتقط أنفاسه , والتفت
بلهفة ليطمئن على منة التي بادلته نظراته القلقة بأخرى متسائلة
عن سبب شروده المفاجيء , سألها بلهفة لم يستطع مداراتها:
- انت كويّسة يا منة؟..

أومات منة برأسها ايجابا مجيبة بهدوء:

- الحمد لله , ربنا ستر..

قاطع أحمد حديثهما قائلا بنزق:

- كويّسة يا سيدي الحمد لله, ممكن انت بقه تركز في السواقة يا
تنزل وأسوق أنا؟! , المشوار صغير لحقت تتعب من السواقة كدا
بسرعة؟..

كاد سيف أن يلکم احمد على فمه علّه يكف عن مرجه السمج
ذاك, ولم يعلم بماذا يجيبه؟, ترى ما سيكون ردة فعله إن أخبره
أن سبب ما كاد أن يحدث هو تركيزه على مراقبة منة في
المرآة الخلفية! ,.... فجلوسها خلف احمد جعل من الصعب عليه
رؤيتها مما دعا به الى تسليط المرآة عليها هي وبالتالي لم يعي
أي شيء مما يسير بجانبه! ,...سواءا من جهة اليمين أو
اليسار!!.

ألقى سيف بنظرة سخط ممزوجة ببرود الى احمد قبل ان يدير
المحرك ثانية لمعاودة رحلتها والتي انقضت وسط صمت تام
هذه المرة!!....

وقفت منة تطالع الأفق البعيد الذي تنتشر فيه الغيمات بشكل فنيّ
لا يقدر مخلوق على رسمه, اغمضت عينيها وتنفست عميقا
تعبّ من الهواء المحيط بها والمشبع بعطر البحر المنعش,
سمعت صوتا أجشا يأتيها من الخلف قائلاً:
- عجبك المنظر؟...-

فتحت منة عينيها وقالت وابتسامة طفيفة تلوح على كرز شفثيها
من دون ان تلتفت الى محدثها:

- منظر جميل بجد, سبحان المبدع العظيم, كل مرة أشوف فيها
البحر كأني بشوفه لأول مرة, البحر دا دنيا غامضة وعميقة,
بحس اني بحبه بس في نفس الوقت بخاف منه!...-

التفتت اليه وهى على وقفتها مكتفة ساعديها والابتسامة لا تزال
تنير وجهها الفتّي, بينما تقدم سيف منها بضعة خطوات يتلاعب
الهواء بشعره وبخصلته الشاردة التي تتحدى يدها في ان تتقدم
اليها معيدة اياها الى الخلف مع باقي زميلاتها من خصلات
شعره الابنوسي!... قال سيف بابتسامة بينما تقطية خفيفة
تعتلي حاجبيه الكثيفين:

- تعبير غريب! , بتحبيه بس بتخافي منه؟ , هو ممكن الحب والخوف يجتمعوا سوا؟؟!! ..

نظرت منة اليه بابتسامة في عينيها مجيبة:

- أكيد!... انت اكيد بتحب باباك بس في نفس الوقت بتخاف منه صح؟, انتظرت الى ان وافقها بايماءة من رأسه قبل ان تتابع شارحة:

- أنت بتحب باباك بس بتخاف على زعله وبتعمل حساب غضبه, انا كمان بحب البحر بس بحس ان غضبه زي الاعصار... متقدرش تقف في وشّه, لكن مقدرش غير اني أحبه, وما اصدق اشوفه علشان أفضض له باللي جوايا, بيسمعني وبحس بموجه كأنه بيردّ ويطبطب عليا!!!..

غشيت عيناها نظرة رقيقة بينما كاد هو أن يجز على أسنانه غيظا وغيرة من هذا ال.....بحر!!!, ترى هل سيستطيع يوما ان يجعلها تتحدث عنه بمثل هذا الشغف الذي يملأها لل.....بحر؟؟!!.....

نظر اليها سيف بنظرة عميقة من عينيهِ الناعستين وهو يتحرق شوقا لأن يرى عينيها تطالعانه هو بمثل هذا التوق والشغف اللذان تطالعان به غريمه....البحر!!!..

لا يدري سيف ماذا هذا الذي تثيره فيه هذه الصغيرة؟,....,لم يكن سيف من المندفعين وراء مشاعرهم بل كان يعمل عقله

في كل أموره صغيرة كانت أو كبيرة!، أما بالنسبة الى اختيار شريكة الحياة, فكان يكفيهِ ان تكون من أصل طيب ومنزل محترم على قدر من الخُلق والثقافة, ولم يكن يلتفت الى الجمال كثيرا ولكن بالطبع أن يحوز شكلها على قبوله, حتى يستطيع المضي قدما في حياته معها, ولكن فجأة دخلت هذه الفاتنة المشاغبة الصغيرة في لحظة غفلة منه, بابتسامتها الشقية وعينيها المرححة, لتعيث في مشاعره وقلبه بل وعقله على حد سواء...فسادا!!، لا يستطيع أن يحدد متى على وجه التحديد بدأت حسابات العقل والمنطق لديه والخاصة بمواصفات النصف الآخر تختلف؟!، ولكنه يعلم تماما أنه في نفس اللحظة التي دخلت فيها منة من باب مكتب أخيها ذاك اليوم الذي رآها فيه أول مرة , هي ذاتها اللحظة التي دخلت الى قلبه مندفعة وبقوة ليشرع لها قلبه أبوابه على مصراعيها!!، ولكن ما يجعله يكاد يقتلع شعر رأسه غيظا هو شعوره الخانق من أنه وحده من يعاني مثل هذه الاحاسيس الشائكة!، ولكن... تبا له ان لم يجعلها تهيم به تماما كما يهيم هو شغفا وحباً بها وكأنه أصبح مجنون...منة!!، فهو يعلم تماما مدى جاذبيته والتي جعلت الفتيات في الجامعة يتذرعون بشتى الوسائل في سبيل محادثته والتعرف اليه...

اقترب سيف بضع خطوات وقد تسمرت عيناه على هذا المنظر الرائع امامه والذي لم يكن للبحر أي يد فيه....، بل هو مشهد هذه الحورية الفاتنة والتي تسللت بضع خصلات من وراء

حجابها لتتطاير بفعل الهواء حول وجهها مما جعل أصابعه
تتحرق لأعادتها الى مكانها الأولي ليخفيها عن الانظار وان
كان شيطانه يهمس له بأن يدعها كي يُملئ عينيه من حسننها,
فهو يكاد يقسم أن هذا الشعر له ملمس الحرير وانه ان فلت من
عقاله فسيتسبب في وقوع صرعى له من فرط الجمال الثائر
الذي يمتلكه!!....., انتبهت منة لخصلاتها المتطايرة من وراء
وشاحها الرقيق فقامت باخفاءها باصبعها الابيض الصغير مما
جعل سيف يعرض على باطن شفته السفلى من رقة حركتها
متخيلا هذا الخصلات وهى تلامس صفحة وجهه او ماذا
سيحدث ان لامسه هذا الاصبع بمثل هذه الرقة مداعبا صدره
حيث خافقه يضح الدم بسرعة عالية يكاد صوتها يصم
الأذان؟!..

سعل سيف ليجلي حنجرته كي يفيق من أتون هذه المشاعر
المتدفقة وما ان فتح فمه ليهم بالكلام مع هذه الانثى الشاردة
والتي تطالع البحر بافتتان أشعل نيران الغيرة في صدره, حتى
انطلق صوت صاخب بجوارهما يهتف قائلا:

- سيف, منة... ياللا العميل جه ومستنيكم..

أغمض سيف عينيه بشده قهرا من هذا الصديق اللدود في حين
أسرعت منة لموافاة شقيقها, بينما كتم سيف شتيمة بذينة كادت
أن تفلت من بين شفثيه الحازمتين...

لحق سيف بمنة واحمد وما ان وصل بجوار هذا الأخير حتى
جذبه من مرفقه بشدة أذهلته وتحدث سيف بغیظ من بین أسنانه:

- خلیك مستظرف دمك كذا لما أغطسك فی المالح انا انهرده
واخلص منك!!...., نظر الیه أحمد بنصف عین وقال ببراءة
زائفة:

- لیه بس یا أبو السیوف!, انا كنت عملت حاجة!?, عموما مش
ههون علیك, وان هونت علیك مش ههون علی منونتي اختي
حبیبتي....

قرب سيف وجهه من احمد وقال بینما لمعت عیناه بنظرة تملك
قویة وصوته أصبح خافتا یحمل نبرة تحذیر واضحة:
- جرّب تدلّعها تاني وتقول منونتي وانت تشوف هيجرالک
ایه!..

ضحك احمد بغرابة قائلا بدهشة واضحة:

- انت اتهبلت یا سيف!?, .. دي أختي...

لیقاطعه سيف بقوة قبل ان یتحدثه قائلا:

- ولو!!...., ما تدلّعهاش قودامي لو سمحت, ..ویا ریت ما
تدلّعهاش خالص لا قودامي ولا من ورايا!!..

بحلق احمد فیہ بحیرة واضحة وتحدث قائلا:

- سيف بقولك ايه ما تخضنيش عليها وتقلقني منك!..., اعقل
كدا بدل ما أفشكلهاالك من قبل ما تتقدم لها رسمي حتى!!..

سيف بمداهنة وابتسامة صفراء تزين وجهه الرجولي الذي
ينضح وسامة وجاذبية:

- لالا لا وعلى ايه ... انت عارف انت حبيبي من أيام الجيزة,
هو انت تكره ان جوز اختك يبقى بي...., وبدلا من ان يقول
لفظة غيرة والتي كانت ستتسبب في لكمة له من يد احمد لا
محالة استعاض عنها بكلمة....خوف, فقال:

- يبقى بيخاف عليها كدا؟, انت بس همتك معايا وخليها توافق,
وليك عليا أي حاجه عاوزها هنفذهاالك, بس يا ريت يا احمد
سيبني اعرف اقولها كلمتين على بعض أومال هفاتها ازاي؟! ,
مش كفاية هي خلقة بتهرب مني كل ما بقرب لها!..

احمد بجدية مصطنعه وهو يهز في رأسه موافقا:

- تصدق فعلا!. هتوافق عليك ازاي ولا اساسا هنفاتها ازاي
وانا بحس انها كل ما بتشوفك زي الطفل اللي شاف حقنة
قودامه ويبصرخ علشان ما يخذهاش حتى لو كان فيها الشفا!!
أجابه سيف من بين اسنانه:

- الله عليك يا رافع معنوياتي انت!, حُقنة!!.., انا حقنة!!..,
عموما مالکش دعوه هقنعه تاخذ الحقنة طالما فيها الشفا ان

شاء الله زي ما بتقول, ودلوقتي ياللا يا فالح اتأخرنا عليها
اوي..

انتظر حتى تقدمه احمد ببضعة خطوات ليتمتم بينه وبين نفسه
قائلا بغيط حانق:

- حقنة!!... وانت الصادق انت اللي شربة بس هعمل ايه
مضطر أشربها علشان خاطر عينيها...., ثم سار لاحقاً بأحمد
ومنة...

تم التعارف بين صاحب الفيلا الاستاذ طارق السعدي رجل
الاعمال المعروف وزوجته عادة, و منة وسيف المسؤولان عن
بناء وديكور فيلاتهما, وأحمد بصفته مهندس انشائي وشريك في
المكتب الهندسي...

بعد أن تناقش الجميع بخصوص الفيلا وأعرب طارق وعادة
عن سعادتهما من سرعة سير العمل, انبهرت عادة بالتصميم
الداخلي لديكور الفيلا والذي وضعته منة, واشادت به قائلة أنه
يفوق ما تخيلته بمراحل, وفرحت منة لهذا المديح, كانت منة قد
شعرت براحة عميقة تجاه عادة بوجهها البريء وان لم يخلو
من مسحة حزن غالبا ما تطفو عندما تعتقد بانشغال الباقيين
عنها, ولم يفت منة نظرة الشحن في عينيها الرائعتين
بخضارهما الزيتوني العجيب, وشعرها العسلي الذي تنعكس

عليه أشعة الشمس فكأنه ذهب يلمع يكاد بريقه يخطف الابصار,
بينما تمتلك جسد انثوي جذاب بكل منحنياته الانثوية البحتة!,
ولكن في ذات الوقت... لا تعلم لما هذا الاحساس بعدم الارتياح
الذي يخالجها بشأن زوجها طارق على الرغم من وسامته
الملحوظة التي تجعله أقرب لنجوم السنيما بدءا من جسده
الرياضي الممشوق وشعره البني الناعم الى عينيهِ بلون السماء
الصفافية... ولكنها ما ان تبصر عيناه يُخيل اليها أنها عينا ثعلب
ماكر ينتظر الفرصة للانقضاض على فريسته مقتنصا اياها!!...

قال طارق بنعومة أثارت الشعور بالغثيان لدى منة بينما
ابتسامة لزجة ترسم على شفثيه المخططتين بشارب خفيف
يحيط بهما ولحية خفيفة تغطي الذقن فقط :

- بصراحه زوقك جميل يا باش مهندسة, التصميم اللي انت
عاملاه تحفة بجد...

رسمت منة ابتسامة صفراء على محياها وقالت بهدوء:

- متشكرة لحضرتك بس انا كل اللي عملته انى نفذت رغبة
مدام عادة, هي كانت حاطة تصور معين للديكور وانا حاولت
أوصل للي هي علوزاه...

قالت عادة بابتسامة :

- لا بجد, طارق عنده حق, انت موهوبة فعلا... وانا سعيدة انك انت اللي هتنفذي ديكور الفيلا بنفسك, لانك اكيد هتقدري تعملي اللي انا عاجزاه بالظبط....

قال احمد بابتسامة بينما ظل سيف واقفا يتابع الحديث الدائر امامه بجمود ولا يعلم لما يرغب بلکم هذا الطارق على فمه ليمحي هذه الابتسامة البلهاء وكأنه يقوم بدعاية لمعجون أسنان!, لم يكن سابقا سريع الانفعال كما هو الآن, ولكنها هي...., انه تأثيرها هي, ولا بد له أن يفتحها بأسرع وقت في امر ارتباطهما بل ويحاول بشتى السبل الحصول على موافقتها قبل ان يقدم على عمل أخرق....كرغبته بلکم طارق والذي يعد أكبر عميل لديهم!!.....

سمع احمد يقول بهدوء:

- احنا مبسوطين ان الشغل عجب حضراتکم, وان شاء الله الفيلا تطلع زي ما انتو عايزين وأحسن...., ثم حانت منه التفاتة الى سيف وتنحج كي ينتبه هذا الآخر اليه بينما تابع هو قائلا:

- معلش احنا هنضطر نستأذن علشان ورانا سفر واي ملاحظة او استفسار طبعا التليفونات معکم والمكتب مفتوح لكم في أي وقت...

هتفت عادة وهى تمسك بالمحمول خاصتها:

- صحيح يا منة, عاوزة رقمك علشان أعرف اتواصل معاكي
ولو فكرت في حاجه علشان الديكور يبقى سهل اقولك عليها
وانت كمان لو عاوزة حاجه تكلميني على طول,..... نظرت
منة الى شقيقها فوافق بهزة من رأسه, هي لا تزال تشعر
بالغربة فهذه هي المرة الاولى التي يُطلب منها رقم هاتفها كما
انها لا تشعر بالراحه لهذا الطارق ولكنها تستطيع ايقاف أيّا كان
في مكانه اذا تجاوز الحدود معها...

قالت منة بابتسامة بسيطة :

- اوكي, اتفضلي, واملتها الرقم وقامت بتخزين رقم الاخرى,
في حين لمعت عينا طارق باعجاب لم يفوتها بغريزة الانثى
بينما سيف كاد ان يهتف ب.....لا..... قاطعه, ولكن ما باليد
حيلة, ولكنه لن يستطيع الصبر اكثر من هذا وسيفاتها قريبا
في أمر ارتباطهما...

قال طارق والذي أعجب بمنة ما ان وقعت نظراته عليها وأكثر
ما جذبته اليها عدم التفاتها اليه بل ولم تلق اليه بالاً مطلقا
وانشغلت بتبادل الحديث مع زوجته:

- مينفعش يا باش مهندس تمشوا كدا, .. لازم نتغدى سوا
الأول..

قاطع صوت سيف الجدي أحمد قبل ان يجيب قائلاً:

- لا معلش يا طارق بيه, اعذرنا, سكتنا طويلة...

أصر طارق وساندته عادة في عرضه فقد أرتاحت لمنه
وارادت توطيد علاقتها بها فهي ليس لديها اصدقاء وكيف
وطارق له الفضل في ذلك بعد زواجها منه وانتقالها من البلد
الاوروبي الذي عاشت فيه عمرها كله وتركها لعائلتها هناك
لتعود الى الوطن بصحبة زوجها والذي سرعان ما ملّ منها ولم
يكد يمر عامين على زواجهما!!....

نظر احمد الى سيف ورفع كتفيه علامة قلة الحيلة واضطروا
الى قبول دعوة الغذاء وذهبوا الى احد المطاعم التابعة لمنتجع
شهير في العين السخنة والمعروف بمأكولاته البحرية اللذيذة...

حول مائدة عامرة بكل ما لذ وطاب من مأكولات البحر الشهية
المختلفة, تجمع الخمسة, تبادلوا بعض الاحاديث الخفيفة اثناء
تناولهم الطعام, انفردت منة بالحديث مع عادة في حين تبادل
الرجال الثلاثة الآراء حول أمور مختلفة ولكن كان من الملاحظ
صمت سيف شبه الدائم, فكان لا يتدخل بالكلام الا اذا وُجّه اليه
الحديث....

انتهوا من تناول الغذاء, وتفرقوا كلا الى وجهته, بعد وعد من
عادة بزيارة منة للاطلاع على التصميم النهائي لديكور الفيلا..

اتجه سيف واحمد لركوب السيارة, هم احمد بفتح الباب الخلفي لشقيقته عندما شعر بيد من حديد تشد مرفقه فتطلع لصاحبها بدهشة ضاحكة سائلا:

- ايه يا بني, فيه ايه تاني؟, انت مش عجبني انهرده خالص!..

اقترب سيف بوجهه منه وهمس من بين أسنانه بغيط مكتوم:

- لو عاوزنا نوصل مصر حته واحده,...تفضل تسوق انت..لأن أنا اعصابي بثبت على الآخر...

قطب احمد حائرا, ولكن حرك كتفيه علامة اللامبالاة قائلا:

- وهو كذلك, انت كنت عرضت قبل كدا وانا رفضت؟!..

وقبل ان يتحرك احمد الى الجهة المقابلة كانت منة قد وصلت فأسرع سيف بفتح الباب الخلفي لها فدخلت متممة بالشكر, وقف سيف امام احمد قائلا :

- اتفضل بقه روح سوق, عاوزين نروح, خلي المشوار دا يخلص على خير بقه..

ابتسم احمد واتجه الى مقعد السائق بينما جلس سيف في المقعد المجاور له, وقام بضبط المراة الجانبية والتي أظهرت منة بوضوح!, ابتسم سيف متمتما بينه وبين نفسه:

- ايوة كدا خلينا نطلع بحاجه من المشوار اللي مالوش صنف اللازمة دا!!!.....

انقضت رحلة العودة سريعاً, ولاحظ احمد عزوف سيف عن تبادل الحديث, فسكت هو الآخر بعد عدة محاولات منه لاشراكه في الكلام, بينما أسندت منة رأسها الى ظهر المقعد وأغمضت عينيها, لتذهب في نوم متقطع, فهي منذ أن استيقظت فجراً لم تتم, ومع حركة السيارة جعلت جفونها تتساقط رغماً عنها ليداعب الكرى عينيها....

وقف احمد أمام منزلهما, التفت الى سيف الشارد بنظره بعيداً ولكن من يدقق يعلم انه شاخصاً ببصره....خلفه! قال احمد بابتسامة:

- حمدلله على السلامة يا بوس, ثم التفت الى الخلف حيث منة والتي افاقت ما ان وقفت العربية قائلاً:

- حمدلله على السلامة يا منون..

فركت منة عينيها فكانت أشبه بالاطفال مما رسم ابتسامة حانية على شفاه سيف ونظر اليها من المرأة نظرة شغف لم ينتبه اليها أحد, وسمعها وهي تقول بصوت ناعس بتلقائية:

- الله يسلمك يا أبوحميد....

عبس سيف وتمتم بحلق:

- أبو حميد ومنون, وانا يا باش مهندس!!...., لا لا لا الموضوع
كدا مش نافع!....

كانت منة قد نزلت من السيارة يتبعها احمد عندما انتبه سيف
من شروده ونزل هو الآخر, ثم نادى احمد عاليا:

- احمد!, التفت احمد اليه وكان على بُعد خطوتين من بوابة
العمارة, تقدم سيف اليه وانتحى به جانبا وهو يقول بصوت
خفيض:

- انا عاوز أقابل والدك!..

كان احمد عاقدا جبينه أول الامر متسائلا عن سبب مناداة سيف
له, وما ان سمع منه رغبته في مقابلة والده حتى انفرطت العقدة
وارتفع حاجبيه الى اعلى وهو يقول:

- تقابل الوالد?, ليه فيه حاجه?.., ثم استدرك قائلا:

- آسف طبعا ما أقصدش, دا بيتك يا سيف, بس اصلي
استغربت...

سيف بنزق:

- وايه وجه الاستغراب?!, انا عاوز افاتح والدك في موضوع
ارتباطي بمنة..

قال احمد بتردد:

- ايوة يا سيف, بس مش كنا اتفقنا اننا هنفاتها في الموضوع الاول قبل ما نتقدم رسمي؟, ثم تابع محاولا اقناعه بينما الاخر كان يهز برأسه نفيا :

- يا بني افهمني وبلاش نشوفية الدماغ دي, اذا كانت لما بتكلمك كأنها عسكري في الوحدة بتكلم القائد بتاعها, عاوزنا مرة واحدة كدا نقولها اتقدم لك وعاوز يخطبك؟, تيجي ازاي؟, هيبقى الرفض هو الجواب المنطقي الوحيد, اختى وانا عارفها, رافضة كلمة جواز , ويوم ما نقولها عريس ونحاول نقنعها يبقى انت!!.....

قال سيف بثقة مطلقة:

- مالکش دعوه, خليني بس اقابل والدك وانا كفيل باقناعها...

حرك احمد كتفيه بقلة حيلة و اشار اليه ليتقدمه قائلا:

- انت حر, اتفضل...

كانت منة قد سبقتهما الى المنزل, وكانت تتبادل القبلات مع امها وابيها وكأنها كانت غائبة لمدة شهر وليس لسويغات قليلة برفقة أخيها, عندما سمعت صوت احمد يدعو سيف للدخول, قطبت منة بحيرة متممة:

- ودا وقته يا احمد؟, والتاني دا مش تعبان يروح يرتاح؟!..

افاقت من شرودها على صوت والدها وهو يرحب بضيف ابنه
في حين انسحبت هي الى غرفتها تاركة والدتها تنادي أم
محمود لتأتي بواجب الضيافة....

كانت منة تريد الاغتسال لازاحة تعب السفر ولكنها لم تستطع
لوجود سيف, فآثرت الانتظار الى ان يرحل, وبدلا من ذلك
خلعت حجابها وأطلقت شعرها ليستريح منسدا حتى خصرها,
كانت ترقد فوق فراشها الوردي, عندما سمعت صوت طرقات
على الباب تبعه دخول والدتها وهي مبتسمة, اعتدلت منة جالسة
ونظرت بابتسامة الى وجه والدتها السعيد وقالت:

- ايه الخطوة السعيدة دي يا توفي!, الاودة نورت...

اتجهت والدتها اليها واقفة أمام الفراش وقالت بحنان امومي:

- عقبال ما أزورك في بيتك يا حبييتي..

قطبت منة وقامت من مكانها متجهة الى والدتها وقالت وهي
تحيط كتفيها بذراعها البض:

- ليه بس يا توفي!?, انا مهما كان بنتك حبييتك بردو, ليه

عاوزه ترميني في النار بإيديكي بس!?,....

شهقت امها عاليا والتفتت اليها ناظرة اليها باستنكار تام وهو
تهتف زاجرة اياها:

- ايه اللي انت بتقوليه دا يا بنتي؟, النار؟! , اعوذ بالله, دي سُنّة الحياة حبييتي...

قلبت منة عينيها الى اعلى ثم حاولت رسم ابتسامة على شفتيها
الورديتين وقالت بمزاح خفيف:

- خلاص ولا تزعل يا جميل, مش نار.....مائية!! , بس بردو
مشكلة! , انا في العوم مش أوي, يعني هغرق في شبر مائية!! ,
شوفتي المصير واحد في الآخر...سواء نار او مائية!!...

قالت امها وهى تضربها بخفة على يدها المحيطة بكتفيها:

- انا عاوزة اعرف انت بتجيبى الردود دي منين؟, ربنا يكون
في عونہ.. دا هو اللي هيكون وقع ولا حد سمى عليه..
ابتعدت منة عن امها قليلا واجابت:

- طيب كويس علشان ياخذ باله وما يقعش! , عموما الكلام دا
سابق لأوانه, يعني شايفه العريس واقف على الباب؟!...
شهقت امها قائلة:

- شوفتي الكلام خدنا ونسيت! , اتفضلي روعي لباباكي في
الصالون...عاوزك..

قالت منة مقطبة بحيرة:

- عاوزني؟, وبابا عاوزني في الصالون ليه؟, وبعدين مش فيه
ضيف معاه هو واحمد؟

زفرت الام بضيق قائلة:

- جرى ايه يا منة, هو محضر؟, روعي شوفي بابا عاوز ايه,
ياللا اتفضلي...

رفعت منة يدها الصغيرة وقالت:

- طيب طيب طيب, قلبك ابيض يا أم احمد, رايحه أهو.....

ووضعت وشاحها الذي سبقت وأن خلعت له لتستر به خصلات
شعرها الحريري, وغادرت مرافقة والدتها والتي حاولت معها
لتبدل ثيابها بأخرى نظيفة, ولكنها عاندت وأصررت على الذهاب
لروية والدها بنفس ثيابها فما الداعي للتبديل وارتداء ثيابا
جميلة؟, فهي قد انصاعت لرغبة والدها لموافاته الى غرفة
استقبال الضيوف بصعوبة, نظرا لوجود سيف هناك, انها لا
تعلم لما لا تستطيع التصرف بطبيعية معه, بل وكأنها تخشى
شيئا فما ان يتواجد بالقرب منها حتى تسارع باختلاق الأعذار
لتنسّل هاربة من امامه, ولكم حمدت ربها لمرافقة شقيقها اليوم
في رحلتها, تلك الرحلة التي تعتقد اعتقادا كبيرا أنها لم ترق
ل...سيف!..

انتبهت من شرودها على صوت والدتها يحثها للاسراع للحاق
بوالدها..

طرقت منة الباب فسمعت صوت والدها الحاني يدعوها
للدخول, دخلت تاركة الباب خلفها مفتوحا....

اتجهت منة الى والدها الذي أشار الى كرسي مذهب بجواره
كباقي طقم الجلوس , جلست منة وهى تنظر الى اخيها الجالس
على الاركة الفخمة بجوار سيف بتساؤل فرفع حاجبيه الى
اعلى بمزاح, بينما لم تفوتها نظرات سيف المتلهفة!!...
وجه الأب حديثه الى ابنته بلهجة حانية:

- بصي يا منة يا حبيبتي الباش مهندس سيف هيتكلم معاكى
شوية, يا ريت تسمعي منه كويس الأول قبل ما تقولي رأيك!..
ثم وقف الوالد يتبعه احمد ووقف كلا من سيف ومنة احتراماً
بينما منة عاقدة جبينها في حيرة وتساؤل, واثناء مرور احمد
من امامها للانصراف قرصها في وجنتها بمزاح قائلاً بمشغبة
بينما عيناه تلمعان من فرحته لرؤية صغيرته وقد أضحت
عروس يخطب ودها الآخرون:

- والله وكبرت يا منونتي... ما ان هم بالابتعاد تاركا منة
غارقة في حيرتها حتى وصل الى اسماعه صوت سيف يقول
بخفوت كي لا يسمعه الباقيين بلهجة عادية في ظاهرها ولكنها
تحمل رنة تحذير مبطن:

- مد ايدك عليها تانى وانت تشوف شغلك!! , ومنونتي دي
هعرفك ازاي انها تبقى منونة واحد بس!...!

احمد بمرح واضعا يده بجانب فمه:

- خلي بالك انت لسه ع البر, وانا بكلمة مني ممكن اخليك ما تطولش اللي انت هتجنن عليه دا!, روق كدا وما تزعلنيش..

سيف بمزاح زائف:

- لالا كله الا زعلك, احنا طالبين الرضا...

قال احمد بجدية مصطنعه وهو يقف معتدا بنفسه:

- ايوة كدا, ناس تخاف ماتختشيش بصحيح!,

قاطع جدالهما المرح صوت الوالد مناديا لأحمد الذي سرعان ما لحق به تاركين منة وسيف بمفردهما, والتي شعرت وكأنها كالطفلة التي تركها والدها في اول يوم لها بالمدرسة منصرفا, فكانت على وشك النداء عليه, علما بأن الباب مشرعا على مصراعيه وان عائلها تقبع على بعد خطوات منهما...

أشار سيف لمنة بالجلوس فجلست حيث الكرسي خلفها, جلس سيف وانتظرت منة سماع ما يريد قوله, بينما كان سيف يراقبها وابتسامة حنان صاف ترتسم على شفثيه فتقلل من حدة فمه الحازم, يطالعها بنظرة تروق وشغف تلمع في مقلتيه لتشعل فحم عينيهِ..

هزت منة بقدمها بحركة لا ارادية, وهي تقول في نفسها:

- ايه يا عمّنا, هو الموضوع عويس أوي كدا؟! , وبعدين
موضوع ايه اللي عاوز يكلمني فيه؟, لا وبابا وأحمد موافقين!..

تكلم سيف بصوته الرخيم قائلاً:

- عجبتك الرحلة انهرده؟..

نظرت منة اليه واجابت بهدوء:

- آه, كانت ظريفة, واحلى حاجه ان الشغل عجبهم, ثم سكتت
قليلا لتتابع بعدها وقد انفرجت اساريرها وقد توصلت اخيرا في
رأيها لسبب انفراده بالحديث معها:

- هو دا الموضوع اللي عاوز تكلمني فيه؟

قطب سيف وقال مستفهما:

- موضوع ايه؟

اجابت منة بحماس:

- المشروع اللي احنا الاتنين شغالين عليه سواا!, لم تنتظر سماع
اجابته واندفعت موضحة:

- عموما ما تقلقش, عن نفسي الجزء الخاص بيا من المشروع
هخلصه بسرعة, وأي شيء هحتاج أعرفه هسأل عادة, هي
طلبت مني دا...

قطب سيف قائلاً:

- عادة؟, ثم ابتسم متابعاً بسخرية طفيفة:

- انا شايف انكم بئيتوا اصحاب بسرعه يعني؟

اجابت منة بتلقائية:

- هي بصراحه شخصية حبوبة وظريفة وانا ارتحت لها, وهى
اللي طلبت منى نشيل الرسميات, بيني وبينك انا مش بحب
التكلف في الكلام!...

عاجلها سيف هاتفا:

- ايش معنى انا اللي مصرّة على التكلف معاه في الكلام؟!...

اندهشت منة وقالت بارتباك خفيف:

- أفندم؟...

مال سيف بجذعه باتجاهها وقال بجدية ناظراً الى عمق عينيها
اللوزتين:

- بقول ليه انا اللي مصرّة تحطي حاجز بيننا؟, ليه مش عاوزة
تشيلي الرسميات؟, مع العلم انك بتتصرفي عكس كدا مع الكل؟

ضحكت منة ضحكة خفيفة مضطربة وقالت وهى تحاول
الهروب من حصار عينيهِ اللتان تثيران فيها مشاعر تختبرها
لأول مرة:

- وانا أظن سبق وقلت لك سبب انى بكلمك بالاسلوب الرسمي
دا!! , انا مش شايفه فيها حاجه بصراحه تخليك بالحدة دي! , انت
مديري, واكبر منى بـ 8 سنين , وبعدين عادي يعنى, فين
المشكلة؟

أجاب سيف بحزم وهو يطالعها بنظرات قوية جعلت عيناها
أسيرة شعاع عينيه الذي جعل خافقها يضرب بين جنبات
صدرها بقوة حتى غدا كالعصفور الحبيس:

- المشكلة انه مينفعش واحده تقول يا باش مهندس وتتكلم
رسمي اوي كدا مع الشخص اللي هيكون...جوزها!!..

فغرت منة فاها دهشة وفتحت عينيها على وسعهما وهى تكرر
كالبلهاء:

- ايه؟.....جوزها!!...., ثم عبست متسائلة:

- جوز مين؟!..,

ابتسم سيف ابتسامة صغيرة مجيبا:

- هو فيه حد غيرنا هنا؟..

نظرت اليه منة مصعوقة من اجابته, بينما كان يلوم نفسه فهو
لم يكن من ضمن خططه مفاتحتها بأمر ارتباطهما بهذا الشكل
ولكنها هي من تُثير أسوأ ما فيه, زفر بعمق واغلق عينيه لثوان
ثم فتحهما ناظرا اليها بقوة وقد قرر طرق الحديد وهو ساخن

فدائماً كان مبدأه الوصول الى هدفه بأقصر الطرق وفي رأيه
الاسلوب المباشر هو الحل الأمثل فهو لا يستسيغ المحاوره
والمداورة في الكلام, وجه اليها الكلام متحدثا بجديه بينما
تطالعه هي بذهول بالغ وكأنها أمام كائن خرافي:

- بصي يا منة, المعروف ان أقصر طريق بين نقطتين هو
الخط المستقيم.... صمت قليلا ليتابع ناظرا بعمق الى بحر
عينيها الذي يموج بانفعالات شتى الآن:

- منة انا عاوز أتجوزك.... رأيك ايه؟, نظرت اليه منة وكأنها
لا تفقه ما يقول وسرعان ما ترجم عقلها العبارات التي سمعتها
أذنيها ووجدت نفسها تردد كالبغغاء:

نعم؟...تت.....ايه؟,تتجوزني؟؟. , أوما برأسه ايجابا وقد برقت
عيناها بعزم لا ينضب وقال بنبرة لا تحتل المزاح:

- أيوة, وأحب أعرفك اني مش هقبل كلمة.. لأ!.....,

نظرت اليه بسكون تام وعلامات الذهول وعدم التصديق ترسم
على وجهها بوضوح, بينما يعمل عقلها بكامل طاقته مفتشا عن
اجابة لسؤال يراودها:

- ترى هل هذه المزهرية المصنوعة من مادة البورسلين جيدة
الصنع حقا أم أنها وعند أبسط احتكاك ستتكسر الى قطع
صغيرة؟! , فهناك هاجس يلح عليها باختبار اناء الورود هذا

على أم رأسه!...، أو ربما شيء آخر!، كأن تصرخ الآن متهمة
اياہ بمحاولة التعدي عليها!، قطبت متسائلة في صمت:

- ترى أيهما الوسيلة المثلى للرد على هذا المجنون؟!، ولكن...
مهلا... أليس كلامه في حد ذاته بل وتهديده الصريح برفضه
لسماع أي رأي آخر خلاف موافقتها يعدُّ ضرباً من الجنون؟!،
إذن... فلن يلومها أحد أن اختبرت أيّاً من الحليّن؟، فالأمر كله
جنون في جنون!!.....

- يتبع -

الحلقة الرابعة:-

نظر سيف اليها مندهشاً من هدوءها الملحوظ، قطب قليلاً ثم
تحدث بتساؤل محاولاً إخفاء قلقه من الإجابة وقد رسم ابتسامة
صغيرة على شفتيه المظللتين بلحيته الخفيفة:

- ايه يا منة، يا ترى سكوتك دا استغراب، ولا مش مصدقة،
ولا..؟، وغمزها بمكر متابعاً:

- السكوت علامة الرضا؟!.

طالعه منة ببرود:

- بصراحه، كل اللي انت قلته دا، ما ان همت اساريه
بالانفراج فمعنى ذلك انها موافقة أو لم يقل السكوت علامة

الرضا؟!، ولكن قبل ان تفترش ابتسامة واسعه وجهه الرجولي
الجذاب سمعها تقول ببرود ثلجي:

- ما عدا...، وشهرت سبابتها أمامه متابعة بثقة:

- السكوت علامة الرضا!، عموما انا مش هأخر الرد عليك،
نوووو.....!!

عبس سيف وقال باستهجان:

- إيه؟!، إيه نووو دي إن شاء الله؟!.

منة وهى تحرك كتفيها بتلقائية:

- يعني لأ!، انت مش قلت انك مش هتقبل كلمة لأ؟!، تابعت
ببراءة مزيفة:

- وأنا ما يرضنيش انى أقول حاجه انت رافضها، مهما كان
انت مديري ولازم أسمع كلامك، علشان كدا ردي....نووووو!!

سيف باستنكار تام وعبوس:

- وأنا كمان نوووو!!..

قالت منة بحبور:

- ممتاز!، يبقى فين المشكلة؟، طالما أنا ونووو وإنت نوووو،
يبقى خلاص متفقين؟، ما فيش حد هنا ييس....!!..

تحدث سيف وقد كان على أوشك أن يقتلع شعر رأسه غيظا:

- منة, مستفزنيش!, وانا هر فض ليه وانا اللي متقدم لك!!.

نظرت اليه منة ببرود وقالت منفعة بغضب مكتوم:

- مين اللي مستفز فينا يا باش مهندس?, هو مشروع شغل
عاوزنا نعمله سوا!?, انت مش شايف طريقتك!?, انت بتديني
أوردر وعاوزني أنفذه!!... لم تنتظر سماع اجابته وهبت واقفة
من مكانها, ونظرت اليه متابعة:

- للأسف يا باش مهندس طلبك مش عندنا, عن إذك!.

سارت بضعة خطوات باتجاه الباب قبل ان يوقفها صوته أمرا:

- إستني... تسمرت قديمها في الأرض رافضة الحركة, بينما
شعرت به يقترب منها حتى وقف خلفها تماما ثم زفر عميقا قبل
ان يقول في محاولة منه لامتصاص غضبها:

- يمكن يكون خانني التعبير, بس اللي كان قصدي تعرفيه
كويس إني مصمم على الارتباط بيكي, وانه حتى لو رفضت
فأنا مش هزهق, وهحاول بأي طريقة انى أقنعك بإرتباطنا!.

عقدت منة جبينها والتفتت اليه ناظرة الى فحم عينيه وهى تسأل
في حيرة:

- وليه إصرارك أوي كدا على الارتباط بيا?, أعتقد انت ممكن
تلاقي ألف واحد توافق عليك, انت بمواصفات العريس أعتقد
انك مناسب...

ابتسم سيف قائلاً:

- وأنا مش علوز من الألف دول غير واحده بس! , نظرت اليه في دهشة حائرة بينما يكمل عبارته:

- إنت يا منة! ,... لا تعلم منة لما هذه الاختلاجة التي أصابت قلبها؟! , فنطقه لأسمها الآن جعلها تشعر وكأنه يغازلها! , حاولت منة ازاحة عينيها بعيدا عن أسر عينيه وقالت وهى تتهرب بنظراتها:

- وإيش معنى أنا؟! .

أجاب سيف وهو يشير اليها بالجلوس على الأريكة العريضة:

- طيب ممكن نقعد الأول علشان نعرف نتكلم؟! .

جلست منة على طرف الاركة حيث أشار سيف , ولم تنتبه أنه هو الآخر قد جلس على ذات الاركة في الطرف المقابل لها! ..

قال سيف بهدوء وجدية:

- شوفي يا منة , انا طول عمري وانا الجواز دا آخر حاجه بفكر فيها! , بالعكس أنا علشان الكبير والولد الوحيد وسط أربع بنات , وعيلتي من المنيا من الصعيد , فكانوا بيلحوا عليا في الجواز بشكل مش طبيعي , ووالدي كل مرة بسافر لهم فيها لازم يفاتحنى في موضوع الجواز , بيني وبينك أنا كنت شايله من دماغي خالص! .. , عقدت منة جبينها منة وسألته:

- وشايله ليه من دماغك؟, على كلامك انت من الصعيد, والولد الوحيد, يعني أولادك هما اللي هيشيلوا اسم العيلة, وبعدين اللي اعرفه ان الصعايدة بياخدوا من بنات عمهم؟!..

نظر اليها سيف مجيبا بينما نظرات عينيه تدغدغ أوصالها:

- كل الكلام اللي انت بتقوليه دا مضبوط, لكن أنا كنت شايف أن لسه وقت قودامي على ما أفكر أرتبط, لكن كل حساباتي أتغيرت, وبالتحديد من أسبوعين وخمسة ايام بالظبط!..

تساءلت منة بحيرة:

- وايه اللي حصل من اسبوعين وخمسة ايام وخلاك تغير رأيك؟!....

سيف بهمس جعل دقات قلبها تتسارع قفزا بالرغم منها:

- اللي حصل إني شوفتك!!... اضطربت منة وقالت وهى تشيح بوجهها الذي غدا في حمرة الشمندر السكري وقالت بارتباك ظاهر:

- إي...إيه؟, أنا مش فاهمه إنت...., قاطعها سيف بلهفة لم يستطع مداراتها:

- ايوة يا منة, ارجوك اسمعيني, انا من أول لحظة شوفتك فيها وأنا حاسس ان كُلي متلخبط!, إسألني اخوكي كدا... قوليله انا متقدم لك من امتى؟, هيقولك من عشرة ايام بالظبط!..

لاحت على وجه منة الفتى علامات الدهشة وعدم التصديق
فهتف سيف بلهفة لتصدقّه:

- انا مش مضطر اني أزوء كلامي, بصي يا منة, انا معرفش
اللف والدوران, من ساعة ما شوفتك عجبتي, ولاقيت اعجابي
بيك بيزيد كل يوم, وانا بحب الوضوح, ولأنك أخت صاحبي
لازم كنت أبقي صريح معاه, انا مش هبصلك من وراه, انا
عارف اني فاجئتلك لكن أعمل ايه؟, انا كمان عاوز أرسى على
بر, طول ما الموضوع متعلق وانا مش عارف آخذ بالي من
شغلي, زي انه رده مثلاً!....

قطبت منة متسائلة:

- انه رده؟, ليه؟, ايه اللي حصل انه رده؟, اعتقد المقابلة كانت
ناجحة والشغل عجب العميل....

صمت سيف قليلاً ولم يرد الإفصاح عما مر به هذا اليوم والذي
لم يبشر بالتفاؤل منذ البداية!, حين فاجئه أحمد بمرافقته لهما,
الى هذا المتحلق المغرور المسى طارق والذي يود كثيراً لكمه
في أنفه!, فقد لاحظ طريقته في النظر الى منة والتي أثارت
حفيظته ورغبته في الاسراع بأمر ارتباطهما كي يقطع الطريق
على كل من يفكر مجرد التفكير في النظر اليها!, فهي منته هو
وحده... وليس أحد آخر!..

امتنع سيف عن الاجابة وبدلاً من ذلك قال:

- سيبك من الموضوع دا دلوقتي, ممكن أعرف ردّك على طلبى؟..

ارتبكت منة قليلا ولم تعرف بما تجيبه ولكنها لم تعتد هي الأخرى الهروب من المواجهة, ولهذا شحذت همتها واعتدلت في جلستها ناظرة اليه وقالت بكل هدوء وضبط للنفس تمتلكه:

- باش مهندس سيف, طبعا حضرتك عارف انك بمواصفات العريس فإنت ما شاء الله مواصفاتك تغري أي بنت بالموافقة عليك وأي أهل يبقوا فرحانين لأرتباطك ببنتهم....,

لا يعلم سيف لما هذه الكلمات قد أثارت خوفه بدلا من فرحته بمديحها له, وانتظر تنمة كلامها:

- انا بحترم صراحتك جدا, وأنا كمان مش بحب اللف والدوران, انا زي ما انت عارف لسه مخلصه الكلية من فترة قريبة اوي, وحلمي انى أسافر بره أكمل دراسات عليا!, رفعت كتفيها وأكملت وسط نظرات عدم الراحة والاستهجان التى رماها بها في حين لم تنتبه هي اليها وبدلا من ذلك تابعت بحماس في شرح وجهة نظرها:

- عارف انا حلمي دايم انى أكون مهندسة ديكور متميزة, فيه فرق بين الناجح والمتميز, وانا بحب التميز والتفرد, بحاول على أد ما أقدر أنى أوصل للى بحلم بيه..

سيف بهدوء يناقض ما يعتمل في داخله من غضب من أحلامها
التي قد تقف عثرة في سبيل تحقيق حلمه هو, ولكنه لن يستسلم
ومنة ستكون له!, قال سيف:

- يعني أفهم من كلامك انك مش رافضاني كشخص, ورافضة
مبدأ الجواز دلوقتي؟!..

أومات منة بهدوء مجيبة:

- آه, تقدر تقول كدا...!

سيف بمناورة ذكية:

- طيب واياه المانع انك تتجوزي وتحققي أحلامك في نفس
الوقت?, أنا عمري ما هقف قودام طموحك بالعكس, انا
هشجعك وخصوصا اننا تقريبا بنشتغل في نفس المجال..

منة وقد بدأت تشعر بالتململ من هذا الحديث واحساسها
بالحرج يزداد:

- معلش يا باش مهندس, انا طبعا مقدرة طلبك, بس للأسف أنا
مش بفكر في الموضوع دا خالص دلوقتي..

كان هناك سؤال يلح على عقل سيف ولا بد من معرفة جوابه
فبناء على اجابته سيحدد هو خطواته المقبلة, تتحنج سيف قبل
ان يتحدث وهو يضع عيناه في عينيها لتأسر نظراتها:

- تسمحيلي أسألك سؤال?. هزت منة رأسها بالموافقة, فتابع:

- فيه حد تاني في حياتك؟, لفظ السؤال بصعوبة شديدة, وكاد قلبه أن يتوقف عن العمل في انتظار سماع اجابتها والتي لم تتأخر, عبست منة قائلة:

- حد تاني؟, حد تاني ازاي يعني؟, وما لبث أن أشرق عقلها بالفهم فأجابت :

- لا طبعا!, ولو فيه, أول حد هيعرف أحمد أخويا, أنا مش بخبي حاجه عليه أبدا..

لم تعلم منة كم كبرت في نظره لدى تصريحها بأنها لا تفعل شيئا في الخفاء, وإلى أي مدى هي واضحة وصريحة مع ذويها فاستحقت بالمقابل ثقتهم المطلقة بها, وهذا ما يجعله متمسكا بها الى النهاية, نظر اليها سيف وقال بهدوء واثق:

- انا طبعا مقدر صراحتك, بس معلش.. انا مش شايف تعارض بين الجواز وبين تحقيق احلامك!, بالعكس بقه الجواز بيبقى حافز للنجاح!..

قطبت منة بتساؤل رآه في عينيها فتابع محاولا اقناعها برأيه:

- يعني مثلا عندك أنا!, من ساعة ما فكرت في الارتباط بيكي وانا بقيت علوز أنجح أكثر وبقي ارتباطنا هو اللي بيحفزني انى اشتغل أكثر, وانى اكون مش بس ناجح... لا !, وابتسم مكملًا:

- ومتميز كمان...., وعلى فكرة.. النجاح والتميز دا مش
علشانى أنا لوحدى!...!...!...! دا علشاننا احنا الاتنين!, لأنى من
يوم ما فكرت ارتبط بيكي واحنا الاتنين فى نظري بنينا
واحد!!..

لم تعلم منة ماذا تقول؟, فهذا الكم من المشاعر الفياضة والتي
يغدقها عليها سيف تشعرها بالعجز عن النطق!, هي كأية فتاة
فى مثل سنها, تفرح عندما تعلم أن هناك من يحمل لها هذا
النوع من الاحاسيس الجميلة التي تستشعر صدقها فى نبرة
صوته, ونظرة عينيه!... ولكنها لن تخدع نفسها بأنه أحبها, فلا
يمكن أن يحبها فى مثل هذه الفترة القصيرة, تخضب وجهها
بحمرة الخجل, بينما تابع بصوت أجش وقلبه يطرق بين جنبات
صدره هولا مما اعترف لنفسه به تواء!, فهذه الصغيرة التي تقبع
أمامه تفرك يديها خجلا بينما حمرة وجهها تجعله راغبا بقطف
ثمار وجنتيها اللتان تبدوان أشهى من ثمار الفراولة الطازجة,
هذه الفاتنة نجحت فيما فشل فيه غيرها!, هو لن يخدع نفسه
أكثر من هذا, فرغبته الشديدة فى الارتباط بمنة ليس لمجرد أنها
تناسب متطلباته فى شريكة حياته او لأنه معجب بها, بل
لأنه.... يحبها!, يحبها كما لم يتصور أن يحب أحدا بهذا الشكل
من قبل!, بل إنه يعشقها ويحلم باللحظة التي تنتمي فعليا إليه,
والتي تصبح فيها امرأته هو,.... لم يستطع البوح لها بما يعتمر
فى قلبه من مشاعر جياشة لها, خوفا عليها من طوفان

الاحاسيس التى تجيش بداخله مهددة بهدم حصون مقاومته,
سعل قليلا مزدردا ريقه بصعوبة وتابع بصوت أجش:

- ممكن ما تجاوبيش دلوقتي, خدي وقتك وفكري, وبعدين يا
ستي لسه فيه خطوبة, والخطوبة دى مرحلة للتعارف, انت ليه
تحكمي على ارتباطنا بالفشل من قبل ما تدي نفسك فرصة انك
تعرفيني كويس وتديني فرصة أثبت لك اني صادق فعلا في كل
حرف قلتهولك؟!...

ترددت منة في الاجابة ثم تحدثت بصوت مرتبك:

- يعني لو ... انا بقول .. لو, حصل وما اتفقناش, هتقبل ساعتها
برأيي?... احتلت نظرة غامضة عينيه وقال :

- ماتسبقيش الاحداث يا منة, عموما انا عمري ما هجبرك على
حاجه انت مش عاجزها....

ارتاحت أسارير منة فقال سيف بابتسامة:

- ممكن بقه تنادي عمي علشان عاجزه?...

أومات منة بالايجاب وهمت بالوقوف حينما وضع سيف يده
على يدها المستريحة بجوارها هاتفا بلهفة:

- استني, نظرت منة الى أصابعها المستريحة في قبضته, فأزاح
سيف يده والتي كانت كمن لامس سلكا كهربائيا مكشوفاً, فلحظة
ملاسته لبشرتها, سار تيار كهربائي عالي التردد في جسده

بأكمله, بدءا من أصابع قدميه وحتى منابت شعر رأسه مرورا
بعموده الفقري, نظر اليها سيف بنظرات أشاعت الفوضى في
حواسها, كانت وكأنه يلامسها بعينه!, اضطربت.....,
ارتبكت.....و.....سَكَنْتُ!! , لم تستطع الابتعاد قيد أنملة!,
وكانها تسمرت في مجال مغناطيسي بفعل شعاع عينيه الثاقب,
كان أول من قطع خيط التواصل الغير مرئي هو... سيف, حيث
فك أسر عيناها بنظرات خاصة, كادت تشعر بأنها تحمل لها
رجاء حارا!, وقف سيف في حين اعتدلت هي في وقفتها
واعتلت عينيها نظرات تائهة مشتتة, بينما همس لها بعد أن
أجلى حنجرته:

- هستنى ردك, ما تتأخريش عليا, صمت قليلا ثم تابع
بصوت متهدج:

- أرجوك..

كان كلا منهما يقف يطالع الآخر هو برغبة قوية لشدها اليه
وزرعها في صدره ليقفل عليها بأضلعه, فلا تبعد عنه ولو
أنملة, وهي بحرج وخجل, تهرب بعينيها منه كلما تلاقت
نظراتهما.....

دخل احمد بمرحه المعهود وهو يمزح قائلا:

- ايه يا باش مهندس, انت لو بتعمل مقابلة شغل, مش هتاخذ
الوقت دا كله!!..

نظر اليه سيف بحنق قائلاً:

- عارف هادم اللذات, أهو إنت!!..

قال أحمد بجدية مصطنعه:

- بقه كدا!! , أنا هادم لذات! , نظر الى منة مصطنعا الصرامة وقال:

- منون, التفتت اليه منة ناظرة اليه بتساؤل فتابع وهو يلعب حواجه الكثيفة لسيف بإغظة:

- روعي انت حبيبتي, ارتاحي شوية, خلاص البيه أكل ودانك بما فيه الكفاية, وبلغى بابا ان سعادته, عاوز يمشي!!..

تلعثمت منة قليلا ونقلت نظراتها من شقيقها الواقف يطالع سيف بإستفزاز مرح, وسيف الذي يكاد ينفث نارا من أنفه وفمه على حد سواء غيظا وكمدا من أحمد, ألم يحذره قبلأ ألا يناديها بأي من ألفاظ التحبب؟! , مَن حبيبته؟! , انها حبيبته هو وحده, وسيعمل على إفهام الجميع هذا!!...!!..

أجابت منة ولم يفارقها بعد خجلها الواضح:

- حاضر, عن إذنكم...

لم يستطع سيف كبح جماح نفسه وهتف بها أثناء انصرافها:

- مش تسلمي طيب؟!..

التفتت اليه وما ان وقعت نظراتها عليه حتى سارعت بإشاحة
عينيه جانبا, وقالت بخفوت:

- انت عارف انى ما بسلمش!..

قال سيف بمرح خفيف:

- مش لازم سلام بالإيد يعني, كفاية انك تقوليلي مع السلامة..

نظرت اليه منة بطرف عين وكتمت ابتسامتها بصعوبة في حين
كان احمد يراقب المشهد أمامه بفكاهة, قالت منة وهي تخفض
نظراتها أرضا:

- مع السلامة, ثم سارعت بالمغادرة تاركة خلفها قلبا يدوي
عاليا, حتى كاد صاحبه يقسم أن من معه يستطيع سماع صوت
نبضاته!!..

قال أحمد ساخرا مقلدا سيف:

- كفاية انك تقوليلي مع السلامة!! , ثم عدل نبرة صوته متابعا
بامتعاض زائف:

- ايه يا عم النحوح!! , ايه النحنة دي كلها؟!..

اغمض سيف عينيه وزفر عميقا, وعدّ في سره من 1 إلى 10 ,
ثم فتح عينيه مطالعا أحمد وتحدث من بين أسنانه:

- عارف أسوأ حاجة ايه؟, انك هتبقى أخو مراتي!!...., هم احمد بمجادلته عندما قاطعه دخول والده, فاعتدل كلا منهما وكفا عن المزاح احتراماً له, أخبر سيف عبد العظيم أنه في انتظار جواب منة على طلبه وقام بإعطائه ورقة بها كل البيانات الشخصية الخاصة به وبعائلته, واستأذن منه أن يُحضر والده معه في المرة القادمة للتعارف, فرحب عبد العظيم بالزيارة, واخبره انه مهما كان جواب منة فسيظل مرحب به في هذا المنزل, فهو صديق أحمد وبمثابة ابن ثان له!!....

مر يومان منذ زيارة سيف لمنزلها, وكانت تتعمد اجتنابه في العمل, وكأنه شعر برغبتها بالانفراد بنفسها, فكان معظم وقته يقضيه بعيداً عن المكتب في مواقع البناء, صلت صلاة الاستخارة وتحدثت مع والدها ووالدتها كثيراً, هي لا تنكر أن والديها موافقين بل ومرحبين بهذه الزيجة, فمن الواضح أن سيف قد استطاع كسب محبتهم له, والشيء الذي يُدهشها أنها لم ترفض وبقوة منذ البداية!, ما الذي جعلها تنصاع لرغبته في التفكير والروية واعطاء أنفسهما فرصة لمحاولة انجاح هذا الارتباط؟!..كان لحديثها مع شقيقها نصيب الاسد من قرارها بالتروي قبل ان تدلي بموافقتها او رفضها...., فقد علمت منه أنه ابن وحيد على أربعة بنات, وأن عائلته من محافظة المنيا في الصعيد, من العائلات المقتدرة مادياً, ولكن سيف رفض

وبقوة أي مساعدة مادية من والده, وكان يعمل وهو لا يزال طالباً في كلية الهندسة, وان مكتبهم الحالي كان هدية والده له بمناسبة التخرج ولكن جميع المصاريف الخاصة به تكفل بها سيف وحده قبل ان يشاركه هو وعمر, أخبرها أنه بما ان سيف هو الابن البكري والوحيد للشيخ عبدالهادي فكثيراً ما كان يلح عليه والده في الزواج, ولكنه كان يتصل من هذا الموضوع حتى فاجأه ذات يوم برغبته في الارتباط بشقيقته هو....
منة!!.....

كانت منة تجلس شاردة تلاعب قلمها بين أصابعها الغضة عندما فاجئها صوت يقول بصراخ مرح:

- بووووووه!, شهقت منة والتفتت الى صاحب الصوت لتجدها ايناس التي تنظر اليها بإستفزاز مرح تميل فوق مكتبها فقالت لها منة بغیظ :

- انت عارفة ان قلبي كان هيقف دلوقتي من الخضة؟!..

قالت ايناس بمرح:

- سلامة قلبك يا حبيبتي, اعملك ايه بئالي ساعه انا وسحر عمالين ننادي عليك مابتريديش, نبسب لك مش بتتبسبسي, اللي واخذ عقلك يا قمر!....

ابتسمت منة ابتسامة خفيفة وأجابت:

- لا.. تصدقي دمك خفيف وضحككتيني!, انا عارفة أحمد اخويا شايك فيكي ايه!! رمت منة بجملتها الاخيرة وهى تراقص حاجبها الايمن باغظة لايناس والتي تدرج وجهها بألوان الطيف السبعة, وارتبكت وهى تقول بتلعثم بينما اعتدلت واقفة:
- تصدقي إنك سخيفة ودمك بايخ, وانا استاهل انى بتكلم معاكى!..

ضحكت منة وقالت:

- خلاص خلاص هو انا كنت قلت ايه يعني؟! , وبعدين حبيبتي لو مش عاوزة حد يتكلم بطلي تعلقي له على كل بوست ينزله على صفحته الشخصية, دا انا يا بنتي اللي اسمي أخته مش بتكلم معاه بالطريقة دي!, انما انت أه بتتكلمي باحترام وزوء وكل حاجه, انما مش بتفوتى بوست واحد ولا جملة حتى هو كاتبها... الا والاقىكي ناطة معلقة, لا.. وايه... من قلبك!!!..
قالت ايناس باستنكار:

- انت اللي متخلفة, عادي بوست وبعلق له عليه, فيها ايه دي?
قامت منة من مقعدها واستدارت حول المكتب واقفة بجوار ايناس وهى تهمس لها بينما كانت سحر في الطرف البعيد من الغرفة غير منتبهة لما يدور بينهما:

- أنوس حبيبتي, انت عارفة انا بحبك أد ايه, وأنت وسحر بقول انكم اخواتي مش أصحابي, وبخاف عليكي, حبيبتي الناس ليها الظاهر, والفيس دا دنيا تانية خالص, مش كل اللي على صفحة احمد مثلا يعرفوا انك زميلته في الشغل, ولو عرفوا فيه منهم اللي ضميره مش كويس ويظن فيكي ظن مش اللي هو, هتقوليلي بتعلقي عادي وكلامك ما فيهوش شيء عيب, هقولك انا متأكده, ومع انى ما كنتش أحب ادخل وقلت لأحمد انى مش هفاتحك في الموضوع دا, لكن لازم اقولك!... تطلعت اليها ايناس في توجس قلق بانتظار سماع ما أخبرها احمد به, زفرت منة بعمق وقالت وهى تطالع ايناس جيدا:

- احمد مش مبسوط من تعليقاتك لكل بوستاته, وعلشان أكون أوضح, احمد مستغرب اكتر من الوقت اللي بتقديه ع الفيس, الموضوع من الآخر مش عجبه ومش مريحه!!...

ارتبكت ايناس وقالت:

- وهو ماله ؟!, انت عارفة انى عايشة مع تيتة لوحدنا , بابا وماما ما بشوفهوش غير شهر في السنة ولو كمل كمان , في اجازتهم السنوية اللي في الغالب مش بيكملوها ويجروا ع المستشفى اللي بيشتغلوا فيها في الخليج, والفيس هو تسليتي الوحيدة, وانا مش بعمل حاجة غلط!..

حاولت منة امتصاص غضبها قائلة بابتسامة حانية:

- عارفة حبيبتي والله, بس احمد بيخاف عليكى, وانت عارفة
كويس انه احمد آخر واحد يتهمك بحاجه وحشة او يفهمك غلط,
لكن هو بردو مش عاوز حد يجرحك بكلمة او حتى بفكرة غلط
عنك في دماغه ولو كان مايعرفكيش!!..

ارتبكت ايناس قائلة وهى تشيح بنظراتها بعيدا:

- بس كلامه ليكي...,, قاطعتها منة هاتفه:

- كلامه ليا معناه انه خايف عليكى, ومعناه بردو انه قريب
اووي, هيقوم بزيارة للسيد الوالد اول ما ييجي هو ومامتك
مصر بالسلامة, بس الاول موضوعي انا يخلص!!..

احمرت ايناس خجلا, ولكنها قطبت مستفهمة:

- يزور بابا؟, وموضوعك ايه هو؟؟

تنهدت منة عميقا واجابت:

- بصي يزور بابا دي أظن انت عارفة ليه؟! , مش معقول يعني
علشان يدوق الشاي بتاعكم ويشوفه زي بتاعنا ولا احلى؟,
خبطتها ايناس بمزاح غاضب على يدها, فيما تابعت منة وقد
شرد نظرها بعيدا:

- وموضوعي بقه, واضح كدا انى محتاجه آخذ رايك انت
وسحر لان دماغي ورمت من كتر التفكير..

قاطعت همسهما نشوى وهى تقول بمزاح:

- موضوع ايه يا حلوين؟, تأففت ايناس حنقا بينما ضحكت منة
والتي غدت علاقتها بنشوى أفضل بكثير من ذي قبل, فقد تيقنت
منة ان سلوك نشوى ما هو الا نتاج تربية متحررة وغياب
مستمر للرقيب المتمثل في الأب والأم بعملهما في الخليج,
وعيش نشوى مع جدتها المسنة لأبيها, الأمر الذي أدى الى
انفتاحها الزائد, وأخذت منة على عاتقها أمر الاهتمام بها,
والوقوف بجانبها لخوفها الشديد من نتيجة تحررها المنفلت
ذاك!!..

قالت منة بابتسامة:

- ابدأ, بنتكلم على مواصفات عريس الاحلام!..., انضمت سحر
لهن, وجلسن الاربعه على جلسة خاصة موضوعه بأقصى
الغرفة لمتابعة هذا الحديث الشيق!!....

قالت منة:

- يا للا بقه كل واحده مننا تقول مواصفات فتى احلامها ايه?..

نظرت الى ايناس قائلة:

- ابتدي انت يا أيناس, هنمشي أبجدي, قالت ايناس بابتسامة
يشوبها بعض الخجل:

- يعني زي أي بنت, عاوزاه انسان كويس, كريم, متدين,
بيحبني ويخاف عليا... نظرت منة الى سحر فشردت تلك
الاخيرة بعينيها الى البعيد وقالت:

- زي مواصفات ايناس, وعاوزاه مرح وطيب ويا ريت لو
يكون مهندس زيي, علشان يفهم ظروف شغلي, و... قاطعتها
منة ضاحكة:

- وأول حرف من اسمه عمر!!, نظرت اليها سحر بغيط بينما
تلاعبت منة بحاجبيها وانخرطت نشوى وايناس بالضحك,
نظرت منة الى نشوى قائلة:

- وانت يا شوشو.... عريس الغفلة عاوزة مواصفاته ايه؟
أجابت نشوى بحماس:

- عاوزاه دمه خفيف زي احمد حلمي, ورياضي زي أحمد
السقا, ووجيه كذا زي أحمد مظهر, وفي جمال أحمد عز!!...
نظرت منة اليها بصمت لثوان ثم قالت بثقة مطلقة:

- حمرااا!!!, هتفت بها نشوى مقطبة بينما كتمت كلا من ايناس
وسحر ضحكاتهما بصعوبة:

- هي ايه دي اللي حمرا يا منة?, قالت منة ببراءة مزيفة:

- الشقة!!!, ألوان الشقة أكيد حمرا صح?, عبست نشوى قائلة:

- حد يلون شفته بالأحمر؟, انا أي نعم بحبه بس بردو!, ازاي الشقة كلها تبقى حمرا يعني؟!...,...

قلبت منة عينيها الى الاعلى في حين انخرطت ايناس وسحر في الضحك, نظرت منة الى نشوى المندھشة من ضكاتهم بخبت واضح ومالت الى ايناس بجوارها وهمست لها ببراءة زائفة:

- خدت بالك يا أنوس, نشوى فارس احلامها كله على أحمد!, قطبت ايناس مستفهمة :

- ازاي يعني؟,

اجابت منة بدهشة مصطنعه:

- انت يا بنتي مش سمعتيها بتقول دمه خفيف زي احمد حلمي, وجسمه رياضي زي احمد السقا وأمور زي أحمد عز؟! , أومأت ايناس بالايجاب واعتلى وجهها علامات الريبة فتابعت منة:

- امممم, يبقى ناقص تقول أول حرف من إسمه أحمد عبدالعظيم!!..., قطبت ايناس متسائلة بحيرة وريبة:

- مين أحمد عبد العظيم؟! , فغرت منة فاها دهشة وعبست قائلة بحنق:

- لا ابداء, دا المكوجي اللي على أول الشارع!, وما لبثت أن
احتدت قائلة بسخرية:

- مش عارفة احمد عبدالعظيم يا أذكى اخواتك!!, صمتت ايناس
لوهلة ثم شهقت عاليا ونظرت اليها مصعوقة وهى تشير بعينيها
الى نشوى التى انشغلت بالحديث الى سحر:

- أحمد....اخوكي!?, قالت منة ببراءة مزيفة:

- اوعي تتهوري يا ايناس, انا بهدي النفوس بس!!..

نظرت ايناس الى نشوى وقد لاح على وجهها علامات
الإجرام,ولو كانت النظرات تملك خاصية القتل لكانت الأخيرة
وقعت صريعة في الحال, واصدرت ايناس زمجرة غضب,
فقالت منة بهدوء:

- روستخ روستخ يا زكي يا روستخ, في حين انتبهت كلا من
نشوى وسحر اليهما, فنظرت سحر بتساؤل, بينما طالعتها
نشوى بعدم فهم واضح!!...

كان سيف كالليث المحبوس, يتحرك في غرفته بالمكتب بقلّة
صبر وحنق واضحين, لما هذه المدة كلها لتبلغه بقرارها?, هل
الارتباط به مخيف الى هذه الدرجة ويستحق أن تفكر لمدة ثلاثة

ايام كاملة؟, لقد ترك لها الحرية كاملة في التفكير, وكان يعتمد
الابتعاد عنها حتى لا يشكل وسيلة ضغط عليها, هو يريد
موافقتها التامة من دون أي ضغوطات منه, ولكن... لقد أوشك
صبره على النفاذ, وقف سيف وهمس في نفسه وقد برقت عيناه
بعزم لا ينضب:

- مش معقولة بعد دا تقولي آسفة!, لا يا منة كفاية عليكي وعليها
الايام اللي فاتت, لو الضغط هيخليكي توافقي يبقى مافيش مانع
من شوية ضغط صغيرين!!, ولكنه لم يستطع تنفيذ وعيده حيث
تلقى مكالمة غيرت على إثرها قراراته كلية!!..

هتف سيف مخاطبا محدثه على هاتفه المحمول:

- حضرتك بتقول ايه يا عمي؟, بتتكلم بجد؟, تعالت ضحكات
الرجل كبير السن وقال بوقار:

- معقولة هكذب عليك يا بني؟, اندفع سيف قائلاً بأسف:

- لا لا لا.. ما اقصدش والله, بس من مفاجئتي, مش قادر
أصدق بصراحه!!...., أعاد الرجل على أسماعه عباراته
بصوت وقور متزن:

- بقولك يا بني, منة بلغتني بموافقتها, شوف عاوز تجيب والدك
امتى وتتقدم لها رسمي؟!....,

هتف سيف باندفاع:

- انهرده! انهرده... هكلم بابا وأقوله ييجي ونتفق في كل حاجة!! قال عبد العظيم والد منة وابتسامة وقورة تزين وجهه وهو يطالع زوجته الجالسة بجواره فرحة لموافقة ابنتها فهو عريس لا يعوّض:

- لا يا بني ما ينفعش انهرده, احنا كمان لازم نبقي مستعدين لاستقبال عيلتك الكريمة, وبعدين لازم مامتك واخواتك يشرفونا كمان!....

قال سيف برجاء:

- ما هو اخواتي البنات هيجوا في الفرح, المشكلة انهم متجوزين وظروفهم يمكن ما تسمحش, انما والدتي ممكن تيجي, بس يا عمي احنا مش ضيوف, معندكوش شاي?, كوبايتين شاي من ايد حماتي هتبقى ممتازة, وشاي ليه انا هجيب معايا دسنة شربات!!, ضحك الوالد واجاب:

- لا يا بني ما يصحش, وبعدين انت بتتكلم في الفرح ولسه الخطوبة ما اتعملتش, عموما هنستناكم بكرة ان شاء الله...

أجاب سيف بقلق:

- ما هو يا عمي اسمح لي انا شايف انه يبقى فرح على طول, حضرتك عارف اكتر مني ان منة ما كانتش موافقة على مبدأ الجواز من الاساس...

قال الأب:

- ايه خايف تغير رأيها؟.

أجاب سيف بثقة:

- لا يا عمي, ان شاء الله مش هتغير رأيها, بس انا مش بحب
فترة الخطوبة تطول...

أقر الوالد كلامه:

- عندك حق, عموما التفاصيل دي هنتفاهم فيها لما تشرفونا
بالزيارة انت ووالدك...

تبادل سيف والوالد التحيات قبل ان يغلق سيف الهاتف متنفسا
بعمق وقد أشرق وجهه الوسيم بابتسامة واسعة وهو يقول في
نفسه:

- واخيرا يا منة, هتبقي حرم سيف الدين عبد الهادي,
مراتي...أنا, وبرقت عيناه وهو يتابع بلهجة قوية كمن يدلي
بقسم عظيم متعهدا في نفسه:

- باباكي خايف تغيري رأيك!, وكأني هسمح بكدا, انت خلاص
وافقت, والجواب دا نهائي مايقبلش النقاش!!....

لم يستطع سيف رؤية منة بعد ان أبلغه والدها بموافقتها, فما ان انطلق اليها في المكتب حيث تعمل حتى فوجيء بزميلاتها يخبرنه انها قد انصرفت مبكرا اليوم!, ففكر سيف متفكها:

- بتهربي يا منة!, وهو كذلك... بس مش هتعرفي تهربي مني كثير!..

جاء اليوم التالي وقد انقلب منزل عائلة منة رأسا على عقب!, فقد أعلنت والدتها حالة الطوارئ بالمنزل, وقامت بطرد زوجها وابنها بغية شن حملة نظافة واسعة النطاق تساعد فيها ام محمود, أما منة فأمرتها بملازمة حجرتها وعدم الخروج منها بعد أن فشلت في دفعها للذهاب لابتياح ثوبا جديد وزيارة صالون التجميل, فقد رفضت منة رفضا باتا, معللة أنها زيارة عادية ولا يوجد داع لمثل هذه الامور, صرخت فيها أمها:

- انت عاوزة تجنينيني يا منة?!, يا بنتي, فيه عروسة عريسها جايلها هو وأهله وما تحبش تشتري فستان جديد ولا تروح للكوافيرة تظبط نفسها... انا عمري ما شوفت كدا!!!..

منة بطبيعية شديدة:

- آه فيه.... أنا!, وأديكي شوفتي يا ستي, حقك تشكريني انه فيه حاجة ماشوفتهاش قبل كدا وانا كان ليا الشرف وورّتهالك!!!..

وخوفا من الأم على صحتها وكي لا تعاني من ارتفاع في ضغط الدم مصحوبا بأعراض أزمة قلبية مع العلم أنها لا تعاني

أَيًّا مِنْهُمَا, أَثَرَتِ السَّكُوتَ وَعَدَمَ الْمَجَادَلَةِ وَأَصْدَرَتْ فَرْمَانَهَا
بِحَبْسِ مَنَةِ عَبْدِ الْعَظِيمِ فِي غُرْفَتِهَا حَبْسًا أَنْفَرَادِيًّا إِلَى حِينِ
وَصُولِ الضُّيُوفِ!!..

وَصَلَ سَيْفٌ بِرَفَقَةٍ عَائِلَتَهُ, وَتَمَّ التَّعَارُفُ بَيْنَ الْعَائِلَتَيْنِ, كَانَ وَالِدُ
سَيْفٍ "عَبْدُ الْهَادِي".. رَجُلٌ صَعِيدِيٍّ بِمَعْنَى الْكَلِمَةِ, بِهَيْئَتِهِ وَزِيَّهِ
التَّقْلِيدِيِّ, وَعِبَائَتِهِ الْفَخْمَةُ الَّتِي تُوْشِي بِثَرَاءِهِ, كَمَا كَانَتْ الْأُمُّ
"زَيْنَبُ", بِعِبَائَتِهَا السَّمْرَاءِ التَّقْلِيدِيَّةِ وَلَكِنِهَا مِنَ الْقَمَاشِ الْفَاخِرِ
وَصَفًّا مِنَ الْأَسَاوِرِ الذَّهَبِيَّةِ الْعَرِيضَةِ, وَالَّتِي كَانَتْ تَصْدُرُ رَنِينًا
كَلَمًا حَرَكْتَ صَاحِبَتِهَا يَدَيْهَا.....

جَلَسَ الْجَمِيعُ يَتَبَادَلُونَ الْأَحَادِيثَ الْخَفِيفَةَ فِي انْتِظَارِ وَصُولِ
الْعُرُوسِ وَالَّتِي كَانَتْ تَقِفُ خَارِجَ غُرْفَةِ اسْتِقْبَالِ الضُّيُوفِ
تَتَمَسَّكُ بِعِبَاءَةِ أُمِّ مُحَمَّدٍ تَكَادُ تَبْكِي مُقْبِلَةً يَدَيْهَا كَيْ تَدْخُلَ مَعَهَا
أَوْ أَنْ تَدْخُلَ هِيَ... بَدَلًا مِنْهَا!!..
أُمُّ مُحَمَّدٍ بِدَهْشَةٍ بِالْغَةِ:

- يَا خِرَاشِي يَا سَتَ مَنَةٍ!, ادْخُلِي بِدَالِكَ إِيَّايَ يَعْنِي؟..

كَادَتْ مَنَةُ أَنْ تَبْكِي بَلْ وَتَرْقُرُقَتِ الدَّمُوعُ بِالْفِعْلِ فِي عَيْنَيْهَا
الْمُكْحَلَتَيْنِ بِاللَّوْنِ الْأَسْوَدِ وَالَّذِي أَسْبَغَ عَلَيْهَا جَمَالًا رَائِعًا فَغَدَتْ
كَعْيُونِ الْغَزَالِ الْبَرِيِّ!, قَالَتْ مَنَةُ بِرَجَاءٍ وَاسْتِعْطَافٍ:

- علشان خاطري يا ام محمود, مش هقدر أدخل لوحدي, وماما مش هعرف أناديها, حاسة انى زي ما اكون معروضة للبيع, هيقعدوا يبصوا فيها ويفحصوا!!!..

كتمت ام محمود ضحكة كادت ان تفلت منها وهي تقول:

- الله يحظك يا ست منة, لا هو انت فاكرة حماتك دي زي الست ماري منيب كدا هتقعد تشدك من شعرك وتديكي جوزة تكسريها باسنانك وكدا؟, يا بنتي دول باين عليهم ناس أكابر, وناس مأصلين بصحيح, وبعدين سوى كنت بشعر أو قرعه, انت عاجبه ابنهم وعاوزك, يبقى خلاص!..

تبدلت نظرة منة من التوسل الى الحنق وقالت بزمجرة حانقة:

- خلاص خلاص, ولا الحوجة لحد, هي يعني كانت موتة ولا أكثر, ثم جذبت نفسا عميقا وقالت في سرها:

- استعنا على الشقا بالله...,, ودخلت بقدمها اليمنى كما أوصتها أمها سابقا وأم محمود الآن...

كان سيف أول من شاهدها فصمت عن الحديث بغتة لينتبه الموجودون لسبب صمته المفاجيء ذاك والمتمثل في ملاك بدون جناحين يدخل إليهم, كادت منة أن تتوارى خجلا من شدة بحلفتهم بها, كانت طلتها ملائكية بفستانها الابيض الحريري,

منسدلا على قامتها حتى كاحلها, ويتداخل معه قماشا من
الشفيفون الأسود من الجزء السفلي, وحذاء أسود عال الكعب,
ووضعت وشاحا فوق رأسها أبيض اللون من الحرير الطبيعي,
يتداخل معه وشاح آخر من الساتان الأسود... وكان الحجاب
موضوع بطريقة سائرة وجذابة, واكتفت من الزينة بكحل أسود
للعين, وملمع شفاه زهري, وخاتم صغير من الذهب الأبيض..
قامت والدتها ما ان شاهدها وقالت بحبور وهي تشير الى والدتها
سيف الذي كان قاب قوسين أو أدنى من دعوتها للجلوس
بجواره, بل وفي احضانه إن جاز الأمر!!... قالت الأم
مبتسمة:

- تعالي هنا جنب الحاجة أم سيف, تقدمت منة ترفل في ثوبها
الحرير مطأطأة برأسها في خجل, حتى وصلت الى والدتها
سيف التي قامت من فورها محتضنة إياها بحب وقالت بلكنتها
الصعيدية:

- ما شاء الله تبارك الرحمن, جَمَرَ, تعالي جاري اهني يا
بنيتي..

جلست منة في المنتصف بينها وبين والدتها, فيما نظر اليها
الشيخ عبد الهادي وقد راقه احتشامها, فكان يخشى أنت تكون
كفتيات هذه الايام حيث السفور والتبرج المبالغ به, ولكنه يعلم
أن سيف ولده لم يكن ليرضى بهذه الاشياء فهو وإن كان يتحدث
بلسان أهل المدينة وظاهره يواكب الموضة والعصر ولكنه من

الداخل صعيدي حتى الصميم, وجّه الشيخ عبدالهادي حديثه
اليها بصوته الوقور المتزن:

- ربنا يحميك يا بنيتي ويحفظك من كل شر, ثم التفت الى
والدها الجالس بجواره متابعا:

- ما شاء الله يا حاج عبد العظيم, بنتك جمال وأخلاق عاليه,
اجابه عبد العظيم فخورا بإبنته التي حصلت على اعجاب أهل
خطيبها من اللحظة الاولى:

- ربنا يخليك يا شيخ, هي بنتك بردو....

قال الأب بحماس:

- أومال, معزتها كيف معزة بناتي تمام,...., تنحنح سيف قليلا
وقال موجه حديثه الى والده وناظرا الى والد منة.. بينما احمد
يتابع أخته بنظرات محبة فخورة :

- بقول يا حاج ندخل في المهم....

ضحك الجالسون وقال الشيخ بلهجته الصعيدية المحببة:

- مستعجل جوي شكلك إكده؟! , ثم تابع بابتسامة:

- عموما يحج لك تستعجل, عروسة زي الجומר زيبها تُبجى
خايف لا تروح منييك, وأناي متلهف جبل منك أنها تكون مرات
ولدي وبنتي الخامسة, ثم وجه حديثه الى عبد العظيم قائلا
بابتسامة كبيرة :

- احنا يا حاج عبدالعظيم طالبين الجُرب منييك, ولدي سيف
عاوز يتزوج بسلامتها بنتكم منة...

قال عبدالعظيم بابتسامة هادئة:

- ومنة بنتك يا شيخ, وسيف في معزة أحمد ابني تمام, وانا مش
هلاقي ناس زيكم أتشرف بنسبهم وأطمئن على بنتي الوحيدة
معهم...

قال الشيخ بسرور وهو يومئذ برأسه ايجابا:

- يُيجي على خيرة الله, وكافة طلباتك وطلبات العروسة مُجابه,
انا معنديش أعز من ولدي, ويشهد ربنا انها دخلت جلوبنا
ومعزتها من معزة ولدنا, المهر اللي تجول عليه والشبكة وكافة
شيء, وعلى فكرة.. سيف هو اللي مصمم انه يتكفل بكافة
مصاريف زواجه مع ان ربنا موسعها علينا لكن هو الله يهديه
راكب دماغه ومحكم رايه انه هو اللي هيتكفل بكل حاجه,
راجل من يومه, قال الشيخ عبد الهادي عبارته الاخيرة بفخر
شديد بابنه الوحيد وهو يربت على كتفه, تحدث عبدالعظيم قائلاً
بابتسامة صغيرة:

- وانا يا شيخ عبد الهادي مش طالب غير انه يعاملها بما يرضي
الله, زي ما رسولنا الكريم عليه الصلاة والسلام قال ما معناه
في الحث بتحري الزوج المسلم صحيح الدين في زواج بناتنا,
إن أحبها أكرمها وإن لم يحبها لم يُهنها, صلّى الموجدون على

الرسول عليه أفضل الصلاة والسلام , نظر سيف الى والده
بنظرة يعلم معناها جيدا , فحرك والده رأسه بهزة طفيفة بالمقابل
لم ينتبه اليها الحاضرون وقال:

- بجول ايه يا حاج عبدالعظيم, طالما احنا اتفجنا على كل حاجه
تجريبا, يبجي انا بجول خير البر عاجله!, ايه رايك نكتب
الكتاب?, وأهو تبجي مَرْتُهُ شرعي برضيكي, يعني علشان
يكونوا براحتهم, يتحدثوا سوا, هما الاتنين على حسب ما
عرفت من ولدنا ابishtغلوا في نفس المكان, فييجوا يروحوا
وييجوا سوا, أنا أضمن لك سيف ولدي برجيتي, لكن نفوس
الناس سَوّ!, ممكن حد يجول حاجه ولا يتحدث بكلمة اكده ولا
اكده, جولت ايه يا حاج!...!

نظر عبدالعظيم الى زوجته والتي اعتلى وجهها علامات الحيرة
ونقل نظره الى ابنته التي شحبت فجأة ونظرت اليه وعلامات
الرفض تلوح في مقلتيها والتي انتبه اليها احمد الذي تدخل
رغبة منه في ايجاد حل يرضي الطرفين:

- بصراحه عندك حق يا شيخ عبدالهادي, بس لو تسمح لي
موضوع كتب الكتاب دا... نأجله شوية, على الأقل لغاية ما
ياخدوا على بعض, واذا كان ع الشغل فأنا معهم في نفس
المكتب والناس اللي هناك كلهم في منتهى الاخلاق...

كاد سيف ان يقفز على احمد كمما فمه أو لعله يدس قطعة
الجاتوه الكبيرة التي تفرش الطبق الخزفي الصغير الذي امامه

في فمه مرة واحدة لإسكاته, ونظر اليه نظرة كره عميق, كاد
احمد أن ينفجر معها ضحكا, ولكنه استطاع التحكم في نفسه
احتراما للحضور.....

قال عبدالهادي بصوته الوقور:

- كلامك جميل يا باشي مهندز, لكن معلش اسمح لي, انا
صحيح تعليمي على جدي, ومش متخرج من كلية عالية زبيكم,
لكن أنا أحب أمشي على سنة الرسول عليه الصلاة والسلام,
صلّى الحضور عليه فيما تابع هو بلهجة مقنعة:

- بص يا حاج عبدالعظيم وانت يا أحمد يابني, واسمح لي أشيل
الالجاب لأنك بجيت كيف سيف ولدي تمام, أوأأ احمد بحماس
قائلا:

- دا شرف ليا يا عمي, ابتسم عبدالهادي متابعا:

- سيف ولدي وانا أعرفه صوح, وأضمنه برجيتي كيف ما
جولت سابج, لكن يا ابني اختك تفضل محرمة عليه!, يعني لا
ينفع يجعدوا وحديهم ولا يتحدثوا واصل حتى!, طيب انت
بتجول ياخدوا على بعض, ياخدوا على بعض كيف والكلمة
اللي بيناتهم من غير حاجه شرعي تُبجى غلط!?, بص يا بني أنا
زوجت اربع بنات والاربعة بنفس الطريقة دي, وواحد منهم
بعد ما كتبنا الكتاب ظهر لنا انه مافيش نصيب بيناتهم كل واحد

منهم راح لحاله, ودلوك سميحة بنتي متزوجة وعندها بدال العيل... اتنين!!!, مشيرا بإصبعيه السبابة والوسطى....

قال عبدالعظيم:

- ماشاء الله, ربنا يخلي, ثم تابع بعد ان القى إلى زوجته وابنته بنظرة حازمة:

- واحنا كمان عاجزين ربنا يبارك في ارتباطهم, بصراحه كلامك حَكَم يا شيخ عبدالهادي..., سكت قليلا ناظرا الى الوجوه المحيطة به قبل ان تستقرّ على ابنته الواجمة تنظر اليه برجاء, وقال:

- أنا موافق على كتب الكتاب يا شيخ عبدالهادي, شوف المعاد اللي يناسبكم واحنا جاهزين!!!..., ابتسم عبدالهادي وقال:

- لع..., المعاد ده يحددوه العرسان سوا, بس يا ريت ييجى بسرعه, ولا انت عارف يا سيف هيبجى فيه حظر تجول لغاية ما نعجد لكم, قال سيف بلهفة أضحكت الموجودين الا واحده شعرت وكأنها في دوامة تشدها الى أسفل:

- وانا بقول خير البر عاجله, أروح أجيب المأذون ونكتب دلوقتي!!!.....

لنتعالى أصوات الضحكات بين الجالسين, تكلم عبدالهادي قائلاً:

- لع... مش جوي إكده, أَوَلْكَشِي وَجَبَلْ أَي حَاجِه نَجْرَا الْفَاتِحَة
انه ربنا يتمم بخير....

رفع الحاضرين أكفهم لقراءة الفاتحه بينما غرقت منة في
شرودها حتى همست لها امها في أذنها:

- منة حبيبتي اقري الفاتحه,.... فرفعت كفيها لتقرأ الفاتحة....

بعد الانتهاء قال الشيخ عبدالهادي بصوت رخيم:

- آميين, فأمن الجميع خلفه, ونظر سيف الى منة بنظرات
جعلت خافقها يختلج بين جنبات صدرها بعنف, وهمس لها
بصوت غير مسموع وابتسامة عريضة ترسم على وجهه
الرجولي الجذاب:

- مبرووك, فابتسمت ابتسامة خفيفة مرتبكة, مضطربة,
وأخفضت عينيها الى أسفل حياء و...خجلا!!..., وتبادل الجميع
التهاني, واتجه عبدالعظيم الى ابنته محتضنا اياها بعد ان قبلتها
والدتها وحماتها مهنئتين, وتقدم احمد لتهنئة شقيقته والتي ألقت
بنفسها بين ذراعيه متمسكة به بقوة وقال بحنان بالغ:

- الف مبروك يا منون, ما تتصوريش فرحتي انهرده ازاي,
ربنا يتمم لك بخير حبيبتي, وحانت منه نظرة امامه حيث كان
سيف واقفا يراقب احتضانه لمنة وقد اعتلت عيناها نظرات
محذرة, فلاعب احمد حواجبه بإغظة, بينما سيف كان يحاول

ألا يتقدم اليهما ويجذبها بعيدا أن أخيها التي تتمسك به بقوة
وكانها طفلة تتمسك بوالدها خوفا من أن يتركها ويرحل!!..

أبعد احمد منة قليلا مقبلا اياها فوق جبينها وقال:

- سيف ابن حلال, وانا متأكد أنه هيحافظ عليكى...

رفعت منة عيناها الى اخيها وقالت بصوت خافت:

- ربنا يخليك ليا يا احمد, عقبالك, انت كدا خلاص مابقالكش
حجة...، أوماً احمد برأسه قائلاً:

- ماتخافيش, قريب بإذن الله, ايه رأيك نتجوز احنا الاتنين في
ليلة واحده؟, لم تنتبه منة لحديثه عن زواجها المرتقب ونسيت
خوفها من عقد القران القريب, وقالت وهى تتعلق برقبته
كالاطفال:

- يا ريت يا أحمد, تبقى بجد جميلة...

ضحك أحمد ومال عليها هامساً:

- طيب ابعدى بقه, أحسن لو طولت معاكى شكل سيف باشا
يمكن ما يخانيش الحق أدخل دنيا!!... قطبت منة بحيرة والتفتت
خلفها لتطالعها عينا سيف وقد احتلتها نظرات نارية أشاعت
الفوضى في قلبها, حيث ألهمت حواسها, فنظراته لم تكن
نظرات عادية!..... بل أنها نظرات تشي ب.....غيرة عاشق
حتى النخاع!!.....

- يتبع -

الحلقة الخامسة:

طالعت منة بنصر يدها اليمنى وابتسامة تختلج على محياها الفاتن, بينما يتخضب وجهها حياء وقد غشيت عيناها نظرة حالمة شاردة, تتذكر ما حدث منذ سويغات قليلة!!....

بعد أن إنتهى الجميع من تبادل التهاني صدح صوت سيف مستأذنا حماء المستقبل في رغبته بتقديم هدية لعروسه, وافق الأب وسط الزغاريد التي انطلقت من أمها وأمه تشاركهما أم محمود والتي دخلت بصينيه كبيرة صُفَّت فوقها كؤوس شربات الورد كالعادة في مثل هذه المناسبات, أفسحت زينب لولدها ليجلس بجوار عروسه بينما وقفت هي بجانب ابنها وهي تقول ببهجة عارمة فرحة بوحيدها وبعروسه الفاتنة:

- أجد إهنه يا عريس, بعد إذنك يا حاج عبدالعظيم, العريس هيلبس عروسته هديته, وافق الاب بهزة من رأسه بينما تحدثت الأم الواقفة بجوار ابنتها بسعادة وهي ترى هدية سيف لابنتها والتي تتم عن فخامة ورقى في الذوق:

- تسلم يا سيف يا ابني, زوقك حلو بصحيح...

كانت الهدية عبارة عن خاتم من الذهب الأبيض مطعم بفصوص صغيرة من الألماس, يحمل فوقه فراشة رقيقة من الذهب الأصفر, بعد أن وضعه في بنصر يدها اليمنى والذي

ناسب قياسها تماما وكأنه مصنوع خصيصا من أجلها, همس
سيف لها بصوت منخفض:

- اول ما شوفته قلت هو دا, لونه ابيض زي قلبك, والفراشة
دي زيك بالظبط, رقيقة... وتسحر العقول!!....

لم تستطع منة الرد, وكاد وجهها أن ينفجر لشدة الخجل, قام
أحمد بتسجيل هذه اللحظات السعيدة بآلة التصوير الرقمية
الخاصة به, بعد ذلك دعا والديها سيف وعائلته للانتقال الى
غرفة الطعام لتناول طعام العشاء, والذي كان معاناة بجميع
المقاييس بالنسبة الى منة والتي جلست بجوار سيف بترتيب من
أمها, طالعت منة أمها باستغراب فقالت تلك الاخيرة بضحك:

- اقعدي جنب عريسك يا منون, سماح انهرده بس, انما بعد كدا
ما فيش لغاية كتب الكتاب... ليعلو صوت سيف مرحا:

- طيب أنا بقول نكتب من بكرة ايه رأيكم؟, التفتت اليه منة
شاهقة بدهشة في حين غمز أحمد قائلا بخبث:

- ايه يا عريس, هو سلق بيض؟, مش على طول كدا!!..

نظر سيف اليه من تحت جفونه بنصف عين وقال بمرح مفتعل:

- مش الكبار اتفقوا؟!...يبقى خلاص!!, وعموما ريح نفسك أنا
ومنة هنحدد سوا المعاد, ما تشغلش بالك انت!!....

تبادل الجميع الضحك متتدرين على لهفة سيف لإتمام الزواج
سريعا بعروسه, وان كان الأمر بيده لكان الزفاف وعقد القرآن
في يوم واحد!!.....

جلس الجميع في غرفة الجلوس بعد الانتهاء من تناول الطعام,
وجلس العروسان في جلسة منزوية عن الجميع في أقصى
طرف الغرفة بينما تجمع الباقيين في الطرف المقابل منها!!...
نظر سيف الى منة بنظرات هائلة وقال بصوت به بحة خفيفة
من فرط سعادته:

- مبروك يا مُنايا!..., ما تتصوريش انا فرحان قد ايه!.....

أجابت منة وقد تخضب وجهها باللون الأحمر الشديد وهي
تشيح ببصرها جانبا:

- الله يبارك فيك, قطب سيف بحزن مصطنع وقال:

- يا ... إيه؟! , مش معقولة يا منة..., لغاية دلوقتي ما سمعتش
اسمي منك لوحده كدا!, انت بنيتي خطيبتي فهمي نظمي رسمي,
وقريب أووي هتبقى مراتي, ولسه مش بتكلميني الا رسمي!!..

ذكره لأمر عقد القرآن جعلها تنسى حرجها منه, ونظرت اليه
في جدية قائلة بحلق خفيف:

- صحيح ... كويس انك فكرتني!, احنا مش اتفقنا ان فترة
الخطوبة دي تعارف ولو حسينا اننا مش متفقين يبقى نبعد في

هدوء؟!، أقدر افهم ليه موضوع كتب الكتاب اللي انت فاجئتني بيه دا؟

كاد سيف أن يعرض على أسنانه غيظا وقال بصوت حاول اخراجه هادئا بصعوبة ونجح الى حد ما وإن كان حمل بعضا من غضبه المكتوم:

- يعني أحنا لسه يدوب مقري فاتحتنا من نص ساعه, وانت بتتكلمي اننا نسيب بعض!،... زفر بعمق وتابع قائلا:

- انا مش فاهم ايه اللي مضايك؟!، كتب الكتاب دا علشان تبقى خطوبتنا شرعية, ما نحسش بأي احراج واحنا بنتكلم, علشان نقدر نقرب من بعض من غير خوف وخجل, وبعدين انت بنفسك سمعت بابا وهو بيقول ان سميحة اختي سبق واتكتب كتابها وما حصلش نصيب وفكت وهى دلوقتي متجوزة وعندها طفلين, وبعدين كتب الكتاب دا هو الخطوبة الشرعية غير كدا أنا معرفوش ومش مؤمن بيه!!....

ارتفع قدر سيف في نظر منة, لأحساسها أنه يراعي حدود الله, ويتمسك بسنة نبيه صلى الله عليه وسلم, ولكنها لم تستطع اقضاء شعورها بالقلق والوجل نظرا لسرعة الاحداث, نظرت اليه وقالت في أسف:

- معلش يا سيف, أرجوك ما تزعلش مني, كل الحكاية اني اتخضيت لما لاقيت الكلام على كتب كتابنا, وانا ماكنش عندي

فكرة خالص ان باباك هيفتح الموضوع دا مع بابا, وانت ما قولتليش!!....

نظر سيف اليها بانهار ولم يرسخ في ذهنه أيا مما قالته ما ان سمع همسها باسمه من بين شفتيها الندية, وهتف:

- يااااه!, ما كنتش أعرف ان اسمي حلو أوي كدا!, أسدلت منة جفنيها خجلا وكادت أن تتوارى من شدة الحياء, فيما تابع سيف بوله زائد:

- اول مرة أحب اسمي بالشكل دا!, ثم استدوك مجيبا على الشق الثاني من كلامها:

- وبعدين...ماجاش فرصة اقوالك على موضوع كتب الكتاب, لأنني مالقيتش تعارض بينه وبين الخطوبة, المهم دلوقتي ايه رأيك عاوز كتب الكتاب يكون في اقرب وقت؟!..

رفعت منة رأسها شاهقة بدهشة وهى تردد بذهول:

- ايه؟, في اقرب وقت!!, انت مش شايف انك مستعجل اووي؟....., نظر اليها سيف برجاء واجاب:

- لو عليا عاوزة بكرة , لا ... انهرده!, وعموما دا كتب كتاب بس , ولو انى نفسي يبقى كتب كتاب وفرح مع بعض!!....
فتحت منة عينيها على وسعهما وقالت بانشدها:

- كتب كتاب وفرح مع بعض! , انت داخل على طمع كذا! ,
شوية شوية هلاقيك بتقولي يبقى بكرة!!..

ضحك سيف ضحكة رجولية عميقة دغدغت بصوتها الرنان
قلبها الذي رفرف عاليا بين أضلعها , قال سيف من وسط
ضحكاته:

- حلوة حكاية طمع دي! , ومالو لما أكون طماع في حقي!..
قطبت منة بحيرة وتساءلت بابتسامة خفيفة تعطي محياها
الجميل:

- حقك؟!... , أوأ سيف بالايجاب وأجاب بنظرة ملتهبة وصوت
أجش محملا برغبة مكبوتة لاحتوائها بين أحضانه فلا يفلتها بعد
ذلك أبدا:

- أيوة يا مُنايا,.....إنتِ.....حقِّي!!...., لم تجد منة جوابا مناسباً
للرد عليه, وارتبكت فأثرت السكوت, وشكرت الله في سرها
عندما تقدم منهما شقيقها يمازحهما بأنه قد طال هذا الهمس
الجانبى وأن الأوان لينزل كلا من الملك والملكة من فوق
عرشهما وينخرطا مع باقى الرعيّة!!.....

عادت منة من رحلة ذكرياتها لهذا اليوم وهى تتحسس بابها مها
خاتم سيف, أيقظها من شرودها صوت هاتفها المحمول, فحانت

منها نظرة اليه لترسم ابتسامة واسعه على وجهها الوضاء ما
أن طالعها اسم المتصل, فتحت عليه واجابت بهمس العصافير:

- السلام عليكم , فأجابها سيف بصوت حنون:

- و عليكم السلام ورحمة الله وبركاته, نمت؟, هزت منة رأسها
رفضاً ثم انتبهت لعدم استطاعته رؤيتها فأجابت بخفوت:

- لأ....., لسه.., ثم سكنت و....صمت !!, لم تعلم منة ماذا تقول
وانتظرته ليبدأ الكلام, طال سكوته, فأعتقدت أن النوم قد غلبه,
فنادته همسا:

- إنت نمت؟! , سمعت صوت أنفاسا عميقا حتى كادت تقسم أنها
شعرت بسخونة أنفاسه الالهية بينما يقول في صوت هامس
دغدغ أوصالها:

- لا يا مُنايا, ما نمتش, بس صوت نفسك خلاني مش قادر
أتكلم!

لم تعلم منة بما تجيبه, وارتبكت وقالت في دهشة حائرة:

- صوت نفسي؟, ثم ضحكت ضحكة رقيقة وتابعت:

- هو النفس ليه صوت؟, اجاب سيف بيقين تام:

- أكيد!, يعني مثلا كنت حاسس بصوته دلوقتي زي ما يكون
بيهمس لوداني, كفاية أنى أقعد أسمعاه كدا, وأسرح معاه!!,
ابتسمت منة وقالت بخفر:

- واضح انك مش مهندس شاطر وبس, لا... وشاعر شاطر
كمان!!...

ابتسم سيف وأجابها بهمس محبب:

- انت اللي خلتيني شاعر, من يوم ما شوفتك وحاجات كتير
أوي اتغيرت فيا!! ها... مش هتكلميني شوية , انا اللي عمال
أتكلم؟!.. همست منة :

- ما انا مش عارفة أتكلم أقول ايه؟! , عموما طمّني اخبار عمي
وطنط ايه?..

أجاب سيف وهو يعتدل فوق فراشه سائدا رأسه الى ظهر
الفراش, وقد ارتسمت ابتسامة صغيرة على وجهه ولم يرد ان
يثقل عليها بمشاعره العميقة فهو سيسقيها حبه بالتدريج حتى
تتشبع به خلاياها تماما كما تشبعت جميع مسام جسمه عشقها:

- الحمد لله كويسين, فرحانين جدا طبعاً, وبيقولوا انهم كانوا
خايفين من كتر ما كنت رافض موضوع الجواز , انى لما آجي
أتجوز أختار واحده ما تعجبهموش , لكن الحاج عبد الهادي
قالى بالحرف – وقلّد لكنة والده الصعيدية في الكلام :-

- سيف يا ولدي... إنت وِجِعت واجف!, الحمد لله, ثم ضحك
وتابع :

- والحاجة أم سيف بقه قالت فيكي قصايد شعر, مال وجمال
وحسب ونسب كاملة وما كامل الا وجه الله...

لم تستطع منة كبت ضحكاتها أكثر من هذا وهى تستمع الى
طريقة سيف في تقليد أمه في الكلام , سكون تام حل على سيف
ليقول بعد أن هدأت ضحكاتها بصوت أجش من شدة ما يعتمل
بداخله من فوران في مشاعره الجياشة:

- ايه دا؟, دي ضحكة ولا تغريد كروان؟! , خجلت منة بينما
تابع هو بلهجة تقرير أمر واقع:

- إوعي تضحكي الضحكة دي قودام حد! , مهما كان! , أنا بس
المسموح له يسمعها وتضحكيهاله... بس!... غير كدا
مرفووض!

أجبات منة بتساؤل وتقطبية خفيفة تعتلي جبينها:

- وليه يعني؟, وايش معنى انت بس؟, ايه واسطة؟... , ثم تابعت
بجدية مصطنعه:

- لا لا لا معنديش كوسة هنا, ماحبهاش!!....

قال سيف بمرح لا يخلو من الجدّة:

-لاني جوزك حضرتك, عرفت ايش معنى انا بس؟

هزت منة كتفها بلامبالاة وقالت باستفزاز لم يرق له:

- بس انت ما بئيتش جوزي!, زفر سيف عميقا وأجاب:

- صحيح, ما قولتليش... ايه رأيك نكتب الكتاب يوم الخميس
اللي جاي؟

أبعدت منة الهاتف عن أذنها ونظرت اليه مصعوقة, ثم أعادته
ثانية الى أذنها وقالت بذهول تام:

- خميس مين ونكتب أيه?, قال سيف بصبر:

- الخميس اللي جاي دا, وهنكتب ايه يعني يا منة?, كتاب حياتي
يا عين!?, هنكتب كتابنا طبعاً!!!..

منة بعدم تصديق :

- انت قصدك الخميس اللي جاي اللي هو بعد ثلاث ايام دا?, بما
اننا انهرده الاثنين فاللي هو بعد الثلاث والاربع?...!

كتم سيف ضحكته وأجاب:

- أيوة يا منيا... تمام ... شطورة ... بتعرفي تحسبي صح!, هو
دا بشحمه ولحمه!!!..

عبست منة وأجابت ساخرة:

- يا راجل!, وجاي على نفسك ليه كذا!?, ما تخليه بكرة وأهو
خير البر عاجله وخلاص!, ثم تابعت من دون ان تدع له
المجال للرد :

- هو انت فاكِر نفسك رايح تكتب اسمك في ورقة وتمشي؟! ,
يعني معلّش مش كتب الكتاب دا له استعدادات؟ , وأولها
لاااااا ازم أكون أنا شخصيا مستعدة؟! , إلا إذا حضرتك عاوز
تكتب حاجة تانية غير كتب كتابي أنا وانت؟ ... ساعتها براحتك,
اكتب اللي نفسك فيه , بس خلي بالك مش هقراه! , سايرها سيف
في كلامها وسألها في جدية مصطنعه:

- وليه بقه ان شاء الله مش هتقريه؟ , ايه دون المستوى!!..

اجابت بجدية مطلقة:

- الملخص من اوله كدا مش عجبي , وشكله هيطلع كتاب
مقاولات , تمام زي أفلام المقاولات كدا , وانا ماليش في اللون
دا!!..

أطلق سيف ضحكة رجولية عميقة مست شغاف قلبها وجعلت
ابتسامة حالمة لا ارادية ترسم على وجهها الفاتن وقال :

- تصدقي أنا الاول كنت عاوز اتخانق معاك , لكن بعدين
مقدرتش امسك نفسي من الضحك , واضح فعلا ان حياتنا مع
بعض مش هيكون فيها أي ملل!! , هدأت ضحكاته وتابع بنبرة
جادة لم تخلو من شجن أثار لديها مشاعر غريبة عنها تختبرها
معه لأول مرة:

- علشان خاطري يا منة , خلينا نكتب الكتاب في أقرب فرصة ,
انت مانتصوريش نفسي أغمض وأفتح الاقي الحدود والحواجز

دي اتشالت ما بيننا, الفرحة ممكن نأجله شوية, لكن على الأقل
وأنا بتكلم معاكى زى دلوقتي أكون مش حاسس انى بعمل
حاجه فيها شبهة... ايه رايك؟..

لم تعلم منة بما تجيبه, فوجهة نظره منطقية وهى لا تملك سوى
الاعجاب بها, فهو يخشى الله في علاقته بها, ولا يريد سوى
التقرب منها بدون أن يتكبل ضميره بعبأ ذنب من السهل
تجاوزه!!..

أجابت ببعض التردد:

- طيب نخليه بعد شهر!, أجاب سيف بنزق:

- ايه شهر?, بقه أنا يا مفترية بقولك عاوزة بعد ثلاث أيام
تقوليلي شهر?, تنفس عميقا ثم تابع بجدية:

- بصي يا منة, هما اسبوعين, ودا آخر كلام عندي, ثم تابع
بلهجة ليّنة لإستمالتها:

- المفروض دى حاجه تفرحك, وتخليكي تتأكدي أنى فعلا جاد
جدا في ارتباطي بيكي, وعمرى ما هفكر تاني, وانا متأكد انه
نفس الاحساس دا هيكون عندك, بس انت اديني الفرصة انى
أقنك ان خوفك دا مالوش أي مبرر!!..

أجابت منة وقد بدأ تشبثها بالرفض يتفكك ولاح التردد في
نبراتها:

- يعني أنت مش هتتفع تقنعني الا لو كان مكتوب كتابنا؟..

قال سيف بمكر جعل الدماء تتدفق الى وجنتيها:

- اكيد! , يعني مثلا لو عاوز أقولك كلمة أو انقل لك شعور معين, مش هعرف وانت هتتكسفي, لكن واحنا مكتوب كتابنا أنا مش بعمل حاجة غلط, ولا هخاف حد يسمعني ولا حاجة, وفي نفس الوقت أهلك هيكون قلبهم جامد واحنا بنتكلم ولا حتى واحنا خارجين سوا ...

أجابت منة بتلعثم:

- طيب... , هتف سيف:

- طيب ايه؟..

منة بخجل:

- طيب يا سيف, طيب!! , تأوه سيف عاليا وقال بحماس مندفع:

- من بكرة هكون عندكم علشان اقول لوالدك على المعاد, لو بابا ماكانش مسافر بكرة كان جه معايا , لكن للاسف الحاج والحاجة لازم يسافروا الصبح الحاج وراه مصالح مش هيقدر يعطلها... , انما ما قلتيش عاوزة شبكتك تبقى ايه؟

قضمت منة باسنانها اللؤلؤية شفتها السفلى كعادتها لدى شعورها بالتوتر, وقالت بخفوت:

- الشبكة دي زي بابا ما قال , هديتك ليا , تبقى على زوقك انت..

سيف بحنان وحب شعرته في نبرات صوته:

- لو عليا انا عاوز أجيب لك أغلى وأجمل حاجة وبردو يبقى شوية عليكى, والمهر زي ما باباكي قال , اللي في مقدرتي, وانا مش هبخل عليكِ بحاجه ابدأ, وبكرة بإذن الله هتفق مع باباكي في كل حاجة, أنا رأيي كتب الكتاب يبقى عائلي, يعني نكتب في المسجد , انما الفرح نكون مرتبين له قبلها ليكي عليا أعمل لك أجمل فرح في مصر كلها, ونعزم ان شالله حتى الدنيا بحالها, ايه رأيك؟

أجابت منة بخجل :

- اللي تشوفه..

أنهت مكالمتها مع سيف بعد حديث طال لأكثر من ساعتين, لا تعلم ما هذا الشعور الذي يغزوها كلما حادتها سيف بصوته القوي الرخيم, تشعر بدغدغة في مشاعرهما لا تعرف لها إسما, هي لا تعلم ان كانت قد تسرعت بالاستجابة لرجائه بتعجيل موعد عقد القران ولكن ما هي على يقين منه أنها بذلك تكون قد اتقت الشبهات, فلا تشعر بالذنب اذا ما همس لها سيف ببضع كلمات جعلت أوصالها تغدو كالهلام كما حدث في نهاية مكالمتهما اذ همس لها بنبرة شجن وحنين:

- تصبحي على خير يا مُنى عمري كله, ثم بنبرة أشد خفوت:

- بحبك... لينهي المكالمة تاركا اياها وقد شعرت بحرارة جسدها تكاد تقارب الاربعون, وفوران في مشاعرها الداخلية, وسخونة في وجهها حتى انها كادت تقسم أنه غدا كثمرة الطماطم الناضجة تماما!!!...

اتفق سيف مع والدها على التفاصيل الاعتيادية الخاصة بزواجهما, لم يكن ينفردا بها في العمل الا نادرا, أما مساء فكانت مكالمتها المعتادة والتي غدت بالنسة الى منة كطقوس يومية لا تستطيع النوم بدونها, ولكنه لم تهاتفه هي ولا مرة, فكان هو دائما الباديء بالاتصال, وكان يمازحها قائلاً أنه لن يغضب لعدم مهاتفتها له, لعلمه بخجلها ولكن بعد عقد القرآن سيكون لكل حادث حديث وقتئذٍ!!!...

فرح الجميع لنبا خطبتهما, وباركوا لهما بفرحة من الاعماق, فقد استطاعت منة اكتساب حب واحترام الجميع في تلك الفترة القصيرة التي عملت بها في المكتب.....

أوشك الاسبوعين على الانتهاء واقترب موعد عقد القرآن والذي تم الاتفاق على أن يكون في مسجد (.....) الشهير, وتمت دعوة جميع الاقارب من الجهتين, لحضور عقد القرآن, ثم بعد ذلك تمت اعداد وليمة كبيرة لأفراد العائلة المقربين فقط لدى منزل عبد العظيم والد منة...., ولكن.....حدث شيئين في تلك الايام القليلة التي سبقت عقد القرآن, كانا عبارة

عن...مكالمة هاتفية و....زيارة غير متوقعة كان لهما دور كبير
في مُجَرِّيات الأحداث بعد ذلك!!.....

أما المكالمة الهاتفية فكانت بين عواطف والدة منة تدعو فيها
شقيقتها الوحيدة سهام والمقيمة في الاسكندرية لحضور عقد
قرآن ابنتها, والتي ما ان علمت بالنبأ حتى سكنت مصدومة,
وعندما شعرت بدهشة عواطف شقيقتها لصمتها المبالغ,
انتبهت من صدمتها وهنأتها بخطبة ابنتها وقالت في معرض
حديثها ما أزاح النقاب عن صدمتها أول الأمر:

- مبروك يا عواطف يا حبيبتي, انت عارفة منة غالية عندي أد
ايه , لو أقولك يمكن أغلى من رانيا بنتي ...

أجابت عواطف بحنان:

- عارفة يا سهام طبعاً, وولادك غاليين عندي اوي, ربنا
يفرحك بشهد بنت رانيا, وعقبال نادر... ايه لسه مش ناوي
نفرح بيه؟, ابنك مش صغير يا سهام ساكتة عليه ليه؟ دا احمد
اللي أصغر منه بسنتين عاوز يخطب, واحده زميلته في الشغل
ومنة بتشكر فيها اوي, قلنا بعد كتب كتاب منة ان شاء الله
نروح نخطبها له..

زفرت سهام بياس مطلقة تنهيدة عميقة وقالت:

- أعمل ايه يا عواطف.. مش بإيدي؟! , لو عليا نفسي أجوزه
وأفرح بيه انهرده قبل بكرة, انت عارفة هو ورانيا اللي طلعت

بيهم أنا وشوقي من الدنيا, لكن أقول ايه اللي كان عاوزها
ومستنيها راحت لأبن حلال ثاني, بس على الله يكون يستاهلها
بجد!!....

عقدت عواطف جبينها وقالت بحيرة:

- هو نادر كان حاطط عينه على حد؟

اجابت سهام بأسف:

- كان يا عواطف... كان!!.....

اجابت عواطف وقد بدأ عقلها يعمل سريعا على ربط
المعلومات التي اخبرتها بها أختها بعضها ببعض:

- وانتو ليه ما فاتحتوش اهل البننت؟...

سهام بحزن على ابنها عندما يعلم بخطبة فتاة احلامه لغيره بل
ودعوته هو ليكون شاهدا على عقد القرآن كما أخبرتها شقيقتها:

- كانت بتدرس, واحنا عارفين انه باباها رافض أي كلام في

الموضوع دا لغاية ما تخلص, وسبحان الله لسه مخلصه

مابئالهاش شهرين, ونادر كان مشغول اليومين اللي فاتوا دول

في كم فوج سياحي لشركة السياحة اللي هو ماسكها, وكان

ناوي آخر الاسبوع ننزل مصر ونتقدم رسمي بعد ما افاتح

مامتها طبعاً, بس نعمل ايه بقه؟..., القسمة والنصيب!!...

هتفت عواطف بينما رنا الى سمعها حشجة بكاء من الطرف الآخر :

- انت... انت قصدك.. منة بنتي؟

قالت سهام وسط غصات بكائها:

- كان قايم نايم يحلم بيها يا حبيبي, وكل ما اقله افاتحك ولا ألمح لك يقول يا ماما عمي عبدالعظيم رافض أي كلام خالص ولما حد بيفاتحه بيرفض من غير حتى ما يعرفوا منة, انما نقول ايه, حد كان عارف انها اول ما هتتخرج هتتخطب على طول, زي ما يكون العريس واقف ع الباب!!!,,

قالت عواطف بحزن على حال شقيقتها وابنها الذي بمكانة احمد ابنها:

- معلش يا سهام, مش هقولك لو كنت قولتيلي, لأن كل شيء قسمة ونصيب , وان شاء الله ربنا يوفقه في واحده أحسن من بنتي كمان...

أنتهت المكالمة ولاحظ عبدالعظيم شرود زوجته الواضح فسألها فسردت له ما دار في المكالمة بينها وبين شقيقتها فقال بأسف لحال نادر والذي يكن له معزة خاصة:

- لا حول ولا قوة الا بالله, انما هقول ايه, كل شيء قسمة
ونصيب, ونصيبهم مش مع بعض, نادر راجل بجد ولو كان
عندي بنت تانية كنت روحت وخطبته هو ليها بنفسى....
ثم طلب منها عدم اخبار أي كان بهذا الامر خاصة منة..
أما الزيارة الغير متوقعة فكانت من.... عادة!!..

فاجئت عادة منة بزيارتها في مكتبها وبعد تبادل التحيات
اخبارتها عادة برغبتها في ان ترافقها منة لشراء ما يلزم من
أدوات ولوازم التشطيب الداخلي..

فتشت منة عن سيف لابلأغه بمرافقتها لغادة ولكنها علمت من
نشوى انه بالخارج في احد مواقع البناء, فأخبرت احمد شقيقها
الذي مازحها بشأن رغبتها بأخذ الإذن من سيف قبلا, فأخبرته
بترفع :

- دا شغل, يعني من الآخر أروح ولا أفضل والزبونة تطير
مننا؟!..

هتف أحمد:

- لا لا لا, روعي طبعا, زبونة مين دي اللي تطير؟! , دا احنا
عاملين لها شغل كتير اوي , والمكتب هيكسب من وراها غير
الارباح المادية شهرة جامدة جدا....

بعد ساعتين قضتها كلا من منة وغادة في جولة شرائية
مكوكية, زارا فيها نسبة كبيرة من المعارض المخصصة لهذا
الأمر, دعت غادة منة لاحتساء كوبين من العصير في مقهى
قريب قبل رحلة العودة...

اثناء احتسائهم لعصير البرتقال الطازج تحدثت غادة بتلثم
طفيف قائلة:

- منة ممكن أسالك سؤال؟

أشارت منة برأسها بنعم هاتفة:

- اكيد.... اتفضلي!!....

تابعت غادة وهى تنظر الى كأس العصير القابع بين أصابعها
البيضاء الطويلة وقالت بصوت تشوبه بعض المرارة بينما
لمعت عيناها بدموع محبوسة:

- يمكن تستغربي للكلام اللي هقوله, خصوصا ان فترة تعارفنا
مش كبيرة اوي, لكن صدقيني أنا ارتاحتلك جدا من أول ما
شوفتك, ويمكن لأني ماليش أصحاب هنا خالص , وطارق شبه
مانعني من أن يكون لي أصدقاء الا في أضيق الحدود, ويكون
بمعرفته هو ومن خلاله هو ولازم أقدم معلومات وافية عنهم,
وهو يقرر اذا كانوا مناسبين ليا ولا لأ!, علشان كدا عاوزة آخذ

رأيك في حاجه, هي يمكن خاصة شوية ومخرجة شويتين, بس
انا مقدرش اتكلم مع حد ولا حتى مع ماما, بيني وبينها بلاد
ومش هتقدر تعمل لي حاجه!,,,

عقدت منة جبينها في تساؤل وقالت وهى تشير بيدها الى عادة
تدعوها لمتابعة كلامها:

- اتفضلي يا عادة , انا يمكن دي تاني مرة اشوفك فيها ,
ومعظم كلامنا عن طريق التليفون بس بجد انا كمان ارتحتلك
اوي, وحسيت انك في مقام أختي بالظبط, قولي يا حبيبتي اللي
انت عاوزاه وتأكدي ان اللي هتقوله ولا ... كأي سمعته!!...
لعت عادة شفيتها بطرف لسانها قبل ان ترفع عينيها الى منة
قائلة باهتزاز واضح:

- الواحد اللي بتشك في جوزها, وعندها نسبة يمكن اكر من
90% ان شكها دا في محله, مش من حقها انها تدور وراه
علشان تتأكد اذا كان شكها دا صح ولا لا؟؟؟

- قطبت منة مجيبة وهي تطالعها بجدية:

- تدور وراه إزاي يعني يا عادة؟, قصدك تفتش في موبايله
مثلا ومحفظته وكدا؟!!

أشارت عادة برأسها ايجابا فقالت منة بهدوء ونظرة ثاقبة تعطي
عينيها:

- طيب خايني معاكي واحده واحده, لو شگها طلع صح...وهو
بيعمل فعلا حاجه غلط...وفتشت ولاقيت انها على حق ومش
ظالمه , هيبقى قودامها حل من اتنين - وأشارت بإصبعيها
السبابة والوسطى - يا تواجها يا تسكت كأنها معرفتش
حاجه,.... مالت منة على الطاولة المستديرة التي تفصل بينهما
في حين أولتها عادة كامل انتباهها فيما تابعت منة بهدوء
شارحة وجهة نظرها:

- لو واجهته يبقى حاجه من اتنين - وعدّ على أصابعها - يا
إما هيعتذر ويبوس الايادي ويحلف انه غلطان ومش هيعمل كدا
تاني... يا إما هيقولها أنا كدا بقه وان كان عجبك وأعلى ما في
خيلك اركبيه , والغلط اللي كان بيعمله وهو مداري علشان مش
عاوزها تعرف يعني ممكن نقول بيراعي مشاعرها يا ستي ,
هيبقى على عينك يا تاجر!! , ولو اعتذر وقبلت اعتذاره هتشكّ
في كل خطوة وكل كلمة هيقولها بعد كدا , وحياتهم هتبقى نار,
نار غيرة وشكّ على طول , طيّب لو اتجاهلت وعملت نفسها
مش واخده بالها ؟! , هتسقط من نظر نفسها...وهيجي وقت
هتنفجر فيه , هتكون عاملة زي حلة الضغط عماله تضغط في
نفسها تضغط تضغط لغاية ما تنفجر! , وللأسف نتايج الانفجار
دا ممكن تبقى مُدمّرة , هتقوليلي أومال إيه الحل؟ , هقولك!!..
صمتت منة قليلا ثم تابعت وعادة تتحرق لمعرفة ما ستقوله:

- فيه آية في القرآن بتقول ما معناه ... بسم الله الرحمن الرحيم " لا تسألوا عن أشياء إن تُبدَ لكم تسوءكم", صدق الله العظيم, بمعنى بلاش تفتشي ورا جوزك, وحاولي تتقربي من ربنا أكثر, عارفة لما بكون متضايقة أو أي حاجة مزعلاني بتوضى وأفرش سجادة الصلاة وأصلي, أول ما بقف على سجادة الصلاة بحس انى بقيت في معية الله, ببكي لربنا وبدعي له وبيسمع منى, من غير وسيط, الصلاة دي أسرع وسيلة علشان تتواصلي بيها مع ربك, عاوزة تدعي... صلي, عاوزة تطلبي حاجة... صلي, عاوزة تشكري ربك... صلي, مخنوقة ومش عارفة مالك... صلي واتكلمي معاه, سبحانه وتعالى بيسمعنا من فوق سبع سماوات, وقال لنا " وقل إدعوني أستجب لكم ", أمرنا بالدعاء وأوجب عليه سبحانه الاستجابة, صدقيني يا غادة , نبشك ورا جوزك مش هينفعك, ادعي له بالهداية, لازمي الاستغفار على طول, وربنا ان شاء الله هينور لك بصيرتك.. انفجرت غادة في بكاء حار وهى تكتم فمها بكفيها الاثنين قائلة من بين دموعها الغزيرة:

- بس انا نبشت وعرفت, ويا ريتني ما عرفت يا منة, يا ريتني ما عرفت..., ثم ألقت برأسها فوق الطاولة دافنة رأسها بين ذراعيها, وقد افترش شعرها الناعم الطاولة حولها, بينما دموعها تنساب مغرقة وجهها, شهقت منة بخوف وقالت وهى تحاول رفع رأس صديقتها المنتحبة:

- عادة حبيبتي, عادة اهدي, ثم رفعت كأس الماء الموضوع أمامها ونثرت بضع قطرات منه على وجهها, وأمسكت براسها من الخلف وساعدتها على ارتشاف بعضها منه وسط نظرات الدهشة والحيرة من رواد المقهى, بعد أن تماكنت عادة أنفاسها قليلا , سألتها منة:

- هديتي يا عادة؟, أو مأت عادة برأسها ايجابا وقالت:

- الحمد لله, تابعت منة :

- بصي لو مش عاوزة نتكلم دلوقتي أجليها لبعدين!!!..

أشارت عادة بيدها بالنفي بقوة بينما انشغلت بمسح أنفها وعينيها بمنديل ورقي ثم تحدثت بصوت ممزوج بغصات بكاء حار:

- لا يا منة, أرجوكي أنا عاوزة أفضفض علشان أرتاح, أنا...

من زمان وأنا شاكة في طارق, انا وطارق اتعرفنا واتجوزنا في شهر تقريبا, كان في اوروبا وكان بينه وبين بابا شغل,

شافني في حفلة من الحفلات اللي بحضرها انا وماما مع بابا لزوم شغله, وعجبته, حاول يتقرب لي كثير لكن أنا مع اني

متربية هناك لكن تربيتي كانت شرقية, ما فيش حاجه اسمها

اصاحب ولد, وكنت مادة للسخرية في المدرسة, كانوا

مستغربين منى اوي وبيسمونني المعقدة , تقريبا كنت تحدي

بالنسبة لطارق, ابتدى يغير طريقته معايا بدل الغزل

المباشر, ابتدى يتكلم بلطف ويلمح أنه بعيد عن أهله وبلده وانه

حاسس اننا كأهل له هناك, وفاجئني مرة واحده انه اتقدم
يخطبني!, بصراحه انا مش هكذب طارق دمه خفيف
وشخصيته ساحرة, وأنا كنت ابتديت أميل له فعلا واغير فكرتي
عنه, وحببته!, حبيبته بكل مشاعري اللي كنت شايلها جوايا
للانسان اللي هرتبط بيه في النور, وعشت معاه بعد الجواز 10
شهور في الجنة, لكن شوية بشوية ابتدا يتغير, سهر لوش
الصبح, وسفر, ولما أسأله يقول لي شغل, حاسيت اني زي ما
اكون موظفة عنده بس بدرجة زوجة!, يعني أخرج معاه في
المناسبات الرسمية, استقبل معاه الضيوف اللي لهم علاقات
ببزنيس معاه, مش أكثر !!, وابتدت الخلافات بيننا, وزادت
أكثر بعد الحمل ما إتأخر وكنت مصممة نروح نكشف, انما هو
فاجئني وقال انه مش بيفكر في الاطفال دلوقتي ونسيب
الموضوع بظروفها!!, لغاية ما الشك دخل قلبي وبالتحديد من 6
شهور بالضبط!!, مكالمات مربية, يقعد بالساعات على الموبايل
بتاعه ولا التاب ولما أسأله يقول لي أصحابي وبيعمل شات
معهم, لحد ما في يوم نزل ونسي الموبايل بتاعه, الموبايل بتاعه
له باس وورد, قعدت أجرب وفجأة قلت أجرب عيد جوازنا,
وفعلا طلع صح, ودخلت على الاسكاي!!..., تهدج صوتها
عندما وصلت في سردها للاحداث عند هذه النقطة ثم مسحت
عينها وتنشقت عاليا لتبعد الدموع عن عينيها وتابعت بصوت
متألم مجروح:

- ما تتصوريش حالتي كانت عاملة ازاي لما شوفت القرف اللي على جهازه!! , فيديو هات وكلام في منتهى السفالة!! , عمري ما كنت أتصور ان جوزي يعمل كدا!! , حاجات في منتهى القذارة!! , وطبعاً فتشت في الفوتوز , والواتس!! ... ايه كمية القرف دا!! , يومها من كُتر قرفي طلعت جري على الحمام وقعدت أرجع لدرجة انى حاسيت ان معدتي هتخرج من كتر التراجع!! , وطبعاً بعد ما هديت شوية قفلت الموبايل ورجعته مكانه تاني وقفلت كل الحاجات اللي فتحتها , ثم ضحكت بسخرية وتابعت:

- تصدقي انه يومها كان رايح الهرم واحنا ساكنين في القاهرة الجديدة , وهو في نص المسافة افكر الموبايل.... رجع المسافة دي كلها تاني علشان ياخده!! , أنا لسه فاكراه شاكله أول ما دخل عليا وانا قاعده عملت نفسي بقرا في مجلة كانت قودامي مسكتها اول ما سمعت الباب بيتفتح , بص لي بصة فيها قلق , على سؤال نفسه يسأله , على... خوف غريب عمري ما توقعت اني أشوفه في عينيه! , وسألني بلهجة غريبة عن موبايله , قلت له اني ما شوفتوش , دخل المكتب لاقاه مطرح ما كان سايبه , وقعد يتكلم معايا زي ما يكون بيحس نبضي , وانا معرفش ربنا اداني المقدرة يومها اني ابين له انى عادية جدا , واللي خلاه يقتنع نى فعلاً معرفش حاجه انه اتصور انى مش ممكن أفك شفرة الموبايل , قوليلي يا منة أتصرف ازاي؟ , انت عارفة ان فيلا العين السخنة دي هديته ليا؟! , زي ما يكون قلبه حاسس

انى متغيرة, عارفة لما بيقرّب مني جسمي بيقشعر ولما بي....,
ببقى عاوزة أقوم أرجع في ساعتها, أنا تعبانة, تعبانة ومش
عارفة أعمل ايه؟!...

ربتت منة على يد غادة وقالت بتعاطف بينما داخلها يغلي
كالمرجل تريد رؤية هذا ال... طارق الذي باع نفسه للشيطان,
ولتكشف له غبائه الحاد الذي سيجعله يخسر قلبا محبا مخلصا
كقلب غادة, كنتيجة طبيعة لخيانته لها, فما حدث عبارة عن
خيانته بجميع المقاييس حتى وإن كانت.... خيانة... نت!!,
ولكنها حاولت التخفيف عنها وتجنبت مشاعرها الحارقة تلك
قائلة بتعاطف شديد:

- غادة حبييتي.. لازم تكوني أقوى من كدا, انت بتحبي جوزك,
وواضح كمان انه بيحبك بدليل جوازه منك, انا معاكى انه
ممکن يكون اتجوزك لانك ما استجبتيش لمغازلته ليكي من
الاول, لكن أنا متأكده انه حبك, بدليل انكم قعدتم 10 شهور في
منتهى السعادة زى ما قلتيلي, يمكن زهق من الاستقامة او
اصحابه اللي هما اصحاب الشر هما اللي دفعوه انه يرجع
للطريق دا تاني, وأكيد انه بعيد شوية عن ربنا, فشيطانه قدر
يلعب بعقله, فيه حاجات كتير اوي, وانا مش ببرر له خيانته
لان الخيانة مالهاش تبرير, لكن عاوزاكي تحاولي مرة واتنين
انك تنقذي جوزك من المستنقع دا, حاولي علشان ما ترجعيش
تندمي وتقولي يا ريتني حاولت, بصي يا غادة محدش معصوم

من الخطأ, واحنا بشر... , وربنا علشان كدا من رحمته بينا
عمل لنا التوبة, وطمنا انه هيقبلها مننا بشرط تكون توبة
نصوحة, وانها بتمسح الذنب لو كانت صادقة فعلا, عادة
حبييتي لازم تحاولي تنقذي جوازكم, انت لازم تحاولي تتشليه
من البير اللي هو وقع فيه برجليه, لازم يا عادة, صدقيني
انت اللي هتكسبي في الاخر, انا متأكده انه جوزك جواه بذرة
كويسة , ما فيش حد حلو مطلق أو وحش مطلق, لكن احنا اللي
بنمي بذرة الخير او بذرة الشر بإيدينا, حاولي يا عادة, ادعي
ربنا, واستعيني بالصلاة والصوم وقراءة القرآن, وربك بإذن الله
هيفك كربك, واوعي تعرفيه انك عرفتني حاجه, علشان ما
تقلبش عند ويقولك وان كان عاجب!! , خلاص حبييتي؟!...

ابتسمت عادة من بين دموعها وقالت :

- ما تتصوريش كلامك زي البلسم الشافي ازاي يا منة,
هحاول, ادعيلي يا منة... ادعيلي علشان خاطري....

قالت منة بابتسامة:

- هدعيلك حبييتي في كل وقت انه ربنا ينور بصيرتك ويفك
كربك , بس ممكن نقوم بقه علشان الوقت سرقنا؟!...

نظرت عادة الى ساعتها اليدوية فشهقت متفاجئة:

- احنا قاعدين هنا بئالنا ساعتين؟, انا آسفة يا منة أخرتك
معلش ياللا بينا...

وغادرا المقهى بعد أن قامت غادة بدفع الحساب وسط اعتراض منة ولكن الأخرى أصرت أنها هي من دعتها, ولكن لتكون هناك مفاجأة من نوع آخر في انتظارهما عند وصولهما لسيارة غادة!! , فلدى قيام غادة بإدارة المحرك..... رفض المحرك أن يبدي أي استجابة!! , حاولت مرة واثنتان ولكن... لاهية لمن تنادي! , فاضطرت غادة بعد أن اعتذرت لمنة أن تقوم بالاتصال بزوجه مرغمة خاصة وان مكان عمله لا يبعد كثيرا عن المكان الذي هما فيه, تلقى اتصالها واخبرها انه سيوافيهما حالا, وبالفعل لم تكد تمر عشرة دقائق الا وكان طارق يصف سيارته بجوار سيارة زوجته...

اخرت غادة زوجها انها خرجت في جولة شرائية لابتياح لوازم التشطيب الداخلي للفيللا وانهما توقفتا هنا لاحتساء بعض العصير والتماسا للراحة, ولا تدري ما سبب توقف سيارتها ليفاجئها زوجها انها وكالعادة قد قامت بتشغيل مصابيح انتظار السيارة وتركها لفترة طويلة مما تسبب في توقف البطارية الضعيفة اصلا والتي لا بد من تغييرها, فقد طلب من أحد العمال لديه أخذ السيارة لورشة تصليح السيارات لتغيير البطارية, وكان من المزمع عليه استبدالها اليوم أو غدا, ولم يعد أمام منة سوى قبول عرض طارق بتوصيلها بعد رفضه رفضا قاطعا لاستخدامها سيارة أجرة وساندته في هذا غادة وبقوة!!...

أوقف طارق السيارة أمام محل عمل منة, التى نزلت ومالت على زجاج النافذة المجاورة لغادة لتشكرها على ايصالها, وتركتها مع وعد على الاتصال بها, وقد دعتهما لحضور عقد قرأها مقدمة اليهما بطاقة الدعوة المذهبة أطرافها....

دخلت منة الى المكتب فوجدت نشوى جالسة تحاول الاتصال بهاتفها المحمول, مالت فوق المكتب ممازحة اياها:

- ايه يا نونو..... بتعاكسي مين؟؟, شهقت نشوى متفاجئة, ثم أجابت بلهفة:

- منة! خضتيني,, انت فين؟ أتأخرت ليه كدا؟, هزت منة كتفها بلامبالاة مجيبة:

- أبدا, لفينا على بتاع 550 معرض كدا, وشربنا عصير, و..... قاطع استرسالها صوتا قويا يقول بأمر لا يقبل النقاش:

- لو سمحت يا منة عاوزك!!.. قطبت منة دهشة من طريقة سيف في الحديث, ولكنها توجهت اليه وهى مبتسمة قائلة:

- نعم يا فندم, يا ترى حضرة المدير عاوزني في ايه؟

ما ان أغلق الباب خلفها حتى أمسك بمرفقها بشدة آلتها ومال عليها قائلا بغضب مكبوت من بين أسنانه:

- تقدرى تقوليلي يا هانم عربية مين اللي انت نازلة منها دي؟, شهقت منة بذهول قائلة:

- إيه؟! , تابع سيف بسخرية وهو يشد على مرفقها بقسوة:
- أقولك أنا! , دي عربية طارق بيه! , اللي اعرفه أنك خرجت
مع مراته , ايه.....سابتكم في نص المشوار وكملت أنت وهو؟!!!
نظرت اليه منة باتسغراب لوهلة ثم ما لبثت نظراتها أن شابها
البرود وقالت بصوت ثلجي وهى تنظر الى يده القابضة على
مرفقها:

- سيب دراعي يا سيف!.. هتف بقوة :
- انا بسأل سؤال دلوقتي وعاوز اجابته... ايه اللي خلاكي
تركبي مع طارق دا؟!..
أجابت منة بحده بالغة وهى تحاول جذب مرفقها بشدة من
قبضته القوية:

- وانا بقولك سيب دراعي أحسن يا باش مهندس!!...
ترك سيف مرفقها ونظر اليها بدهشة ما لبثت ان تحولت
لغضب ساحق وهو يقول:
- وكم ان بتؤمري؟! , انت بتهربي من الاجابة ليه؟ , واحده زيك
بعد ما جوزها شاف اللي انا شوفته دا لازم تدافع عن نفسها
مش تتكلم بكل وقاحه كدا!!...
نظرت اليه منة وقالت بصوت أصابه الجمود ونظرات خاوية:

- أولا انت مش جوزي!, تاني حاجه ...لهجة الاتهام اللي انت بتكلمني بيها دي أنا برفضها, تالت حاجه بقة.... تقدر تعتبرني من اللحظة دي مستقلة, عن اذنك!!....

انتبه سيف من ذهوله لتصريحاتها النارية وناداهها بغلظة:

- استني عندك!!, وصل اليها في خطوتين ووقف خلفها في حين كانت يدها تشد على مقبض الباب بغية فتحه ولكن سيف لم يمهلهما وهتف بغضب:

- اولا انا بعد يومين هبقى جوزك رسمي, ثانيا الاتهام دا انت السبب فيه لما سمحت لنفسك انك تركبي عربية راجل غريب, تالت حاجه بقة استقالتك مرفوضة!!....

نظرت اليه من فوق كتفها وقالت بابتسامة مريرة ودموع لمعت في مقلتيها ولكنها رفضت النزول بينما لهجتها أصابها الجمود وكأنها قد غدت إنسانا آلياً:

- أنا عمري ما كنت محل شك أو موضع اتهام, لكن بما أن كل حاجه ليها أول مرة, فواضح انك انت المرة الاولى ليّا.... واكيد الاخيرة!!, ابتعد سيف بضعة خطوات الى الوراء مقطباً بغارابة من حديثها, مما سمح لها بالاستدارة ووقفت عاقدة ذراعيها امام صدرها متابعة وهى تنظر اليه بقوة:

- مدام عادة مرات طارق بيه جات هنا علوزاني اروح معاها علشان تنقي حاجات لتشطيب الفيلا, دورت عليك مالاقيتكش,

عرفت انك بتابع شغل بره, حاولت اكلملك بالموبايل كان خارج
نطاق التغطية, قلت لأحمد ووافق, بعد ما خلصنا مشوارنا انا
وغادة عزممتني على حاجه ساقعه في كافيه, واحنا في العربية
اكتشفت ان العربية مش بتدور, كلمت جوزها طلعت البطارية
عاوزة تتغير, كنت هاخذ تاكسي وأرجع, لكن هما صمموا انهم
يوصلوني, كانوا عاوزين يوصلوني البيت لكن أنا ما رضيتش
لاني ما اتعودتش أرجع البيت بعربية غريبة, قلت لهم
يرجعوني المكتب وهرجع مع أحمد, يا ترى فيه أسئلة تانية؟!
ازدرد سيف ريقه بصعوبة وقال بخشونة:

- أنا شوفتك من شباك المكتب, كنت موطية على شباك العربية
بتكلميه..., قاطعته رافعة يدها مجيبة بخواء تام بينما شحوبها
يضاهي شحوب الموتى:

- كنت بكلمها!, طالعها سيف بتساؤل فأوضحت قائلة:

- كنت بكلم غادة بشكرها على التوصيلة, عن اذنك....

استدارت مغادرة فلحقها ندائه لها بصوت ملهوف, وما لبث أن
اقترب منها وهو يقول محاولا الاعتذار:

- منة أنا... أنا آسف, أنا ماكنتش داري بنفسي, اول ما لمحتك
نازلة من عربيته, واحمد قالي انت فين, ولاقيتك بتضحكى
وموطية تتكلمى من الشباك وبعدين شاورت بايدك, كنت
هتجنن, سامحيني يا منة... سامحيني يا مُنايا!!..

استدارت اليه منة نصف التفاتة ورمته بنظرة أسى وحزن عميقين ثم تحدثت بما جعله يشفق طلبا للهواء رغبة منه في التنفس فقد شعر أن الهواء قد نفذ من حوله حتى كاد يختنق ما ان طرق سمعه عباراتها الحادة كشفرة السكين بصوت حزين مغلف ببرود ثلجي:

- آه...., بمناسبة انك كلها يومين وتبقى جوزي رسمي,.... أنا أسفة يا باش مهندس!..... شوفلك عروسة تانية العروسة اللي انت علوزها..... اتكسرت.... وانت اللي كسرتها بايديك!! , وانصرفت مغادرة صافقة الباب خلفها بقوة في حين هتف هو من أعماقه بصرخة حادة:

- مننننننننننن!!....

- يتبع -

=====

الحلقة السادسة:

نظرت الى هاتفها المحمول الملقى بجوارها على الفراش وهو يضيء بقوة وكأنه ينهرها لتقوم بالرد على المتصل الملح الذي هاتفها لمرات لم تعد تستطيع حصرها... وقد أحرق هاتفها من كثرة الاتصال.....

صوت طرقات هادئة ولكن حازمة على باب غرفتها انتزعتها
من افكارها, ثم صوت شقيقها مناديا لها, مسحت وجهها
براحتها كي تمحو أي أثر لدموعها التي فاضت بكثرة منذ
عودتها من العمل برفقة اخيها والذي شاهدها وهي تنطلق
خارجة من مكتب سيف كالقذيفة ولم تمهله الفرصة لسؤالها عن
سبب حالتها الغريبة التي يراها لأول مرة عليها, وهي تكاد
ترجوه بصوت متلهف ونظرات ضائعة أن يقلها الى المنزل
بينما يقف سيف خلفها بعد ان لحقها بسرعة صاروخية يناديها
بصوت مشروخ حزين محمل بنرة غريبة من التوسل!, ولكنها
لم تلق بالا اليه وحاولت التماسك وهي تطلب من اخيها الذهاب
الى المنزل, فألقى احمد بنظرة متفهمة اليها مفسحا لها الطريق
للتقدمه بينما رمى سيف بأخرى متسائلة و..... مُنذرة!, في حالة
ان ثبت له أن له يد في حالة الانهيار التي يراها على شقيقته
الصغرى!!

توجهت منة الى باب غرفتها وأدارت المفتاح مرتين لفتحه
وهي تنظر الى أخيها قائلة بابتسامة ممزوجة بشجن غريب
وهي تفسح له كي يستطيع الدخول:

- اتفضل يا ابو حميد, انا عارفة انك مش هتسكت لغاية ما
تعرف سبب الحالة اللي انا كنت فيها انهرده في المكتب,
وبصراحه استغربت اوي لما لاقيتك ما لاحقتنيش تسألني اول
ما دخلنا البيت, واقنعت ماما كمان انى تعبت من اللف مع

عميلة للمكتب وشكلي اخدت ضربة شمس علشان كدا شكلي
تعبان بالشكل دا!!!....

دخل احمد مغلقا الباب خلفه في حين سارت هي حتى جلست
على طرف فراشها ممسكة بيديها الاثنتين طرف الفراش
بجوارها, تناول احمد كرسي مكتبها الصغير الموضوع أسفل
نافذة الغرفة العريضة, ووضعه أمامها ثم جلس عليه ومال
ناحيتها مشبكاً يديه بعضهما البعض وقال بحنان أخوي فياض:

- أنا حبيت اسيبك لغاية ما تهدي خالص, لاني عارف السبب
اللي خلاكي منهاراً بالمنظر اللي شوفتك بيه انه رده ...!!

رفعت اليه عينين متسائلتين و متوجستين عما يعلمه فعلا عن
سبب حالتها النفسية التي تواجهها لأول مرة, رفع كتفيه
وأنزلهما علامة الجهل متابعاً:

- هو انا طبعاً مش عارف السبب بالضبط, لكن.. ممكن
أخمن!!!..

لتطلق منة أنفاسها التي حبستها مغمضة عينيها ومندهشة في
نفس الوقت من نفسها لخوفها من معرفة احمد بسبب حالتها وان
سيف هو المتسبب الرئيسي والوحيد لما كانت عليه من شفير
الانهيار!!!..

ابتلعت ريقها وشردت بنظراتها التي يغشاها الحزن الى البعيد
وقاطعته قائلة بابتسامة مريرة ترسم على شفيتها الذابلتين:

- مش محتاجة تخمين! كل الحكاية ان انت احيانا بتمر بموقف صعب عمرك ما مريت بيه قبل كدا, بيحتاج منك وقفة جامدة, علشان تهذا وتفكر وتحلل وتوصل لحل للوضع اللي حصل!!...
تطرق احمد للموضوع مباشرة:

- انت اتخاننت مع سيف؟

نفضت منة رأسها لتطاير خصلات شعرها الكستنائية اللون
ثائرة محيطة بوجهها الصغير الفاتن وهى تسبل جفניה كي لا
تفضحها عيناها:

- مش بالظبط!,,,,,, تُرى أي شيء جعلها تنفي شجارها
الدامي لقلبها مع سيف؟! هي لا تعرف! ولكن ما تعلمه فقط
أنها لا تريد إشراك أخيها بالأمر, فهي ناضجة كفاية لتحل
مشكلاتها بمفردها, كما أنها لا تريده ان يخسر صديق عمره,
حتى لو.....إنفصلت هي عن سيف! يجب ألا تجعل أخيها يخسر
شقيقه الروحي كما يحلو له تسميته! ألم عميق أصاب قلبها
عندما طرأ على فكرها أنها بالفعل قد وضعت كلمة النهاية
بالنسبة لعلاقتها هي وسيف! أفاقت من شرودها على صوت
تذمر أخيها الواضح وهو يقف قائلاً بحيرة بالغة:

- ما هو مش معقول؟, انا شايفك بعينيا وانت طالعه بتجري من
مكتبه وهو أول ما شافني معاكي كان هالين عليه يقولي ما
تسمعش كلامها وتبعد!..

ابتسمت ابتسامة ساخرة صغيرة وأجابت وهى تطلع الى اخيها
المشرف عليها:

- أيه بنيت حكيم عيون حضرتك!!..

نظر اليها أحمد بجدية سائلا اياها بحسم:

- يعني سيف مالوش يد في حالتك الغريبة دي انهرده؟

أجابت منة بتلعثم طفيف وهى تهرب بعينيها من نظراته القوية:

- انا قلت لك يا احمد مش بالظبط! , عموما أنا اعرف احل
مشاكلي ازاي, وبعدين إنت ليه مُصرّ انك تعرف؟ , سيبيني لغاية
ما أرتب أفكارى وصدقني انت أول واحد هقوله, كل الموضوع
انى عاوزة اعتمد على نفسي , انا مابقيتش طفلة يا احمد أي
حاجه تحصلها تجري على اخوها الكبير تشتكي له!!

اجاب أحمد بحزم:

- طيب تقدر تفهميني سيف تحت في عربيته بئاله اكتر من 3
ساعات ليه؟؟..

أصابته الدهشة منة وقالت بغير تصديق:

- إيه؟ , سيف تحت في عربيته؟... , قبل ان تنهي سؤالها كان
أخيها يهز برأسه ايجابا ويقول متتهدا بعمق:

- ايوه يا منة, مرابط تحت البيت, ولا راضي يطلع ولا يفهمني فيه ايه!, كل اللي طالع عليه خليها ترد عليا!, خليها تكلمني!, أنا عمري ما شوفت سيف منهار زي انهرده!, ثم عقد جبينه متسائلا:

- هو ايه اللي حصل بينكم بالضبط?!.....

أجابت منة بجمود بينما خافقها الأحق كاد ان يطير من بين جنبات ضلوعها خوفا على من تسبب في هذه الفوضى التي تعيشها مشاعرها الخائنة:

- خليه يطلع يا احمد, بس ارجوك مش عاوزة بابا وماما يعرفوا حاجه لغاية ما يمشي, قولهم انه جاي يزورني وبس, نظرت اليه بعينين محملتين بالرجاء وهى تتابع:

- أرجوك يا احمد!!...سيبني أتصرف لوحدي وصدقني لو معرفتش هجيلك واحكي لك واطلب منك تدخل, زفر أحمد عميقا وقال وهو يوميء باستسلام:

- حاضر يا منة, زي ما انت عاوزة, وفي أي وقت عاوزة تتكلمي تأكدي انى هسمعك كويس أوي, أنت مش اختي وبس...لأ, انت بنتي كمان يا منون!!, بس اوعديني يا منة... اوعديني أنك لو حاسيت انك لو مقدرتيش فعلا توصلي لحل للموقف اللي بينكم انك هتصارحيني, انا اخوك قبل ما اكون

صاحبه, وانتم الاتنين غاليين عندي, ويهمني مصلحتكم انتو
الاتنين!!!...

هزت منة رأسها بالايجاب... , تقدم منها احمد وأخفض رأسه
مقبلا جبينها بحنان أخوي, ثم طالعها بابتسامة وهو يقول:
- ياللا, قومي كدا اغسلي وشك ورتبي نفسك وانا هكلمه
يطلع...

ثم انصرف مغلقا الباب خلفه في حين تسمرت نظرات منة الى
البعيد وهى تدعو الله أن يلهمها الصواب...

كاد سيف أن يعانق أحمد فرحاً ما ان فتح له الاخير الباب, فهو
لم يصدق أذنيه عندما هاتفه أحمد داعيا اياه للصعود الى المنزل
مخبراً ان منة قد وافقت على الجلوس اليه...

تركه احمد بعد ان أتى له بكوب من عصير الليمون الطازج
وهو يقول بهدوء:

- بص يا سيف انا معرفش ايه اللي حصل بينكم بالظبط, منة
مش عاوزة تحكي, لكن تأكد انى هبقى في صف اختي, لاني
واثق ومتأكد انها أبدا مش متسرعه, وبتفكر كوي ساوي وعقلها
سابق سنها, وبالتالي أي قرار هتاخده هتلاقي الدعم الكافي من

عيلتها ليه!!، ثم استأذن منصرفا، تاركا اياه عرضة لقلق عظيم
ينهش روحه خوفا من حديث احمد...

قابلت منة والدتها قبل دخولها الى سيف، اقتربت منها امها
ووضعت يدا حانية على وجنتها وهى تقول بحنو:

- منون حبيبتي، انا أمك...واكثر واحده فاهماكي، انا عارفة ان
الموضوع مش حكاية ضربة شمس زي اخوك ما قال، وان
وجود سيف دلوقتي في اللحظة دي وفي الحالة اللي انا شوفته
عليها لما دخلت أسلم عليه... بيقول انه اكيد حصل بينكم زعل،
بصي حبيبتي ... الزعل والخصام هما دول الملح والفلفل بتوع
الجواز، عاوزاكي تفكري بعقلك كويس اوي، مافيش حد كامل
يا منة، كلنا فينا اخطاء، فلازم نتعلم ازاي نتقبل الطرف الثاني
بعيوبه قبل مميزاته طالما عيوبه دي مش حاجه اساسية، بمعنى
مش عيب في الاخلاق!، لانه دا العيب الوحيد اللي مينفعش
الواحد يتعامل معاه أو.... يتجاوز عنه!!.....

كانت كلمات أمها لا تزال تتردد في أذنيها عندما دخلت غرفة
الجلوس حيث يجلس سيف منتظرا كمن ينتظر حكما بالاعدام
كما وصفه شقيقها مازحا في محاولة منه لكسر جمودها

الواضح, بينما نظر اليها والدها بعمق وهو يهمس لها قبل
ولوجها الى الداخل:

- تأكدي يا منة أنى معاكى فى أى قرار هتأخديه, بس بشرط
تحكمى عقلك كويس, لان الحالة اللي فيها خطيبك دي مش حالة
واحد فيه سوء تفاهم بسيط او زعل خفيف بينه وبين
خطيبته...لأ!, دي حالة واحد يائس و....خايف!, ربنا يهديكى
حبيبتي....ويصلح لكم الحال.....

ولجت منة بخطوات بطيئة, رفع سيف رأسه بلهفة فهو عرف
بحاسته أنها معه فى ذات الغرفة من قبل أن يراها!, فقد تغير
الهواء المحيط به, وانتشرت ذبذبات فى الجو, ونبض قلبه
بعنف بين جوانحه, هتف واقفا ما أن أبصرها حقيقة ملموسة
تقف أمامه بكامل هيئتها التي تثير جنونه وولعه بها:

- منة....., نظرت اليه بخواء تام, ابتلع ريقه بصعوبة, وقال
بصوت خرج متحشرجا بالرغم عنه:

- مش بتردي على اتصالاتي, كنت ناوي أفضل تحت البيت ان
شالله حتى لبكرة الصبح, بس لازم كنت أشوفك!!....

نظرت منة الى البعيد متحاشية النظر الى عينيه اللتان تغشاهما
نظرة استعطاف وتوسل غريبة على شخص بقوته!, قالت
محاولة التماسك وبهدوء لا يشي بداخلها المفكك:

- وانا أهو, يا ترى فيه حاجة تانية نسيت تقولها, أو... , وحانت منها التفاتة اليه لتتابع بسخرية لم تستطع تفاديها:

- أو حاجة شوفتها أو عرفتھا جاي تواجهني بيھا؟! , كادت شهقة ان تفلت منها ما ان ابصرت وجهه, لم تكن قد طالعتھ لحظة دخولھا اليه, انه أبدا ليس بسيف الذي تعرفه!, فالآخر كان دائما بكامل أناقته وهندامه المثالي, بينما من تراه أمامھا الآن فبعيد كل البعد عن أي أناقة أو مثالية!, كان شكله يوحي بالساعات العصبية التي مرت عليه, فعيناه حمراوتين وشعره مشعث بقوة نتيجة تمريره لأصابعه فيه عدة مرات, وهندامه غير مرتب, فربطة عنقه محلولة وسترته مليئة بالكسرات نظرا لطول جلوسه في السيارة, وأزرار مقدمة قميصه محلولة حتى منتصف صدره العضلي, حتى أن شعيراته السمراء التي تغطي هذا الصدر القوي كانت ظاهرة للعيان....

هربت بنظراتها بتردد خجل من منظره المزري ولكنه لم يفقد في نفس الوقت جاذبيته الطاحنة, حتى أن شعيراته البارزة من خلف القميص كانت وكأنها تستفزها كي تمد يدها ممسدة لها بأصابعها البيضاء الرقيقة!! , هتفت بداخلها وهى تشيح بنظراتها بعيدا عنه بقوة " رباه .. ماذا يحدث لي؟, لم يحدث أن نظرت الى رجل مهما بلغت درجة وسامته بتلك الطريقة من قبل؟, لما هو مختلف؟, لما لم أصرح أحدا من أهلى باتهامه إياي بالعبث من وراءه؟, وانا على يقين أنه لو أن أبي أوأخي علم بما رماه

في وجهي من اتهامات باطله فذلك كفيل بانهاء ارتباطنا في التو
واللحظة والى ابد الأبدين؟! ", أفاقت من شرودها على صوته
وهو يقول بينما ابتسامة رجاء صغيرة ترسم على فمه القوي
الحازم فيما يشير بيده الى الاريكة العريضة:

- ممكن نقعد طيب الأول؟! ,

هزت رأسها في صمت بالايجاب وجلست على أقصى طرف
من الاريكة ليجلس هو على ذات الاريكة ولكن في أقصى
الطرف الآخر!..

تحدث محاولا بث الهدوء في صوته, فيكفيه أنها هنا الآن بين
ناظريه, تستمع اليه وان كانت تشيح بعينيها الرائعتين عنه,
ولكن وجودها معه يكفيه حاليا وهو كفيل بأن يجعل عيناها تراه
بل وترى آيات عشقه السرمدى لها والذي يصرخ به كل إنش
في جسده الحيّ!...., تحدث قائلا:

- منة عاوزك تسمعيني كويس من غير ما تقاطعيني, وبعد كدا
أنا مستعد أسمعك لغاية ما تقولي كل اللي عاوزاه, لم ينتظر
ردها وتابع قائلا وهو ينظر امامه الى نقطة وهمية بينما تسترق
هي النظر اليه:

- أنت عارفة انى ولد وحيد على اربع بنات, انا اخوهم الكبير,
والدي رباني من صغري على انى راجل البيت, لما كان
بيضطر انه يسافر كان دايمًا بيقول لي أنه مسافر وسايب راجل

وراه, يمكن من وانا عمري سبع سنين, ما افكرش انى لعبت
زي الاولاد اللي في سني, وانا اساسا كنت بحب أرافق والدي
في كل مكان بيروحه, وكبرت وشخصيتي تبلورت اكثر وبئيت
جد اكثر, مش هقول انى كنت مقفل,....لأ!, لكن ما كنتش بؤمن
بالحب والحاجات دي , كنت راسم لنفسى انى لما افكر اتجوز
هختار واحده تناسبني وتناسب عيلتي, لما خلصت ثانوية عامة
وجبت مجموع كبير يدخلني كلية الهندسة هنا في مصر,
صممت انى اتابع تعليمي هنا, ووالدي وافق, وسكنت هنا في
شقة لوحدي, كنت شايل مسؤولية نفسى, وساعدني في كدا
خالتي اللي عايشة هنا, عمر كان اصغر منى بـ 3 سنين, بس
كنا قريبين من بعض, اتعرفت على احمد عن طريقه, انا كنت
في اخر سنة وهما في سنة تانية, قابلت طبعا بنات كتير في
الجامعة, نظر اليها مطلقا بسمة صغيرة وهو يقول في حين
أرادت هي أن تصرخ به مطالبة اياه بعدم ذكر أي صفة مؤنث
أمامها!, تابع متفكها بغية اضاء طابع المرح على حديثهما
لكسر حدة الموقف بينهما:

- انا طبعا عارف انى وسيم, وكانت بنات كتير اوي تحاول
تلفت انتباهي ليها, وانا بصراحه مش قفل!, لكن عمري ما
انسقت ورا أي علاقة, ولا مشاعري استجابت لاي واحده كانت
شايقة فيا عريس مناسب, يعني شاب وسيم ومن عيلة كبيرة في
الصعيد, علاقاتي كانت كبيرها كوباية عصير في كافيتريا

الكلية بس!! , لم تستطع منة منع نفسها من النظر اليه بدهشة
بينما تابع هو ببساطة قائلا:

- آه! , مستغربة ليه؟! , المهم..... اشتغلت في اكثر من مكان, بقه
عندي خبرة كويسة , والدي اداني الشقة اللي هي المكتب
دلوقتي كهدية تخرج, أجلت ان اشتغل لنفسي لغاية ما اكتسب
الخبرة اللازمة, اتخرج عمر واحد وفي مرة عرضت عليهم
يشاركوني, وفعلا... فتحنا المكتب وابتدينا نشتغل سوا, حاسيت
انهم اخواتي بجد, وكان اهلي في الوقت دا ابتدوا يضغطوا عليا
علشان اكمل نص ديني على رايبهم, لغاية ما كنت راجع في
مرة من البلد بعد ما نقاش وجدال كبير مع والدي وشبه تهديد
منه اني لو ما اخدتش خطوات جادة في موضوع الجواز دا, انه
هو اللي هياخدني من ايدي ويروح يخطبني للي هو يختارها!! ,
طبعلا يومها كنت شايط, ورجعت ع المكتب على طول , كنت
محتاج اني أفضفض مع احمد بالذات, بحس انه على أد ما هو
مرح لكن عقله يوزن بلد, وفي وسط دا كله, ابتسم ناظرا
اليها بحب جعل اللون الاحمر ينتشر في وجنتيها وأشاحت
بنظرها بعيدا في خفر وأرتباك, بينما تابع هو بصوت خافت
أجش:

- وسط دا كله دخلت نسمة طرية, خلتني غصب عني ألتفت
ليها, ومن ساعه ما شوفتها وانا حاسيت ان حالي وكياني كله
اتشقلب, واني مش هرجع زي الأول الا اذا قدرت أفوز بيها!..

اقترب قليلا منها في جلسته وقال بلهفة:

- كل ما كنت بشوف حد حواليكى او جنبك كنت بتجنن! ,
عرفت الخوف لأول مرة في حياتي! , خوفي أنى أفقدك! , لما
سمعت عمر بيمدح شغلك وبيقولك تشتغلي معاه في فريق
لوحدكم كنت عاوز ساعتها أصرخ فيه وأقوله منة مش ممكن
تكون مع حد غيري, حتى لو شغل! , ولما سافرنا
السخنة... وشوفت سماجة اللي اسمه طارق دا.. كان هالين عليا
اضربه لما لمحت نظراته ليكي, انا عارف ومتأكد انك بريئة,
وانك متعرفيش معنى نظراته دي ايه, ودا اللي جنينني,
ومقدرتش أستحمل, صممت ان احمد يخليني أفتحك في
الموضوع, انا كنت مصارحه من الاول , بس قلت تاخدي
فرصة تعرفيني كويس قبل ما اتقدم رسمي, لكن خفت... ,
لاقيت انك ممكن تروحي من ايدي, اقترب أكثر منها حتى لم
يعد يفصل بينهما الا انشأت قليلة واستمرت على تحاشيها النظر
اليه بينما لفحتها أنفاسه الثائرة وهو يميل عليها متابعا بياس
قاتل:

- لما شوفتك نازلة من العربية, غيرتي عمتني, ما شوفتش
قودام عيني غير اللون الاحمر بس, كنت عامل زي التور
الهايج, ما بين انى عاوز أنزل أضربه لغاية ما أخلص عليه,
وبين أنى عاوز أخطفك من قودامه ومن قودام أي راجل تاني,
منة... أنا... أنا بحبك! , بحبك الحب اللي كنت بسخر منه! , بحبك

الحب اللي عمري ما آمنت بيه, انتِ ماتتصوريش عملت فيا ايه؟, انت سحرتيني ببراءتك وخفة دمك, لما اتخطبنا ملاني خوف من نوع تاني!, كنت خايف أحسن تراجع نفسيك وتلاقيني أنى مش فارس الاحلام بتاعك!, انا عارف انى جد شويتين وشخصيتي مثلا مش زي شخصية احمد اللي انا بحسده على ارتباطك الكبير بيه!, نزولك انه رده من العربية قودامي ولما شوفت طارق خلتنى أحس أن أسوأ كوابيسي بتحقق قودامي, وانك هتسيبيني, وانا... مقدرش... مقدرش أسيبك يا منة, انت خلتييني أحس انى عايش فعلا, شقاوتك وضحكك وعينيكي اللي بتوه لما بشوفهم, يمكن انا أكبر منك ب 8 سنين, لكن انت عقلك أكبر من سنك بكتير, قدرت تعملي اللي مافيش واحده قدرت تنجح فيه!, نظرت اليه منة بتساؤل لم يتجاوز شفتيها ليجيب عن تساؤلها الصامت بهمس مبجوح:

- خلتنى أحبك لدرجة انى أحس ان روعي مش بتترد جوه جسمي الا معاكى, عارفة يوم خطوبتنا لما اعترضت على كتب الكتاب وقتلي اننا اتفقنا ان الخطوبة لو ما اتفقناش فيها كل واحد يروح لحاله, ساعتها حاسيت انك لو بعدت عني هموت, أصريت على كتب الكتاب علشان أقدر أنقلك ولو جزء بسيط من احساسى بيكي, منة... أرجوك.. ما تسيبينيش, انت متعرفيش انت ايه بالنسبة لي؟, انا من غيرك أموت... أموت يا حبيبتي!!.....

لم تستطع منة منع دموعها من النزول, لقد مسّ صوته شغاف قلبها, استشعرت الصدق في نبراته, ولكن الجرح لايزال طريا وعميقا , تكلمت من بين دموعها الصامتة وعيناها مليئة بعتاب ممزوج بآلم جعلته يخنق آهة أسف وندم لتسببه في الحزن الذي أصاب معشوقته, فهو سبب هطول هذه الالاماسات اللامعه على وجنتيها المرمريتين, وسمعها وهى تقول بصوت مخنوق ببحة البكاء:

- بس اللي يحب حد ما يجرحوش!, ما يهينوش!, ما... ما يكسروش يا سيف!! , لتفقد السيطرة على نفسها وتنهمر في بكاء حاد, دافئة وجهها بين يديها, بكاء قطع نياط قلب سيف ولم يستطيع معه الوقوف جانبا فاحتواها بدون شعور بين ذراعيه وهو يكرر هاتفا:

- أنا آسف, آسف, آسف, اعملي أي شيء, اطلبي مني أي حاجه, الا انك تبعديني عنك, انت كدا بتحكمي عليا بالاعدام يا مُنايا, أنا مستعد لأي شيء الا انك تبعدي عني, أرجوك....

هدأت نوبة بكائها قليلا وسط توسلاته العميقة, وانتبهت الى ذراعيه اللتان تحوطانها, ابتعدت بتردد, محاولة دفعه براحتيها الصغيرتين واللتان ما ان لمستا صدره حتى شعرت بمضخة عملاقة تضخ تحت يديها وهدر الدم في أذنيها عاليا لملمس صدره الصلب لراحتيها الطريتين, قالت وهى تشيح بنظرها بعيدا في تلعثم وارتبأك واضح:

- أنا مش... مش عارفة أفكر كويس, ممكن تسيبني لغاية ما أهدأ؟! , أمسك سيف بيديها مثبتا اياهما على صدره وقال بقوة:

-اهدي براحتك, وخدي الوقت اللي انت عاوزاه, بس واحنا سوا, مع بعض... , لأنني بالتأكيد مش هسمح لأي حاجه تفرقنا او تبعدنا عن بعض...

رفعت عيناها المبللتين بالدموع اليه وقالت بخفوت:

- مش هينفع! , لازم أخذ القرار وانا بعيد عن أي ضغوط...

لم تعلم أي صورة جذابة كانت ترسمها امام عينيها الشغوفتين, برموشها المبللة وأنفها الاحمر من شدة البكاء وشفتيها النديتين من كثرة قضمها لها بأسنانها اللؤلؤية الصغيرة كعادتها دائما, بلع ريقه بصعوبة وهو يحارب نفسه كي لا يقوم بما يموت شوقا اليه! , ركز بصره على شفتيها وقال بصوت أبح للانفعالات التي تمر بداخله والشوق الذي ينخر جسده مطالبا اياه بأشباع توقه القاتل اليها, قال وانفاسه الساخنة تلهب بشرتها الحليبية:

- على جثتي انك تبعد عني! , كتب كتابنا في معاده, وصدقيني لمصلحتك انت قبل أي حاجه, انا خلاص صبري نفذ... , اعلمي فيا اللي انت عاوزاه بس وانت شايله اسمي, أنا راضي بأي ترضية تقولي عليها, انما كتب الكتاب هيبقى بعد بكرة في

المعاد... , أنخفض صوته حتى غدا كالهمس بينما نبراته جعلت
الدماء تجري ساخنة في عروقها:

- مفهوم يا منة؟! , لم تستطع سوى الايماءة برأسها , ثم تملّصت
من بين يديه ليترك يديها على مضض, وقفت ما أن فك قيدها
وكفكت دموعها براحتيها الدافئتين لأمسكه بهما , وقالت بكل
ما أوتيت من قوة قبل ان تركض منسحبة من أمامه:

- كتب الكتاب في معاده .. اوكي, لكن من هنا لغاية كتب
الكتاب ما فيش تليفونات ولا مقابلات, ودي أول حاجه, لغاية ما
أفكر في باقي العقاب هيبقى ازاي!! , ثم ركضت سريعا من
امامه تاركة اياه غارقا في ذهوله, فهذه المشاغبة الصغيرة قد
علمت أي سلطان لها عليه!, ومن الواضح أنها تنوي السير في
الانتقام منه حتى النهاية!, ولكن..... ليس مهماً!, طالما انها في
النهاية ستكون امرأته هو و...بين يديه!, وسيعلمها كيف يكون
الحب?, سيكون أستاذها في تعليمها أبجديات العشق, بل سيجعلها
تتنفسه عشقا تماما كما يفعل هو!!.....

نقّدت منة ما وعدت به سيف, فلم تستقبل أية مكالمات منه ولم
ترد على رسائله العديدة, كما امتنعت عن الذهاب الى العمل,
وتوعدها سيف في ضميره بأنه سيأخذ بثأره منها, ولكن فليعقد
القرآن أولاً وبعد ذلك لكل حادث حديث!!.....

أتى يوم العقد القرآن وظهرت منة بأروع صورة, لم يكن سيف
رأها حتى وصل المسجد حيث يعقد القرآن, فقد أتت المزينة
ومصطفة الشعر الى المنزل للاهتمام بالعروس, وكان برفقتها
صديقاتها ايناس وسحر ونشوى, اللاتي لازمها منذ الصباح
الباكر, وقام أحمد وعمر بالاهتمام بتوصيل عائلة العروس
وصديقاتها والعروس نفسها الى مكان عقد القرآن, حيث أقلّ
عمر العائلة, بينما ركبت العروس ورفيقاتها مع شقيقها, والذي
كان يلقي بنكاته المرحّة مختلسا النظرات الى من يهفو اليها
قلبه... ايناس!!!..

كاد سيف أن يستشيط غيظا لإصرار منة على عدم مرافقته في
الذهاب الى المسجد, فقد أرسلت اليه عبر أخيها رسالة تخبره
فيها أنها ستحضر مع عائلتها لوجود صديقاتها معها, نظر سيف
بغيط الى احمد الذي لاعب له حواجه وقال من بين اسنانه:

- مبسوط انت بأختك؟! , أجاب أحمد ساخرا:

- طبعاً!, بنت راجل بصحيح...., كلمتها واحده!, مش هتشوفها
يبقى مش هتشوفها!...

ذهل سيف وقال:

- وانت عرفت منين ان الهانم حاكمة عليا اني ما شوفهاش الا
يوم كتب الكتاب?..

أجاب أحمد بمكر:

- وهي دي عاوزة ذكاء؟! , واحد زيك فضل مرابط في عربيته بالساعات, ولما ترضى عليه.... ما يطلبش انه يشوفها خالص؟! , وبعدين دي حتى الشغل ما كانتش بتروحه! , وطبعاً قالت لماما وبابا انها اخدت اجازة علشان تجهز نفسها لكتب الكتاب...

لم يسأل أحد من عائلة منة عن سبب الخلاف بينها وبين سيف, واحترموا رغبتها في الكتمان, وسعدوا بإزاحة الغمة التي كانت تلوح في سماء ابنتهما, وقد شعروا بالفخر لمقدرة صغيرتهما على حل مشكلاتها بحكمة وكنة لما يحدث بينها وبين زوجها, فأية خلافات اذا تدخل الأهل فيها ولو بغرض الاصلاح تتفاقم....., لا بد ان يصل الزوجين بنفسيهما الى حل يرضي جميع الاطراف, وتدخل الأهل لا يكون الا في حالات استثنائية يكون فيها الحياة الزوجية لأبنائهم مهددة بالانهيار التام.....

وصلت منة بصحبة صديقاتها الى قاعة عقد القران, وجدوا سيف بانتظارهم خارج القاعة الملحقة بالمسجد الخاصة بعقد القران, كان يقف بجانبه والده والذي عرفته منة ما ان شاهده, بزيه الصعيدي التقليدي ولكن الباهظ الثمن كما تدل عباؤه الفخمة والعصا العاج المطعمة بفصوص من الاحجار الكريمة

أعلاها والتي كان يمسك بها, وبرفقتهم اربعة رجال في عمر سيف تقريبا, خمنت أنهم أزواج أخواته البنات.....

ما ان شاهد سيف منة وهى تهبط من سيارة احمد بمساعدة صديقاتها , حتى حبس أنفاسه لشدة جمالها, ولم يشعر بنفسه وهو يترك والده في منتصف حديث ما, ليسير ناحيتها كالمسحور, ويقف امامها مذهولا من هذا الجمال الرباني الصاعق الذي يقف أمامه يكاد يتوارى منه خجلا, قال سيف بصوت مبهور:

- إيه الجمال دا!..., لكز أحمد سيف في خاصرته وقال بجدة زائفة:

- احترم وقفتي بينكم على الاقل!, أشاحت منة بوجهها بعيدا تكتم ضحكتها بينما تطلع سيف الى احمد في اللحظة التي تبادلت فيها الصديقات الابتسامة في محاولة لكتم ضحكاتهن التي أوشكت على الانفجار!, قال سيف بغیظ من بين اسنانه:

- مش وقتك خاااالص يا احمد!, بقول ايه ... ما تشيلني من دماغك بقه!, يعني انساني انهرده علشان خاطري...

تظاهر احمد بالتفكير ثم اجاب باستفزاز واضح:

- أفكر.....

تأبط سيف ذراع منة واتجها الى داخل القاعة لتجد والدها
ووالدتها واقفان بالداخل لمقابلة المدعوون, اسرعت اليها
والدتها تحتضنها وعيناها تدمعان لرؤية صغيرتها وقد غدت
عروس جميلة تتأبط ذراع عريس وسيم ودعت الله أن يكفيهما
شر عين حاسدة متممة بداخلها بالأذكار المحصنة.....

مرت مراسم عقد القرآن كالحلم, شعرت منة كأنها تحلم وعندما
طُلب منها أن توقع باسمها أسفل العقد الرسمي الذي يربط
مصيرها بمصير سيف, رفعت عينيها تطلع اليه لثانية قبل ان
تضع اسمها في خانة الزوجة, لتطالعها ابتسامة عشق صاف
وفرحة ترغرد في مقاتيه, فابتسمت بتوتر وذيلت العقد بتوقيعها,
لتنطلق زغاريد الفرح بعد ذلك....

وقفت منة وسيف جنباً الى جنب لتلقي مباركات الاهداء
والاصدقاء, محاطين بوالديهما, تقدم منها حماها بعد انتهاء عقد
القرآن وقال وهو يفتح ذراعيه على وسعيهما:

- مبروك يا مَرَّتْ ولدي, الف الف مبروك, واحتواها بين
ذراعيه مقبلاً جبهتها, وسط ضحكات عائلتها وخجلها الشديد,
شعرت بالارتياح لشقيقاته البنات, سميحة وسمية وسلمى
وسارة, اللواتي كن يرتدين عبااءات سمراء حريرية بتطريز
أنيق راق , رحبوا بها مهنئين بالزواج الميمون بشدة وهن يطلق
زغاريد الفرح , ابتسمت منة وهمست لسيف حتى لا يسمعها
أحد:

- انتم كلكم على حرف السين؟, ايه امبراطورية سين... بس
للابناء فقط؟؟, ابتسم سيف ونظر اليها بمرح مجيبا:

- ابتدي انت كمان ياللا جهزي اسامي امبراطورية الولاد
بتاعتنا, خلي بالك لو الامبراطورية اقل من 6 افراد مش
هستلم!!

فتحت منة عينيها على آخرهما, ونظرت اليه بحدة قائلة بحنق
طفولي:

- امبراطورية ايه...و6 مين؟, احنا لسه يدوب شبكة وكتب
كتاب!!....

نظر سيف الى الطقم المرصع بالالماس شبكته اليها والذي قد
ألبسها اياه بعد الانتهاء من عقد القران ولم تكن قد شاهدته قبلا
فهو كما سبق واخبرته قد اختاره لها بمفرده فهي هديته اليها,
قال سيف ونظره معلق على جيدها حيث تتدلى سلسال الطقم
فوق فستانها المقفول ولم يظهر أي شيء من هذا الجيد المرمري
فقد التف وشاحا من الستان حوله ليخبئه عن الأعين:

- بمناسبة الشبكة.. عجبك؟...

اجابت منة وهى تشيح بنظراتها خجلا:

- آه, جميلة بجد...., زوقك حلو فعلا..

همس بالقرب من أذنها:

- انا عارف ان زوقي حلو, والدليل على كدا اني اخترتك....
- نظرت اليه منة لتتوه في ابتسامته التي تنير وجهه الرجولي,
شتان بين هذا اليوم وذاك اليوم الذي أتى لمصالحتها فيه, فهو
الآن يبدو كنجم سينمائي لامع, بجلته الكاملة الرمادية اللون,
وقميص من أرماني بنفس لون الحله وربطة عنق من لون
فستانها.... وكان قد سألها عن لونه حينما اشترته منذ فترة, وقد
شذب لحيته فغدا وسيما يخطف الانفاس, بينما لا تزال تلك
الخصلة الشارده فوق جبينه العريض تستفز منة لاعادتها الى
الخلف مع باقي رفيقاتها من خصلاته الابنوسية الناعمة!!....
- قطع استرسالهما في الحديث والدها الذي احتضنها مباركا لها
ثم احتضن سيف موصيا بها خيرا, وجاء احمد الذي ما ان
احتضنها بين ذراعيها حتى كادت ان تبكي فربت على ظهرها
بينما يطوقها بين ذراعيه بقوة وهو يقول بحنان:
- مبروك يا منون, ماتتصوريش فرحتي قد ايه يا حبيبتي...
ابتعدت منة عن احضانه ونظرت اليه بحب اخوي صاف
وقالت بينما الدموع تلمع في مقلتيها:
- الله يبارك فيك يا حبيبي, عقبالك يا رب... حانت منه نظرة
الى شاغلة عقله وقلبه التي تقف على بعد خطوات منه منخرطة
في حديث ودي مع سحر ونشوى وقال وهو يغمز منة بشقاوة:

- قريب اوي ان شاء الله, احنا خلصنا من كتب كتابكم اهو...
فوقي لي انا بقه, ماشي؟,

ضحكت منة واجابت وهى تطرف برموشها لابعاد الدموع
عنها:

- ماشي الكلام...., شعرت منة بذراع عضلي يطوق خصرها
فجأة وصوت سيف يقول بحلق مفتعل:

- ايه ايه ايه, حيلك حيلك, مين دي اللي تفضى لك؟, ياللا يا
بني...ياللا من هنا... يحزن!!...

شهق احمد بتمثيل وقال بنصف عين:

- سيف.. ابو السيوف... ما تفتكرش علشان كتبت كتابك يبقى
هتؤمر وتتحكم.. لا!!!, بعد الزينة دي ما تخلص على خير كدا
ان شاء الله منة هترجع معانا, يعني هي لسه تبعنا يا خفيف...
قال سيف بمداهنة:

- وانا قلت حاجه يا ابو حميد, دايم كدا فاهمني صح!!!, كل
الموضوع اني مش عاوز حاجه تشغل عروستي عني انهرده
مممكن؟

تظاهر احمد بالتفكير ثم أوما برأسه في جدية مفتعلة واجاب:

- اممم... ممكن!, عطفنا عليك وسمحنا لك بانهرده بس....,

لاحظ احمد أن والده يشير اليه, فاتجه اليه بينما مال سيف على اذن منة قائلاً بحنق:

- هو ايه!..., كل الرجاله انهرده مسموح لها تبوس وتحضن وانا في جيبي تصريح رسمي فهمي نظمي اني ابوس واحضن براحتي مافيش غير مسكة ايد بس وبالعافية كمان!!..

تخضب وجه منة احمرار حتى كاد ينفجر بينما حانت منها التفاته الى يدها حبيسة قبضته منذ ان انتهى عقد القرآن رافضا تركها, تابع سيف همسا وقد فاض الشوق من عينيه وهو يطالع وجهها المسدل امامه خجلاً وحياءاً:

- تصدقيني لو قلت لك انى غرت من كل واحد لمسك انهرده سواء باباكي او اخوكي او حتى...والدي أنا؟!....., رفعت نظراتها اليه لتأسرها نظرة العشق التى تشي بها عيناه, ولم يقطع حبل اتصالهما الا نحنحة ذكورية التفتت اليها منة ليشرق وجهها بحبور وهى تهتف:

- أهلا نادر...ازيك, انت لسه واصل انت وطنط سهام ولا ايه?..

سعل نادر ليجلي حنجرته وقال بما أمكنه من هدوء:

- معلش يا منة معرفناش نوصل بدري عن كده, مبروك ألف مبروك... (تقصد نادر الوصول متأخرا بعد عقد القرآن كي لا يضطر أن يكون شاهدا عليه كما سبق ان قالت خالته عواطف

لوالدته سهام, فهو لن يستطيع بأي حال من الأحوال على هذا الأمر الذي لن يتمكن من احتماله, ويكفي أنه أتى مهنئاً كي لا تغضب خالته او يحزن عمه عبدالعظيم او احمد صديق واخيه) بادلته منة التهنة بحماس قائلة:

- الله يبارك فيك عقبالك...., أشارت الى سيف الواقف بجانبها ساكنا منتظرا ان تقوم بتقديمه الى هذا الضيف الذي أشرق وجهها سعادة ما ان رآته!!... مد سيف يده لمصافحته بينما عيناه تنقدان نادر ابتداءا من رأسه المكلل بالشعر البني, ثم عيناه بلون الزرع شديد الخضار, وبنيتة العضلية, مرورا بحلته الزرقاء اللون التي أضفت على بشرته الذهبية وسامة ملحوظة, تقدمت منها خالتها بصحبة والدتها محتضنة اياها مهنئة لهما, لاحظ سيف ترقرق الدموع في عيني خالتها لم يعجبه نظرات نادر المسترقة اليه في تساؤل !!, ولكنه نفض هذه الافكار بعيدا عن رأسه ما ان اقتربت والدته ومعها بعض النسوة من العائلة للسلام على العروسين...

بعد الانتهاء من عقد القران تفرق الجمع بينما دعا والد منة عائلة سيف الى وليمة العشاء التي تم الاعداد لها لأفراد العائلة المقربون من الطرفين, حيث قام أحمد بالاتفاق مع مطعم شهير لتقديم بوفيه كامل يشمل على جميع صنوف الطعام مما لذ وطاب.....

ساد وقت تناول الطعام جو من المرح المحبب , لم تكن سهام تنوي حضور العشاء ولكن عواطف أصرت , وما ان انتهت محنة تناول الطعام بالنسبة لسهام وولدها حتى سارع نادر بالاستئذان لاضطرارهما للسفر الليلة , واعتذرت سهام عن عدم حضور رانيا لمرض ابنتها المفاجيء....

انفرد سيف ومنة في غرفة الجلوس , وقامت والدتها بإدخالهما اليها بناءا على طلب من شقيقته سارة - التي تصغره بعامين وهي متزوجة منذ ما يقرب الثمان سنوات ولها من الابناء ثلاثة - فقد استشعرت حاجه أخيها للانفراد بعروسه فلم تستطع عواطف الرفض فهو لم يعد أجنبيا عنها بعد اليوم, تطلع سيف لشقيقته بنظرة شكر فغمزته بدورها بمكر وقد ارتسمت ابتسامة خبت على فمها الصغير المكتنز!!

ما ان أغلقت والدتها الباب خلفها حتى تقدم سيف من منة الواقعة في تردد تنظر الى الاسفل في حياء وقال بهمس بجوار أذنها:
- حماتي دي ست ممتازة بصراحه, كان فاضلي شوية واخذك من وسطهم واجري والجدع فيهم يحصلني!!..

ضحكت منة بحياء وقالت وهى تشيح برأسها الى الجهة الاخرى:

- ليه يعني؟, ما احنا مع بعض... انت سبتتي ابعد عنك لحظة
واحد من ساعة ما كتبنا الكتاب!!..

اقترب سيف حتى كاد يلتصق بها قائلا:

- بس لسه اهم حاجه معملتهاش!!..

رفعت منة وجهها اليه لتطالعه بعينين متسائلتين ببراءة:

- ايه هي دي؟, تاهت نظرات سيف بين وجنتيها المتوردتين
خجلا وبين عيناها اللامعتان و....شفتيها الشهيتين بلونهما
الزهري اللامع , لم يستطع الصبر أكثر من ذلك, صدقا لم
يستطع الابتعاد وقال بخفوت بينما تتسلل يداه لتطوقان خصرها
وهو يميل عليها في حين وضعت هي راحتيها على يديه
محاولة ازاحتها وقد بدأ الخوف يتسلل اليها وهي تسمعه يقول
بصوت أجش خافت:

- اني أبارك لك همست منة وهي تحاول ابعاد وجهها عن
انفاسه الساخنة التي تلهب بشرتها الحليبية:

- ما انت باركت لي و....., لم يمهلها تتمة كلامها, وامسك
برأسها بين راحتيه مثبتا وجهها امامه بينما نظراته مسلطتان
على شفتيها المرتجفتين فشعرت بغريزتها ما ينوي فعله
وهمست بخوف:

- سيف ما تتهورش, انتة تعمل ايه؟, قال سيف وقد غدا كالمنوم مغناطيسيا:

- هتشوفي أنا هعمل ايه؟, همست منة باعتراض :

- سيف ما ينفعش, لبيتلع سيف باقي عبارتها بين شفتيه,
ساحقا اياها بين ذراعيه, ضاعطا عليها بقوة , بينما شفتاه تنهل
من رحيق شفتيها وقد غدا كالعطشان السائر في الصحراء
والذي يكاد يقضي نحبه ظمأً وإذ بواحة عذبة رقراقة أمامه
فطفق ينهل منها كيف يشاء ليروي عطشه ولكن.... لم يكن
عطشه ليرتوي ولم يكن شوقه لينطفأ....

انتبه على رفرفات كعصفور حبيس تضرب في صدره, فابتعد
عنها وهو يلهث ليجد انها تضربه بقبضتيها الصغيرتين لبيتعد
عنها بينما غدت ساقياها وكأنهما كائنين هلامين لم تستطيع
الوقوف عليهما واستندت الى سيف الذي طوقها دافنا اياها بين
ذراعيه بقوة لا يريد افلاتها...

همست منة من بين انفاسها اللاهثة والتي كادت تزهرق طلبا
للهواء الذي حجبها عنها سيف بعناقه الصاعق:

- وقح... سمعت ضحكة رجولية عميقة أشاعت في سائر
حواسها الفوضى ثم همس من بين طيات حجابها بمزاح:

- هي دي الوقاحه في نظرك؟, لا.... انت لسه ما شوفتيش
الوقاحه اللي على أصولها, بس ما تقلقيش هوريها لك هوريها لك

هتروحي منّي فين؟! , لكمته بقبضتها الصغيرة فابتعد عنها
ضاحكا بينما قالت بحنق خجول:

- لا انت مش بس وقح.... وقليل الأدب كمان !!, همّ سيف
بالرد عليها عندما قاطعه صوت طرقات على الباب ثم دخول
امها حاملة صينية عليها قطعتي من الكعك احدهما قطعة من
كعكة شيكولاته والاخرى من كعكة الفانيليا, مع كأسين من
العصير الطازج, وضعت الصينية فوق الطاولة الرخامية
الصغيرة وتبادلت العبارات المازحة معهما ثم انصرفت تاركة
اياهما بمفردهما للمرة الثانية!!.....

ما ان اغلقت والدتها الباب خلفها حتى شهرت سبابتها في وجهه
قائلة وهى تتراجع الى الخلف بينما يتقدم هو منها وابتسامة
ماكرة تعلو شفتيه :

- خليك مكانك , اوعى تقرب , صدقني انا مجنونة وهَلَمْ عليك
الناس!!....

نظر اليها بعبث وقال بجدية مزيفة:

- ايه يا منة.. انت ضميرك وحش ليه؟, انا هقعّد على الكنبه
وراكى علشان آكل التورته... , ثم غمزها بخبث متابعا وهو
يحرك رأسه يمينا ويسارا في أسف مصطنع:

- لا لا لا ... , انت ظنونك بنيت وقحة يا منة!! , شهقت بحدة ,
فطالعتها بمكر ثم جلس الى الاريكة العريضة, تناولت طبقها

وهمت بالجلوس بعيدا ليجذبها من خصرها فتسقط جالسة
بجواره لا يكاد يفصلها عنه انش واحد وقال :

- اقعدى هنا, مكانك جنبى, لو مامتك دخلت ولاقيت كل واحد
مننا فى ناحية هتقول ايه؟, نظرت اليه بغيط ثم تناولت قطعة
كبيرة من الكعك وهى ترمقه بنظرات غيظ, ابتسم وقال وهو
يشير الى طبقها:

- على فكرة انا بحب تورتة الشوكولاته, ممكن ادوق حته من
طبقك؟, مدت له الطبق وقالت وهى تبتلع لقمتها :

- اتفضل, كُلها كلها, مش عاوزة... , نظر اليها وهو يتناول
الطبق واضعا اياه جانبا وقال بخبث وهو يميل عليها:

- لا مالوش لزوم الطبق, انا هدوق من هنا!! , قطبت حائرة
لُتُفاجأ به وهو يشير الى فمها وقبل ان تنتبه الى نيّته كان يتناول
فتات الكعك المحيط بفمها بشفتيه النهمتين معتصرا شفتاه!!...
ابتعد عنها عندما شعر بحاجة كلا منهما للهواء وقال ونظراته
تلهبها بحرارتها:

- تصدقى عمري ما دوقت كيكه شوكولاته بالطعامه دي؟, لم
تجبه منة , وبدلا من ذلك تناولت كأس عصير المانجو الطازج
الموضوع امامها مرتشفة جرعة كبيرة منه لترطب حلقها
الجاف, فقال ونظرات الشوق الحارقة تراقب شفتيها النديتين
من العصير والمنتفختين بفعل قبلاته اللاهبة:

- لو قلت لك بحب المانجة هتخليني أدوقها؟, نظرت اليه
واجابت محاولة التماسك:

- لا وانت الصادق هدومك هيّ اللي هتدوقها!!.....

انتهت السهرة وسط الفرحات والضحك وقد أصر احمد على
سيف أن يتابع السهرة هو ومنة مع الجميع ويدع هذه الصومعة
التي وكأنه لم يكد يعقد قرانه على منة حتى ينفرد بها بمعزل
عن الباقيين, همس سيف اليه من بين اسنانه:

- انا قلتها قبل كدا هادم اللذات!, بينما اندفعت منة موافقة أحمد
وهي تتجه الى الخارج برفقته, ليقبض سيف على مرفقها ويميل
عليها غير سامحاً لها بالمرور:

- ما صدقت.. مش كدا؟, عموماً هتروحي مني فين يا مُنايا,
ودلوقتي ايدك في ايدي واوعي تبعدي عني خطوة واحده,
أحسن لك!! , نظرت اليه بنصف عين واجابت بابتسامة بريئة
زائفة:

- أنا!, معقول!, لا لا لا ... او عي تفتكرني صح!, ياللا بقه
علشان عاوزة اقعد مع اخواتك شوية مالحقتش اتعرف بيهم,
قال بنزق :

- يا سلام, وانا ايه ان شاء الله؟, فوق البيعة!...

زفرت منة ثم نظرت اليه وقالت مهادنة كمن تحايل طفلا
صغيرا بدلال أسره حتى كاد أن يفقده صوابه:

- انت الكل في الكل طبعاً, انت مش عارف كدا ولا إيه؟, هما
اخواتك وانا علشان كدا يهمني علاقتي بيهم تبقى كويسة, ياللا
بيننا بقه؟!... ومنحته ابتسامه جعلته يتيه بين رسم شفتيها
الشهيتين يكاد يضرب بعرض الحائط بأي آداب أو سلوك
فيسحبها اليها ساحقا ابتسامتها المغرية بشفتيه النهمتين لها!!
تسمر سيف في مكانه فنادى احمد الواقف بعيدا عنهما امام
الباب:

- يا هووو, أخينا... ثم مال برأسه الى شقيقته الواقفة تطالع
سيف وتقطيبة خفيفة تعتلي جبينها :

- ماله دا؟, انت عملت فيه ايه؟..

هتفت منة بتلقائية:

- وربنا ما عملت حاجه, هو اللي إتسلّوَح لوحده كدا!!.....

فيما صوت منة الرقيق الهامس كالبلبل المغرد يتردد في أذنيه
وهي تتدلل عليه لأول مرة بينما استعاد مذاق شفتيها الشهوي
الذي يكاد يفتك به شوقا اليها ليعيد الكرّة مرات ومرات!!...

انتبه من شروده على وقفتهما المتسائلة, سعل قليلا ثم اتجه اليها محيطا خصرها بذراعه وسط تعبير شديد الجدية وتقدم أحمد جاذبا منة وهو يقول وسط دهشتها:

- ورايا يا احمد, عاوزين نقعد مع الناس شوية, مش معقولة كدا, ايه نازل رغي رغي رغي... ارحمنا!!, وسار هو ومنة متجهين الى الخارج بينما يتابعه احمد بعينيه المذهولتين وهو يشير الى نفسه متسائلا في دهشة:

- أنا؟!.....

بدلت منة ثيابها وخلدت الى الفراش طلبا للنوم الذي خاصم جفنيها, فكلما أغلقت عينيها تتراءى لها صورة سيف, وتستعيد ما حدث هذه الليلة, وقد تحسست بأصابعها شفتيها أكثر من مرة متذكرة قبلاته اللاهبة وحرارة أنفاسه التي كادت تذهب بعقلها!, لم تكن تتصور في أكثر خيالاتها جموحا أن مذاق قبلتهما الأولى سيكون كالعسل اللاذع!, فهي حلوة كمذاق العسل, ولكنها تترك أثرا حارقا فوق الشفاه كلذعة العسل الخام!, ارتسمت ابتسامة على شفتيها الحمرأوين عندما تذكرت تقاعس سيف على اللحاق بوالده وذلك عندما أبدى أهله استعدادهم للانصراف مما جعل والده يتندر قائلا بتساؤل مفتعل:

- إيه رأيك ناخد منة معانا؟, ما هو انت شكلك إكده مش هتتعتع
من مُطرحك واصل!!...., لينفجر الجميع بالضحك مما اضطره
للانصراف ملقيا بنظرات ولهة اليها وهو يتمتم في اذنها بكلمات
دغدغت احاسيسها الفتية:

- او عي تنامي, هسهر معاكي لوش الصبح, حقي بقه, انا
ما صدقت.....

انتبهت من شرودها على رنين جرس المحمول بجانبها, مدت
يدها ليطالعها اسمه, اجابت مبتسمة بهمس :
- مجنون!, معقول مانمتش لغاية دلوقتي?..

اعتدل سيف في رقده فوق فراشه وقال بصوت داعب أذنيها:
- أنا قلت لك هكلمك يبقى هكلمك, بس اعمل ايه في التحقيق
اللي اتعمل لي من أخواتي , قلتوا ايه, عملتوا ايه, عروستك
زي القمر... ما سابونيش الا لما قلت لهم ناموا علشان
هتسافروا الصبح بدري, اجوازهم دخلوا ناموا وسابوهم لي هما
واولادهم, كنت تشوفهم تقولي سيرك قومي فتح جوة بيتي!!..
انفرجت منة بالضحك, وعقبت على حديثه من بين ضحكاتهما:
- حرام عليك يا سيف, دا جزاتهم انهم فرحانين بيك?!!..

تنهد سيف عميقا وقال وهو يمرر أصابعه القوية السمرء بين
خصلات شعره فيشعثها بينما شعر بنغزات من الشوق اليها ما

ان تناهى الى سمعه صوت ضحكاتها الخلابه وشرد فيما حدث بينهما عندما كادت أن تذوب بين يديه كقطعة السكر, قال زافرا بعمق:

- بقولك ايه... هنبتيها كدا؟! مش كويس... للصحة العامة على الأقل!!!

قطبت منة واستفهمت بابتسامة حائرة:

- یعنی ایه؟, مش فاهمه!!..

اطلق ضحكة عميقة وأجاب:

- هفهمك يا مُنايا، بس لما اشوفك... فيس تو فيس يعني، أصل الموضوع دا بالذات ما ينفعش يتشرح شفوي لااااازم تحريري!!..

استمرت المكالمة بينهما لما يقرب من ساعتين، حتى طالعت
مئة ساعتها الموضوعه فوق الجارور بجوار فراشها فهتفت
قائلة:

- سيف احنا بئالنا ساعتين واكثر بنتكلم، ياللا علشان نعرف ننام شوية قبل ما نصحي نصلي الفجر، ثم سألت مقطبة:

- انت بتصحي تصلي الفجر يا سيف طبعاً مش كدا؟, ولا من
اللي بيروح عليه نومة ويقول هبقى أصليه صبح ويعمل نفسه
مش سامع حاجة؟!...

أجاب بصوته الرخيم:

- لا طبعاً يا قلب سيف, بصلّيه وفي المسجد كمان, بس انا بقه
من انه رده هبطل أظبط المنبه, عاوزك انت اللي تصحيني,
عاوز أصحى على صوتك!!,

قضمت شفتها السفلى بأسنانها اللؤلؤية وقالت بخفر:

- حاضر, تصبح على خير..

هتف قبل ان تنهي المكالمة:

- استني استني, مش هتقولها بقه؟.

سألت بحيرة:

- هي ايه دي اللي اقولها?..

أجاب بخبث:

- حبيبي؟؟... نفسي أسمعها من بين شفايفك اللي مش هيخلوني

أعرف أنا دول!!,,,

تصنعت الغضب و هتفت بجدية مصطنعه:

- سيف؟, اجابها هائماً:

- نعم, يا قلب سيف...

قالت بلهجة العالم ببواطن الامور:

- انت وقح!, فتح سيف عينيه على وسعيهما وقد فارقتة حالة الهيام التى أصابته وقبل ان يجيبها تابعت بجدية مزيفة:

- دي مش شتيمة حضرتك!, لأ.... دا اكتشاف!, وأدي أول اكتشاف اكتشافه ولسه مكملاش يوم مع بعض, سيف.... نام يا سيف علشان شكلك هيست!!....

قضم سيف شفته وقال بصوت خافت:

- ما هو المشكلة في نام دي!, انا لو نمت هحلم احلام هصحى منها تعبان انا عارف!!....

قطبت منة حائرة وما لبث أن أشرق عقلها بالفهم فهتفت بقوة هذه المرة قبل ان تغلق الهاتف في وجهه:

- قليل الأدب...., لتغلق الهاتف بقوة , بينما رنت ضحكات سيف وقال وهو يطالع محموله:

- مجنونة...., بس بموت فيكي.....

وزفر بعمق قبل ان يضع هاتفه جانبا ويغلق جفونه ليستسلم للنوم محتضنا الوسادة بين يديه وقد ارتسمت على وجهه ابتسامة من نال غايته بعد طول انتظار.....

- يتبع -

=====

الحلقة السابعة:

- وأنا آسفة يا سيف, مش مقتنعه, وبالتالي مش موافقة على بتقوله!.....

زفر سيف في ضيق ورمى برأسه الى الورااء مغمضا عينيه, ثم مسح على وجهه بيديه, وانتظر هنيهة قبل ان يعتدل في وقفته, ناظرا اليها بعمق وقد قرر ان يغير من طريقته فمنة كما يعلم لا تأتي بالعناد أو بالأمر أبدا...

اقترب منها بضعة خطوات ثم وقف على مقربة منها بينما تراقبه بعينين حذرتين, أجابها محاولا الهدوء قدر المستطاع:

- ممكن أفهم ايه اللي مش عجبك في كلامي؟, انى مش عاجزك تبعدني عني؟! , ولا لأنى عاجز أكون معاكى فى أى مكان بتروحىه؟, ثم تقدم خطوتين أخرتين فكان على بعد أنشات قليلة منها وهو يتابع بلهجة أشعرتها بأنها مذنبه فى حقه:

- ولا مش هيكون مُرَحَّب بِيَا عند خالتك؟..

رفعت منة عينيهآ اليه وقالت نافية بقوة:

- لا طبعاً! انت عارف ومتأكد أوي انك مرحب ببيك عند أي حد من عيلتي, كل الموضوع ان خالتو تعبانه شوية وماما مسافرة تشوفها, وانا عاوزة أشوفها, خالتو دي أنا متربية في حجرها زي ما بيقلوا تقريبا, فطبيعي أنى لما أعرف انها وقعت ورجليها اتشرخت واتجبست كمان إني ما أهزش أكتافي واقول يا حرام وربنا يشفيها وخلصت!!!...

مال سيف ناحيتها وقال بقوة:

- وأنا مش فاهم انت ليه رافضة اني اروح معاكي انت وطنط؟, احنا هنروح سوا بعربيتي هنقضي اليوم مع خالتك ونرجع, فين المشكلة مش فاهم أنا لغاية دلوقتي؟, مش أحسن ما تسافروا في القطر لان باباكي عنده شغل وأحمد مش هيقدر يوديكموا علشان المشروع اللي لازم يسلمه للعميل اللي معاد تسليمه قرب ومش هيعرف يروح هنا ولا هنا لغاية ما يخلصه؟!...

زفرت منة بيأس, لا تعلم كيف تقنعه دون أن تفصح له عن السبب الرئيسي الذي يجعلها ترفض وبإصرار مرافقته لها هي وأمها, كما لا تريد أن يعلو صوتهما فيسمع والدها ووالدتها الجالسين في الصالة الخارجية بينما تجلس معه في غرفة الجلوس بمفردهما, وقد تركاهما بعد أن جلسا قليلا الى سيف يتبادلان معه الاحاديث الخفيفة حتى ظهرت منة بطلتها الملائكية وفتانها الحريري الهفهاف الذي يتطاير حولها عند كل حركة منها وقد أسدلت شعرها بناءا على نصيحة أمها

والتي نصحتها بها ثاني يوم عقد القرآن, فهو قد غدا زوجها,
ولا بد أن تتزين له, فتركت خصلاته تلاعب وجنتيها وتنسدل
حتى نهاية خصرها, واكتفت بوضع ملح شفاه كعادتها وأيضا
كالعادة اعترضت والدتها على عدم وضعها للزينة لدى رؤيتها
لزوجها, ولكنها لم تأبه لاعتراضها وقالت بلامبالاة:

- يحمد ربنا انى بدخل بشعري, وبعدين انا عاوزة اعرف ما انا
بشوفه في المكتب عادي, ليه بقه كل ما يبجي لازم الوصايا
العشر دي, اللي يسمعك يا أم منة يقول انى مش بشوفه غير
جمعه في الشهر!!!... قرصت أمها أذنهما وزجرتها قائلة وسط
تأوهات منة ألما :

- انا عاوزة أعرف...إنت مش هتبطلني لماضة ابدأ؟, نهايته
اتفضلي اخلي جوزك مستني في الصالون وبابكي قاعد معاه,
احمد اخوكي مش موجود كالعادة, شبه بيبات في الشغل علشان
المشروع اللي في ايده, ياللا خلصي عيب الراجل يقعد مستني
أكثر من كدا..

وانصرفت تاركة منة وهى تتأفف من أوامر والدتها وكأنه هو
ابنها وهي زوجة ولدها!!!.....

انتبهت منة الى سيف الذي يقف في انتظار إجابة شافية لسؤاله
عن عدم رغبتها لاصطحابه لهما, ابتلعت ريقها وترددت أولا
قبل ان تشد قامتها وتلقي بقنبلتها دفعة واحده:

- علشان احنا مش هنروح ونرجع في نفس اليوم!....

سكت سيف قليلا وهو يطالعها بغرابة ثم اقترب منها حتى غدا وجهه على بعد بوصات قليلة من وجهها وكرر كلامها بحيرة وهو مقطب جبينه في تساؤل:

- مش ايه؟, مش هترجعوا في نفس اليوم؟, ازاي يعني؟؟...

جذبت منة نفسا في عمق واجابت وهى تنظر اليه محاولة التسلح بالقوة والهدوء:

- ماما هتقعد مع طنط سهام يومين علشان رانيا مسافرة مع جوزها, وهترجع من السفر بعد يومين ان شاء الله, وماما هتفضل هناك لغاية ما رانيا ترجع بالسلامة علشان تقعد مع مامتها, ما ينفعش طبعا ماما تسيب طنط سهام وهى بالحالة دي, وعمو شوقي مش عارف يعمل حاجه هو ونادر, وكل واحد فيهم في شغله, وعمو شوقي أخذ اجازة يومين لكن مش هيعرف ياخذ اجازات تانية, ونادر مشغول في مكتب السياحة اللي هو بيديره, وبردو مش هيعرف يتصرف, وماما أختها الوحيدة فماينفعش طبعا تسببها لوحدها في الظروف دي, وبردو ماينفعش طنط تيجي تقعد معانا, وعمو شوقي رافض, وهى كلها يومين ورانيا ترجع بالسلامة, عرفت ليه بقه مش عاوزاك تيجي؟! , لان المشوار هيبقى تعب ع الفاضي بالنسبة لك وخلص...

سأل سيف بهدوء بينما برقت عيناه بغموض لا تدري لما
أصابها بالقشعريرة في أنحاء جسدها:

- إممم, وانت هتقدي مع مامتك اليومين دول على كدا؟,
أجابت منة بتلقائية:

- آه..., صمت سيف لثوان ثم قال بهدوء ينذر بهبوب العاصفة:
- وشغلك؟,.. اجابت منة بطريقة عفوية:

- اعتقد يومين مش هيفرقوا كثير , خصوصا ان معظم شغلي
فنتشته تقريبا, والباقي هاخده أشتغل عليه وانا هناك....

سأل سيف بذات بروده القاتل:

- اممم, انت على كدا مرتبة كل حاجه أهو!, وكنت هتقوليلي
أمتى ان شاء الله انك ناوية تروحي تقدي يومين عند خالتك
مش يوم صد... رد..., زي ما كنت فاهم؟!....

زفرت منة بعمق ونظرت اليه محاولة التحلي بالهدوء الذي لا
تشعر بذرة منه بداخلها, فهي تشعر كما المتهم الذي يُحقق معه
بينما هو يحاول أن ينفي عن نفسه تهمة لا يعلمها!, قالت
بهدوء:

- سيف الموضوع مش مستاهل دا كله, من الآخر...انا كنت
هقولك اكيد بس..., ليقاطعها قابضا على مرفقها بقوة أمتها

وأدهشتها في ذات الوقت وهو يتحدث بغضب حاد من بين أسنانه:

- بس ايه يا هانم؟, كنت هتقوليلي وانت هناك صح؟, هتخطيني قودام الأمر الواقع يعني!....., قطبت منة وأجابت وهو تحاول جذب مرفقها من قبضته ولكن دون جدوى:

- سيف أعتقد انه لو الموضوع فيه حاجة غلط ماكانش بابا وافق انى أروح مع ماما واقعد معاها هناك, فلو سمحت بلاش الطريقة دي لانك عارف كويس اووي اني مابحبش كدا, وشيل ايدك علشان صوتنا ما يعلاش أكثر من كدا وبابا وماما يسمعونا....

بدلاً من تركها أمسك بمرفقها الآخر وجذبها ناحيته حتى ضربت أنفاسه الساخنة صفحة وجهها المرمرى, وقال بعنف واضح:

- انا جوزك يا هانم, عارفة يعني ايه ج و ز ك (ونطق كل حرف مشددا عليه), يعني أنا المفروض اني اعرف من الاول, مش تحصيل حاصل, وبعدين أنا رافض انك تقعدى هناك, عاوزة تسافري يبقى رجلى على رجلك, نروح سوا ونرجع سوا, لكن تقعدى هناك ولو يوم واحد من غيرى لأ , وبعدين انا مستغرب مش ابن خالتك عايش معهم هناك, ازاي والدك يرضى بحاجة زي كدا؟!...,, قالت منة وهى تحرك رأسها بقوة يميناً ويساراً ولم تعلم أي صورة جذابة رسمتها امام عينيه

بخصلات شعرها الثائرة حولها وعينيها اللتان تلمعان ببريق
الشراسة والعنفوان, وقد طغى اللون الاحمر على وجهها حنقا
وغضبا , قالت دون أن تعي تغير تعبيرات سيف وهو يجذبها
اليه بخفة تنافي قوة قبضته لمرفقيها:

- أولا انا مش راичه لوحدي, تاني حاجه... نادر عايش في
شقة لوحده, جنب شقة خالتي لكن عايش لوحده من فترة طويلة
اوي, تالت حاجه بقه ودا المهم.. انا ارفض طريقة كلامك دي,
كلامك فيه تلميح أنا ما أقبلوش, واعتقد أن بابا هو اللي مسؤول
عني لغاية دلوقتي حتى لو كاتبين الكتاب, وانا أرفض انك
تشكك في رأي لبابا بالشكل دا...., أجاب سيف بصوت
متحرج من شدة الانفعالات التي تمر بداخله:

- وانا ما غلطتش لما خفت عليكى, انت مراتى يا منة, عارفة
يعني ايه مراتى؟! , اول ما قلتيلي انك ناوية تقعدى مع مامتك ما
درتش بنفسى, ليه خبيتي عليا, كنت هتمشي سياسة الامر
الواقع؟, دا اللي اتفقنا عليه من اول يوم؟, احنا مش اتفقنا ان
ماحدث فينا يخبي حاجه ع التاني؟, ليه ما صارحتنيش من
الاول؟, علشان كدا لما عرفت النار... ولّعت فيا, خصوصا ان
ابن خالتك عازب, انا عارف تربيتك طبعاً وواثق فيكى, لكن
حقى اني أغير, ليه يا منة ما صارحتنيش من الاول؟..

ابتلعت منة ريقها وقالت وقد بدأ الشعور بالذنب ينخر قلبها,
بينما يراقب هو شفتيها ونار من نوع آخر تسري في جسده, نار
التوق للنهل من رحيق شهدها:

- أنا ... انا عارفة انى المفروض كنت اقولك من الأول, لكن
بابا وافق, ولو كان الموضوع فيه حاجة اكيد كان هيرفض,
وبعدين بصراحه يا سيف انت محبّكها اوي, مش بتتفاهم, من
يوم كتب كتابنا لما شوفت نادر وانت كل ما تيجي سيرته تتغير
وأحس انك عصبي شوية, دا غير التحقيق اللي فتحتولي من
فترة عنه وعن سنه وشغلته وأسئلة مالهاش أول من آخر, وانا
مش عارفة بالظبط ايه اللي قالقك من نادر, نادر دا زي أحمد
بالظبط, انسان في منتهى الاحترام و...., ليجذبها سيف بقوة
الى أحضانه فتسقط بين ذراعيه ويرتطم رأسها بعضلات
صدره القوية, فتأوهت دهشة وألما بينما يعتصرها بقوة ألمتها
وهو يقول بشراسة من بين خصلات شعرها:

- بس هو مش أحمد أخوكي!, رفعت عيناها في ذهول لتطالعه
فاصطدمتا بفحم عينيه المشتعل, تكاد تقسم أنها رأت رؤوس
ألسنة اللهب وهي تتراقص متصاعدة بين مقلتيه, فغرت فاها
دهشة فيما أحكم سيف قبضته بيديه الخشنتين حول وجهها
الفائن وهمس بالقرب من شفتيها بصوت أجش محمل برغبة
دفيئة في زرعها بين أضلعه:

- ما تلومنيش يا منة, أنا بحبك جدا, وبغير عليكى جدا,
واحساسى انك بتخبي عليا حاجه بيجننى جدا, ما تقدريش تقولى
ان غيرتى دي مش فى محلها, اللي بيحب بيغير يا منة, لو مش
بغير عليكى أبقي حاجه من اتنين يا أنا مش راجل كفاية أو أنى
مش بحبك , والاتنين أنا بريء منهم, حاولت منة الابتعاد عن
ذراعيه والفكاك من قبضة يديه لوجهها وهى تتحدث بتلعثم :

- ايوه بس كلامك فيه نبرة شك مش غيرة وأنا... ليقاطعها
وهو يقرب وجهها اليه مررا ابهامه على تقاطيعه الفتيّة الساحرة
حتى توقفت فوق ثغرها المكتنز الشهى راسما تفاصيله وهو
يقول بصوت خشن خافت بينما نيران الشوق تستعر فى
عروقه:

- عمري ما أشك فيكى يا منايا , أنا... ولم يستطع الصبر أكثر
من ذلك ليتناول شفّتيها فى قبلة ملتهبة مفرغا فيها كل شوقه
وحبه وغيرته, حاولت الفكاك منه باديء الأمر, ولكنها فشلت,
لتستسلم بعد ذلك الى حنان ذراعيه فتلتف ذراعيها مطوقة رقبتة
مبادلة اياه عناقه بكل الحب الذي فجّره سيف فى أعماق قلبها...

بعد فترة لا يعلمّا مُدّتها , اضطر سيف للابتعاد عنها عندما
شعر بحاجتهما للهواء, قبّلها بعمق فوق قمة رأسها وقال
وهويلهت بصوت متطلب متملك:

- وافقى يا منة اننا نقدم الفرح, احنا بئالنا اسبوعين تقريبا
مكتوب كتابنا, وافقى اننا نتجوز آخر الشهر!!,,,,

ابتسمت منة وقالت بينما لم تستطع الابتعاد عنه قدر أنملة فهو
يحتضنها بشدة كالطفل المتشبث بأمه:

- انت مجنون! , آخر الشهر يعني بعد اسبوعين تقريبا! , لا ... ما
ينفعش!! , زفر سيف بحنق وقال وهو يبعتها عنه قليلا ليستطيع
رؤية وجهها الذي طالعه بنظرات أخذت بلبّهِ وعقله على حد
سواء:

- مين فينا اللي مجنون دلوقتي؟ , بصي... هي كلمة واحدة...
فرحنا بعد شهر من دلوقتي, جهزي كل اللي انت عاجزاه في
الشهر دا, أنا لو عليا عاجزك بشنطة هدومك, ثم غمزها متابعا
بخبت:

- ومن غير شنطة هدومك خالص.. يبقى أحسن!! , ضربته بقوة
بقبضتها اليمنى الصغيرة على صدره فتأوه بألم مفتعل بينما
شتمته من بين أسنانها محاولة الفكاك من قبضته لخصرها
الدقيق الذي يفقده عقله كلما أمسك به بين يديه:

- إنت وقح وقليل الأدب, وانا مش هتكلم معاك تاني, وعلشان
تبقى عارف طول ما انت كدا يبقى الفرح ولا.. سنة من
دلوقتي!!

قال سيف برنة ضحكة واضحة في صوته:

- لا لا لا.., ومين اللي هيوافق على الجنان دا ان شاء الله؟,
بُصّي... أبسط حاجه يعملها انى هخدك زي ما انت! , واقول

لعمي معلّش يا عمي مقدرناش نصبر! , وانت كدا كدا مراتي
شرعي, علشان أوريكي بجد قلة الأدب والوقاحة عاملين
ازاي؟! , وما اعتقدش باباكي بعد كدا هيعترض! , هيسمّنا
كلمتين في العضم واحمد اخوكي ممكن ايده تعلّم على وشّي
لكن مش مهم, كله فداكي حبيبتي!! ,....

هتفت منة وقد كاد وجهها ان ينفجر من شدة الاحمرار خجلا
و.... غضبا من هذا الوقح المتبجح:

- سيف... انا مش بهزر دلوقتي! ,.... أجاب سيف ببرود
ظاهري بينما أدحض جميع محاولاتها للإفلات منه:

- ولا أنا يا مُنايا, ها.... هكلم عمي انه رده ان فرحنا بعد شهر من
دلوقتي, ولو على القاعة انا اعرف مديرين فنادق خمس نجوم
هيساعدوني في الموضوع دا, اما الشقة فيوم واحد ننزل نختر
العفش, بس طبعا حضرتك لازم تيجي تشوفي الشقة علشان
تحددي مقاسات الأوض, وجهازك انت بقه... ماليش فيه, اللي
تجيبه هاتيه والباقي واحنا مع بعض, ها... قلتي ايه؟؟ ,....
حاولت منة المماطلة وقالت بتلكؤ:

- طيب نتفاهم.., ليقاطعها سيف محركا رأسه يمينا ويسارا
رافضا وبشدة وهو يقول بجدية مفتعلة:

- أبدا, ولا لحظة تفاهم, اللي عندي قلته, عاوزة فرح وافقي بعد شهر, مش هتوافقي يبقى هنتجوز ومن غير فرح....اختاري!!,
ضربته بقوة وقالت بحق من بين أسنانها:

- انت بايخ بجد, موافقة....., هتف سيف وهو بيتعد عنها غير مصدق أذنيه :

- بجد يا منة؟, لم يمهلها الرد عليه وامسك بيدها واندفع خارجا وهو ينادي قائلاً:

- عمي... عاوزك ضروري, لتهتف منة بحق من بين أسنانها بصوت منخفض وهي تحاول إيقافه:

- يا مجنون يا ابن المجانين!!..استنى لما أكمل كلامي الأول!!,
ولكنه لم يأبه لمحاولاتها واندفع خارجا بسرعة جاذبا منة معه وما ان وقف أمام والديها حتى تحدث عبدالعظيم مبتسما وهو يقول:

- خير يا سيف يا بني؟.... همّ سيف بالكلام عندما جذبت منة يده هامسة له :

- بس بشرط يا كابتن!, هسافر مع ماما بكرة لوحدا زي ما كنا مخططين, ايه رأيك؟؟. تطلع اليها سيف بنصف عين وقال قبل ان يلتفت الى عمه المتابع للحوار الدائر أمامه بابتسامة أبوية ونظرة تساؤل, قال سيف بهدوء ظاهري بينما يود مسح ابتسامة

الاستفزاز والتحد التي ارتسمت على شفثيها بعناق ساحق
يخطف أنفاسها:

- ماشي يا مُنايا, موافق!!...!

سافرت منة برفقة والدتها الى الأسكندرية وكان في انتظارهما
في محطة القطار نادر الذي أقلّهما الى الشقة السكنية التي تقيم
بها عائلته, تجاذب أطراف الحديث مع منة وخالته التي أشفقت
عليه في نفسها فهي تعلم أن أمنيته كانت ارتباطه بمنة ابنتها,
ودعت الله له في سرها أن يعوّضه عنها بالزوجة الصالحة....

أحرق سيف هاتف منة اتصالات طوال هذين اليومين, لم تكن
تمر ساعة من نهار أو ليل إلّا ويهااتفها فيها... حتى أصبحت مادة
للتندر والسخرية بين أمها وخالتها, بينما كان نادر الذي قلّ
تواجده أثناء مكوثهما لدى عائلته عندما يصدف ويتواجد أثناء
ورود إتصالاً من سيف, كانت عيناه تلمع بغموض وترسم
ابتسامة صغيرة على شفثيه, لم يتعرّض لأمر خطوبتها من
سيف الا مرة واحدة في أول يوم لهما اذ قال في معرض
الحديث:

- وإنّ عامله ايه يا منة؟, مبسوطه مع خطيبك؟, أجابت منة
بتلقائية ذبحته من الوريد الى الوريد وهو يرى ابتسامتها
المشرقة التي أنارت وجهها ما إن أتى على ذكر خطيبها:

- الحمد لله يا نادر, بجد سيف انسان ممتاز, ياللا انت كمان شد
حيلك عاوزين نفرح ببيك...., لتتعلق تعابير وجهه ما إن أَلقت
على مسامعه بعبارتها الأخيرة, فشعرت بتراجعها فورا, الأمر
الذي تعجبت له, ومنذ ذلك الوقت لم يحضر نادر لزيارة عائلته
إلاّ لمأماً متذرعاً بكثرة العمل!!...

- يا سيف يا حبيبي قلت لك بإذن الله راجعين بكرة إن شاء
الله...., أو مأت برأسها إيجابا وكأنه يستطيع رؤيتها وتابعت
وكانها تهادن طفلا صغير:

- حاضر يا سيف, واحنا في القطر هكلمك,.. استمعت قليلا ثم
أجابت بسخرية ضاحكة:

- يعني ايه مين اللي هيوصلنا المحطة دي؟, أكيد نادر
طبعاً!...., أبعدت هاتفها المحمول عن أذنها قليلا وهى تُجعد
تعابير وجهها لصوته العالي , وانتظرت الى أن هدا ثم تحدثت
بهدهوء قائلة:

- خلاص, خَلّصت!, بكرة بإذن الله هناخد قطر 7 الصبح, رانيا
هتوصل انهرده بالليل ان شاء الله, أشوفك على خير... سلام,
وأغلقت الهاتف من فورها وهى تزفر متأففة بحلق هاتفه
بصوت منخفض مسموع:

- أووووف, مجنون!, انا متجوزة واحد مجنون!, ثم أشرق
وجهها بابتسامة عريضة وهى تتابع قائلة:

- بس بموت في جنانه, وإن شاء الله شفاك على إيديا يا سيف يا ابن أم سيف!!!...

في الصباح الباكر إستقلت منة ووالدتها القطار في طريق عودتهما, وأرسلت منة رسالة قصيرة الى سيف تبلغه فيها بركوبهما القطار كما طلب منها, ثم أغلقت هاتفها, رافضة التحدث اليه, فقد آن الأوان لسيف عبدالهادي بأن يعلم بعض الأمور الهامة عن منة عبدالعظيم وأولها..... أن لا يحاصرها كمحاصرة الدجاجة بغرض الإمساك بها!, وطالما قد حُدد معاد الفرح, فلا بد لهما من إرساء قواعد للتعامل في حياتهما المقبلة, كي لا يصطدما في أول حياتهما سوية, غيرته القويّة مع...عنادها الشدييد!!!..

كان سيف في انتظارهما في محطة وصول القطار, تفاجئت منة بوجوده, بعد أن تبادل السلام والتحية معهما, قام بوضع حقيبتيهما في حقيبة سيارته ثم فتح الباب الأمامي لأم منة والتي قالت متطلعة الى منة بابتسامة:

- لا.. دا.. مكان مراتك هي اللي تقعد جنبك, أنا هقعد ورا,....لتسارع منة بالركوب في الخلف وهي تقول:

- بقولك ايه يا ماما, انت رجليكي وجعاكي, اركبي يا ماما اركبي, بلا.. مراتك,.... حماّك.. هي اللي تقعد قودام!!, ناظرة اليه بتحد جعله يكتم لعنة كادت تفلت من بين شفثيه, صعدت أم منة الى السيارة, ونظرت الى سيف الذي يكاد يستشيط غيظا ولكن كبت غيظه بابتسامة مرسومة مزيفة, وصعد هو الآخر

الى مقعد السائق, وانطلق سيف محركا السيارة باتجاه منزل
منة...

لم تلتفت منة اليه طوال الطريق, وكانت لا.. تشارك في
الحديث الدائر بينه وبين والدتها الا اذا وجه أحدهما اليها سؤالاً,
فقد تذرعت برغبتها بالنوم, وألقت برأسها الى مسند المقعد
خلفها, مغمضة عينيها, لترحل بالفعل في سبات عميق, فهي لم
تذق النوم بالأمس, حيث خاصم النوم جفنيها, وظلت ساهرة
تفكر في حياتها المقبلة مع سيف, وكيف تُحد من غيرته
الجنونية وحب التملك القوي لديه, بينما طالعها سيف في مرآة
السيارة الخلفية بنظرات متوعدة لتجاهلها له منذ مكالمتهما
الهاتفية آخر مرة!!.....

شعرت منة بشيء يداعب بشرتها الحليبية, فأزاحته بيدها جانبا
وهي تأفف من تلك الحشرة المزعجة التي أقلقّت نومها!, ليعود
ذاك الشيء لمضايقتها ثانية وبإلحاح مستفز!,..... رمشت منة
بعينيها وهي تتذمر قائلة باعتراض واهن أضعف من مقاومة
ذاك المتواجد بالقرب منها مطالعا إياها وكأنها الأميرة النائمة
متلهفا لإيقاظها بقبلة!, همست بصوت ضعيف:

- يوووه, هش.. هش,.... لتدغدغ أذنيها ضحكة رجولية خشنة,
فتحت منة عينيها دهشة, ليقعا على عينين في لون الليل البهيم
يطالعانها بشغف جعل الدم يسيل في أوردتها كالعسل الدافئ,
ولم تلبث أن انتبهت لتواجدها في سيارة سيف القابع امامها
يداعبها بعينيها, اعتدلت في جلستها ونظرت حولها قبل أن
تستفسر وعيناها تفتشان هنا وهناك عن والدتها:

- ايه دا.. احنا وصلنا البيت؟,...., ثم طالعه بإتهام يمور في عينيها اللوزتين وتابعت بلهجة لوم:

- ما صحتنيش ليه؟,.... انتبهت الى المنديل الورقي الذي يحمله بيده فضيقت عينيها مواصلة هجومها:

- آه, كان حلو انك تضايقني رايح جاي بالمنديل على وشي صح؟, كان عجبك الموضوع مش كدا؟,....

أجابها سيف وهو على وضعه المائل ناحيتها حيث كان نصف جسده داخل السيارة والنصف الآخر خارجها, فهو لم يستطع ايقاف نفسه وهو يراها تغط في سبات عميق, فساعد والدتها على الصعود الى أعلى قائلاً لها أنه سيلحق بها جالبا حقائبهما بعد أن يوقظ منة, فانصرفت امها بهزة من رأسها مشددة عليه أنه سيتناول معهم طعام الغداء....

أجاب سيف غامزاً اياها بخبت:

- ما هو يا كدا, يا اما كنت هصحيكي تمام زي الاميرة النائمة!, وعلشان احنا في الشارع ما عملتهاش... أي نعم الشارع هادي ومحدث موجود دلوقتي لكن بردو, دا بدل ما تشكريني اني طلعت محترم وما انتهزت الفرصة!?, أجابت ساخرة بشكر مزيف:

- طاب يا سي... محترم!, ممكن تبعد بقه علشان أنزل؟!...., أجاب سيف ببراءة مزيفة:

- ما تنزلي, هو انا حايشك?, ما انا بعيد أهو... انا جيت جنبك?, ولا هي تلاكيك وخلاص!?,... مش فاهم أنا والله؟!..

سكتت منة ناظرة اليه بنصف عين وهي ترغي وتزبد بداخلها,
ثم قالت بهدوء مصطنع من بين أسنانها المطبقة بقوة:

- هنزل, بس ابعد انت بس شوية, انا تخينة يا سيدي ... قُلت
ايه؟, مش عارفة أنزل من النص شبر دا؟, مشيرة الى المساحة
الضيقة التي لا تمرر عصفورا بجانبه, ... أطلق سيف ضحكة
عميقة, وانتصب واقفا وهو يقول:

- ماشي يا منة هانم, اتفضلي يا دبوبة التخينة!..., ما ان أفسح
لها حتى خرجت مسرعة من السيارة, واعتدلت أمامه واقفة
قائلة بحنق:

- ولما أنا دبوبة التخينة اتجوزتتي ليه؟, لم تترك له مجالا للرد
وهمت بالسير لتلتف يده حول معصمها جاذب إياها لتقف أمامه
ووجهه على بعد بوصات قليلة منها وأجاب ونظراته تشيع
الفوضى في جميع حواسها:

- علشان بحبك وبموت فيكي, تخينة بقه ... رفيعة, ... طويلة ..
قصيرة, ... مش مهم!, المهم إنك منة حبييتي وخلص!!,
إضطربت من نظراته المغازلة وابهامه الذي يداعب ظهر يدها
مثيرا فيها أحاسيس شتى, وأجابت محاولة الهرب بنظراتها من
أسر عينيه المشتعلتين:

- طيب, ممكن بقه أمشي؟, ماما اكيد مستغربة دلوقتي أحنا ليه
ماحصلنهاش؟, قال سيف بابتسامة جانبية وهو مستمر في
مداعبته ليدها الناعمة كيد مولود صغير:

- لا.. مامتك عارفة ان ورانا مشوار هنعمله الأول, على فكرة
انا معزوم ع الغدا عندكم انهرده....

قطبت منة بحيرة سائلة:

- تشرف, انما.. مشوار ايه؟! , وفيين المشوار دا؟, أجااب سيف وهو يبتعد عنها ليفتح باب السيارة الامامي داعيا اياها للجلوس بجواره:

- هتعرفي دلوقتي, ممكن تدخليني بقة علشان نلحق مشوارنا, انا انهرده واخذه اليوم كله أجازة علشان نخلص المهمة دي!!!..
انطلق سيف بالسيارة وبعد قليل أعادت منة سؤالها لسيف عن وجهتهما عندما أجابها بتلقائية:

- رايعين نشوف الشقة.. علشان ننزل نختار العفش!...

صمتت منة قليلا لتستوعب عبارته, ثم سألت بدهشة:

- شقة ايه؟,...., أجابها سيف وهو يلقي إليها بنظرة خاطفة قبل أن يعيد انتباهه الى الطريق:

- شقتنا يا منايا.. هتكون شقة ايه يعني؟, شهقت منة واجابت:

- إيه؟, شقتنا!!!... نروح نشوف شقتنا أنا وانت بس؟! , وماما وافقت؟! ,.... قطب سيف واجاب بابتسامة حائرة وهو يسترق إليها النظر:

- آه وافقت!, ولعلمك أنا أخذت إذن عمي الأول كمان وهو موافق!, مستغربة ليه مش فاهم أنا!!!!,...., أجابت منة بامتعاض واضح ولكن بجدية شديدة:

- علشان مينفعش!, سيف... ممكن تروّحني؟, أنا مش هشوف شقق معاك لوحدنا....

أوقف سيف سيارته فجأة لدرجة أن عجالاتها قد أصدرت صريرا عال وهو يضغط على مكابح السيارة بشدة حتى كادت منة أن تضرب برأسها في الزجاج الأمامي ولكن أنقذها حزام الأمان, نظرت اليه منة باستنكار تام وهمت بالصراخ فيه عندما أوقفها تعبير وجهه السوداوي وهو يطالعها بنظرات غضب ناري يتصاعد بقوة بين فحم عينيه المشتعل وقال بصوت كالفحيح بينما ينفث نارا من فمه:

- نعم؟, سمعيني ثاني كذا؟, وكرر عباراتها التي أشعلت نيران غضبه :

- مش عاوزة تشوفي شقتك معايا لوحدنا؟...., لم يترك لها الفرصة للإجابة وبدلا من ذلك تابع بغضب شرس:

- ليه أن شاء الله؟, شايفاني أيه قودامك؟, باباكي ومامتك لو ما كانوش واثقين فيا ما كانوش وافقوا عليّا زوج لبنتهم من الأساس!!, عموما ولا يهملك يا منة...., وكما أوقف السيارة بغتة, أدار المحرك منطلقا بها بسرعة عالية ضاغطا بقوة على دواسة البنزين مما جعلها تتمسك بمقعدها جيدا وهى تختلس اليه النظرات برهبة, فهذا الوجه من سيف لم تختبره سابقا, كان سيف عاقدا لحاجبيه بقوة, ويعتلي وجهه تعبير غضب أسود لا يريد أيّ كان اختباره, عضت منة طرف لسانها وقد شعرت بالذنب لإغضابه, ولكنها شعرت بالخجل والرهبة لانفرادهما تماما في منزله, وحاولت الحديث بتردد وخشيّة:

- سيف... سيف أرجوك ما تزعلش منّي, أنا.. أنا.. ما كانش قصدي اللي فهمته.. أنا...., لتقاطعها يده التي رفعها أمامها,

أمرأاً اياها بالسكوت, وتحدث من دون أن يعيرها إلتفاتة وبجمود تام:

- خلاص يا منة... اقلي ع الموضوع دا... أجابت منة برجاء وقد بدأت الدموع تترقرق في مقلتيها :

- لأ.. مش خلاص يا سيف, مش عاجزك تزعل مني, أنا... أنا... آسفة يا سيف... آسفة, ليتهدج صوتها وقد غلبتها دموعها التي انهمرت كالسيل على وجنتيها المرمريتين, وهي تشهق بغصات بكاء حار جعلت سيف يرنو اليها بنظره, ليراها منهارة في نوبة بكاء حاد, أطلق شتيمة من بين أسنانه, ثم ألقى بنظره في المرأة الجانبية, قبل أن يعطي إشارة أنتظار, ليقف بالسيارة تماما الى جانب الطريق..

التفت اليها وقال عاقدا جبينه أمرا اياها بالتوقف عن البكاء:

- ممكن تبطلي عياط؟! , ثم باستخفاف وسخرية غير مقصودة تابع:

- مافيش حاجه حصلت للعياط دا كله!..., رفعت منة عينين سابحتين في بركة من الدموع وقالت بصوت متقطع من بين شهقات بكائها العنيفة وهى تمسح بعينيها بظهر يدها فغدت كالطفلة الحزينة بعينيها الدامعتين:

- انت... انت ... زعلان مني, وأنا ..أنا آسفة... ما اقصدش المعنى اللي جه في بالك والله!...بس ...أنا ..كن...كنت..., زمجر سيف حانقا وأحلّ حزام الأمان الخاص بالسائق وسط لعنة مكبوتة انطلقت بهمس منخفض من بين شفتيه المطبقتين ليجذبها بقوة بين أحضانه وهو يحل حزام الأمان الخاص بها ,

وقد احتواها بقوة بين ذراعيه لتتخرط في نحيب حار يقطع نياط القلب بينما سيف يهددها مربتا على ظهرها وهو يهمس لها بكلمات صغيرة أن تكف عن البكاء, بعد فترة بدأت نوبة البكاء التي أصابت منة بالانحسار وان كانت لا تزال شهقاتها تنتابها بين لحظة وأخرى, انتظر سيف الى أن هدأت تماما ثم خاطبها بخفوت قائلاً:

- خلاص .. هديتي؟,, لتوميء برأسها ايجابا, تناول سيف محرمة ورقية من صندوق المحارم أمامه, وناولها اياها , تناولتها منة ومسحت وجهها الغارق في دموع الألم لإغضابها سيف, قالت منة وهى تطالعه بتوسل أن يفهمها:

- انا....أسفة يا سيف, ما قصدتش خالص المعنى اللي جه في بالك انى مش واثقة فيك, كل الحكاية إني...., وأسدلت جفنيها خفرا متابعة:

- إني... مكسوفة,, مش اكتر...., همّت ابتسامة حانية بشق طريقها الى وجه سيف, عندما انتبه فقال بعتاب وقد فارقه غضبه من هذه الطفلة القابعة أمامه في ثوب امرأة فاتنة :

- وهي دي أول مرة نكون فيها لوحدنا؟, ما انا كل ما بزورك بقعد معاكي لوحدنا!! , قالت منة وهى تهرب بنظراتها جانبا قاضمة بأسنانها شفتها السفلى بتوتر كعادتها:

- بس.... بيكون ماما وبابا موجودين, لكن.....مش بنكون لوحدنا كدا...خالص....,, نهرها سيف بصوت أجش بينما عيناه تراقبان فمها المضطرب وأسنانها الصغيرة التي لا تزال تقضم شفتها المكتنزة:

- قلت لك 100 مرة قبل كذا بطّلي الحركة بتاعتك دي... رفعت عينيها بدهشة ناظرة إليه بحيرة وتساؤل عن مقصده بنظرات أخذت بقلبه, لم يمهلها الكلام فقد فرغ صبره ومال عليها متناولاً فمها في قبلة حارة عميقة وقد أثاره منظر شفتها السفلى المنتفخة من كثرة قضمها لها بأسنانها اللؤلؤية!!.....

تركها بعد فترة طويلة وهى تعبّ من الهواء, بينما احتضنها بشدة راغباً في دفنها بين أضلعه كي لا تبتعد عنه ثانية واحده, وتحدث بهمس أجش:

- أنا عايزك تكوني متأكده من حاجه واحده... أبعدھا عنه قليلا ناظرا الى عينيها الذابلتين لكثرة الدموع التي ذرفتھا, بينما شفتيها متورمتين تحملان أثر قبلاته اللاهبة لها وكأنه قد دمغهما بصك ملكيته الخاصة , وتابع بهمس جاد:

- أنا مش ممكن أذيكى, وهحميكى حتى من نفسى!, عهد عليّ يا مُنايا انى عمري ما هكون سبب لحزن يدخل قلبك , أو دمعة أسف تنزل من عينيكي... ابتسمت منة وهمست له بحب قبل أن تلقي بنفسها بين أحضانه الدافئة:

- وأنا مصدقك, وواثقة فيك, وهمشي وراك وأنا مغمضة من غير خوف ولا قلق..... ليحتويها بين ذراعيه وهو يسأل بمزح خفيف:

- أعتبر دا وعد؟.....,..... ابتسمت منة وأجابت دافنة وجهها في صدره العريض مستنشقة رائحة العطر الرجولي الخاص به الممتزج برائحته الخاصة والذي يداعب أحاسيسها بعبيره المثير الجذاب:

- وعد!!....

لتعلم خطأ وعدّها ذلك بعد مدة قليلة ما أن دخلا منزل سيف لمعاينته!!,,,,, حيث أرهاقها بالركض خلفها بين عُرف المنزل المختلفة, وهي تصرخ ضحكا وخوفا بينما يلاحقها من مكان الى مكان متوعدا إيّاها ما أن تقع في قبضته!!....

وقفت منة حول طاولة الطعام المستديرة وقد خلعت حجابها بناء على طلبه ما ان دخلا الشقة كي تحرر شعرها قليلا فهي ترتدي الحجاب منذ ما يزيد عن ست ساعات, وقفت واضعة يديها حول خصرها تطالع سيف بنظرات حنق مفتعل, بينما يقف سيف على الناحية الأخرى من الطاولة يطالعها بنظرات خبث وابتسامة مكر تزين ثغره وسمعها تقول بنزق:

- بقولك ايه.... انا شفت الشقة كويس أووي, كفاية بقه... خلينا نمشي!! قال سيف بمكر وهو يحاورها محاولا التقدم اليها من ناحية اليمين لتتأهب متخذة وضع الاستعداد للفرار من الناحية الأخرى:

- لسه أهم أوضة ما شوفتهاش.... أوضة النوم !!, وانقض عليها لتطلق صرخة عالية وهي تهرب منه مجيبة:

- لا.. يا باش مهندس...شكرا, مين قالك إني هنام في أوضة؟, أنا هنام في الصالة حضرتك...., وركضت وسط صرخاتها الضاحكة, وهو يحاول الإمساك بها, ركضت منة حيث غرفة الجلوس وقذفت حذاءها الصيفي المسطح جانبا من قدميها الصغيرتين, لتقفز فوق الأرائك المنتشرة بصورة عشوائية, ولم يكن سيف بأقل منها جنونا, فقام بنزع حذاءه هو الآخر ملاحقا لها

بلا هوادة, حتى عثرت أثناء ركضها لتقع من فوق احدى الارائك على السجادة السمكية المفروشة فوق الأرض الخشبية, وهدأت واستكانت تماما!! , ما جعل سيف قلبه يقرع بخوف, وهو يتقدم منها وقد هوت على وجهها...

قال وهو يمد يدا خائفة مزيجا الشعر المحيط بوجهها رافعا اياها قليلا مديرا لها ناحيته رافعا كتفها بذراعه وهو يناديها بقلق واضح:

- منة... منة حبيبتى, طرق وجهها بخفة بأصابعه مواصلا ندائها بصوت أعلى قليلا ولكن بالحاح قوي هذه المرة وهو يناشد عينيها المسبلتين أمامه بالنظر اليه:

- منة .. ردى عليا.. منة... لتباغته بفتح عينيها فجأة والنظر اليه هاتفة بابتسامة مشاغبة:

- عاوووو!! , كاد سيف أن يخنقها قهرا وغيظا بينما احاطها بذراعه الآخر مكررا بنزق من بين أسنانه:

- عاوووو؟! , ضحكت منة وقالت وهى تعتدل في جلستها الشبه راقدة بين ذراعيه وسط ضحكتها العريضة الساخرة:

- عليك واحد...., قال سيف متمتما من بينى أسنانه وهو يشد عليها مقربا اياها منه:

- عليا واحد!! , طيب.... أنا بقه هورّيكى أزاي هيبقى عليكى إنتي.. واحد .. اتنين.. تلاته... أربعة!!!, قالت بضحك صاخب وهى تحاول الفكاك من أسر ذراعيه الفولاذيتين مديرة رأسها من جهة لأخرى:

- لا لا لا ... سماح يا أهل السماح, عيّل وغلط, وانت الكبير يا كبير....,

أجاب سيف محاولاً تقبيلها بينما تهرب من محاولاته باستبسال قوي:

- لا مين اللي قال كبير؟, أنا معاكي صغير وأعيّل منك كمان, ليقتنص شفتيها في قبلة حارة أودعها كل ما يعتمل في قلبه من مشاعر جيّاشة خاصة بها وحدها...

في وقت لاحق وأثناء تناولهما طعام الغذاء الذي ذهب سيف لشرائه بينما انشغلت منة بترتيب الفوضى التي أشاعها أثناء لهوهما بالركض وراء بعضهما, وكان قد اعتذر لوالدتها عن تناول الغذاء لرغبته في دعوة منة لتناول الغذاء بالخارج, فقبلت والدتها اعتذاره ببهجة لكرم زوج ابنتها الواضح الذي لا تمر مناسبة الا وقد أحضر هدية لمنة أو دعاها لتناول الطعام خارجاً, ولهث لسانها بالدعاء الى الله أن يحفظ عليهما سعادتهما وأن يتم لهما زيجتهما على خير...

نظر اليها سيف في جلستهما المريحة على الأرض وصناديق البيتزا المفتوحة تفوح منها رائحتها الشهية بينما يتناولان قطع البيتزا الساخنة بشهية قوية, قال سيف باهتمام:

- ايه رأيك ننزل بكرة نشوف العفش؟... ابتعلت منة لقمتها وقالت وهي تنظر اليه بطبيعية بينما تمسح باصبعها فتات الطعام حول فمها:

- بكرة مش هينفع... خليها كمان يومين... بكرة نشوى
عاوزاني معاها..

قطب سيف ووضع باقي قطعة البيتزا في صندوقها الكرتوني
أمامه وقال سائلا:

- نشوى عاوزاكي معاها؟, في حاجه ولا ايه؟, رفعت منة
كتفيها علامة الجهل وأجابت ببراءة :

- معرفش, لكن قبل ما أسافر اسكندرية قالت لي انها عاوزاني
في موضوع ووعدتها إني اول ما أرجع هفضى لها, وامبارح
كلمتني ولما عرفت انى راجعه انهرده رتبت معايا معاد
لبكرة...

سأل سيف بغموض وقد فقد شهيته للطعام تماما:

- هيبقى معاكى ايناس وسحر طبعاً!!,

أجابت منة نافية ما جعل تقطيب سيف يشتد:

- لآ... انت عارف ان علاقة ايناس وسحر مع نشوى عادية,
هي عاوزاني لوحدي!!...

أجاب سيف بحسم:

- منة أنا مش عاجبني الموضوع دا, من الآخر قلقان, انت
شايقة طريقة نشوى متحررة أوي ازاي... أنا مش مرتاح
لصداقتك معاها..

لم ترغب منة بالشجار مجددا وبدلا من ذلك حاولت تغيير
الموضوع قائلة:

- ما تقلقش يا سيدي قال يا خبر بفلوس... صحيح ما قاتلكش
ان ايناس كلمت باباها ومامتها وهينزلوا في خلال أيام بعد ما
أخذوا اجازة من المستشفى اللي هما شاغلين فيها في الخليج
علشان احمد يتقدم لها رسمي؟, أشرقت أسارير سيف وعلّق
قائلاً:

- بجد؟, ممتاز... بس غريبة أحمد ما قاليش يعني؟! ,
لتطلق منة ضحكة مستمتعه وهى تقول ملاعبة حاجبها بشقاوة
محببة:

- لأنه لسه ميعرفش, ايناس لسه عارفة امبارح بس وانا أول
واحد قال لي, تقريبا هتلاقىها بلّغت هي أحمد انه رده وبما انك
ما روحتش الشغل فماتعرفش....

انتبه سيف لرغبتها في تغيير موضوع نشوى فسايرها قائلاً:

- احمد انسان ممتاز.. ايناس مش هتلاقي زيّه, ثم أكمل بغرور
وثقة وهى يغمزها ضاحكاً:

- تمام زيي كدا, انت كمان مش هتلاقي زيي, ولسبب بسيط جدا
اني مش هديكي الفرصة انك توربي لا شمال ولا
يمين!!..., نظرت اليه منة بسخط مفتعل وقالت وهى تقف:

- هه.... يا عم الغرور ارحمنا شوية, ياللا حضرتك تعالى
ننصف مكاننا علشان تروحني, ولا انت خاطفني انه رده..

وقف سيف بجوارها ومال عليها قاضماً شحمة أذنها بأسنانه
المصفوفة بانتظام متقن:

- يا ريت بصراحه, نفسي أخطفك في مكان ما حدش يعرف لا
يوصلك ولا يلمحك فيه حتى..

نظرت اليه منة مصطنعة الخوف قائلة:

- يا ماما!!!!!!, وركضت وهى تحمل صندوقى البيتزا يلحقها
سيف بأكواب المياه الغازية...

- أنت بتقولي آيه يا نشوى؟, هتتجوزي فعلا؟!... سألت منة
نشوى الجالسة أمامها في هذا المطعم الشهير بوجباته السريعة
والتي أجابتها والسعادة تطل من عينيها:

- آه يا منة, من فرحتي مش قادرة أصدق, انت أول واحد
تعرف...

فرحت منة وقالت وهى تشد على يديها بسرور:

- ألف ألف مبروك يا شوشو حبيبتي, ثم ما لبثت أن انتبهت
فقطبت قائلة والابتسامة لا تزال فوق شفتيها:

- انما أنا أول واحد اعرف ازاي؟, قصدك من وسط اصحابك
يعني؟! ما هو أكيد العريس اتقدم لباباكي وعيلتك عرفت مش
كدا؟...

هزت نشوى برأسها يمينا ويسارا نافية وأجابت قائلة في برود
ما ان أتت منة على ذكر والديها التي تتحدى إن علم أحدهما أين
هي ابنتهما الآن وبرفقة مَنْ!, قالت نشوى بجمود تام:

- لا يا منة... أنت أول واحد من صحابي ومن... وتابعت ساخرة:

- عيلتي الكريمة!! هتفت منة بعدم تصديق:

- ازاي... دا؟! أومال انت هتجوزي ازاي من غير ما يتقدم لوالدك؟...

أجابت نشوى بحدة مكبوتة وقد بدأت واجهة البرود بالتصدع:

- من امتى عزيز بيه ودريّة هانم يههم يعرفوا حاجه عني!! عزيز بيه في شغله وشركاته ومشاريعه, ودريّة هانم بصحباتها والنادي اللي هي عضو في مجلس ادارته, والجمعية الخيرية اللي انتخبوها رئيسة ليها, انما أنا وابتسمت باستخفاف ونظرة حزن تظلل عينيها الجميلتين:

- أنا آخر واحد يفكروا فيها أو تيجي على بالهم, من وانا صغيرة... اهتموا انى اتعلم في أكبر مدارس وألبس أغلى لبس, وكل اللي عاوزاه قبل ما أطلبه ألاقيه الا حاجه واحد بس... حضن دافي من ماما وكلمة حنان من بابا, دا الشيء اللي للاسف مالهوش اعراب عندهم, تعرفي ان دادة سعاد هي اللي مرباني؟, وانها تعرف عني حاجات هما ما يعرفوهاش؟, في مرضي كانت هي اللي بتداويني وفي فرحى كانت بتزغرد وترقص, يوم ما اخدت ثانوية عامة كل اللي عملوه عزيز بيه ودريّة هانم بوسه خفيفة ع الخد والاب العزيز عربية آخر موديل, وامي العزيزة طقم ألماس من داماس, والحفلة اللي عملوها كانت علشان اصحابهم مش علشانى, علشان الوجاهة الاجتماعية والصور المرسومة قودام الناس تكمل, ولما

اتخرجت نفس اللي حصل في الثانوية العامة اتكرر, بس المرة دي العربية أغلى والطقم بقه طقم الماس ودولاب هدوم كامل من باريس, ووظيفة مديرة علاقات عامة في شركات عزيز بيه بما انى دارسة ادارة اعمال في الجامعة الامريكية, بس انا رفضت, وفضلت انى اشتغل مع سيف واحمد وعمر, وطبعا الكلام معجبش عزيز بيه بس كالعادة ما حاولش انه يناقشني وقال بكل برود براحتك...

قالت منة باشفاق على هذه الطفلة الفاقدة لحنان والديها منذ أن أبصرت عيناها النور مربطة على ظهر يدها بحنو:

- أيوة يا شوشو حبيبتي, بس دا جواز...., قاطعتها نشوى هاتفة وهى ترفع اليها عينين سابحتين بالدموع التي تأبى نزولها فهي ان تركت لها حرية الهطول ستبكي أنهارا وبحارا حزنا وأسفا على كل لحظة مرت بها من دون حنان والديها:

- مش هتفرق صدقيني, ثم حاولت تمالك نفسها متابعة:

- عموما انا طبعا مش هتجوز من وراهم, اكيد هيجي يخطبني منهم, أنا بردو مهما كان ليا أب وأم حتى لو همّا مش حاسين إن لهم بنت!!....

حاولت منة ازاحة هذه الحزن الجاثم فوق كتفي صديقتها جانبا وسألتها بمزاح خفيف:

- والعريس بقه... شوفتيه فين وازاي وامتى ؟, ياللا اعترفي وبالتفصيل الممل!!...

انتفضت منة واقفة وهي تصرخ بذهول بعد أن روت نشوى
حكايتها مع العريس المرتقب :

- انت بتقولي ايه يا نشوى؟, عرفتاه عن طريق النت؟, جواز
فيس بوك ازاي يعني انا مش فاهمه؟؟.....

لم تنتبه منة الى نظرات رواد المطعم فقد انشغلت بالنظر الى
صديقتها المائلة امامها وكأنها تطالع كائن خرافي قادم من
كوكب آخر وعقلها يفتش بجنون عن اجابة لسؤالها اللوح:
- فيس بوك؟, عريس فيس بوك؟, ازاي انا؟؟!!..

- يتبع -

=====

الحلقة الثامنة:-

نظرت نشوى الى الوجوه التي تطالعها هي ومنة بدهشة
وتساؤل, وقالت برجاء وتوصل حتى انها كادت تبكي:

- منة أبوس إيدك اقعدى بس وانا هفهمك , الناس بتبص علينا..
زفرت منة بحلق وجلست قائلة بحدة مفرطة:

- هي الناس هتبص وبس؟! , دا لسه الناس هتفرج وتتكلم
وتضحك كمان!! , انت اتجننت؟! , عريس مين دا ان شاء الله
اللي انت فرحانة بيه اوي?..

أجابت نشوى باستعطاف:

- مدحت! اسمہ مدحت... وعلشان خاطري اهدي وأنا هفهمك..

أجابت منة بحنق شديد:

- تفهميني ايه بس؟! حد عاقل يا ربي يقول كدا؟, واحد تتعرف في عليه من الفيس بوك وعاوزه تتجوزيه؟, فين العقل في دا؟...

أجابت نشوى مقطبة:

- أنا مش فاهمه ايه وجه الغرابة في اللي بقوله؟, اتعرفت على مدحت عن طريق الفيس, زي ما كنت ممكن اتعرف عليه في الكلية او الشغل او النادي, الفيس دا سبب... ايه اللي منرفرك كدا عاوزه افهم؟..

نظرت اليها منة بغير تصديق وكررت سؤالها:

- ايه اللي منرفرنى؟, تابعت ساخرة بقوة:

- لا ابدا عادي, ثم تحدثت محتدة بجدية شديدة:

- علشان يا هانم لو كنت قابلتيه لأي سبب من الاسباب اللي انت قلتي عليها دي.. كان هيبقى سبب طبيعي وعادي وهتعرفيه الاول وتشوفي الحاجات اللي شدتك فيه, من الآخر مافيش حد فيكم هيرسم نفسه قودام الثاني, لكن الفيس دا يا هانم عامل تمام زي غرام التليفونات بتاع زمان, لما كان الولد بيعلق البنات بمعاكسة تليفون!, الفيس مش هيخليكي تشوفيه على حقيقته, هيرسم لك احلى صورة عنه, ويعيشك في دنيا تانية خالص, تقدري تقوليلي هتعملي ايه لما تطصدمي بالواقع؟! لما تكتشفي أن كل كلامه ليكي دا كان وهم, وانه كان بيقولك

الحاجه اللي انت نفسك تسمعيها؟! , انت ما شكّتيش ولو 1% ان كلامه مش صح؟ , دا الفيس دا معروف انه الواحد يقدر يرسم له حياة تانية ويقابل بشر بوش غير وشّ الحقيقي, اذا كان الاسم بتاعه ع الفيس بيبقى مش حقيقي!, يعني مثلا ممكن يكون قاعد في اودة فوق سطوح ويقولك انا ساكن في فيلا في الرحاب مثلا؟, ممكن يكون عاطل ويقولك دكتور, ممكن يكون من غير أهل ويقولك أبويا عمدة .., انت هبلة أوي كدا؟, أد كدا رغبتك انك تهربي من الحياة الباردة اللي انت عايشاها مع اهلك تخليكي ترمي نفسك في النار بإيديكي?!..

أجابت نشوى بمرارة تقطر من بين أحرف كلماتها:

- تصدقي لو قلت لك مش فارقة؟, قاطعت منة التي همت بالكلام وقالت:

- اسمعيني يا منة.., انا فكرت في اللي انت قلتيه دا, بس انا اعرف مدحت من شهرين واكثر, الموضوع ابتدى اننا فانز في جروب ميكس, وبوستاته شدتني, وبعدين أترفع أدمنز في الجروب , وكان بيعمل بوست ثابت اسمه حياتي, البوست دا كل مرة بيناقش موقف من حياتنا اليومية, واحيانا بيعرضوا مشاكل, اللي حصل انى كنت مخنوقة وباعت له قلت له انا عاوزة اتكلم وبس, وفعلا اتكلمت معاه, طبعا كله شات, كنت عاوزة أففض وبس, سمعني وقاللي كلام ريحني, ومن هنا شوية بشوية علاقتنا ابتدت تقوى, انا عرفت انه خريج تجارة انجليش ومعاه كورسات كتير في الكمبيوتر ولغات كمان, وبishtغل في شركة استيراد وتصدير بس عاوز يسافر برّه, علشان يشتغل ويحضر دراسات عليا, عجبني طموحه , وفي

نفس الوقت انسان متفهم اوي, انا ما حاستش انه كداب
بصراحه, وبعدين تقدرى تقولى انها مقامرة يا صابت.. يا
خابت!, لو صابت يبقى أنا الكسبانة...

قاطعتها منة بسخرية:

- ولو خابت يا فالحه؟, ... نظرت اليها نشوى بحزن وأجابت
بابتسامة أسى تلون شفيتها الكرزتين:

- عادي يا منة.... مش هخسر كثير, ما انا خسرت في حياتي
كثير لغاية ما خلاص اتعودت على طعم الخسارة...

نظرت اليها منة بأسى وقالت:

- بس للأسف يا نشوى, الخسارة المرة دي هتكون أكبر من أي
خسارة تانية!, المرة دي لو خسرت.... هتخسري نفسك!!!...

شردت نشوى في كلام منة التي سألت ببرود:

- والاساذ هيتقدم لأهلك امتى ان شاء الله؟....

أجابت نشوى بصوت منخفض:

- هنتقابل انهرده ونحدد!!!....

أومأت منة برأسها ثم ما لبثت فجأة وهي تصيح بذهول:

- تت....ايه؟, تتقابلوا؟, انت اتجننت اكيد؟,,

حركت نشوى يدها أمام منة وهي تقول بتوسل:

- وطي صوتك أبوس ايدك, ايه بس اللي مضايقك؟, هنتقابل عادي, وفي مكان عام, مش هينفع نتكلم ونتفق لا.. فون ولا.. شات!....

هزت منة رأسها وقالت بجدية مفتعلة وهي تشيح بنظرها بعيدا:

- آه فعلا, مش هينفع لا فون ولا شات!!..., ثم سلّطت نظراتها على نشوى وقالت بابتسامة صفراء:

- وانت يا نشوى ما شوفتيهوش قبل كذا؟

أجابت نشوى باضطراب وهي تتحاشى النظر الى منة فهي تعلم أن منة على شفا ارتكاب جريمة فيها:

- لا.... شوفته!..., لعبت بأصابعها مشبكة اياهم تارة ومفلتة لهم أخرى وتابعت:

- اتكلمنا.. كام.. (كاميرا) .. كذا مرة!!....

كادت منة أن تصرخ ولكنها سارعت بوضع يدها على فمها, ونظرت الى نشوى قليلا وهي تهز قدمها بعصبية شديدة قائلة بحدة:

- ماشي يا نشوى انا مش هقولك حاجه, اظن انك كبيرة كفاية وعارفة مصلحة نفسك كويس, انا هقوم....,

امسكت نشوى بيد منة ما ان وقفت الاخيرة ونظرت اليها برجاء حار قائلة وهي تقضم شفتها في توتر واضطراب ملحوظ:

- لا يا منة علشان خاطري ما تسيبينيش, أنا...أنا اتفقت انا ومدحت اننا نتقابل هنا انهرده وهو زمانه على وصول, مش هقدر اكون لوحدي, عاوزاكي معايا, علشان كدا ادितه المعاد هنا!!!...

ارتمت منة جالسة الى مقعدها بذهول وقالت بدهشة حادة وغير تصديق لما سمعته:

- انت... انت بتقولي ايه?, اللي اسمه مدحت دا... جاي دلوقتي?, أومأت نشوى ايجابا, وما إن همت منة بالكلام حتى قاطعها رنين هاتفها المحمول فرفعته ليطالعها اسم سيف يزين الشاشة, اغمضت عينيها قليلا ثم فتحتها مستنشقة نفسا عميقا, محاولة التماسك كي تستطيع الاجابة على سيف بهدوء, فتحت الخط وبعد السلام بادرها سيف قائلا:

- انت لسه مع نشوى يا منون?, أجابت منة:

- ايوة يا سيف, احنا بنتغدى دلوقتي, وشوية كدا وهنروح....
بعد أن علم منها اسم المطعم قال بينما يحاور إحدى السيارات المارة بجانبه:

- لا حبيبتي..., انا جنب المطعم اللي انتو فيه, استنيني ما تمشيش مع نشوى, انا هفوت عليكى أوصلك وبالمره فيه حاجه عاوز اقولك عليها!!!...

فتحت منة عينيها على وسعها هلعا وقالت بينما تطالع نشوى بذهول واضح:

- إنت ايه؟, اعاد سيف حديثه فحاولت منة التنصّل من العودة برفقته قائلة بضحكة وهمية:

- لا أصلك مش عارف, احتمال نلف شوية على المحلات, فيه مول فتح جديد جنبنا هنا عاوزين نشوفه!!..

كادت منة تبكي وهى تتحدث لسيف بينما تطالع نشوى في غيظ وقهر, أجابها سيف ضاحكا ما جعل الدم يهرب من وجنتيها:

- ولا يهملك حبيبتى, هاجيلك ولّفى انت وصاحبتك براحتكم وانا هستاكي في أي كافيه هناك, خمس دقائق بالكثير وهكون عندك!!... وأغلق سيف الهاتف تاركا منة تطالع في محمولها وقد ارتسم الوجوم على ملامحها, قالت نشوى في تساؤل :

- فيه ايه يا منة؟, سيف عاوز يبجي ولا ايه؟... لتطالعها منة بدهشة مجيبة بحيرة وخوف مما هو آت:

- سيف جاي, خمس دقائق ويبقى هنا, يعني هيشوف, لتقاطعها نشوى هاتفة:

- مدحت!! , انتبهت منة لترى نشوى وهى تشير بيدها , فاستدارت مستفهمة لمن تشير له نشوى خلفها, فطالعتها قامة طويلة, اقتربت شيئا فشيئا حتى وقفت بجوار طاولتهما ومال صاحبها عليها قائلا بابتسامة مرسومة:

- ازيك يا نشوى, وقفت نشوى مصافحة اياه, بينما منة نقلت نظراتها بينهما وهى تقول في سرها:

- احلّوت!.....

نظرت نشوى الى منة وقالت وهى تقوم بالتعارف بينهما مشيرة الى مدحت:

- منة .. أقدم لك مدحت, ثم اشارت الى منة قائلة:

- منة صاحبتى وأكثر من أختي كمان!! , مد مدحت يده مصافحا وهو يقول بابتسامة:

- تشرفنا يا آنسة منة..

نظرت منة الى يده الممدودة ثم رفعت نظراتها اليه قائلة ببرود:

- شكرا, بس آسفة... ما بسلمش..

أعاد مدحت يده بينما تكلمت نشوى محاولة اصفاء المرح الى صوتها لإزاحة موقف منة البارد جانبا من ذهن مدحت:

- بس انت جاي في معادك تمام, الواحد يظبط عليك ساعته بقه بعد كدا؟!....

أشار مدحت لها بالجلوس بينما لم تكن منة قد قامت للترحيب به من البداية بل مكثت جالسة في مكانها وعيناها زائغتان بين مدخل المطعم وساعتها وهي تتحين الفرصة للاستئذان والانصراف, فهي لن تستطيع الجلوس برفقتها, أما نشوى فهي من رتب الموعد مع هذا ال.... مدحت دون الرجوع اليها وبالتالي هي غير مُجبرة على الجلوس معهما!!....

كان مدحت يوجه الحديث الى منة الشاردة, فكررت نشوى كلام مدحت وهي تحاول جذب انتباه منة:

- منة.. مدحت بيسألك .. تحبي تشربي ايه؟.. انتبهت منة وقالت
بينما نظرها مثبت على المدخل:

- ها... لا مالوش لزوم شكرا, انا هضطر أقوم... لتبتر
عبارتها ما ان طالتها هيئة سيف وهو يتلفت يمينا ويسارا
يجوب المطعم مفتشا عنها بين الرواد بعينه, همست في سرها
بوجل:

- جالك الموت يا تارك الصلاة!! , ياللا... هي بايضة بايضة....,
لتصطدم عيناها بعيني سيف الذي سار باتجاهها وابتسامة
عريضة ترسم على وجهه بدأت تخبو ما ان اقترب من
طاولتهما ولاحظ وجود رجل غريب برفقتها حتى غابت كليّة
ليحل بدلا منها تقطبية عميقة ونظرات..... شكّ وريبة!!....

كانت منة تجلس في صمت تام بجوار سيف وهو منطلقا
بسيارته في سرعة عالية الى منزلها, استرقت النظر اليه بين
فينة وأخرى مؤثرة عدم الكلام وهي تعلم يقينا ان صمته هذا ما
هو الا الهدوء الذي يسبق العاصفة والتي ستقرع فوق رأسها
حتما ما إن يصلا منزلها....

قبيل وصولهما الى وجهتهما سعلت لتجلي حنجرتها وقالت
بابتسامة صغيرة:

- سيف... أنا مش عارفة إنت... , ليقاطعها سريعا وبحسم
ونظره معلق أمامه:

- مش هنتكلم دلوقتي,..... ثم التفت اليها بحدة وتابع بنظرات غضب سوداء وصوت مكتوم يحمل لهجة نذير لم تفتها:

- الكلام و.....الحساب لما نوصل!!...., فسكتت منة تماما وغاصت في مقعدها وعقلها يعمل كالماراثون لإيجاد حل لهذه الكارثة التي أوقعتها فيها نشوى بغائها!!....

ما إن أغلقت عواطف باب غرفة الجلوس خلفها بعد أن رحبت بسيف وأصرت عليه المكوث لتناول طعام الغذاء قائلة أن زوجها على وشك الوصول, حتى تناول سيف مرفق منة بقوة فاجئتها وجعلتها تشهق وهى تنظر اليه بوجل ومال عليها وهو يقول من بين اسنانه بغضب مكتوم:

- ممكن بقه تشرحيلي يا مدام معناه ايه اللي انا شوفته دا؟, وازاي تسمحى لنفسك انك تقعدى مع واحد غريب عنك؟...., لم يمكثا بعد وصول سيف سوى دقائق معدودة رحب فيها سيف بالضيف وقد قامت نشوى بالتعارف بينهما معرفة سيف انه خطيب منة بينما مدحت ب.. مدحت فقط!, الأمر الذي استشاط له سيف غيظا وصمم على المغادرة ولم تفلح محاولات نشوى في بقائهما وغادرت منة برفقة سيف وسط نظرات الرجاء والخوف من نشوى لئلا تكون السبب في شجار يحدث بينهما, فحالة سيف لا تبشر بأي خير!!

عادت منة الى الواقع وحاولت امتصاص غضبه قائلة بينما تشير بيدها ليهدأ:

- سيف ممكن تهدى شوية علشان نعرف نتكلم, انا مش فاهمه ايه اللي منرفرك اوي كدا?...

قبض سيف على مرفقها الآخر وصرخ وهو يجذبها بقوة ناحيته:

- انت هتجنينيني؟, يعني ايه.. ايه اللي منرفزني؟, انت شايفه انه ما فيش حاجة حصلت؟, اشوف مراتي قاعده مع واحد متعرفوش القاعده اللي انا شوفتها دي, وما اتضايقش؟, وما تقوليليش ان نشوى كانت معاكم... كل اللي حصل من تحت راسها ... انا مش قايلك اني مش موافق على الصحوبية بتاعتكم دي؟, وانها نوع ثاني خالص غيرك أرفض انك تحتكي بيه؟! , واتفضلي .. اللي حصل انهرده أكبر دليل ان كلامي صح قاعدين مع واحد الله اعلم إتلمت عليه منين... تقدري تقوليلي شكلك كان هيبقى ايه لو حد من معارفك شافك؟, كنت هتبرري دا بـايه؟, دا لا أخو واحده فيكم ولا جوزها ولا خطيبها, يبقى ايه ان شاء الله المبرر غير انها واحده منحلة وعاوزة تجرّك معاها؟!....

نظرت منة اليه باستنكار وقالت بحدة بالغة وهى تحاول جذب مرفقيها من قبضته القوية ولكن دون جدوى:

- يعني ايه تجرّك دي؟, انا مش معزة ولا بقرة بتجرّها وراها في كل حنة؟, وبعدين انا سبق وقلت لك ايه اللي معصبك اوي كدا؟, انك شوفتني قاعده مع نشوى ومعانا واحد غريب؟, لتشتد قبضته بدون شعور فأطلقت آهة ألم بالرغم منها ولكنها تابعت متجاهلة ألمها:

- انت شوفتني اعترضت على كلامك؟, انت عندك حق!,
قاعدتنا كان شكلها مش ظريف, لكن اعمل ايه هو جِه قبل
وصولك بدقايق وحمدت ربنا انك جيت!!...

وكان دلوا من الماء البارد قد انصب فوق سيف الذي نظر اليها
مبهوتا, فهي تعترف أمامه بخطئها بمنتهى التلقائية ولم تحاول
المجادلة او الغضب, بل انها تكلمت بطبيعية شديدة واضحة
انها حمدت الله لدى وصوله وعدم تركها برفقتها أكثر من
ذلك!!...

قطب سيف جبينه واقترب منها وهو يقول بشك بينما استطاعت
منة جذب نفسها بعيدا عنه ما ان خفت قبضته:

- انت عاوزة تقولي انك ما كنتيش تعرفي بوجوده وانك
اتفاجئتني بيه؟, ...

مسدت منة موضع قبضته لمرفقيها وقالت وهى تنظر اليه بثقة:

- وهو انت عندك شك في كدا؟, تعتقد انى ممكن اكون عارفة
انه فيه حد هيكون موجود معنا ووافق!!?.....

حان الوقت لتتبدل المواقع ويتخذ سيف موقع المدافع بينما
اتخذت منة موقع الهجوم , قال سيف نافيا بشدة:

- لا طبعا!, انا متأكد انك مش ممكن تعملي حاجه زي كدا!!...

وقفت منة أمامه بكل عنفوان ونظرت في عينيه سائلة بجدية
بالغة:

- أومال ايه اللي مضايك بقه؟, انى اضطريت لموقف زي دا
وان نشوى هي اللي حطتني في الوضع دا لما وافقت انى

اقابلها؟! , وبفرض نشوى فري وحياتها أوبن أوي, .. هزت
كتفيها بلامبالاة وتابعت ببرود:

- أنا ماليش فيه! , هي حرة ... , وما تقوليش انه هينقال عليا أني
زي صاحبتى... لا ... انا هو أنا, اللي هيتكلم عليا علشان
مصاحبه فلانه ممكن جدا فلانة دي تكون احسن من ناس كتير
اووي مش بيقوموا من على سجادة الصلاة لكن للأسف
مابيبطقوش ولا حرف من ديننا! , تلاقيها بتكذب وبتتم وبتخون
وكله, بس قودام الناس الست اللي ما فيش منها, وممكن واحده
عادية زي نشوى بس واضحة, اللي بتعوز تعمله بتعمله طالما
واثقة انها صح! , انا مش بدافع عنها واقول انها مش غلط وانه
فيه حاجات كتير لازم تعمل حسابها, لكن انا ارفض الاحكام
السطحية المسبقة على الناس!!....

ابتسم سيف ابتسامة صغيرة وتقدم منها ليمسك بيديها فيما
أشاحت هي بوجهها بعيدا عنه, تحدث بهدوء قائلاً:

- منة حبيبتي, احنا عايشين وسط مجتمع وناس, أقل تصرف أو
كلمة محسوبة علينا, ما ينفعش اعيش براحتي واعمل اللي في
دماغي حتى لو صح من وجهة نظري, لازم أراعي الحدود
والضوابط اللي حاطها المجتمع اللي انا عايش فيه, وعلى فكرة
الموضوع مش كبت حرية ولا حاجه, بالعكس دا بيحافظ على
كرامة الكل, احنا مش عايشين في المدينة الفاضلة, انت عايشة
وسط بشر, منهم الكويس ومنهم الوحش, متقدرش تمنعي
الوحش انه يأذيكي, لكن تقدرى تحدي من أذيته ليكي, مجتمعنا
للأسف بيحكم على المظاهر, انت مش هتقدرى تغيري عادات
وتقاليد مجتمع كامل, لكن نقدر اننا نحاول ما نعملش الشيء

اللي ننتقد عليه, انا واثق فيكي ومتأكد انك عمرك ما هتعملي حاجه غلط لكن ممكن تقوليلي كان أحمد أخوكي مثلاً هيتصرف ازاي لو شافك زي ما انا شوفتك انهرده؟, او باباكي؟! ابسط شيء هيلوموكي زي ما انا عملت.. خصوصاً ان البنت اللي كنت معاها مُنتقدة في كل حاجه من أول لبسها لغاية تصرفاتها المنفتحة اوي, بنت فاهمه الحرية غلط, وللاسف واضح انه ما فيش حد في اهلها واخذ باله منها او بيحاول انه يصلح من شخصيتها, وبالتالي منظر زي اللي انا شوفته انهرده دا أي حد هيقول منة ونشوى شوفناهم قاعدين مع راجل, مش هيسأل الراجل دا مع مين فيهم ولا هيهتم انه يعرف التفاصيل, انا بردو مش بقول انه دا صح, لكن هرجع واقولك اننا عايشين في مجتمع بتحكمنا عادات وتقاليد وحدود, لازم نراعيهم كويس اوي....

نظرت اليه منة في انتظار انتهائه من الحديث ثم جذبت يديها من قبضته وتكلمت ببرود:

- خلاص خلصت كلامك؟, بص يا سيف.. انا عارفة ومقتنعه بكل اللي انت قلته دا, بس دا مش سبب زعلي منك, انت اتصرفت على اساس انى كنت قاعده مع واحد من وراك!, انت قلت أي حد يشوفنا مش هيفكر يسأل او يستفسر.. جميل... بس انت المفروض تسأل وتستفسر قبل ما تُحكم وتدين!!....

زفر سيف بيأس وقال بانفعال:

- علشان منظركم استفزني!, لو انت شوفتيني قاعد القاعدة دي مع واحده متعرفيهاش مش هتتضايقي؟, عقدت منة ساعديها امامها مجيبة ببرود شديد:

- كنت هاجيبها من شعرها! , ما ان ابتسم سيف منتصرا وهم بالكلام حتى قاطعته رافعة يدها وهي تكمل بذات البرود:

- بس دا لو كان شكل القاعده غلط! , لكن لو انت معاك صاحبك ومعكم واحده وقاعدين في مكان عام, على طول كنت هسألك واستفسر منك, مش ألوم وأعاتب, وبعدين طالما بنتكلم بقه على المجتمع...تابت باستخفاف:

- يبقى للأسف محدش هيلوم ويعاتب... عارف ليه؟, لم تنتظر اجابته وتابت ردا على نظرة التساؤل التي تلوح في مقلتيه:

- لأن مجتمعنا مجتمع ذكوري بالدرجة الأولى, يعني الراجل مسموح له انه يعمل أي شيء وعذره في الآخر انه راجل, لكن الست انفاسها محسوبة عليها, مع ان الفرق دا فرق بيولوجي الراجل مالوش أي فضل فيه, وديننا ما فرقش بين الذكر والأنثى في أي احكام او واجبات او ثواب او عقاب, الشيء الوحيد اللي فرق فيه الميراث.. " وللذكر مثل حظ الأنثيين", وليه لان الراجل هو اللي له القوامة, واللي عليه كافة الالتزامات المادية اتجاه اسرته ولو له أم هو المتكفل بيها, ولو اخته مش متجوزة بردو متكفل بيها, والست لو متجوزة وعندها مال قارون جوزها الملزوم انه يصرف عليها, هي حابيت تساعد من مالها ما فيش مشكلة لو ما رضيتش حقها وما تتعاقبش على كدا, يعني في الأول والآخر ديننا بيراعي حقوق الست كويس أوي , وللاسف المجتمع اللي احنا عايشين فيه هو اللي ظالمها وبيجور عليها, وهرجع تاني واقولك... انا مايهمني من دا كله غير طريقتك في كلامك, ونبرة الاتهام اللي كلمتني بيها واللي انا برفضها, انا ما بعملش حاجه غلط,

ولما واجهتني اول حاجه قلتهالك ايه؟, قولتلك انت صح, عندك حق!, واندھاشي من نرفزتک لأن الموضوع كان ممكن يكون أسهل من كدا بكتير لو كنت سألتني الأول قبل ما تهاجمني بالاسلوب دا!!!....

نظر سيف اليها وأجاب وهو ينظر الى عينيها بقوة:

- طيب ممكن تقوليلي مين دا؟, وايه اللي خلاكي ما تقوميش اول ما جه؟!..

زفرت منة بعمق مغمضة عينيها وما لبثت ان فتحتهما ناظرة اليه بيأس وهى تجيب محاولة التماسك:

- دا يبقى خطيب نشوى!, هما لسه ما أعلنوش الخطوبة رسمي, وأظن سبق وقلتك انك جيت بعد ما هو وصل بدقايق, وعلشان انا ما بعملش حاجه غلط, ما رضيتش اقوم أتحب زي الحرامية, بالعكس انت جيت واتعرفت عليه وعرف انك خطيبي, أي استفسارات تانية!!!....

أجاب سيف مقطبا:

- خطيب نشوى?! , وليه ما اعلنتش دا?..

زفرت منة بيأس واحتدت بالرغم منها قائلة بحنق:

- وانا مالي, إسألها هي السؤال دا!, أظن دي حاجة خاصة بيها هي?! , بقولك ايه يا سيف انا تعبت من الكلام في الموضوع دا, انا زي المتهم بجريمة مش عارف ايه هي وانت عمال تحقق معاه علشان يعترف بحاجه معملهاش!!!....

نفى سيف بشدة قائلا:

- لا طبعاً!!!... لتتظر اليه منة مجيبة بحدة مماثلة وقد عقدت جبينها:

- آه طبعاً!! , ما تشوف نفسك بتتكلم ازاي, بقولك ايه يا سيف انا زهقت بجد... عن اذنك ...

وتأهبت للانصراف عندما التفت يده حول معصمها جاذبا اياها لتقف امامه ومال فوقها لتضرب انفاسه الساخنة صفحة وجهها المرمري وهو يقول بعتب:

- عاوزة تسيبيني وتمشي؟! , أهون عليكي أمشي وانا زعلان؟, واذا أنا هونت عليكي, انت ما تهونيش عليّا!! ,قطبت منة وقد خالجتها الريبة من معنى كلامه, لتُفاجأ به وهو يميل باتجاهها محاولا تقبيلها فحاولت الابتعاد عنه وهي تشيح بوجهها جانباً قائلة باعتراض:

- استنى بس, انت بتعمل ايه؟, يا سيدي أنا عاوزة أهون عليك!, سيف مش ممكن...., لتغيب باقي عبارتها بين شفثيه التي اقتنصت شفثيها في قبلة ضارية وقد جذبها بشدة بين ذراعيه, حاولت منة الافلات منه ولكن دون جدوى, وكأن سيف قد انفصل عن واقعهما, وهو يحاول بثها عشقه السرمدي وشوقه اللامتناهي ليقوّض مقاومتها فترفع راية الاستسلام لطوفان مشاعره الهادر الذي جرف ممانعتها بعيدا لترفع رايتها وقد طوقت عنقه بذراعيها البضتين غارقة في لجة مشاعرهما العاصفة!!!....

بعد فترة لا يعرف منهما كم طالت, حاولت منة الافلات من قبضته طلبا للهواء, وشهقت بعنف عندما شعرت بأصابعه وهي

تعبت بأضرار بلوزتها، حاولت إمساك يده وهي تتحدث من بين شفتيه النهمتين:

- سيف.. مش كدا, سيف ... بابا ممكن يدخل... سيف انت هيسـت؟! , لم تجد أي صدى لتوسلاتها فلم يكن أمامها سوى سبيل واحد, فرفعت ركبـتها لتهوى على قصبة ساقه بركلة قوية مؤلمة من مقدمة حذاءها جعلته يفك قيدها فجأة وهو يسب ويلعن من بين أنفاسه الثائرة ممسكا ساقه وهو يقفز على قدم واحده متأوها بألم, بينما وقفت هي أمامه وثرعها يحمل علامات هجومه القوي, وقد أفلت شعرها من ربطته فأحاطت بوجهها بعض خصلاته الثائرة, حاولت ترتيب هندامها الذي اشعته أصابع سيف المجنونة ووضعت يديها في خصرها قائلة بسخط واستنكار شديد:

- انت وقح وقليل الأدب يا سيف, واحمد ربنا ان الضربة جات في رجلك المرة دي, المرة اللي جاية هتدفع تمن قلة أدبك دي غاااالي أوووي!! قال سيف وهو يمسّد موضع الألم في ساقه المصابة بينما يرفع حاجبه بخبت وابتسامة مكر تزين ثغره الذي لا يزال مستشعرا لمذاق شفتيها الشهيّ:

- آه، احنا فينا من ضرب؟!، ماشي يا منة أما أشوف يوم الفرح
مين اللي هينقذك من ايدي؟، الحساب يجمع يا حبيبتي، العد
التنازلي خلاص ابتدى.... كلها شهرين الا 3 ايام ويتقل علينا
باب واحد، أبقي وريني هتقدي تهربي ازاي!!!....

زاغ بصر منة لثوان وقد تعالت دقات قلبها خوفا من وعيده لها،
ثم وقفت أمامه محاولة التماسك وهي تقول بتحد:

- كويس انك نبهتني, سيف أحب أبشرك ان الفرح من انهرده ,
لا من دلوقتي إتأجل ولأجل غير مسمى!, فياريت ما تتعفش
نفسك بعدّ الأيام لأنك هتتعب نفسك ع الفاضي!!..

أعاد سيف ساقه الى الأسفل واعتدل واقفا أمامها قائلاً بدهشة
وقد ارتفع حاجبيه بغير تصديق حتى كادا يلامسان مقدمة
شعره:

- متقدريش!, الفرح انا اتفقت على معاده مع باباكي خلاص,
هو مش لعب عيال!!..

حركت منة كتفيها بلامبالاة أغاظته وقالت ببرود:

- لا طبعا أقدر, تحب تشوف؟....., وقبل ان تكمل وكأن والدتها
قد شعرت بها, إذا بها تقطع عليهما خلوتهما وهي تدخل قائلة
بابتسامة مرحبة:

- ياللا يا منة علشان تساعدينني, بابا كلمني وكلها خمس دقائق
ويكون هنا, ياللا علشان نحضر السفرة, ام محمود اجازة
انهرده انت عارفة....

لفت انتباه عواطف صمت منة التام, فنظرت اليها في تساؤل
ولم تغب الابتسامة عن شفتيها فيما أسبلت منة أهدابها في خجل
مصطنع, نظرت عواطف الى سيف متسائلة في دهشة:

- هي مالها؟, أجاب سيف بحيرة وذهول من تلك الممثلة القديرة
الواقفة أمامه:

- معرفش!, قبل ما حضرتك تدخلتي بثانية واحده كانت عماله
تناكف فيّا!!.....

نظرت اليه منة ببراعة مزيفة وقالت وقد بدأت شفيتها
بالارتعاش بعد أن استدعت دموعها التي سرعان ما لبّت ندائها
وقالت بصوت خرج مهزوزا وباتقان جعلها جديرة بالفوز
بجائزة الأوسكار في التمثيل:

- يا سلام .. بقه متعرفش!! , اندفعت الى أمها التي احتوتها بين
ذراعيها مطالعة بحيرة سيف الواقف امامهما يراقب ما يحدث
باندھاش تام , وتابعت منة وسط بكائها المفتعل:

- أنا.... أنا مش مصدقة انى خلاص... أقل من شهرين وأبعد
عنكم!! , ابتمست عواطف وقد انزاح حملا ثقيلًا من فوق أكتفائها
عندما علمت سبب حزن أبنتها, وقالت وهي تربت بحنو على
شعرها:

- دي سنّة الحياة حبيبتى, وبعدين انت هتبقى معانا هنا, المشوار
كله ربع ساعه بالعربية بيننا وبينك!!... ' حركت منة كتفها
وقالت باعتراض طفولي:

- بردو, ماليش دعوه!! , قالت أمها مهادنة بينما قطب سيف
بحيرة لا يعلم الى ما ترمي تلك المشاكسة الصغيرة:

- طيب انت عاوزة ايه يا حبيبتى واحنا نعمله؟, لترفع منة
عينين مليئتين بالرجاء الحار هاتفة بتوسل جعل قلب أمها يهفو
لصغيرتها التى كبرت ولكنها لا تزال ترفض مفارقة عائلتها
الصغيرة:

- نأجل الفرح!! ,... قالت الأم بتردد وهو تنظر الى سيف الذي
شهق دهشة و... غضبا! , وان كان قد نجح في السيطرة على
غضبه وحنقه منها:

- ايوه يا منون.. بس ما ينفعش .. بابا وسيف اتفقوا , وبعدين
انت مسيرك لبيتك وجوزك ان ماكانش انهرده هيبقى بكرة!..

نظرت منة بتضرع الى والدتها وقالت بلهفة:

- نأجله شوية بس, انا لسه حاسة انى مش مستعدة للجواز,
علشان خاطري يا ماما , علشان خاطر منونتك
حبيبتك!!... ارتبكت الأم من توسلات ابنتها الحارة ورفعت
نظرها الى سيف الذي لمح بدء موافقة مهتزة في عيني أمها
جعلت قلبه يطرق بعنف, فها هي تلك المشاغبة الممثلة القديرة
تكاد تنجح في اقناع أمها بتأجيل حفل الزفاف, ولكن على جثته
لو نجحت في تنفيذ ما تصبو إليه!!....

قاطع تأمله صوت الباب وهو يُفتح, ليظهر من خلفه عبدالعظيم
الذي انبسطت اساريه ما أن طالعاه وقال وهو يسير اتجاهه
مادًا يده للترحيب به وابتسامة عريضة ترسم على وجهه
الصَّبوح:

- اهلا اهلا يا سيف يا بني نورت, صافحه سيف قائلاً
بابتسامة صغيرة:

- منورة بيك يا عمي, ليلتفت عبدالعظيم الى عواطف وهو يقول
بمرح تعليقاً على احتضانها لمنة:

- ايه يا أم أحمد اخبار الغدا؟, يا ترى يا منون ساعدتي ماما ولا
زي كل مرة؟! , لتبتعد منة عن أمها وتهرع الى ابيها الذي تلقفها
بين ذراعيه مقبلاً جبهتها بحنان أبوي بينما قالت هي بدلال
الإبنة على والدها:

- مش عيب يا أستاذ عبدالعظيم يا ناظر المدرسة؟, ربنا ما يقطع لي عادة!, زي كل مرة أومال ايه, ما انت عارفني كلمتي واحده!!.....

أطلق عبدالعظيم ضحكة عميقة ثم وجّه حديثه الى سيف قائلاً وهو ينظر الى وجه إبنته المبتسم:

- انا مش عارف هتعمل معاها ايه يا سيف؟, خلّي بالك مش هتعرف تاخد معاها لا حق ولا باطل, أدبك شايف أهو!..

تحدث سيف بشرود قائلاً بينما نظراته معلقة بتلك التي تتغنج على والديها تاركة إياه يتلظى بنار الحسد لعبدالعظيم, حيث كان يريد ان يكون هو من تتدل عليه بهذا الشكل وتتمسح به كالقطة المدللة!! , قال سيف بصوت أجش:

- أنا راضي تعمل فيّ ما بدالها, ولو عليّا أنا نتجوز من بكرة, واللي عاوزاه هنفذه!!.....

نظرت اليه منة بغرور بينما علّق والدها قائلاً:

- خلاص يا سيف, هانت كلها شهرين والعفريّة دي تبقى معاك, وساعتها وريني شطارتك!!,,,

قاطعته منة بتردد مفتعل:

- بابا.... انا عاوزة نأجل الفرح شويّة!! , أبعدّها والدها عن ذراعيه ونظر اليه مقطباً وهو يقول:

- نأجل الفرح؟, ثم حانت منه نظرة تساؤل الى سيف الذي أطبق شفّتيه غيظاً وغضباً منها, ولكنه لم يرد التعليق على ما

سمعه منها حتى يرى رأي والدها أولا , ولم ينتظر كثيرا فقد
سمعه وهو يقول بحيرة:

- ليه يا منون حبيبتي؟, حصل حاجة؟, لتبادر عواطف بالاجابة
قائلة وهى تتنهد في عمق:

- أبدا... كل الحكاية ان منة مش عارفة ازاي هتقدر تسيينا
وتبعد عننا!! , صدح صوت ضحكة والدها عاليا وقال موجهها
حديثه الى ابنته:

- انت بتتكلمي بجد يا منون؟, طيب دا كلام ناس عاقلين؟, على
كدا بقه كل ما يقرب معاد الفرح تقولي لأ... أجّلوه! , ونقعد
نأجل الى ما شاء الله! , هتف سيف بانفعال :

- يا سلام يا عمي, هو دا الكلام!! , نظرت اليه منة بامتعاض,
والذي لم يلبث أن تحول الى استعطاف ورجاء وهى تنظر الى
والدها قائلة بحزن:

- يعني أنا بنيت ثقيلة أوي كدا عليكم يا بابا؟, انا عاوزة الفرح
يتأجل شوية بس, وبعدين احنا فيه حد بيجري ورانا؟, احنا لسه
صغيرين وقودامنا العمر كله, حقي يا بابا انى أعيش يومين
حلوين كدا في خطوبتي, مش من الدار للنار, ولا انتو زهنتوا
منّي خلاص؟, ليسارع والدها الى احتضانها وهو يقول بعتب:

- معقول الكلام دا يا منون؟, انت يا بنتي مش عارفة غلاوتك
عندنا ولا ايه؟, عموما يا ستي ماتقلقش, انا عندي كم منة!! ,
نظرت منة الى سيف الواقف خلف والدها يطالعهما بذهول تام,
واخرجت طرف لسانها الوردي له بإغظة سهوا عن الباقيين,
بينما راقصت حاجبها الأيمن له بإغظة, مما جعل الدم ينفر في

عروقه, وقد انتفخت أوداجه غضبا وقهرا من هذه المشاغبة الصغيرة, قاطع استرساله في أفكاره الانتقامية صوت عبدالعظيم قائلا:

- ياللا نتغدى الأول وبعدين نتكلم , قالت منة :

- معلش يا بابا أنا سبقتكم, كنت برّه مع واحد صاحبتى واتغدينا سوا...

حرك والده رأسه يسارا ويمينا معترضا وقال بحزم:

- ماينفعش, اقعدى معانا علشان خاطر سيف على الأقل!,
لتعاجلها والدتها :

- افتحي نفس جوزك يا منة, ياللا اتفضلي معايا علشان نجهز
السفرة!!!...

بعد الانتهاء من تناول طعام الغداء, جاءت عواطف بصينية مصفوف فوقها أكواب الشاي وصحون بها قطع من الكعك البيتي المحلى بالشوكولاته والذي صنعته منة في اليوم السابق, قدمت عواطف لسيف طبق الكعك قائلة:

- على فكرة, دي عمايل ايدين منة, احمد اخوها بيحب كيكه الشوكولاته بطريقة مش ممكن, وبيطلبها منها بالذات, دوقها وهي هتعجبك...., تناول سيف الصحن وقال قبل ان يهم بتناول قطعة منه:

- انا متأكد, أغمض سيف عينيه متلذذا بطعم الكعك الرائع ثم فتحهما ناظرا الى منة يداعبها بعينه وهو يقول:

- فعلا ممتاز, تسلم ايديكي يا منة,,, بعد ان تداولوا بعض من الاحاديث الخفيفة التفت والد منة الى سيف قائلا:

- انت ابتديت تدور على قاعة للفرح يا سيف ولا لسه؟, انتهز سيف الفرصة وقال:

- أنا دوّرت ولاقيت فعلا يا عمي!, وكنت جاي انهرده اقابل منة علشان أفرّحها واخذها ونروح نشوف القاعة, لكن هي بقه فاجئتني بطلبها الغريب دا انها تأجل الفرح!!...

لم تعلم منة أتصدقه أم لا؟, هي لم تسأله عن سبب موافاتها الى المطعم الذي كانت فيه هي ونشوى, وبدلا من سؤاله تشاجرا بسبب إتيان نشوى بهذا ال.. مدحت لتراه!, ولكنها تعلم تماما أن سيف لن يكذب في أمر كهذا, ولكن... معنى ذلك أنها قد أصابته بالإحباط نتيجة طلبها لتأجيل الزفاف وكأنها تكافئه على نجاحه في إيجاد قاعة زفاف مناسبة!!....

قال الأب موجهها حديثه الى منة بحكمته المعهودة:

- منة حبيبتي, انا بقولك قودام سيف أهو, انت لو عاوزة تأجلي علشان مش متأكده من موافقتك على سيف دا شيء أو أنك عاوزة الفرح يتأجل خوف مش اكتر؟, لم تستطع منة سوى الاجابة بصدق قائلة وهى تنظر الى موضع قدمها:

- لا يا بابا, خوف مش اكتر, موافقتي على سيف مافيهاش أي تردد!!, ابتسم الاب ابتسامة عريضة وقال:

- يبقى على خيرة الله, بعد الشاي خد مراتك وحماتك وروحوا شوفوا القاعة... انا مش هقدر آجي معكم, راجع تعبان من الشغل وعاوز أريح شويّة!!....

تهلل وجه سيف فرحا, بينما رمقته منة بحنق طفولي سافر, وانطلقت زغرودة فرح من فم أمها....

مرّت فترة الشهران سريعا, خطب أثناءها احمد ايناس, والتي وافق والديها على عقد القرآن فورا رافضين فكرة أن يكون زفافهما مع زفاف منة شقيقته, على أن يكون الزفاف في اجازتهما السنوية, أي بعد حوالي 6 أشهر..

كما خطب مدحت نشوى والتي لم تعد تتحدث مع منة كثيرا كما السابق, فقد شعرت برفض سيف ل صداقتها بمنة ولم تكن تريد أن تتسبب بمشاكل بينهما, ولكنها كانت تهاتفها يوميا لتلقي اليها بما يعتمل في صدرها من ضيق سببه زواجها الذي تقرر في ظرف شهر واحد ودهشتها من موافقة أهلها على هذا الارتباط, وكان والديها قد انتهزا فرصة تقدم خاطب لها لإزاحة عبئها عن كاهلها!! , فقد أبلغها والدها انه قد سأل عنه فعلم أنه من أصل طيب ويعمل بشركة تجارية كبيرة لها وزنها في عالم المال والاعمال وقد عرّض عليه أن يعمل لديه نظير مبلغ ضخّم من المال كمُرتب شهري فوافق مدحت بعد ممانعة بسيطة من ناحيته..

حكمت منة على سيف بألا يراها لمدة أسبوعين قبل الزفاف كي
يشتااق اليها الأمر الذي سبب له ضيقا رهيبا, خاصة وانها قد
امتنعت عن الذهاب الى العمل وقد قامت بتقديم طلب اجازة
لمدة شهر فوافق احمد مسرورا غيظا في سيف!!!..

أتى يوم الزفاف, والذي تجلّت فيه منة بأروع حلّة للزفاف, كان
الفتتان قمة في الأنوثة والجمال يظهر جمالها الفاتن وقدّها
الرشيق وقد بدت كالملاك فيه..وقد ارتدت سترة بيضاء قصيرة
من قماش الساتان الأبيض الناعم لتغطي ذراعيها, وقامت
المزينة بتصفيف شعرها وربط الوشاح الابيض الساتان بطريقة
انيقة محببة, بينما قامت بتزيينها بألوان مبهجة براقّة ما جعلها
تشهق في المرأة ما ان انتهت المزينة من عملها غير مُصدقة
لما تراه عيناها !!!...



كان سيف بانتظارها في بهو الفندق المقام فيه حفل الزفاف
حيث قام بحجز جناح العرائس والذي قامت المزيّنة والمصنّفة
بتجهيز منة فيه....., كانت منة تهبط على الدرج اللولبي متأبطة
ذراع والدها بينما سيف يطالعها كأنها ملكة متوجة تهبط للقاء
مملوكها!!...., وما إن وصلت أسفل الدرج حتى تقدم سيف
متناولاً يدها من أبيها مقبلاً جبهتها بحب قبل أن يشبك يدها
بمرفقه لتبدأ حفلة الزفاف على اغاني الزفاف الشهيرة...

لم يستطع سيف رفع عينيه عنها طوال حفل الزفاف وكان
يتيحّن الفرص ليقبل يدها المشبوكة بيده, والذي لم يفلتها طوال
الحفل....

انتهى الحفل الذي امتد لساعات الصباح الأولى, وودّعت
عواطف و عبدالعظيم صغيرتهما بعد أن قاما بتوصية سيف
عليها, ان يراعيها ولا يُغضبها أبدا, وقد تعهد سيف لهما بذلك,
واحتضنها شقيقها احمد الذي كادت أن تبكي بين أحضانه فربت
عليها ممازحا اياها أن زينتها سوف تفسد وقد يجعل هذا سيف
يعود في كلامه ويوقف اتمام الزيجة!, فضربته بخفة على يده
وسط ضحكاته!, في نفس الوقت الذي بارك لهما والدا سيف
وقد أوصت زينب والدته منة بولدها بالوصايا العشر, وبارك لها
اخواته الأربع متمنين لهما الذرية الصالحة , بينما شدد والده
عليه ألا يصدر منه ما يغضب زوجته, وأن يراعي الله فيها,
ونصح منة بأن تطيع الله في زوجها....

انصرف الجميع بعد أن ودعا العروسين اللذان استقلا المصعد
المتجه الى أعلى حيث جناح العرائس , وسط زغاريد الفرح
التي صدحت تملأ المكان..., وكان من المقرر أن يبيت
العروسين في الفندق ليظروا في صباح اليوم التالي الى شرم
الشيخ حيث حجز سيف في إحدى المنتجعات السياحية الشهيرة
لقضاء شهر العسل.....

ما إن وقف المصعد وأشار سيف لمنة بأن تتقدمه, حتى خرجت
يتبعها سيف والذي فاجئها بحمله لها والسير في اتجاه جناحهما
وسط اعتراضها ولكنه قال مبتسما:

- ماينفعش, لازم العريس يشيل عروسته ليلة الفرح, دا تقليد في الدنيا كلها, هيبجي عندي أنا ويقف ليه?...

صمتت منة وهي تكاد تذوب خجلا, بينما ناولها سيف البطاقة
الممغنطة لتفتح الباب, وما ان دخلا حتى أغلق سيف الباب
بركلة من قدمه, وسار بها حتى أنزلها في وسط الجناح, وهو
يقول بابتسامة سعيدة:

- مبروك يا عروسة, اضطربت منة وابتعدت عنه قليلا ثم نقلت
نظراتها في الأرجاء لتشاهد وجود ردهة واسعة حيث يقفان ثم
بابين خمّنت ان احدهما يؤدي الى غرفة النوم الرئيسية بينما
الآخر غرفة الجلوس, وحمام كبير وزاوية صغيرة بها طبّاخ
كهربائي وبعض الأدوات اللازمة لمطبخ صغير عصري...
تحدث سيف من خلفها وهو يشير الى باب كبير قائلا:

- دي اوضة النوم, لو عاوزة تغيري, انا هاخذ هدومي واطلع
أخذ شاور في الحمام اللي هنا...

اتجهت حيث أشار ودخلت يتبعها سيف, لتفاجأ بفراش وثير
عريض مفروش بملاءة من الساتان الابيض منثور عليها ورود
حمراء على هيئة قلب في منتصف الفراش, وقد اصطف على
طول الممر الصغير الذي يوصل الى الفراش شموع كثيرة
يصدر منها رائحة عطرية خلابة, أعملت النظر حولها, لتسقط
عينها عليه في بدلته السوداء التي أكسبته جاذبية ساحقة جعلت
دقات قلبها تكاد تبلغ عنان السماء, فهي لم تنفك تنظر اليه طوال
حفل الزفاف مفتونة بمنظره الرجولي الجذاب وكانت سرعان
ما تشيح بنظراتها خوفا من أن يقبض عليها متلبسة بالنظر اليه

بوله شديد!... اتجه سيف الى خزانة الثياب وفتحها متناولاً
منامة له وقال وهو يحاول التحدث بطبيعية:

- أنا هغير هدومي بره, خدي راحتك ولما تخلصي حصليني
علشان نصلي ركعتين السنة

خرج سيف لتغلق منة الباب خلفه مستندة عليه, لم تفتح منة
فمها بكلمة واحده منذ أن وطئت قدميها عتبة الجناح, اتجهت
الى خزانة الثياب لتختار منامة لها فصُعقت بوجود فساتين للنوم
لم تكن أبداً مما ابتاعته!!، هي على يقين أنها لم تنتقي مثل هذه
الاشياء التي يطلق عليها خطأ لفظة ثياب!، كما أنها لم تبتاعها
من الأساس, لتعلم أنها لا بد نشوى وإيناس وسحر اللاتي
أخبرنها انهما قد قاما بصنع مفاجأة صغيرة لها وأنهما ولأول
مرة يقتنعان بشيء تقوله نشوى!!...

أقسمت في سرها أنها لن تمرر لهن فعلتهن تلك بسهولة, ولكنها
الآن في مأزق!!، فهي لا تملك سوى ما هو موجود بالفعل في
خزانتها, كما أنها لن تستطيع المكوث بفستان الزفاف..، أطلقت
لعنة من بين شفثيها , ثم اتجهت محاولة انتقاء أكثر الثياب
حشمة, ليقع اختيارها على ثوب للنوم باللون الابيض من
الساتان الناعم, طويل حتى الكاحل ولكن بشق طولي من القدم
حتى منتصف الفخذ!، وفتحت عنق عميقة على شكل مثلث,
وبحمايات رفيعة للغاية لا تكاد تثبت في مكانها , وفوقه منزر
حريري بنفس لون الثوب...وكان هذا أكثر فستان نوم حشمة!!

أنهت اغتسالها وقد أسدلت شعرها الذي وصل الى نهاية
خصرها, وقامت بإزالة زينة وجهها مستعيضة عنها بكحل
أسود خفيف أبرز جمال عينيها اللوزتين ومسحة من أحمر
الخدود وأحمر شفاه زهري اللون, وقامت برش بضع قطرات
من عطر الزهور الخاص بها, ثم ارتدت إسدال الصلاة لتلحق
بسيف ليؤديا ركعتي السنة....

ما أن أبصرها سيف والذي كان جالسا يقلب في قنوات التلفاز
أمامه حتى وقف مشدوها من منظرها الملائكي الفاتن, بينما
تخضبت وجنتيها خجلا من منظره في منامته الكحلية اللون من
القماش الناعم, وقد أبرزت بنيته القوية وعضلات صدره التي
تكاد تفتك ببلوزة المنامة....

قال بهمس:

- ياللا علشان نصلي, فأطرقت برأسها موافقة, افترشا سجادة
الصلاة وأقام سيف للصلاة....., كان صوت تلاوته للقرآن
شجيا, يخضع المستمع للانصات له, ترقرق الدمع في عينيها
لشدة ما أثرت بها كلمات الله والتي تلاها سيف بخشوع وحلاوة
لم يسبق لها أن سمعته قبلا...

بعد أن أنهيا ركعتي الصلاة وضع سيف يده فوق جبهتها ودعا
ربّه قائلا : " اللهم إني أسألك من خيرها وخير ما جُبلت عليه,
وأعوذ بك من شرها وشر ما جُبلت عليه", ثم أنهى دعائه
بالصلاة على رسول الله عليه الصلاة والسلام...

ما ان أنهى سيف دعائه وتأهب للقيام من مكانه, إذ به يفاجأ
بمئة وهى تقوم مسرعة لتتجه الى غرفة النوم, فنادها لاحقا بها
وهو يقول:

- ايه , مش هتاكلي؟, التفتت اليه لتفاجأ بنظرات الشوق
اللاهب التي تتصاعد من فحم عينيه المشتعلتين بأتون رغبة
حارقة وعشق سرمدي , ابتعلت ريقها بصعوبة وقالت بتلعثم
طفيف وهى توليه ظهرها:

- لا مش... مش جعانه!, أوقفها سيف ممسكا كتفها ما ان
همت بالابتعاد وهو يقول:

- ومين سمعك, بيتهياالي ننام أحسن!!,,,تسمرت واقفة في
مكانها بينما سيف يديرها اليه, وقد أخفضت وجهها الى أسفل,
وضع طرف سبابته تحت ذقنها رافعا وجهها اليه وقال بخفوت:

- مش هتقلعي الاسدال؟! , نظرت اليه وكأنها لا تعلم بأي لغة
يتحدث, فأعاد عبارته ثانية, لتحاول الابتعاد وهى تقول نافية
بشدة :

- لا ... انا بردانة, لم يأبه سيف لاعتراضاتها وبدلا من ذلك
حاول خلع الاسدال عنها وهو يقول بلهفة وتوق شديدين:

- بردانة ايه بس, عموما يا ستي ولا يهملك هطفي المكيف!...

لم تستطع منعه, وقام بخلعه وسط اعتراضها حتى انها كادت
تبكي خجلا منه, ما ان أبعد الاسدال عنها حتى وقف مبهوتا لا
يستطيع تصديق ما تراه عيناه, اقترب منها يلمس بشرة ذراعيها
الذهبية بافتتان وهو يقول:

- ماشاء الله, ايه الجمال دا, الجمال دا ملكي أنا... , ابتعدت منة وهى ترفع سبابتها في وجهه وقد عادت قدميها الى الحركة بعد أن كانت مسمرة من شدة الخوف والخجل, قالت منة بتحذير وهى تعود الى الوراء بضعة خطوات:

- سيف بقولك ايه... ابعد عني دلوقتي أحسن لك, انت نقّدت اللي في دماغك واتجوزنا في المعاد اللي انت عاوزه, عاوز ايه تاني بقه؟, اقترب سيف منها غير آبه بتحذيراتا وهو ينظر الى جسمها بمنحنياتة الأنثوية الفاتنة البارز من خلف هذا الرداء المسمى مجازا رداء للنوم, وقال بابتسامة ملهوفة:

- عاوز ايه؟! , عاوزك يا مُنايا... , ركضت منة من امامه وقالت وهى تهرع باتجاه غرفة النوم:

- وانا عاوزة أنام يا سيفي, أشوفك الصبح يا عريس!, لتسبقه مغلقة باب غرفة النوم خلفها مديرة المفتاح مرتين في القفل بينما يطرق هو الباب محاولا جعلها تفتح له وهو يقول بمهادنة:

- افتحي يا منون وليكي عليا أكون مؤدب خالص!, نظرت منة الى الباب المغلق بينهما وأجابت ساخرة وهى تضع يديها في منتصف خصرها:

- والله؟! , انت يا سيف تعرف يعني ايه أدب!, أنا بيتها لي ان قلة الأدب اتعلمت ازاى تبقى قليلة الأدب منك!! , لم تسمع صوتا من جهته فقطبت مقتربة من الباب ووضعت أذنها فوقه مصيخة السمع وهى تنادي بتساؤل:

- سيف!, وأيضا لم يصلها سوى الصمت, فتحدثت مخاطبة نفسها بحيرة:

- راح فين يا اخواتي الجدع دا؟, سي....., لتشهب عاليما إن أمسكتها يد من خصرها وسمعت صوتا ضاحكا يقول بمرح:

- يا عيون سيف!, التفتت اليه تطالعه بذهول و عدم تصديق وتحدثت بارتباك تام :

- إنت... إنت دخلت ازاي؟, اقترب منها وهو يقول بضحك:

- انت متعرفيش اني أقدر أقرأ أفكارك!, ثم غمزها بخبث وهو يتابع:

- من الباب يا قطة, بس اللي بيوصل بين أودتنا و...الحمام اللي بره!, تعرفي اني مختار الجناح دا مخصوص علشان كدا!, أصلي خلاص حفظتك... انتبهت منة لنظراته الملتبهة فخطت الى الخلف بضعة خطوات وهي تقول بتلعثم:

- إي...إيه؟, اهدى بالله بس,.... ناورها سيف وهو يقول :

- ونعم بالله يا ستي, بس اهدي انت الله يهديكي, وتعالى هقولك حاجه مهمة....

استطاعت منة الافلات منه وقالت وهى تركض وهو فى أثرها فقفزت فوق الفراش مشيخة له بسبابتها:

- خليك عندك, يا نحلة لا تقرصيني ولا عاوزة عسل منك, مافيش أي مواضيع بيني وبينك دلوقتي خالص, واتفضل بقه من غير مطرود...لم تكذ تنهي جملتها حتى جذبها سيف من قدمها طارحا اياها فوق الفراش فصرخت عاليما باسمه ولم تكذ تلتفت حتى وجدته مشرفا فوقها يطالعا بنظرات ماكرة وقد ظهرت غمازته المختبأة خلف لحيته الخفيفة وقد انسدلت

خصلته الثائرة دوما فوق جبينه العريض بينما همس بصوت
اجش:

- يعني هو ايه اللي انت ريحتيني فيه من اول يوم شوفتك؟,
على طول بتخليني أجري وراكي, ايش معنى انهرده ... ياللا
بجملة الجري, بس عارفة...,, سكت قليلا مداعبا خصلات
شعرها المفترش الملائة الحريرية حولها وقال :

- انت تستاهلي انى أجري وراكي عمري كله!, وكأن هناك
شعاع انبثق من مقلتيه لتتسمّر في مكانها بينما يميل فوقها
ليخطف شفتيها في قبلة رقيقة تحولت بالتدريج لأخرى متطلبة
بينما يده اليسرى مدفونة بين طيات شعرها الكستنائي واليد
اليمنى تحاول خلع منزرها ليظهر أخيرا كتفيها المرمريتين,
شهق سيف عاليا طلبا للهواء وقال وأحرف كلماته تنضح شوقا
لاهب:

- أنا بحبك.. بحبك أووي أووي يا منة, أجابته منة والتي تشعر
بحرارة عالية تغزو سائر جسدها بينما تعالت دقات قلبها فغدت
كقرع الطبول وهي تهمس بصوت منخفض كهمس العصافير:
- وأنا... بحبك!, بحبك أوي يا سيف,... أطلق سيف تأوها عالٍ
وقال :

- يااااه, أخيرا يا مُنايا, أخيرا قلتيها!, من هنا ورايح عاوز
أسمعها منك في كل ثانية, وعهد عليا يا أغلى حاجه في عمر
سيف انى ما هخلي الحزن يعرف طريقه بيننا, حبنا هيبقى
أجمل قصة, ولا تقولي قيس وليلى ولا روميو وجولييت,
قاطعته منة وهى تتلمس لحيته الخفيفة حتى وصلت الى خصلة

شعره الشاردة على الدوام فأعادتها الى الخلف مع باقي
خصلات شعره الابنوسي الجذاب كما كانت تحلم دائما منذ أن
وقع بصرها عليه أول مرة, همست بحب بصوتها الجذاب:

- هتبقى قصة منة وسيف أجمل قصة حب, مش ممكن
تتكرر...

ليميل عليها سيف مُسكِتًا إيّاها بأجمل طريقة ممكنة بين
العاشقين, ويحملها على جناح الحب الى عالم وردي حيث
العشق اللانهائي ليتحدا تماما روحا و...جسدا, فتصبح روحيهما
روحا واحده ولكن... في جسدين!!.....

- يتبع -

الحلقة التاسعة:-

شعرت برفرقة ناعمة فوق جفونها المغلقة, رمشت بعينيها
وفتحتهما لتطالعها ابتسامة سعادة صافية ترسم على وجه
رجولي في غاية الجاذبية وعينين تطالعانها بحب خالص بينما
يهمس صاحبهما بخفوت شجي أمام شفتيها الكرزتين قائلا:

- صباح الورد على أحلى عيون, ... ابتسمت منة ابتسامة
ناعمة ونظرت الى سيف ترد عليه تحيته وقد استعادت ذكريات
ليلة أمس قائلة بخفر وبصوت هامس وهي تسدل جفنيها حياء:
- صباح النور....., مال عليها سيف مقبلا لها بين عينيها وقال:

- شكلك حلو أوي وانت نايمة, رفعت عينيها اليها تسأله
بنعومة:

- انت صاحي من زمان؟؟, أوما برأسه موافقا وهو يجيب
بصوت أجش :

- أنا تقريبا ما نمتش!, خايف أنام وأقوم ألاقيني كنت بحلم, كان
يجرالي حاجه بصراحه... .. أسرعت منة بوضع راحتها
الناعمتين فوق فمه وهى تقول بلهفة راجية:

- ألف بعد الشر عليك يا حبيبي, ما تقولش كدا....., نظر اليها
بوله وقد أعتمت الرغبة عينية وهو يطالعها بعشق ناري سائلا:

- بتحبيني أوي كدا يا منة?, حاولت إزاحة كفيها جانبا ولكنه لم
يسمح لها وقبض عليهما مقبلا باطنهما بينما تحاشت النظر اليه
وقالت وهى تقضم باطن خدّها بينما ظهرت بقعتين حمراوتين
في منتصف وجنتيها وكأنهما ثمرتي فراولة طازجة في انتظار
قطفهما:

- طبعاً... مش جوزي وحبيبي!,, ورفعت عينيها اليه متابعة
برنة صدق واضح لا يقبل الشك:

- انت جوزي وحبيبي وكل حاجه ليّا....., لم يستطع سيف أمام
هذا الحب البريء الذي غرق في فيضه إلا أن يكتسحها بطوفان
مشاعره الهوجاء التي لا تهدأ أبدا, فكلما رسى على صخرة
حبهما طالبتة بالمزيد من ينبوع حبها الصافي.....

استيقظت منة ثانية ولكنها كانت بمفردها هذه المرة, تطلعت حولها في أرجاء الغرفة فلفت انتباها صوت جريان الماء بالحمام, ابتسمت فلا بد أنه سيف , حانت منها نظرة الى الساعة بجوارها فشهقت عاليا ورمت بغطاء الفراش جانبا وهى تقفز كعادتها غير منتبهة لوضعها وهى تقول بلهفة:

- هنتأخر, يدوب الحق أجهز نفسي علشان الطيارة...

لُتصعق بمنظرها عندما حانت منها التفاتة الى المرأة التي وقفت أمامها وهى بدون ثياب, وسمعت في نفس الوقت صوت توقف المياه, فعلمت ان سيف لا بد وانه قد أنهى اغتساله وعلى وشك الخروج, كادت تبكي وهى تتلفت حولها علّها تجد منزرها الحريري لترتديه لتستر نفسها ولكن الوقت لم يمهلها حيث سمعت صوت قفل باب الحمام وهو يُفتح فتناولت أول شيء وقع عليه يدها وارتدته , وما ان انتهت من ارتدائه حتى رأت سيف وهو خارجا من الحمام يُحيط بخصره بمنشفة عريضة بينما يجفف شعره بأخرى أصغر منها , أبعد سيف المنشفة عن وجهه واضعا اياها حول رقبته ونظر الى منة التي امتقع وجهها خجلا وقال وهو يقترب منها ببطء يطالعها من أعلى رأسها الى أخمص قدميها :

- ايه القمر دا؟, وصل اليها ووقف امامها ليمد ذراعا قوية لتحيط بخصرها وقال وهو يجذبها ناحيته بينما وضعت راحتيها على كتفيه الصلبتين تحاول ازاحته بعيدا عنها وهو يقول بصوت رجولي خشن:

- تصدقي قميص البيجاما عليكي شكله حلو أووي!! , شهقت ونظرت الى ما ارتدته يداها لتفاجأ بأنه قميص منامته الكحلي, رفعت عيناها اليه وقالت معذرة بارتباك وخجل:

- معلش أصلي مالاقيتش الروب بتاعي ما اخدتش بالي, قربها سيف منه وقال وهو يطبع على صدغها قبلة عميقة بينما تحشرجت أنفاسه وتسارعت أنفاسها هي:

- انت بتعتذري ليه, لعلمك أنا مش هغسل البيجاما دي, علشان تفضل ريحتك فيها!!....., حاولت الحديث بصوت خرج متقطعا بالرغم منها:

- سيف أنا عاوزة أخذ شاور , انت ناسي معاد الطيارة قرب؟!..

أجاب سيف وهو تائه في رائحتها الانثوية الخاصة :

- ايه رأيك نأجل الرحلة؟, ولا أقولك بلاش دلوقتي خالص!, احنا عندنا شهر طويل عريض نسافر في أي يوم براحتنا, المهم نكون مع بعض!!...., شهقت منة وقالت وهى تحاول الافلات من شفتيه اللحوتين:

- لا يا سيف, انت وعدتني !!, تركها سيف متأففا وقال بحنق طفولي:

- يعني دلوقتي شرم بنيت أحسن مني!! , ابتسمت منة وقالت محاولة ارضاء هذا الطفل الكبير الواقف أمامها ممتعضاً:

- سيف حبيبي دي رحلة العمر, وبعدين يا سيدي كلها اقل من ساعه ونبقى هناك, علشان خاطري... ها؟؟,

تظاهر سيف بالتفكير قليلا قبل ان يجيب وهو مشيح بوجهه
جانبا راسما العبوس على وجهه:

- ماشي يا منة, بس هناك كلمتي أنا اللي هتمشي, أقول ما فيش
خروج, ما فيش نزول, ما فيش مجادلة.... تمام؟؟, قلبت منة
عينها وقالت بابتسامة ناعمة:

- تمام يا سي سيف, بس فُكّ التكشيرة دي شكلك أحلى وانت
بتضحك!!..

لم يعرها سيف بالاً , فاقتربت منه بخبث وأمسكت ذقنه براحتها
اليمنى وقالت بغنج أنثوي جعل الدماء تسيل ساخنة في اوردته:

- ما تزعلش مني, أنا ما يهونش عليّا زعلك أبداً , و... أهدته
قبلة خفيفة على خدّه الأيمن, فكاد يحتويها بين ذراعيه ولكنه
تماسك, فهمست أمام شفثيه وأنفاسها العطرة تضرب وجهه
لتجعل سائر جسده يرتعش وكأنه يعاني من حمى قويّة, بينما
تابعت بمكر أنثوي:

- لسه زعلان؟, لتفاجأه بقبلة صغيرة ولكنها حارة فوق شفثيه
ولم يكد يمد ذراعيه كي يحتويها بينهما حتى غافلته وهربت من
بينهما وركضت الى الحمام الملحق بغرفة نومهما وسط
ضحكاتها ونظرات المكر التي رمتها بها ما جعله يهتف عاليا
متوعدا لها ما إن تقع في يده.....

تناولا طعام الفطور في مطعم الفندق ثم جهّزا حقائبهما استعدادا للذهاب الى المطار وكانت عواطف قد هاتفت منة لتطمئن عليها مودعة اياهما وداعية لهما أن يتم الله عليهما سعادتهما....

انقضى اسبوعان على تواجدهما بالمنتجع السياحي الشهير بشرم الشيخ, كان وقتهما يذهب بين السباحة نهارا ثم التجول سيرا على الاقدام في شارع الشانزليزيه ليلا, وقد ذهب بها سيف الى عدة أماكن بشرم الشيخ, ولكن يظل أغلب الوقت يقضيانه بغرفتهما بالمنتجع بناءا على أمر سيف والذي قد أملاه عليها قبل وصولهما الى شرم من أنه هو وحده المتحكم في كيفية قضاء رحلتها!!.....

تركت منة سيف جالسا في مكانهما المفضل أمام البحر وذهبت الى غرفة السيدات حيث اغتسلت من ماء البحر, كانت تهوى السباحة التي علّمها اياها شقيقها, كانت ترتدي رداء للسباحة محتشم, يشبه رداء الضفادع البشرية بلونه الحالك السواد, فهو عبارة عن بنطال من قماش لا يلتصق بالجسم وبلوزة من نفس نوع القماش ذات أكمام طويلة ويغطيها فستان الى الركبة بحمالات عريضة, ويخفي شعرها قلنسوة مشبوكة بياقة بلوزتها ترتفع لتغطي رأسها....

أنهت اغتسالها وأبدلت ثيابها بأخرى جافة ونظيفة عبارة عن بنطال من الجينز الازرق وفوقه قميص أبيض فضفاض يصل الى فوق الركبة بقليل ووشاح ذو ألوان مبهجة ربطته بشكل

أنيق وعملي, تناولت حقيبتها القش الواسعه وقد انتعلت حذاء البحر وردي اللون ثانية , واتجهت حيث ينتظرها سيف الذي اغتسل تحت احدى رشاشات المياه المنتشرة حول البحر لغرض الاغتسال من مياه البحر.....

كانت تقترب من سيف عندما لاحظت اتجاه نظراته, كانت ترقد على مقربة منهما أنثى يظهر عليها أنها أجنبية وذلك من ملامح وجهها, كانت ترقد فوق كرسي البحر العريض بوضع شبه نائم, ولكن ما أغازها كان رداء البحر الذيلا..ترتديه!!

هممت بالسير حيث يجلس سيف والذي كان ينظر الى البعيد حيث البحر, بينما يتصاعد بداخلها شعور حارق ذو مذاق لاذع تشعر به يحرق جنبات صدرها, شعرت أن الأدرينالين قد بلغ لديها أعلى من مستواه الطبيعي بنسبة عالية, لا تعلم ما هذه الأحاسيس التي تختلج بدواخلها, فلأول مرة تشعر بالشيء وعكسه, فهي تشعر بحرارة لاهبة تضطرم في سائر جسدها ولكن.... يرافقها برودة عالية جعلت أطرافها مثلجة!, شعرت بالدموع تلسع عينيها ولكن مع غيظ وقهر شديد يكاد يفتك بها!, تُرى هلى هذا هو الشعور المسمى بالغيرة حقًا?, ان كان هو فهي هالكة لا محالة!, هل تحب سيف لهذه الدرجة المؤلمة?, انها تكاد تصرخ معلنة ملكيتها له, فهو رجل لامرأة واحده.... هي.. مُناه... وهو سيفها, لا يحق لأي امرأة ان تطالعه كما تطالعه هذه العاهرة التي تكاد تأكله بعينيها!..... اتجهت بخطوات قوية حتى أنها شعرت بقدمها تكاد تحفر أرض الشاطيء من قوة خطواتها حتى وصلت اليه, وضعت حقيبتها

بجلبة ملحوظة فوق المنضدة البلاستيكية المستديرة التي تتوسط
جلستهما وقالت وهى تنتظر اليه بتأفف زافرة بحنق:

- بتبص فين يا سيف؟ لينظر اليها سيف دهشة وهو يقول:

- ببص فين يعني ايه؟, لم تكن منة ممن يحسنون تخبأة
مشاعرهم, فحانت منها نظرة الى تلك الانثى التي تضطجع
بالقرب منهما دون أن تشعر, تتبع سيف نظراتها, فابتسم بمكر,
ثم جذبها من يدها لتجلس على الكرسي المجاور له وقال
بابتسامة لم يستطع مداراتها:

- بتغيري عليا يا مُنايا؟! هتفت منة بحنق:

- سيف بقولك ايه.. ما تجنinish!, عينيكَ كانت عندها بتعمل
ايه؟, ترك سيف يدها واعتدل في جلسته مريحا ظهره الى مسند
الكرسي مادا ساقيه أمامه وكان لا يزال برداء البحر الاسود
الخاص به والذي يمتد من وسطه الى ركبتيه, عقد ساعديه وقال
بلامبالاة وهو يحرك كتفيه بحركة بلامعنى:

- عينيا راحت عندها زي ما أي حد من القاعدين عينية راحت
عندها!, بس الفرق ان عينيا رجعت عندي هنا ثاني انما فيه
اللي عينية لسه قاعده هناك متونسه بيها!!!...

شهقت منة عاليا ثم كشرت عن أنيابها وقالت وهى تميل عليه
بحدة:

- وانت بأي حق عينيكَ تروح عندها؟, انت متعرفش ان كدا
حرام؟, دا إسمه زنا عَيْن يا أستاذ!!!...

انتفض سيف في مكانه ونظر اليها وكأنها مخلوق خرافي آتٍ
من كوكب آخر وهتف بذهول وعدم تصديق بينما انتاب جسده
قشعريرة قوية كمن لمس سلكا كهربائيا عارٍ:

- ايه.. زنا!! , يا شيخة أعوذ بالله , انت بتقولي ايه؟! , مش انا
الوحيد اللي بصيت كل واحد وواحد هنا بص, بس انا
استغفرت ربنا وبعدت عيني على طول!!...
نظرت اليه منة في شك وقالت بتساؤل:

- صحيح يا سيف؟, زفر سيف حانقا هذه المرة وقال بحدة:
- منة انت اتهبلت؟, أنا تقوليلي كدا؟, مالت عليه منة وقالت بما
يشبه التوسل:

- علشان خايفة عليك يا سيف, انت عارف ان النظرة الاولى
ليك والثانية عليك, وانا عارفة ان بنت اللذينة دي باللي هي مش
لابساه دا علشان ما ينفعش اقول لابساه, هي اللي بتخلي الناس
تبص عليها, بس انا عاوزة سيف حبيبي يبقى غير الناس,
وضعت راحتها على وجنته ممسدة لحيته الخفيفة وقالت بحب
يشع من بين مقلتيها :

- عاوزة ربنا يبارك لنا في حياتنا يا سيفي, أنا عارفة انك
غصب عنك, بس علشان خاطري حط دايمًا في دماغك انه
داين .. تدان!, واوعى تعمل حاجه ما ترضهاش لنفسك أو ليا!!
تنهد سيف عميقا وقال وهو يقبل باطن راحتها:

- حاضر حبيبتي, وعاوزك تكوني واثقة ومتأكده انه لا هي ولا عشرة زيّها يملوا عيني, انت حبيبتي خلاص ملّيتي عيني وقلبي وحياتي كلها !, ثم همس بصوت يفيض رغبة:

- بقولك ايه ما تيجي نطلع نرتاح شوية قبل العشا؟, لم ينتظر اجابتها وجذبها موقفا اياها على قدميها وسحبها وهو يركض وهي تركض خلفه للحاق بخطواته وضحكاتها السعيدة تصدح في الأجواء....

طلبا وجبة خفيفة لشخصين من خدمة الغرف حتى يحين موعد العشاء, كان سيف جالسا فوق الاريقة العريضة يقلب في قنوات التلفاز وهي بجواره حتى انتبهت الى فيلم " الرهينة ", يبت على احدى القنوات الفضائية, قفزت في مكانها هاتفة بلهفة:

- سيب يا سيف الفيلم دا, أنا بحبه اووي, نظر اليها سيف ورفع حاجبه قائلا بشبح ابتسامة:

- يا سلام!, بتحبيه أوي؟! دا على أساس ان الفيلم دا ماشوفتيهوش 500 مرة مثلا!, دا كل شوية يتعرض...

قالت منة وهي ترفع كتفيها بلامبالاة بينما أولت انتباهها كاملا الى الفيلم المعروض امامها :

- مش مهم, خاّيهم 501 !, اسكت بقه خايني أتابعه, الفيلم دا كل ما اشوفه كأني بشوفه لأول مرة.. مش ممكن بصراحه...

تصنع سيف اللامبالاة وهو يجيب ناظرا الى شاشة التلفاز امامه
بينما يسترق اليها النظرات بين كلمة واخرى:

- آه .. فعلا... عندك حق!, ياسمين عبد العزيز عامله دور زي
العسل, البنت دي وهم بصراحه.. خفة دم وحلاوة ما فيش بعد
كدا!!!....., ألقت اليه منة بنظرة عابرة وقالت ببراءة مصطنعه
وهي تولي اهتمامها لأحداث الفيلم أمامها:

- اممم, عندك حق فعلا... من الممثلات اللي بموت فيها, بس
سيبك انت عز اللي ما فيش منه!, نظر اليها باستنكار وقال
حانقا رغما عنه:

- نعم!, مين عز دا?... نظرت اليه منة بدهشة مفتعلة واجابت:

- عز!?, أحمد عز يا حبيبي, بجد فنان شكل, وخفة دم,
وتلقائية في التمثيل , ايه ... من الآخر بصراحه...
نهرها سيف بحدة:

- ايه ايه ايه, حيلك حيلك!, انت ناقص تقولي فيه شعر?...
نظرت اليه متسائلة بدهشة مزيفة:

- ايه يا سيف انت اتضايقت ولا ايه?, ليجيبها بحنق شديد:

- لا ابدًا, عمّاله تشعري فيه ولا كأن جوزك قاعد جنبك...

أجابت منة ببراءة مزيفة وهي تقترب منه في جلستها لتلتصق
به تماما واضعة يدها على ذراعه التي استشعرت توتر
عضلاته تحت اصابعها الرقيقة:

- ايه بس اللي ضايقك يا حبيبي؟, دا فنان وطبيعي انى أمدح تمثيله, عادي يعني.. زي ما انت عجبك ياسمين انا كمان احمد عجبني!!...., ليهتف بنزق وهو يستدير ناظرا اليها :

- بردو بتقول أحمد عجبها؟! , انت يا ستي أنت مش واخده بالك ان كلامك بجح شويتين تلاته اربعة؟! , احمد مين دا اللي عجبك؟,....., احتضنت منة ذراعه وقالت بغنج أنثوي بينما تقسم في سرّها أن تذيقة من لهيب هذا الشعور الناري المسمّى .. الغيرة... , فهي الى الآن لا تستطيع نسيان نظرات هذه الساقطة التي كانت تأكله بها, في حين أنه قد أقسم لها أنه لم ينظر اليها سوى مرة واحدة فقط, ولكن حتى هذه المرة هي تكاد تجزم أنها تعدت الدقيقة الكاملة وإلا كيف استطاع معرفة أن هناك ترهل في منطقة الفخذين وأن هناك نمش يعلو كتفها؟!..... فقد وقع بلسانه قائلًا لها انها لا تلفت الانظار بجلدها المترهل المحيط بأردافها وهذه البقع السمراء التي تلّون كتفها!!!, أقسمت في سرّها وهى تطالعه ببراءة مصطنعه:

- ماشي يا سيف... إمّا توبّتك الصنف كلّ ما بقاش أنا منة.....
قالت بغنج أنثوي:

- ايه بس يا سيفي زعلان ليه؟, ..حبيبي أنا بتكلم على فنان.. فنان.. الناس كلها بتعجب بيه ستات ورجالة, طيب بلاش... عمر الشريف... حسين فهمي... روبرت دي نيرو... كلهم عمالقة فن وحلوين حلاوة.., وأصدرت صفيّرا عاليا من بين شفتيها قائلة وهى تغمز بعينها:

- مووووز ... مووووز... بصراحة!!!..

انتفض سيف وصرخ قائلاً بينما فتيل من اللهب بدأ بالاشتعال داخله:

- انت اتهللت صح؟, أسندت وجهها الى ذراعه بجانبها وقالت:

- لا .. غلط!, مالت على وجنته مقبلة له قبلة عميقة وقالت:

- ولا تزرع سيفي انت ما فيش زيك... طول وكسم ورسم, ما شاء الله عليك بجد, احنا بنتكلم يعني حبيبي....

أوما سيف برأسه زافرا بيأس وقال بعبوس طفيف:

- خلاص... بس اتعلمي تاني اوعي أحس انه حد عاجبك ولو عنده 100 سنة هيفضل بردو راجل....تمام؟, هزت رأسها مجيبة بجدية مصطنعه :

- تمام...., وبعد برهة وأثناء مشاهدتهم لأحداث الفيلم هتفت منة:

- مش بالذمة شبه نادر الخالق الناطق؟, قطب سيف متسائلاً بحيرة:

- نادر مين دا؟, ومين اللي شبهه؟, رفعت نظراتها اليه وقالت بدهشة زائفة:

- نادر!, نادر ابن خالتي.. مش شبه أحمد عز الخالق الناطق؟, ثم تابعت من دون أن تترك له مجالاً للإجابة:

- أنا فاكدة كل ما كانت واحده صاحبتني تشوفه بالصدفة وهو عندنا كانت تقولي احمد عز ابن خالتك دا يجنن!!....

وكانت القشة التي قصمت ظهر البعير, زمجر سيف هاتفا وهو يغلق التلفاز ضاغطا بقوة على جهاز التحكم الخاص به:

- لاااااا, انت شكلك كدا مش هيجيبها لبرّ انهرده!....

نظرت اليه منة بسخط وقالت باعتراض حانق:

- ايه يا سيف, اخص عليك... عاوزة أكمل الفيلم!! مال فوقها مشرفا عليها مما جعلها تميل راقدة فوق الاركة بينما سيف يعاجلها بعبارات حانقة:

- فيلم ايه اللي تكمليه؟, ...ايه هو انا مش مالي عنيك ولا ايه؟, شوية احمد عز ودلوقتي نادر ابن خالتك... انت مش حاسة بنفسك؟... نظرت اليه منة لوهلة بغموض شاب عينيها وتحدثت بهدوء:

- انت ليه واخذ الموضوع بالشكل دا؟, يعني مثلا لما شوفت الست اللي كانت ع البحر انهرده واتضايقت انت قلت لي انه عادي, وانا كمان بقولك عادي.... ممثل حلو... مش لوحدي المعجبة بيه, وكون انه شبه نادر ابن خالتي حاجه ما تضايقش.... ماتبقاش حمّي كدا يا حبيبي, ثم كررت عليه نفس عبارته التي سبق وقالها:

- انا ما حدش يملّي عيني وقلبي وحياتي غيرك!!....

نظر اليها سيف بريية, وقال عاقدا حاجبيه:

- انت بتردهالي يا منة؟, دي... بدي؟....

مسدت منة بظهر أصابعها لحيته الخفيفة وقالت بدلال معترضة:

- تؤ تؤ تؤ, ليه بتحسبها كدا, هو انا اللي كنت قلت لهم يعرضوا
الفيلم دا بالذات؟, ما تبقاش حنبلي يا روعي؟!.....

زمدر سيف بوحشية قائلًا وهو يعتصر خصرها بين يديه بقوة
جعلتها تطلق آهة ألم رغما عنها:

- حنبلي؟, ماشي يا مُنايا... أنا هوريك الحنبلي دا هيعمل ايه,
وصدقيني مش هخليكي تلتفتي لحد تاني ولو قط ذكر ماشي في
الشارع... لانه وقتها حسابك هيبقى عسير اووي, عقدت جبينها
هاتفة بسخط:

- ايه؟, يا سلام !, إزاي يعني....., ليبتلع باقي عباراتها بين
شفتيه مغيبًا اياها في عناق قويّ استمر لساعات طويلة...

انتهت رحلة شرم الشيخ وعادا الى منزلهما, ذهبا لزيارة عائلتها
في اليوم التالي لعودتهما واحتفوا بهما عائلتها سعداء برؤية
ابنتهما وزوجها والسعادة تملأ أعينهما جليّة, تبادل سيف واحمد
القفشات والنكات المرححة, عرضا عليهما أن يبيتا ليلتهما معهم
ولكن سيف اعتذر فهما مضطران للسفر الى بلدته لزيارة عائلته
في الصباح الباكر فلم يبق على عودتهما الى العمل سوى
يومين...

وصلا الى منزل عائلة سيف الواقع فوق ربوة عالية محاط
بأشجار باسقة, استقبلوهما بزغاريد الفرحة والطبل والمزمار,
فأبن كبيرهم قادم في زيارة مع عروسه.....

كانت منة في غاية السعادة وهي تشاهد فرحة أهل البلدة بها
كعروس لابن كبيرهم, ولمست فرحتهم الصادقة بزواجهما
ومدى ولائهم وحبهم لعائلة زوجها...

استطاعت منة كسب محبة عائلة زوجها جميعا, ولكن كان أكثر
من دخلت قلبه واستطاعت الفوز بحبه هووالد زوجها,
الحاج عبدالهادي....

لم يكن يحلو له المُقام الا معها, كان عبدالهادي شخصية قوية
ولكن بطيبة, حازمة ولكن مع حكمة, واستطاعت منة بفطرتها
السوية وحُسن أخلاقها وبراءتها التلقائية اكتساب محبته...

كان يعاني من مرض السكر وارتفاع ضغط الدم, وكثيرا ما
كان يعاند في تناول الأطعمة الخاصة به, وحدها منة من
استطاع أن يجعله يتقبل هذا النوع من الطعام, وكانت بالمقابل
تقوم بعمل الحلوى له والتي كان يحب تناولها بشدة ولكن
بطريقة آمنة لمرضى السكر, فكانت تعتمد على سكر الفاكهة
وبعض انواع من السكر الخاص لمرضى السكر, كانت تبرع
بعمل الاطعمة الخاصة به, مكثا لدى عائلته اسبوعا كاملا بناءا
على الحاج والده, ولم يستطع سيف تمديد اقامته اكثر من ذلك,
ما زال يتذكر أول يوم لهما عندما استيقظ من نومه ولم يجدها
بجواره, ذهب للاغتسال من فوره وارتدى الثوب التقليدي الذي
يرتديه اثناء مكوته بالبلدة, كان يهبط الدرج عندما سمع صدى
ضحكتها الصافية, فتنبع مصدر الصوت ليجدها جالسة في
المطبخ بجوار والدته والتي كانت تضحك معها وهي تقوم
بعجن الدقيق أمامها, وكان هناك ايضا النساء اللاتي يخدمن

عائلته منذ سنوات طويلة, كانوا يطالعين سيدتهن وهي تعلم
كُنْتها كيفية صنع خبزهم الشهير " البُتّاو ", رفعت منة نظراتها
لتفاجأ بسيف يقف مطالعا لها كان هناك لطفة من الطحين فوق
وجنتها واخرى فوق جبينها لم تنتبه لها, وقف سيف يطالعها
وهو عاقد ساعديه أمامه, هتفت بحبور:

- سيف, صباح الخير....., التفتت والدته له وقالت وسط ابتسامة
عريضة ملأت وجهها:

- صباح الخيرات يا وَلَدِي,

اتجه سيف الى أمه مقبلا اياها على راسها وظهر يدها, وقال
بابتسامة:

- صباح النور يا أم سيف...

ثم التفت الى زوجته واتجه ناحيتها واحاط كتفها بذراعه ومال
مقبلا وجنتها قائلا بابتسامة:

- صباح الورد يا منة...., ومسح باصبعه اللطخة التي تلون
وجنتها فاصطبغت وجنتا منة باللون الاحمر فيما ضحكت
والدته قائلة:

- احتشم يا باشي مهندز... جودامي كُمان... وقال سيف وهو
يحتضن كتفي منة بذراعه ولكنته الصعيدية:

- بَه... مَرَّتِي يا أمااي, إتوحشتها جوووي جوووي...,
وكزت منة سيف في خاصرته بينما صدحت ضحكات والدته
التي قالت:

- ماشي يا عريس, اتفضل انت بجه من إهيه... واحنا هنعضر
لك الفطور حالا...

نظرت منة الى سيف وقد تناست خجلها وقالت بلهفة بينما
عينيها تمتلئان سعادة:

- انا اللي هحضر الفطار, عمتي علمتني ازاي ألت وأعجن!,
بصراحه انا نفسي من زمان أتعلم اللّت والعجن.... وانهرده
لتيت وعجنت!!....

لم يستطع سيف تمالك نفسه وصدحت ضحكته عاليا وقال:

- يا سلام!, لتيت وعجنت?, قصدك لعبت!....

عبست منة في وجهه بطفولية بينما دافعت عنها والدته قائلة:

- لاه يا سيف يا ولدي, ماليكش حج واصل, حتى الحاج لما داج
الخُبز من تحت يدها جال انه مضبوط وكأنها مش اول مرة تلت
وتعجن!!....

نظرت اليه منة وقالت باغظة:

- ربنا يخليه ليّا بابا الحاج, دايم رافع معنوياتي, مش بيكسر
مجاديفي زي ناس!!.....

طالعها سيف بنظرة متوعدة بينما طرته والدته من المطبخ
ضاحكة وهي تقول:

- ياللا يا باشي مهندز, روح اجعد في البرانده على ما نحضر
لك الفطور...

وانتهت أيام شهر العسل وعادا كلا من منة وسيف الى العمل,
كانا يذهبان سووية في الصباح وتعود منة بمفردها اذا تأخر
سيف في العمل, وكان الامر لا يخلو من بعض المشاحنات كأى
زوجين حديثا العهد بالزواج ولكن حبهما كان يتغلب على أية
خلافات...

كان قد مر 6 أشهر على زواجهم عندما بدأت منة تستشعر
القلق لعدم حصول حمل, كانا في زيارة خاطفة لعائلة سيف
عندما سمعت والدته تحادثه بهذا الأمر صدفة, وكان جواب
سيف قاطعا في هذا الشأن أنهما لا يزالان في بداية حياتهما وأن
هذا الأمر بيد الله, هي لا تتكر أنها تحب حماتها والأخرى
تبادلها المحبة , ولكنها أولا وأخيرا أم وتريد رؤية أحفادها,
خاصة وأن سيف هو الولد الوحيد حتى كان ذات يوم....

عادت من يومها من العمل مبكرا, دخل سيف المنزل وهو
يناديهما واغلق الباب خلفه, توجه الى المطبخ فلاحظ ان السكون
يسوده, اتجه ناحية غرفة النوم وما ان اقترب حتى سمع صوت
تأوهات تصدر من داخل اغرفة, فتح الباب سريعا ونظر في
ارجاء الغرفة ليجدها فارغة, ثم لفت انتباهه ان الصوت صادر
من الحمام الملحق بالغرفة, اتجه من فوره اليه, طرق الباب
مناديا منة, سمع صوت تأوهاتها, نادى بالحاح قائلا:

- منة .. منة حبيبتي افتحى الباب, انتظر ثوان مرّت عليه وكأنها دهر قبل ان تفتح منة الباب لترتمي على صدره من فورها, ليتلقفها سيف بين ذراعيه بهلع وقد هاله منظر شحوب وجهها الواضح وهتف:

- منة حبيبتي.... لتهى فاقدة الوعي بين ذراعيه..

- طمّني يا دكتور عندها ايه؟, سأل سيف الطبيب الذي هاتف أحمد لإحضاره, ابتسم الطبيب المسنّ وقال وهو يناول سيف ورقة مكتوب عليها بعض الكتابات باللغة الانجليزية:

- أنا كتبت لها هنا بعض التحاليل علشان تعملها, مش هقدر أوصف لها أي أدوية الا لما نتيجة التحاليل تطلع!!!..

شعر احمد بقلق سيف وبادر بسؤال الطبيب:

- خير يا دكتور, حضرتك شاكك في حاجه معينة؟

ليبتسم الطبيب بينما سيف يتحرق قلقا بانتظار الاجابة:

- ما تقلقوش كدا, كل الحكاية انه فيه احتمال بنسبة كبيرة جدا ان المدام تطلع حامل... عموما التحاليل هتوضح لنا....

تسمر سيف في مكانه بينما تهلل وجه احمد وقال وهو يخط سيف بمرح فوق ظهره:

- مبروك يا أبو نسب, والله وهتبقى أب وهبقى خال...

نظر سيف الى احمد قائلاً بغير تصديق:

- أب!، وما لبثت أساريه أن أشرقت واتجه من فوره الى منة
بينما ابتعد احمد لمهاتفة أمه...

دخل سيف الى منة الجالسة في وسط الفراش, مال عليها مقبلاً
يديها وقال بحب:

- حامل يا منة؟, احمر وجهها وقالت:

- الدكتور سألني شوية أسئلة كدا, وقاللي انه 90% حمل, بس
بردو نعمل التحاليل علشان نتأكد....
هتف سيف بلهفة:

- من النجمة هاخدك ونعمل التحاليل..
وظهرت نتيجة التحاليل ايجابية....

مرت الشهور على ابطالنا... منة وسيف حبهما يقوى مع مرور
الايام, وان كان الامر لا يخلو من بعض المناوشات والشجارات
الخفيفة ولكن حب منة لسيف كان يجعلها لا تقوى على خصامه
كثيرا كما كان عشق سيف لمنة لا يجعله يقوى على رؤيتها
حزينة فكان يسارع لمصالحتها...

نشوى ومدحت تزوجا ولكن عانت نشوى الأمرين من غير
مدحت المفرطة, وما زاد الطين بلة أنه قد ثبت لديها أن مدحت
يعاني من مرض الانفصام في الشخصية, وهذا المرض للأسف
لا يظهر بوضوح على المريض, فمن يراه أو يجلس معه يكاد

يجزم أنه سليم مائة بالمائة ولكن من يحتك به هو من يلاحظ
علامات غريبة عليه هي علامات هذا المرض....

تزوج احمد وايناس وأتى والد ايناس لأحمد بعرض مغر في
البلد العربي التي يعمل بها هو ووالدتها وقرر احمد خوض
التجربة والسفر فاقصر العمل على سيف وعمر ومنة وسحر
بعد ان تركت نشوى العمل نزولا عند رغبة مدحت والذي قد
اصطنع شجارا مع سيف في آخر زيارة له لنشوى مصطحبا
اياها في العودة, فكان غيورا كثير الشك بها...

انقطعت اخبار عادة بعد الانتهاء من العمل الموكل لمكتب
سيف.....

اقرب موعد ولادة منة وتقرر مكوثها عند والدها لحين
ولادتها, كان سيف يذهب اليها يوميا بعد العمل الذي امتنعت
عنه منة بأمر من سيف نفسه خوفا عليها, ولم تكن منة قد
علمت جنس المولود رغبة منها لجعلها مفاجأة...

جاء يوم الولادة حيث فاجأت منة آلام المخاض فجرا, اتصلت
عواطف بسيف الذي جاء راكضا على جناح السرعة حيث كان
يقود سيارته على السرعة القصوى قاطعا جميع الاشارات...

وضعت منة مولودها بصورة طبيعية بعد مخاض طويل
وصعب, كاد سيف خلاله أن يفتك بالطبيب بل وبطاقم
التمريض بأكمله....

جاء والدا سيف على جناح السرعة عندما علم بولادة منة التي
انتقلت الى غرفة خاصة بينما.....تم ايداع المولودتين في غرفة
المواليد الخاصة بهم, فكانت المفاجأة ان المولود لم يكن واحد
بل اثنتين أو بمعنى أدق اثنتين...بنتين آية في الجمال....وقد
أسماهما سيف بعد شجار طويل مع منة والتي أصرت على
تسميتهما بنفسها, كانا في غرفتها بالمشفى ومعهما عائلتها
ووالدي سيف عندما اعترضت منة قائلة:

- يعني أنا أتعب ويطلع روعي وانت تاخذ على الجاهز؟, قال
سيف بضحك:

- يا سلام!, نظرت اليه منة وسط ابتسامات الموجودين
المتابعين للجدل الدائر امامهم بمرح, أجابت منة بحق:

- ليه ان شاء الله... مين اللي شالهم في بطنه 9 شهور مش انا؟,
ومين اللي شاف الموت بعينه وهو بيولدهم مش انا؟, تقدر
تقوللي حضرتك تعبتي في ايه؟, نظر اليها سيف الجالس
بجوارها على الفراش بخبث ومال عليها هامسا بمكر كي
يضمن عدم سماع الباقيين له:

- أقولك تعبتي في ايه وما تزعليش؟, ايه هتعملي زي القطط
تاكي وتنكري؟!..., بقة أنا متعبتش؟, طيب عيني في عينك
كدا!, دا كان تعب ومجهود كبير كمان!!, قطبت منة قليلا
محاولة فهم مقصده وما لبثت ان فهمت ما يرمي اليه وهى ترى

غمزته الماكرة له, كتمت شهقة غيظ ثم أشارت اليه باصبعها
ليقترب منها, ومالت على أذنه هامسة بكلمة واحده جعلته يفغر
فاه دهشة ويفتح عينيه على وسعهما ثم هتف دهشة:

- منة... انت بتقولي ايه؟, , قالت منة بهدوء وجدية:

- اللي سمعته حضرتك, وربنا ما يترد على كلامك الا بالكلمة
دي!!....

قال سيف بأسف زائف وهو يحرك رأسه يمينا ويسارا:

- لا لا يا منة, انت بنيتي أم دلوقتي, فيه أم تقول الألفاظ دي
بردو؟, إنت اخلاقك اتغيرت خالص!!...

لتجيبه منة بذات الهدوء والثقة:

- من عاشر القوم حضرتك, تربيتك!!.....

ليتعالى صوت والد سيف بضحك:

- انتم عمالين تتحدثوا بصوت اصغير ليه, خلاص يا سيف أم
البنات جالت هي اللي عتسمي يبجي هي اللي عتسمي...

نظر سيف اليها قائلا بحنق مفتعل:

- افهم انت عملت ايه في الحاج خليتيه ما يرضاش عليك الكلمة
حتى؟, نظرت اليه بغرور قائلة:

- سر المهنة يا بابا, كواليتي يا فندم كواليتي....

وتعالت الضحكات ولكن.... نفذ سيف رغبته وأسمى ابنتيه...
هنا و...فرح..

- هنا , فرح ... ابعدوا عن اللاب بتاع بابا, لو شافكم هيضربكم
انتم حرّين...

ركضا كلا من هنا وفرح ذوات الثلاث سنوات هربا من أمهما
التي أتت محاولة انقاذ الحاسوب الشخصي لسيف من بين برائن
ابنتيهما الشقيتين, فهي تعلم أن سيف يحتفظ عليه بعمله كاملا,
جلست امام الحاسوب وهي تتوعدهما قائلة:

- ماشي يا هنا انت وفرح انا هكلم بابا أخليه ما يجيبش
الشوكولاته اللي بتحبوها زي كل يوم, ثم انتبهت الى شاشة
الحاسوب امامها وهي تقول:

- غريبة أول مرة ينسى اللاب مفتوح, هققله علشان الزئرديتين
دول ما يلخبطوش حاجه في الشغل بتاعه...

ما ان همت منة بضغط ازرار الحاسوب لغلقه حتى تراءى
لها أسما غريبا في قائمة الاصدقاء لدى زوجها في حسابه على
موقع التواصل الاجتماعي الفيس بوك والذي من الواضح أن
سيف قد سهى عنه وتركه مفتوحا, قطبت مندهشة من الاسم, لا
تعلم أي هاجس أسرّ لها بفتح صندوق الرسائل الواردة لتُفاجأ
بزلازل يهدم حياتها الهادئة مطوّقا اياها تحت أنقاض حبهما
الذي كان يلفظ أنفاسه الأخيرة أمامها وهي تقرأ شهادة وفاته
المتمثلة في بضع عبارات تربط بين حبيبها وأخرى لتعلنهما
زوجا وزوجة في.....جوازة...نت!!

- يتبع -

=====

الحلقة العاشرة:

لم تعلم منة كم مرّ من الوقت وهي على حالها أمام جهاز الحاسوب الشخصي الخاص بسيف , كانت كالتمثال في مكانها , لا تنظر الى أيّ من بنتيها اللتان ركضا اليها مطالبينها باللعب معهما , كانت نظراتها شاخصة على الكلام الظاهر أمامها في الشاشة , وكأنها استحالّت الى صنم , لا شيء يُظهر أنها كائن حي سوى دمعة وحيدة يتيمة نزلت من عينها لتلمع على وجنتها القشدية...

انتبه البنّتان إلى صوت قفل الباب ثم خطوات أبيهما وهو ينادي بلهفة كعادته دائماً:

- هَنايا, فرحي, مُنايا, انتو فين يا أغلى حابه عندي....

دائماً ما كان ينادي بناته بذلك, فقد أسرّ لمنة أن سبب تسميته لهما بهَنا وفرح أنهما.. هَناؤه وفرحه, أما هي ف... مُناه!!

دخل سيف الى غرفة الجلوس ليشاهد طفلاتيه مفترشتين أرض غرفة الجلوس يلعبان بدماهما, اقترب منهما ولم يكن قد انتبه بعد الى تلك القابعة خلف حاسوبه الشخصي وكأنها تمثال من الشمع!!....

مال فوق طفلاتيه وقال بابتسامه:

- حبايب بابا بيعملوا ايه؟, نظرنا اليه وقد ارتسمت ابتسامه عريضة على وجهيهما الملائكي واندفعا الى احضانه بقوة طرحته أرضا على ظهره بينما تعالت صدى ضحكاته وهو يسمعهما يقولان بلهجتهم الطفولية المحببة:

- بابااااا, وحشتنا اوي اوي يا بابا , ليحتويهما بين ذراعيه ويفترشا صدره بينما يقول بحب طاغ:

- وانتو وحشتوني اوي اوي يا حياة بابا, او مال فين ماما؟, وقبل أن تجيب أيّ منهما , لاحظ جلوس منة امام الطاولة المنزوية في ركن غرفة الجلوس, اعتدل في جلسته ليقف وهو يحمل كلا من ابنتيه على ذراع وقال بابتسامه حائرة وهو يتجه ناحية منة:

- اللاه.. منة انتِ هنا؟, انا ما اخدتش بالي منك اول ما دخلت؟, لم تجبه, بل لم يطرف لها رمش, قطب جبينه في حيرة وتساؤل:

- منة حبيبتي... فيه حاجه؟, مالك حبيبي؟,.....مالت فرح على أذنه وهمست كمن يسرّ له أمرا:

- ماما ثحلانه مننا, بث أنا ليشي دحوه, هَنا هي اللي قالت لي نلعب كيمس (جيمز), واحنا قلنا لها كتيبي اننا آتفين بث هي لته ثحلانه!!...

ازداد عبوس سيف ولكنه ابتسم لأبنتيه وقال وهو يضعهما أرضا:

- طيب حبايبي روحوا العبوا في أودتكم دلوقتي ... وقبلهما
ليركضا الى غرفتهما بينما تطلع هو الى منة القابعة في مكانها
بجمود تام وكأنها ليست معهم...

اقترب سيف منها قائلا حيث كانت خلفية الحاسوب في مواجهته
بينما استدار ليقف بجوارها مواجهها لشاشة الحاسوب والتي لم
يكن قد انتبه اليها بعد:

- ايه يا منون, انت زعلانه من البنات فعلا؟, يا شيخه دول
أطفال سيبيهم يلعبوا انت....., ليبتتر عبارته عندما فوجيء
بصفحة الرسائل الخاصة به في حسابه الشخصي على موقع
الفيس بوك, وتحديدًا الرسائل الخاصة بـ "قلبي دليلى", أحد
الاصدقاء لديه!!.....

ترنح سيف في وقفته وانحسر اللون من وجهه ونقل نظراته بين
وجه منة الشاحب والذي يحاكي شحوب الموتى وبين العبارات
المصفوفة أمامه بكل بساطة, نسي الكلام لوهلة, فتح فمه كثيرا
ليتكلم فكان كالسمكة التي علق بفمها صنارة الصياد, وكان
صوته قد غادره, حتى اذا ما وجده تكلم بصوت مهزوز وهو
ينظر الى منة بعينين مذعورتين مملوءتين بالتوسل والرجاء
الحار:

- منة...., منة حبييتي, منة الموضوع مش زي ما انت فاهمه!,
منة أنا هفهمك...., ولكن .. لا حياة لمن ينادي, رفع يده
ليضعها على كتفها وهو يلحّ عليها بينما بدأت عيناه تمتلئان
بدموع حارة أبت أن تنسكب:

- منة أنا هشرح...., وكأن مسّا كهربائيا قد لمسها, اذ انتفضت في جلستها لتطالعه بنظرات شرسة وهى تنفض يده من على كتفها هاتفة بغضب قوي:

- ابعد عني, اوعى تلمسني!!...., هبّت واقفة تنظر اليه بمنتهى الغضب والحقد و.....الأسى!! , وقف سيف على بعد خطوات منها وقال بصوت مترجٍ مستعطف:

- منة, منة ارجوك اديني فرصة أتكلم...., نظرت اليه وعينيها تسبحان بدموع عتاب ولوم وتكلّمت بلوعة من بين شفّتين مرتجفتين:

- ليه؟, لم تعطه الفرصة للاجابة وتابعت وسط دموعها التي انهمرت تغسل وجنتيها الشاحبتين وعينيها تقتلانه بنظرات لوم وعتاب:

- ليه يا سيف؟, ليه؟, أنت يا سيف؟, ... انت يا سيف تخونني؟, خ... خيانة... خيانة يا سيف؟,وغطت وجهها براحتيها منخرطة في بكاء عال وهى تتردد من بين شهقات بكائها الحار:

- أنا.. مش مصدقة, مش مصدقة!! , اندفع سيف اليها راجيا وهو يحاول ازاحة يديها جانبا :

- منة الموضوع مش زي ما انت فاهمه, مافيش خيانه ولا أنا اقدر اخونك.., انت عارفة أنا بموت فيكي أد ايه وبعشق بناتي, لا يمكن أخونك يا منة!! , نفضت يديه الممسكتين براحتيها بقوة وقالت بينما انتفض شعرها ثائرا حول وجهها وهى تواجهه بغضب الأنثى المطعونة بيد حبيبها:

- أومال اللي انا شوفته وقريته و..... وسمعته يا سيف... دا
يبقى ايه؟!....

هتف سيف بيأس:

- مش خيانة! أنا مش ممكن أخونك أبدا...دا.....,

لتقاطعه منة بتحد:

- دا ايه يا سيف؟,

أجاب بلهفة حارقة لجعلها تتفهم ما يقوله:

- دا..دا..... نِتْ!!....

عبست منة وسكتت لثوان وكأنها لم تسمع جيدا, ثم نظرت اليه
عاقدة حاجبها مكررة عبارته الاخيرة بحيرة وتساؤل:

- دا ... ايه؟, نِتْ!...., ليوميء برأسه ايجابا وهو يهتف برجاء:

- أيوة حبيبتى, دا.. نِتْ!! , لتخرج عن طورها وهي تصرخ
عاليا بقلب مجروح يرفرف كالطير المذبوح الذي يلفظ أنفاسه
الأخيرة بين جنبات صدرها:

- ايه؟, انت بتقول ايه؟, يعني ايه دا...نِتْ!....,

اقترب منها سيف عاقدا أصابعه وهو يقول محاولا تهدئتها:

- اهدي بس يا منة واسمعيني, انا عمري ما لمست واحد
غيرك, ولا...ولا قابلت حد من وراكي, انا عمري ما خنتك!..

لتهتف به بغضب صارخ:

- والهائم اللي انت متجوزها دي ان شاء الله كنت بتعمل معاها ايه؟, ايه بتتكلم معاها أخوة؟, و....., - سكنت لا تعرف كيف تنطقها ولكنها لفظتها كمن يبصق شيء بذيء من بين شفثيه - وال... المناظر المقرزة اللي انا شوفتها دي معناها ايه؟, لا تكون بنيت دكتور نسا وانا معرفش!!....

صرخ سيف بانفعال فاقدًا لتمامسكه فهو يرى حبيبته في أقصى درجات الانهيار بسببه هو!, بسبب نزوة طيش أصابته في لحظة وسوس له فيها شيطانه مزينا له الخطيئة في لحظة ضعف كان يعاني فيها من ابتعاد حبيبته عنه وانشغالها بأمر التوأمين!... كانت علاقته بتلك الأخرى قد بدأت كأى إثنان يتعرفان عن طريق الانترنت عبارة عن محادثات فقط ولكن ليتطور الأمر بعد ذلك الى ما لا يحمد عقباه!!, صرخ سيف هاتفا:

- افهمي, كل اللي انت بتقولي انك قريرتيه وشوفتيه دا نزوة, انا غلطت بعترف بكدا, لكن دي مش خيانه, بلاش الصورة البشعة اللي انت بتصورها بيها دي, انا الست دي ما شوفتهاش ولا قابلتها خالص, كله نت في نت!!....

نظرت اليه منة قاطبة بصمت قليلا قبل ان تنفجر في ضحك هستيري بينما دموعها تلتخ وجوها وهو يطالعها بنظرات ذاهلة, وقلبه يتخبط بين جنابات صدره خوفا على حبيبته التي تكاد تفقد صوابها, هدأت بعد قليل وقالت من بين ضحكاتها الصغيرة:

- دا ... نت!..., بجد؟, يعني الموضوع عادي!, ... وتابعت باستخفاف وسخرية:

- ما هو طالما ما تقابلتوش في الحقيقة يبقى خلاص, انت ما خُنتش!, واللي حصل دا مش مشكلة, ما هو أصلك لازم تمسكها بين ايديك علشان يبقى اسمك خنتني, لكن القرف اللي انا شوفته دا عادي كأني بتفرج على فيلم سيكس!, هو فيه سؤال معلّش يعني... هو ايه اللي خلاك تتجوزها بورقة ع انت؟, ايه عاوز علاقتكم تبقى شرعي؟!...!!

زفر سيف بيأس وأجاب:

- منة... أرجوك, افهميني , بقولك دي نزوة, طيش, لكن مش خيانة, وبعدين انت قلتها.. دي جوازة عن طريق انت!... وهو فيه حاجة اسمها جواز..نت؟! , لعبة سميها, أي حاجة , لكن خيانه... لا!!..

صمتت منة لبرهة ثم تحدثت وهى لا تكاد تصدق ما تسمعه منه محرّكة رأسها مرارا من اليسار الى اليمين:

- لا... لا لا لا , انت مش ممكن تكون سيف, انت... انت بتبرر الغلط؟, .. ثم واجهته بقوة قائلة وهى تنظر اليه في عينيه بتحد صارخ:

- يعني لو كنت لاقيتني بتكلم مجرد كلام بس على انت كنت هتقبل الموضوع عادي؟, ما هو خلاص بقه.... دا.. نت!!...!!

اقترب منها سيف بخطوتين وقبض على ذراعيها بقوة وهو يتكلم من بين أسنانه في غيظ شديد:

- او عي أسمعك تقولي كدا تاني, فاهمه؟, واو عي ... او عي تفكري ترديها لي يا منة... لأنك بجد عمرك ما هتتصوري عقابي

هيكون شكله ازاي؟!... جذبت ذراعيها بقوة أمتها من بين
قبضتي يديه التي غدت كالكماشة وهتفت بحدة قوية:

- لكن أنا بقة عارفة عقابي أنا ليك شكله إزاي!!,,,,, ثم ابتعدت
عنه متجهة الى باب الغرفة والذي كان قد أغلقه خلف بناته في
وقت سابق وفتحته بقوة حتى ارتطم الباب بالحائط خلفه بينما
هو واقف يحدق فيها بحيرة وذهول فيما وقفت امامه تقول
بعنفوان بالغ قبل ان تخرج:

- من اللحظة دي يا باش مهندس... عقابي ابتدا!!!...

ليقطب سيف بتساؤل ودهشة في حين اتجهت الى غرفة بناتها
منادية بصوت عال:

- هنا... فرح... لتسمع صوتهما فاتجهت الى غرفتهما لتراهما
جالستان الى فراشهما يلعبان بدميتهما , اتجهت اليهما وركعت
بجوار الفراش على ركبتيها ومدت ذراعيها محتضنة إياهما
بينما دموعها تترقرق في عينيها, وكأنهما شعرا بحزن أمهما,
نظرت اليها هنا قائلة بصوت يكاد يبكي بينما راحة يدها
الصغيرة تمتد لتربت على وجنة أمهما فتمسح حزنها الواضح:

- احنا أنفين يا ماما... مث هنعمل كدا تاني... بث ما تذعليش...

احتوتهما بين ذراعيها بقوة وفرح تردد عبارات توأمها, بعد أن
هدأت قليلا أبعدتهما عنها وقالت بابتسامة حاولت رسمها :

- ايه رأيكم... نروح نزور تيته وجدو, وتلعبوا مع مرام بنت
خالو احمد, فرصة تقضوا معاها يومين قبل ما تسافر تاني مع
باباها ومامتها, ليقفز الاثنان بين احضانها فرحا مهللتين:

- هيببييه, هيببيبيبيبييه,....., وقفت منة ونظرت اليهما قائلة:

- طيب حبايبي, نقعد ساكتين لغاية ما احضر الشنط.....

جلبت حقيبة جلدية من فوق خزانة الثياب الخاصة ببناتها وقامت بوضع ثيابهما وأشياءهما الضرورية كيفما اتفق, كانا يضعان معها العابهما ليلعبا بها مع مرام ابنة خالهما أحمد....

ما ان انتهت من وضع أشياءهما, أقفلت الحقيبة وحملتها متجهة الى باب الغرفة لتضعها هناك, ثم التفتت اليهما راسمة ابتسامة على وجهها وقالت:

- هروح أحضر شنطتي انا كمان, مش عاوزة شقاوة..

واتجهت الى غرفة النوم لتحضير لوازمها, فيما كان سيف جالسا في غرفة الجلوس سائدا مرفقيه الى ركبتيه دافنا وجهه بين راحتيه, وهو لا يصدق ما حدث, فهو في حالة ذهول صارخ, لا بد أنه يحلم!, لا أنه ليس بحلم.. بل هو كابوس فظيع!, يدعو الله أن يستيقظ منه عاجلا.....

تطلع الى الباب حيث اختفت منة, ثم قام متجها الى غرفة بناته ليغيّر طريقه في آخر لحظة متجها الى غرفة نومهما, فتح الباب ليقف مصعوقا وهو يراها تتحرك بهستيرية بين الخزانة والفراش حيث الحقيبة المفتوحة والتي ترمي بها ثيابها بعشوائية شديدة, وقف يتطلع اليها مبهورا للحظات قبل ان يتقدم الى داخل الغرفة بعد أن اغلق الباب خلفه, لترفع عينيها اليه حيث كانت تضع اشياءها في الحقيبة, طالعه بتحد وقوة, ثم اعادت انتباهها ثانية الى ما تفعله, في حين تقدم سيف حتى وصل الى مقربة منها وتحدث بعد ثوان من الصمت فقد شعر أن صوته خانه مما

يراه أمامه, ولكنه نجح في التحدث بالأخير وأن كان بحشرجة عالية ونبرة مشروخة وهو يتساءل في ذهول:

- إنتِ.... إنتِ بتعملي ايه؟, وقفت تطالعه قليلا ثم تابعت عمل ما بيدها وهي تجيب ببرود شديد:

- زي ما انت شايف!....

اتجه ناحيتها حيث أولته ظهرها واقفة أمام الخزانة تتابع إخراج ثيابها وقال بعدم تصديق:

- انت... انت بتلمي هدومك؟, هتسيبي البيت؟... التفتت اليه باندفاع وقالت بغیظ وسخرية:

- لا وانت الصادق... هنسيب البيت!!....

عقد سيف جبينه مرددا في دهشة وحيرة:

- ايه؟, هتسيبوا؟!....

تركته منة واقفا على حالته التي أصابها الذهول الحاد واتجهت لتضع ثيابها في الحقيبة وهي تجيب بسخرية:

- تمام, هنسيب البيت, علشان تبقى براحتك, عاوز.. نِت, عاوز بحق وحقيقي.. انت حُر, دي حياتك وانت حرّ فيها!!....

اتجهت الى الحمام الملحق بغرفتهما لتأتي بلوازمها الخاصة في حين وقف يطالعهامقطبا غير قادر على فهم ما صرحت به...

سار اليها حتى وقف على مقربة منها فيما هي منحنية على الحقيبة لتغلقها, ازدرد ريقه بصعوبة وسحب نفسا عميقا قبل ان يقول:

- منة, ممكن تفهميني ايه بالظبط اللي انت فاكره نفسك بتعمله؟..

رفعت رأسها تطالعه بحدة واجابت بسخرية شديدة:

- فاكرة نفسي؟! , ثم اعتدلت واقفة ما ان انتهت من اغلاق الحقيبة وتابعت وهي تسحب نفسا عميقا:

- أظن سبق وقلت لك , انا وبناتي هنسب البيت....

ليتقدم سيف بخطوات بطيئة مكررا عبارتها بتساؤل عاقدا جبينه بشدة فيما عرق ينتفض بقوة في صدغه دليل على غضبه الناري الذي بدأ يفور داخله:

- ومين اللي هيسمح لك ان شاء الله انك تعملي الجنان اللي بتقوله دا؟...

صمتت منة قليلا قبل ان تتحدث ببرود ثلجي:

- انا مش بستأذن ولا بطلب السماح من حد أني أمشي!..., انا حرة نفسي ... والقرار اللي انا اخدته مافيش رجعة فيه!!....

وصل اليها ليطالعهها بشرارات تتقاذف من بين فحم عينيه المشتعل معيدا عبارتها:

- اللي قررتيه؟, اللي هو؟.....

نظرت اليه قليلا بنظرات مظلمة قبل ان تشدّ من نفسها متحدثة بجمود:

- حياتنا مع بعض مش ممكن تستمر..., ابتعلت ريقها لتحاول المتابعة بذات البرود والذي بدأ بالتصدع ولكن لا يزال ما قرأته

وشاهدته ماثلا أمام عينيها, رفعت كتفيها ونظرت اليه متابعة
بصوت خاو:

- ط... طلق...., ليسارع بوضع يده فوق فمها مكما اياه وهو
يهتف بلوعة وغضب بينما بدأت العبارات بالتجمع في مقلتيها
مهدة بالسقوط في أية لحظة:

- إوعي تنطقيها!, أبدا... أبدا يا منة, طول ما في صدري نفس,
وطول ما أنا عايش.. عمري.. عمري ما هسمح انك تفارقيني
لا إنت ولا بناتنا!!!.....

أغضت عينيها قليلا ثم فتحتها ناظرة الى عينيها السابحتين في
غيمة من الدموع , مدت يدا ترتجف مزيجة يده من على فمها
وقالت بصوت أبح محاولة التماسك:

- مش هينفع يا سيف, للأسف.. أي حاجه ممكن أسامح
فيها... إلا... الخيانة!!!.....

صرخ سيف بلوعة:

- انا ما خونتكيش افهمي!!!...

لتصرخ عاليا وقد هطلت دموعها مغرقة وجهها الحزين الدامي:

- لا.. خنتني يا سيف!, ومع أحط انواع البشر, وبأقذر الطرق,
انت مش بس خنتني إنت أغضبت ربك كمان!!, احنا خلاص يا
سيف انتهينا... سمعت... انتهينا!!, وأولته ظهرها منخرطة
في نحيب عال وهى تحاول عدم اظهار صوت واضعة يدها
على فمها....

اقترب منها سيف ورفع يدا مترددة ليمسك كتفها بين يديه وهو يقول بترجي:

- منة, منة سامحيني, انا... انا غلطت..., بس هي جات لي في وقت انت كنت بعيدة عني فيه, البنات خدوكي مني, انت عارفة انت ايه بالنسبة لي, انا كنت بحس اني مش جوزك وبس لا وابنك كمان, انت كنت بتعملي كل حاجه, حتى هدومي انت اللي بتشتريهالي, ومرة واحده مالاقتكيش, هي دخلت لي في وقت كنت ضعيف فيه, لحظة ضعف يا منة سامحيني فيها وارحميني!!...

التفتت اليه منة تطالعه مقطبة وأجابت:

- نعم؟, عاوز تقول ان أنا السبب!!...

هتف بها وهو يمسك بكتفها جيدا بين يديه:

- لا ... انا بس بشرح لك السبب اللي خلاني أعمل كذا, انت عارفة ومتأكده اني مقدرش ابعد عنكم يوم واحد, انتو حياتي يا منة, فاهمه يعني ايه حياتي؟!...

تحدثت منة بصوت ميّت:

- وانت بإيدك نهيت حياتك دي!!...

ليصرخ سيف عاليا بينما قبضته تشد على كتفها:

- افهميني..., الموضوع أتفه مما تتصورني, الحكاية كلها هزار ولعب و..., لتقاطعه هي بسخرية ومرارة تقطر من بين أحرف كلماتها:

- وايه؟, نت!!....

صمت فيما تابعت وهي ترتجف حزنا و... غضبا:

- قولي يا سيف, الموضوع دا من امتى؟, من امتى وانا نايمة
على وداني يا سيف؟....

هرب سيف من عينيها وأجاب بتحشرج:

- من.... من سنتين!!...

شهقت بلوعة:

- ايه؟, سنتين!!...

حاول تهدئتها هاتفا:

- اسمعيني حبيبتى, الموضوع الاول كان شات ع الفيس, واحده
اتعرفت عليها في جروب من الجروبات اللي بندخلها وابتدينا
نتكلم ونفضفض, ما كانش قصدي خالص انه يبقى كدا,
لغاية...لغاية...

تابعت منة بهزل متطلعة اليه في سخرية وحزن:

- ما هو للأسف يا سيف... أول تنازل بس اللي بيبقى صعب!,
بعد كدا كل حاجه بتكون سهلة..., هي أول مرة بس!!...,
وتابعت بحزن عميق وهي تشير الى نفسها:

- اسهل حاجه عندكم تحطوا اللوم على الست, ما جاش في بالك
ابدا ان انت كمان وحشتني؟, ان محتاجة لأيدك تطبطب عليا,
إنى اشتقت لقاعدتنا سوا, ما تصورتش ابدا انى عايشة نفس
اتفراغ اللي انت عايشه؟, انى بمر بنفس المرحلة اللي انت

مرّيت بيها؟, انت... انت فاكّر اني اهملتك واهتميت بالبنات وما سألتش نفسك ولا مرة انا ازاي كنت بوفّق بين بيتي وولادي وشغلي؟, اقتربت منه لتنظر في عينيه وهي تتابع بمرارة:

- مين اللي كان بيشتغل معاك لما احمد ونشوى مشيوا؟, مش ..أنا!, لما جيت قلت لي انه المكتب مصاريفه زادت ومش عاوز تطلب فلوس من عمي... قلت لك ايه؟, قلت لك هنشيله سوا ونوفر مصاريف ومرتبات, كنت بروح الشغل وبطني قودامي مترين ولما ولدت وشديت حيلي كنت بجيب البنات عند ماما وانزل, كنت بنزل 3 ايام في الاسبوع بس معظم الشغل بشتغله من البيت!, عمرك في يوم جيت لاقيت بنت من البنات مش نظيفة؟, لاقيت هدومك مش مغسولة؟, مالاقيتش الاكل جاهز ومستنيك؟!...

صرخ سيف عاليا تاركا كتفيها:

- مالاقيتش اهم حاجه؟, مالاقيتكيش إنت؟, كل اللي بتقوليه دا جميل , بس انا فين من دا كله؟, انا اشتقت لمنة مراتي, حبيبتي , صاحبتني, في لحظة حاسيت انك بتبعدي, كنت بين نارين... عارف انك معذورة بس في نفس الوقت متغاض منك!, ودي جات في طريقي, بأي شكل أهى وقعت في سكتي!!...

عقدت منة ذراعيها واجابت بابتسامة ساخرة:

- يااااه, اتكعبلت فيها يعني؟, تمام زي الواحد ما بيتكعبل في أي زباله!, يعمل ايه يسيبها ولا يوطي ياخدها?! عارف يا سيف الغلط مافيش أسهل منه, انا كمان ممكن كنت أبرر لنفسى انه انت معظم اليوم في الشغل مش بترجع الا متأخر اوي, وطبيعي

انا هلكانه مع البنات اكون نمت, لكن طول الوقت اللي انا فيه لوحدي مش بلاقيك قودامي, معملتش زيك أنا ليه؟, لو على كلامك انى انا بعدت عنك فإنت كمان بعدت يا سيف!, تقدر تقولي اتى آخر مرة اخدت فيها اجازة؟, امتى آخر مرة صيفنا فيها؟, ما تلومنيش يا سيف, اللوم عليك انت لوحديك, انت انسان ضعيف سلمت نفسك للشيطان, لكن أنا الحمد لله عارفة حدودي كويس وعارفة الصح ومن الغلط, وعمري ما جه في بالي لو على سبيل التجربة انى اتكلم مجرد كلام حتى مع أي حد, حتى لو كان قريبي مش..... معرفة نيت!!...

ابتلع ريقه بصعوبة ولم يُحر جوابا بينما تابعت تسأله محاولة البرود على الرغم من أن داخلها بركان يوشك على الانفجار ليحرق في طريقه الأخضر واليابس:

- معلش سؤال يعني.... ليه الجواز صحيح؟, ايه فاكرين بكدا هيكون اللي بينكم شرعي!!....

ابتعد سيف بضعة خطوات وأعطاهما ثم نظر اليها من فوق كتفه قائلا :

- هي اللي طلبت دا!, علشان ما تحسش اننا بنعمل حاجه غلط وحرام!!, وزى ما قالت... حياة كل واحد فينا مش هتتأثر بحاجه, لأنه في الأول والآخر.. دا.... نيت!!!, بس بدل الجواز العرفي او المسيار هيكون ع انت بورقة بيني وبينها نكتبها ونحفظها في فايل عندنا !!....

نظرت اليه منة بذهول وعدم تصديق لما تسمعه ثم سألته:

- إيه؟, انت.. انت بتقول ايه؟, انتو بتحللوا على مزاجكم؟! , واذا كان الجواز العرفي او المسيار نفسهم حرام!, انتو بتتصرفوا على أي أساس أو شرع أو ملّة!! , لا دي مش ممكن تكون بني آدمة!, دي شيطان في صورة انسان!, الشيطان هو اللي بيزين المعصية والغلط.....

لم تنتظر اجابته وعاجلته بسؤال آخر:

- والشهود ان شاء الله اتصرفوا فيهم ازاي؟... حسب معلوماتي الجواز العرفي والمسيار لازم لهم بردو اتنين شهود, ايه شيرتوا العقد دا لاتنين من اصحابكم ع الجروب؟!...
ازدرد سيف ريقه والتفت اليها ساحبا نفسا عميقا قبل ان يجيب محاولا الهدوء:

- كتبت بوست في الجروب انها اتجوزت!, مش لازم يعني الناس تعرف مين العريس, كفاية تعرف انها اتجوزت, وبكدا بدال شاهدين بقه عندنا 5000 شاهد... عدد أعضاء الجروب!!!..

هتفت منة وهي تصم أذنيها براحتي كفيها بحدة:

- بس, بس كفاية, مش عاوزة أسمع.....

قطع سيف المسافة التي تفصلهما في خطوتين اثنتين وقال بلهفة:

- بس, بس خلاص يا منة, خلاص يا حبيبتي... انا هقطع علاقتي بيها نهائي, اساسا أنا بقالي فترة مش بكلمها!!!..

لتبعد يديها عن أذنيها مجيبة بسخرية وغيظ:

- ما تقولش حبيبتي دي! , وبعدين هتحلها ازاي ان شاء الله؟,....ايه... هتعملها بلوك؟, فاكّر انك بكدا حلّيت المشكلة!,
للأسف يا سيف دي مش مشكلة دي.... كارثة!! , وانا مش هقدر لا أسامح ولا أنسى....., انا عند بابا وورقتي توصلني لو سمحت...

وتركته لتتناول حقيبة الثياب وحقيبتها اليدوية من فوق الفراش متجهة الى باب الغرفة لتوقفها صرخة سيف باسمها, أمسكت مقبض الباب الذي فتحته وطالعت به عينين يغشاهما الدمع الغزير والذي انساب كخيطة اللؤلؤ فوق وجنتيها بينما وشاحها معلق في رقبتها, تحدثت بصوت ضعيف ولكنه ثابت:

- للأسف يا سيف, ما بقاش ينفع..

ثم ابتسمت ابتسامة صفراء متابعة بأسف وحزن عميق:

- حياتنا مع بعض... إعتبرها.. أكونت وإتقفل!!!!.....

وسارت متجهة الى غرفة بناتها وهي ترتب من وضع الوشاح حول رأسها لتغطي شعرها , حضر بناتها ركضا على صوت والدهما الصارخ, اتجهت الى غرفتهما لتجر حقيبة الثياب الخاصة بهما, وما ان همت بفتح باب الشقة حتى سمعت صوته يأتيها صارخا من خلفها حتى أن توأميها قد انتفضن من هول الصوت , ركض اليهما ليغلق الباب بقوة عاصفة وقال وهو يلهث مستندا عليه بكتفه:

- على جثتي يا منة, انت مش هتتحركي خطوة واحدة من هنا لا إنت ولا بناتي, ولو مُصرّة يبقى تخرجي لوحديك, انما بناتي.....ونظر الى بنتيه اللتين تطالعانه بخوف وحيرة,

فرفعهما على ذراعيه متنقلا بنظراته بين وجهيهما الصغير وهو يتابع بقوة:

- بناتي هيفضلوا في حضني, مش هسمح انهم يبعدوا عني ولو شبر واحد أو حتى ثانية واحده!!...

طالعه منة بذهول وقالت بصوت متقطع لشدة دهشتها مما تسمع:

- إنت.... أنت بتقول ايه؟, بناتي هيجوا معايا في أي حنة أروحها, انت فاكرا انه بعد اللي انت عملته دا هأمن على بناتي معاك؟, هتريهم ازاي ولا هتعلمهم ايه؟, ... بلاش.... مش خايف يدفعوا تمن جريمتك؟! , دايـن .. تدان يا سيف, دايـن.. تدان!!....

نظر اليها سيف بقوة وقال مشددا على كل حرف يخرج من فيه:

- وربنا غفور رحيم, وانا غلطت واعترفت, بس مش معنى كذا انك تعليلي المشنقة, بصي يا منة... من الآخر طلاق مش هطلق, وخروج من هنا لا إنت ولا بناتي هتتنقلوا خطوة واحده من غيري, أظن واضح؟!....

أجابت بحدة:

- انت.. انت ماتقدرش تمنعني اني اخرج!, تفتكر ان عملتك المهيبة دي لما اهلي يعرفوها هيسكتوا؟, لا.. تبقى غلطان... وانا اللي مش هعيد كلامي تاني يا سيف, احنا خلاص انتهينا, ومافيش قوة في الارض هتخليني أغير كلامي!!...

تطلع سيف اليها بحدة وما إن همّ بالكلام حتى تعالى رنين جرس الباب, قطب سيف, وأنزل ابنتيه قائلا لمنة أمرا:

- ادخلي انت والبنات! , نظرت اليه برفض صارخ قائلة:

- ليه ان شاء الله..خايف يكون حد من اهلي وأتحامى فيه؟ ,
قاطعها سيف بحدة:

- منة , ادخلي جوّه....

ليقاطع حوارهما صوت طرقات عالية متتالية على الباب
يصرخ صاحبها بقوة بالغة قائلاً:

- افتح الباب يا سيف , حالا.... , قطب سيف ومنة ليتبادلان
النظرات الدهشة المتسائلة فلم يكن الصوت سوى صوت...أحمد
شقيقها!!....

فتح سيف الباب وهو يقول مندفعاً:

- فيه ايه يا أحمد.... , لتقاطععه لكمة قوية من قبضة أحمد ألقته
بعيدا داخل الشقة , صرخت منة بينما اتجه أحمد اليه ليرفعه الى
اعلى ساحبا اياه بقوة من مقدمة قميصه وهو يقول بغضب
ساحق من بين اسنانه:

- يا ابن..... , أنا تعمل في اختي كدا , وعاجله بلكمة أخرى
جعلت سيف يكاد يتهاوى أرضا لولا أن أسندته ذراعيه قويتين
نظر لصاحبهما الذي هتف بأحمد قائلاً:

- خلاص يا احمد مش كدا!! , ليصرخ أحمد وهو يزمرجر
محاو لا الوصول الى سيف لضربه مجددا بينما يحول بينهما
جسد عمر الصلب:

- اومال ازاي يا عمر؟ , ها... فهمني ازاي؟ ,.....

نظر سيف الى احمد وهو يمسح خيطا من الدماء التي سالت على طرف ذقنه بينما وقفت منة مصعوقة مما يحدث امامها وهى تضم ابنتيها اليها وهما يدفنان رأسيهما في تنورتها وصوتهما يعلو بالبكاء, لفت صوت بكاء الاطفال نظر عمر الذي تحدث بغضب:

- ممكن تهذا بقه شوية؟, علشان خاطر البنات على الاقل!!

لاحت من سيف نظرة الى ابنتيه, ركع على ركبتيه فاتحا ذراعيه لهما فطالعا والدتهما بتردد خائف قبل ان يندفعا الى احضانه فتأوه وهو يحتويهما بقوة بين ذراعيه متنفسا رائحتهما العبقة, وهو يقول ملطفا:

- ما تخافوش حبايبي, ما فيش حاجة, ادخلوا اودتكم دلوقتي!!..

نظرا اليه بينما مسحت هنا بيدها الصغيرة الدم السائل من فم والدها وهى تقول من وسط دموعها:

- بث... بث انت بينذل منك دم!, ثم رفعت عينيها الشبيهتين بعيني والدها الى خالها متابعة بغضب طفولي:

- انا.. انا مـث بحبك!, انت ضيبت بابا ليه؟, انا اما أكبي هضيبك زي ما ضيبت بابا....

اجابت منة محاولة تهدئة ابنتيها:

- معلش حبايبي, مش انتو لما بترعلوا من بعض احيانا بتضربوا بعض؟, خالوا ما يقصدش حاجة...

تدخل احمد قائلا محاولا التحدث بهدوء حتى لا ينفـر منه ابنتي أخته:

- معلّش حبايبي انا .. انا زعلان شوية , تقدمت اليه فرح قائلة بحزن طفوليّ:

- لما انا وهّنا بنضيب بعض ماما بتسحق لنا, وانت كبيي مش صغيي يعني عايف كويس ان الضيب غلط, متعملت كدا تاني, ماثي؟, ركع احمد على ركبتيه محتويا فرح بين ذراعيه وهو يقول بغصّة حزن في صوته:

- ماشي حبييتي, أنا..أنا آسف ليكم انتي وهّنا, ومد يده الى هّنا الي أنته تركض وهى تقول :

- قول آثف لبابا كمان!, تدخلت منة قائلة بحزم:

- هّنا , فرح ادخلوا جوه دلوقتي, اطاع البنّتين أمر والدتهما فهما تعلمان جيداً أنها ما ان تتحدث بتلك النبرة حتى يكون الأمر واجب النفاذ وبدون نقاش!!!...

وقف احمد أمام سيف وسأل بغضب وحزن:

- ما فكرتش في بناتك قبل ما تعمل عملتك المهبية دي؟, هي دي الامانة اللي أمّناك عليها يا سيف؟, انت كان مُخّك فين وانت بتهبب اللي انت عملته دا؟..

تبادل منة وسيف النظرات وعيني منة تعلمانه بدون كلام انها لم تخبر أيّاً كان بما حدث, انتبه أحمد الى النظرات الدائرة بينهما فقال ساخراً:

- منة مش هي اللي قالت لي يا سيف!, وعلى فكرة مش انا كمان اللي عرفت.... اكثر من 500 واحد عرفوا, الـ 500 دول

الفريندز اللي عندك..دا... اذا ما كانش اصحابك كترتوا عن
500 زي ما انا فاكرهم!!...

اعتدل سيف في وقفته امام احمد ونقل نظراته بين هذا الأخير
وبين عمر الذي اجاب على تساؤل سيف الصامت في عينيه
قائلا بأسف وأسى وهو يشيح بوجهه جانبا:

- للأسف يا سيف, خبر جوازك لفّ الفيس كلّه!, كل اصحابك
تقريبا راحت لهم صورة من الورقة اياها!! , في الغالب الـ...
الست اللي انت عملت معاها كدا.. هكرت على الاكونت بتاعك
وشيّرت الفايل لكل الفريندز اللي عندك!!...

شهقت منة بقوة واضعة يدها على فمها وعينيها متسعّتين
بصدمة بالغة بينما صرخ سيف بذهول وعدم تصديق بالغين:
- إيببيه؟!!!.....

- يتبع -

=====

الحلقة الحادية عشر:

- منة حبييتي, ما ينفعش كدا, 3 ايام لا أكل ولا شرب, مامتك
هتتجنن, وباباكي كل ما يسأل احمد يقوله خليها هي تقول,
وسيف آخر مرة كلم أخوكي قاله لو مش هتردي على تليفوناته
هبيجي لغاية هنا لولا احمد هددته وقاله ان عمي ميعرفش حاجه

لا هو ولا طنط , ولو عرفوا من سابع المستحيالات انك ترجعي
له تاني !!,,

نظرت منة الى ايناس والتي جاءت بها بصينية الطعام كما كل يوم
لتعود بها كما هي, أشاحت منة بوجهها قائلة بابتسامة حزن:

- ماليش نفس يا ايناس, مش سهل اللي حصل دا, انا حاسة انى
في كابوس , كابوس يا ايناس ,..... ثم نظرت اليها قائلة
بابتسامة ممتنة:

- ربنا يخليكي يا ايناس انا عارفة انى تعبكي معايا, كفاية هَنا
وفرح انا سايباهم خالص وانت اللي واخده بالك منهم...
ايناس بعتب:

- اخص عليكى يا منة, هَنا وفرح دول بناتي...زي مرام
بالظبط, ما تتصوريش هما فرحانين ببعض قد إيه, هي فرح
حببتي اللي احيانا الاقيها مسكتة ولما أسالها تقولي ز علانه
علشان بابا , حاسة انها لسه ز علانه من احمد, مع انه حاول
يفهمها انه ما كانش قصده وانه صالح باباها, لكن البنت حساسة
اوي, خصوصا ان سيف مش بيعجي..

منة بأسى:

- لسه الحزن جاي يا ايناس, بس لازم يتعودوا على كدا, انا
مش همنعهم انه يشوفوه, مهما كان دا أبوهم , لكن حاليا أفضل
انهم يتعودوا انه مش هيكون موجود معهم باستمرار زي
الأول... عموما هيتعودوا.. هما لسه صغيرين..

ايناس وهى تنظر اليها بتساؤل:

- وانت هتتعودي على غيابه؟!...!

منة بابتسامة أسف صغيرة:

- هتعود يا ايناس, لازم هتعود...!

ايناس بتردد:

- منة كنت عاوزة أسألك ومحرجة!..

منة باهتمام:

- لا اسألي يا ايناس, انت اختي حبييتي...!

ايناس بتلعثم طفيف:

- معقولة يا منة الوقت دا كله ما اخديتش بالك ان سيف متغير

او انه مثلا بيقد وقت طويل ع انت؟!..!

منة بابتسامة ساخرة:

- اخدت بالي طبعا, بس سيف كان بالنسبة لي فوق مستوى

الشبهات, عمري ما كنت أتصور انه يطلع زي الرجالة اللي

بنقرا عنهم وماليين الفيس!!..!

اعتدلت في جلستها ناظرة الى ايناس متابعة بحزن غيم على

ملامح وجهها وعينين فقدتا بريقهما:

- عارفة يا ايناس, لما كانت أي واحد اسمعها تقول ان لازم

الزوجة تفتش ورا جوزها وتاخذ بالها منه ما تبقاش نايمة على

ودانها كنت بضحك واقول ايه هتشتغل شارلوك هولمز يعني؟!..!

وبعدين ايه العيشة اللي كلها شك وغيره دي , ما كنتش أعرف

انى أنا من الستات اللي نايمة على ودانها وان الموضوع مش
موضوع تخوين أكثر من انك تاخدي بالك علشان تلحقي جوزك
قبل فوات الأوان خصوصا انه فيه ستات على هيئة شيطان زي
اللي اتلم عليها دي...

لم تعلق ايناس وتركتها تخرج ما بجعبتها, فقد شعرت أن منة
كانت كأنها تتحدث مع نفسها ولكن بصوت مسموع, تابعت منة
بنظرة خاوية:

- لما... لما لاحظت اننا ابتدينا نبعد عن بعض, هو علشان
الشغل وانا علشان البنات, حاولت اننى أكسر البرود اللي في
حياتنا, يعني مثلا يوم اجازته كنت أخلي البنات يناموا وافضل
سهرانه مستتياه, ولأني عارفة انه صابح أجازة فكنت بحاول
على قد ما اقدر اننا نسهر مع بعض, أنا فاكرة في مرة نزلت
صبغت شعري واشتريت قميص لانجيري جديد, وقعدت
استنيتيه, تخيلي لما جه وشافني عمل ايه؟؟.....

نظرت اليها ايناس بتساؤل في حين تابعت منة بابتسامة
سخرية:

- قالي ايه الجمال دا, رocht حضرت له العشا, وقعدت جنبه
اتعشى, معلش يا ايناس اسمحي لي يعني, لما جوزك يكون
راجل في عنفوان شبابه ومراته ست جميلة وبيحبها وبقالهم
فترة بعيد عن بعض المفروض لما يشوفها كدا يحصل ايه?..

نظرت اليها ايناس واجابت بتلقائية:

- اكيد مش هيفوت الليلة كدا,.... ثم ضحكت متابعة:

- هيعملوا ليلة دخلة من اول وجديد !!!..

نظرت اليها منة قائلة بجمود:

- بس مش دا اللي حصل! , اللي حصل انه باسني وقاللي
معلش يا منون انا جاي تعبان , تصبحي على خير حبيبتي!!..

فتحت ايناس عينيها على وسعهما شاهقة بدهشة وقالت:

- ايه! , وانت عملت ايه يا منة?..

منة بحسرة:

- هعمل ايه يعني? , بوسته وغطيته ولُمت نفسي إني محسيتش
بيه أنه جاي تعبان , ونمت عادي!! , مش بقولك طلعت مش بس
نايمة على وداني لا وبشخر كمان..... , عارفة يا ايناس اليومين
اللي فاتوا دول كنت براجع فيهم كل السنين اللي مرّت عليا انا
وهو , (كانت تتحاشى ذكر اسمه فإسمه كفيل بجعلها تشعر
بوجع عميق وألم دفين لا تستطع احتماله).....اكتشفت انى فعلا
كنت مغفلة ومع سبق الاصرار والترصد , بس عذري اني
حبيته أوي , وأمنت له أوي وأوي وعمرى ما تصورت انه ممكن
في يوم يحصل حاجه زي كدا !!!..

احتضنتها ايناس وهى تقول مواسية:

- معلش يا منة , غُمة وهنزول ان شاء الله , انا بجد مش عارفة
اقولك ايه , بس لازم طنط وعمو يعرفوا , لازم تقوليلهم...
منة وقد بدأ شعور بالدوار يلفها وهي تحاول مغالبتها:

- هقولهم يا ايناس,بس مش دلوقتي... لما أهدى الأول علشان اعرف أتكلم معهم...

قطبت ايناس ملاحظة منة وهي تضع يدها على جبهتها وقد زاغت عيناها, سألت ايناس بخوف:

- منة مالك؟, أجابت منة بصوت ضعيف متقطع :

- مش.. مش عارفة.. يا ايناس, حاسة اني هبطانه, مم...مممكن تجييلي ماية بسكر؟!,,

هرعت ايناس الى الخارج وهي تقول:

- ثوان حبييتي...

لم تغب ايناس أكثر من دقيقة لتعود فتُفاجأ بمنة وقد أرتمت فوق الفراش, تقدمت منها وهي تناديهما ولكن ما من مستجيب , وضعت كوب الماء جانبا وأمسكت رأس منة وربتت على وجنتيها وهي تناجي بخوف:

- منة... منة حبييتي فوقى , منةو ولكن منة استحالت في يدها الى قطعة باردة من الرخام , مما جعلها تهرع الى الخارج وهي تصرخ منادية زوجها أحمد...

- ما تقلقش يا استاذ عبدالعظيم, كل الموضوع ان الضغط عندها واطي أوي , وبعدين أنا ملاحظ علامات سوء تغذيه عليها, واضح انها مش بتاكل كويس.. عموما المحاليل اللي انا ركبتها دي هتخليها تبقى كويسة ان شاء الله, اهم حاجه

تتغذى كويس وترتاح وتبعد عن أي انفعالات... ربنا يطمنكم عليها ان شاء الله...

أوماً عبدالعظيم برأسه قائلًا وهو يرافق جاره الطبيب الذي سارعوا للاستنجاد به ما ان وقعت منة مغشيًا عليها:

- ربنا يستر يا دكتور حامد, معلش تعبناك معنا....

نفى الطبيب حامد الرجل الأربعيني العمر بهزة من رأسه:

- ازاي تقول كذا؟, دا الجيران لبعضها بردو, عموما أنا تحت أمركم أي حاجه كلمني بس وانا مسافة السلم أكون عندكم, انت عارف شقتي فوقكم على طول!!....

غادر الطبيب تصحبه دعوات عواطف التي سارعت بالدخول لابنتها فيما غادر أحمد الذي كان يلزمها لدى معاينة الطبيب لها , قال احمد لعواطف :

- انا هروح أجيب العلاج اللي الدكتور قال عليه يا ماما, وعاوز أحلى أكل من ايديكي علشان الهانم لما تفوق أنا اللي هأكلها بنفسي!!....

عاد احمد بالعلاج الذي وصفه الطبيب , ودخل ليطمئن على منة فوجدها لا تزال نائمة يرافقها أمه بينما ذهبت ايناس بالاطفال الى الحديقة المجاورة كي لا يصابوا بالقلق لدى رؤيتهم لمنة وهي ترقد مريضة!!.....

نادى عبدالعظيم احمد:

- احمد, تعالى عاوزك..

علم أحمد أنه قد حان الوقت للافصاح عما حدث بين شقيقته وزوجها...

ما إن أغلق أحمد بابا غرفة الجلوس خلفه حتى وقف والده امامه أمرا اياه بمنتهى الصرامة والحزم:

- حالا... تقولي ايه اللي حصل بين أختك وجوزها, انا كنت ساكت الاول ومش عاوز أدخل بقول مهما كان البيوت اسرار, ومنة أنا عارف دماغها, لكن الموضوع يوصل انها كانت ممكن تروح من ايدينا, يبقى لأ... لازم أعرف كل حاجه وبالتفصيل!..

نظر أحمد الى ولده وزفر عاليا وهو يقول بلهجة التسليم بالأمر الواقع:

- أنا هقول لحضرتك على كل حاجه !!.....

احترم أحمد صمت والده الذي تحدث بعد برهة زمنية قصيرة قائلاً بصوت خرج أجشاً رغماً عنه, حزناً على صغيرته:

- كلمه يا أحمد, عاوز أشوفه !!...!

عقدت الدهشة لسان أحمد لثوان قبل ان يفيق من ذهوله ويتحدث بحيرة:

- نعم؟, عاوز تشوفه يا حاج؟, الموضوع خلص خلاص ومافيهوش فصال!!..

نظر عبدالعظيم لإبنه بنظرة متألّمة وصوت طغى الحزن على نبراته:

- أختك معاها بنتين منه يا احمد, والبنات بيحبوه ومتعلقين بيه اوي, واختك نفسها... مش شايف حالتها ازاي؟, دي مش حالة واحده بايعه!!...

ليفاجئهم صوت ضعيف ولكن بثقة:

- واحدة ضايعه بعد الصدمة اللي خدتها يا بابا !!....

نظر كلا من عبدالعظيم واحمد بدهشة الى مصدر الصوت لتفاجئا بمنة وهى تقف مستندة الى ذراع كلا من والدتها وايناس, قام احمد من فوره وأجلسها بجانب والدها الذي احتواها بين ذراعيه مربتا عليها بحنان الابوة, بينما أطلقت هي لدموعها العنان ولم تستطع أمها كتم بكائها بينما اكتفت ايناس بالوقوف جانبا وعينيها يغشاهما الدمع....

قال عبدالعظيم بمنطق الأب الحاني الحكيم:

- ليه يا منة خبيّتي علينا؟...

منة من بين شهقات دموعها:

- ما كنتش قادرة أتكلم يا بابا, سيف... سيف قتلني يا بابا قتلني!!....

وتفاجأ الجميع بمن يقول بصوت أشبه بالعويل:

- لو قتلتك يبقى قتلت روعي وانا مش ممكن أقتل روعي يا منة!!.....

نظر الجميع الى هذا النمر الجريح الذي اندفع الى الداخل بعد
أن فتحت له هنا ابنته فأشار اليها بالصمت ودعاها للحاق
بأخوتها بينما تتبع هو صوت الجميع الذي قاده الى غرفة
الجلوس ليصطدم سمعه بعبارة منة التي كانت كالسهم الذي نفذ
الى صدره!!....

شهقت منة وهى ترفع رأسها من فوق صدر والدها الحامي
هاتفة بعدم تصديق:

- سيف !!....

فمن كان يقف أمامها لم يكن هو أبدا سيفها, حبيبها, ووالد
بناتها,.... لقد كان شبحا....يثير الذعر لمن يراه !!....

كانت لحيته قد استطالت فلم يشذبها منذ تركته منة كعاداته,
وكانت ثيابه مجمدة وكأنه لم يبدلها منذ وقت طويل, واحاطت
بعينيها هالات سوداء وأصبحت وجنتيه غائرتين داخل وجهه,
ولكن ما لمسها حتى العمق تلك النظرة الضائعة التي اعتلت
ملامحه!...

اقترب سيف منها وتحدث الى والدها بينما عيناه طفقا يشبعا
جوعهما الى ملامح معشوقتهما بنهم شديد:

- أنا جيت لغاية عندك يا عمي, أي حاجه تطلبها منة أنا موافق
عليها ... بس أرجوك يا عمي خليها ترجع معايا, أنا مش طايق
البيت من غيرها هي والبنات, حياتي كلها اتلخبطت من
غيرهم..

نظرت اليه منة بغضب تأجج ما ان سمعت صوته, وقد ذهب
شعور الشفقة الذي داهمها حياله ما ان وقع نظرها عليه أدراج
الرياح !!.....,بينما تحدثت عواطف بغيط واضح:

- إنت ليك عين كمان....., ليقاطعها صوت والدها الجمهوري
قائلا بصرامة:

- أم منة....., صمتت عواطف على مضض في حين أكمل
عبدالعظيم بحزم:

- عواطف...خدي بنتك وادخلوا جوّه !!.....

قامت منة بمساعدة والدتها يساندها احمد الذي تركها لتتلقفها
ايناس وغادرن الغرفة بينما يلاحقها سيف بنظرات مشتتة كاد
يركض اليها ما ان سارت بمحاذاته مغادرة, يكاد يُجنّ من فرط
شوقه إليها....., قاطع صوت عبدالعظيم استرسال افكاره
ونظراته الملاحقة لطيف محبوبتها بلا هوادة, قال عبدالعظيم
بجدية وهو يشير الى أحد المقاعد:

- اتفضل يا سيف, اقعد علشان نعرف نتكلم..

جلس سيف بينما اعتلى وجهه تعبير لهفة واضحة وما ان استقر
عبدالعظيم في مقعده أمامه حتى هتف :

- انا عارف إني غلطت, ومستعد لأي ترضية تطلبها, بس
متحرمونيش من مراتي وبناتي !!,,,

تقدم أحمد الذي كان يقف على بعد خطوات قليلة منه وتحدث
بصوت مكتوم غيظا وغضبًا:

- انت بتستعبط؟, هو اللي انت عملته شوية؟!....

قاطع صوت عبدالعظيم الجهوري ابنه:

- احمد, بهدوء علشان نعرف نتفاهم!..... ثم عاود النظر الى سيف متابعا بحسم:

- ايوة يا سيف, انا سامعك...و انت معترف بغلطك وعاوز مراتك وبناتك صح؟؟؟,,

ليجيبه سيف بلهفة واضحة:

- آه, أكيد...أنا مقدرش أعيش من غيرهم ثانية واحده, الايام اللي فاتت دي كانت سنين بالنسبة لي, ولولا اني حببت منة تهدي الأول كنت جيت وراها من اول دقيقة...

عبدالعظيم ببرود وهو يطالعه بنظرة أسي:

- للأسف يا سيف... غلطتك مش بسيطة, دا لو سمينها غلطة! , لأنها مش غلطة يا سيف...دي جريمة في حق نفسك ومراتك وبناتك , وفي حق ربك قبل أي حاجه...., ومن غير كُتر كلام.. بنتي مش هتوافق وأنا مش هضغط عليها, اللي حصل مش خناقه عادية سمعتها كلمتين ولا حتى رفعت ايدك عليها .. لا يا سيف الموضوع أخطر وأكبر من كدا بكثير...

سيف وقد بدأ تماسكه الواهن يتزعزع:

- يعني ايه؟, قصد حضرتك ايه؟...

عبدالعظيم وهو يقف انهاءا للنقاش:

- علشان اكون صريح معاك يا سيف, مش من مصلحتك انك تسألني دلوقتي قصدي ايه!, لأنني لو عليا هقولك مالکش لا..

زوجة ولا.. بنات عندي, أمشي دلوقتي يا سيف, بس أنا مش هقدر أوعدك بحاجة!!...

وقف سيف ناظرا اليه بخوف حاول اخفائه بينما فضحه نبرات صوته المهزوز:

- يعني همشي من غيرهم؟,.... نظر اليه محاولا التماسك وهو يتابع:

- أنا همشي, بس قبل ما أمشي عاوز حضرتك تعرف حاجه مهمة أوي أنا غلطت واعترفت بغلطي, ومستعد لأي حاجه إلا إني أبعد عن مراتي وبناتي , أنا هرجع ثاني, والمرة الجاية يا ريت نقدر نتفاهم أحسن من كدا, أنا مقدر طبعا غضبكم علشان منة, لكن ربنا غفور رحيم, وانا غلطت وثُبت وندمت...و ياريت حضرتك تبلغ منة رسالتي... أنا متمسك بيها هي وبناتي طول ما أنا عايش, ومهما حصل عمري ما هسمح أنهم يبعدوا عني سنتيمتر واحد....., عن اذنكم....

وانصرف تاركا احمد ينظر في أثره بحقد بالغ بينما يتابعه عبدالعظيم بنظرات خيبة الأمل والأسف !!.....

- بعدين يا عبده, هنسيب البنت كدا؟, زفر عبدالعظيم بيأس ونظر الى زوجته التي لحقته الى غرفتهما تاركة منة في عهدة إيناس, نظر اليها بحزن وقال وهو يهز برأسه بأسى:

- هتبقى كويسة ان شاء الله, منة قوية يا عواطف, وعقلها كبير, بس لازم نسيبها تهدي شوية, اللي عمله جوزها مش بسيط ولا سهل ...

عواطف بغضب:

- أنا مش مصدقة ان سيف يطلع منه كدا, مصدقتش نفسي
وايناس بتحكي لي بعد ما سبناكم, الا صحيح هو قالك ايه يا
عبدہ؟..

أجاب عبدالعظيم:

- مش مهم اللي قاله, اللي قاله انا متوقعه, سيف مش هيفرط في
مراته وبناته, المهم هو هيعمل إيه علشان منة تقدر تسامحه؟!..
المهم مش عاوزك تفتحي معاها كلام خالص دلوقتي, انت
شايفه البنت اعصابها مش مستحمله, انا عموما بفكر أننا نساfer
نغير جو في أي حته, اجازة نص السنة خلاص كم يوم وتبتدي,
وفرصة احمد موجود أهو ايناس تلهيها شوية ...

أشادت عواطف قائلة:

- تسلم افكارك يا عبدہ, فعلا لما تغير جو انا متأكدہ انها هتبقى
أحسن ان شاء الله...

أمّن عبدالعظيم قائلاً:

- ان شاء الله يا عواطف, ان شاء الله.....

كانت ايناس جالسة بجانب منة في غرفة الجلوس بعد أن
استعادت منة قواها أخيراً , وكان قد مرّ على قدوم سيف
يومين, كان خلالها يهااتف والدها للاطمئنان منه عليها وعلى
بناته, فلم يكن أحمد ليجيب اتصالاته, وأراد سيف أن يترك لمنة
مساحة كافية للهدوء والتفكير في أمرهما مليّاً, وإن لم يكف عن

ارسال رسائل حب وشوق ملتهبة تجعلها تبتسم حيناً وتبكي
أحياناً !!!.....

صوت رنين جرس الهاتف قاطع الحديث الدائر بين ايناس ومنة
لتجيب ايناس وبعد ثوان لاحظت منة لون ايناس الذي شحب
فجأة وسمعتها تشهق هاتفة بذهول:

- ايه؟, انتي بتقولي يا سحر؟, انتي متأكده؟, ...أمتى الكلام دا
حصل؟....., أنصتت قليلا لنتهي المكالمة ودموعها تنهمر
تغسل وجهها, قامت منة متجهة اليها وهي تسألها في خوف
وترقب:

- فيه ايه يا ايناس؟, سحر قالت لك ايه خلاكي كذا؟...

تكلمت ايناس بصوت متقطع من بين شهقات بكائها الحار:

- نشوى, نشوى يا منة.....و هتفت منة وقد تلفت أعصابها:

- مالها نشوى يا ايناس؟...

لتجيب ايناس بنواح:

- نشوى.. نشوى ات...اتقتلت!, سحر بتقولي أن...جوزها
قتلها!!!...

لتصرخ منة هاتفة بذهول:

- إيبيببيه!!!.....

- "يا أيتها النفس المطمئنة ارجعي الى ربك راضية مرضية فادخلي في عبادي وادخلي جنّتي" - صدق الله العظيم...
الفاااااااتحة.....

أنهى الشيخ تلاوته، وقام المعزّون بتعزية والد نشوى الذي يقف يتلقى عزاء وحيدته التي لم تكمل عامها الثلاثون بعد، في خيمة العزاء التي نُصبت في حديقة القصر لتلقي العزاء في وحيدته، بينما جلسن النسوة مع والدتها داخل القصر

تقدمت منة وايناس برفقة سحر للسلام على والدة صديقتهم وتقديم العزاء, كانت دريّة والدة نشوى كالضائعه, نظراتها تائهة, كانت تتمتم بكلمات غير مفهومة , تحدثت منة بصوت خفيض ملئ بالحزن:

- البقاء لله يا طنط, ربنا يرحمها رحمة واسعة يارب, ان شاء الله شهيدة....

رفعت درية عينيها الى منة التي واصلت:

- أنامنة يا طنط صاحبة نشوى الله يرحمها, نشوى كانت أكثر من أخت بالنسبة لى

وقفت الام بمساعدة سيدة تجلس بجوارها وقالت ودموعها تهطل مغرقة وجهها الخالي من مساحيق التجميل لأول مرة مما وشى بعمرها الحقيقي، بينما شفتاها ترتجف بقوة ، تناولت منة يدها لتسندها وسمعتها تقول بصوت متقطع:

- انت منة؟, كانت دايمًا تجيب سيرتك بكل خير, كانت.. لسه
فاكر انا قبل ما تموت بأيام, قالت لي منة بس هي اللي
بتفهمني...

اجابت احدى النساء الجالسات بجوارها يتابعن الحوار:

- حسبي الله ونعم الوكيل فيه, ربنا مش هيسيبه, أهوم مسكوه
وان شاء الله هياخد اعدام المجرم!, يقتل مراته وهي نايمه...
منه لله, ربنا ينتقم منه !!...

صرخت درية قائلة:

- أنا اللي قتلتها قبله !!,,, ,

صّغت منة وتبادلت النظرات مع ايناس وسحر وقالت محاولة
التخفيف عن هذه الأم الثكلى:

- ما تقوليش كدا يا طنط, نشوى الله يرحمها كانت بتحبكم
أوي..

لتتابع درية وكأن منة لم تتكلم:

- جاتلي قبل ما يحصل اللي حصل بيومين بتشتكي لي انها مش
قادرة تستحمل خصوصًا بعد.. بعد ما اتجنن خالص واتهمها
انها عاوزة تموت, ما كانش باين قودامنا خالص انه مش
طبيعي, ابوها زعق لها وقالها انها واحده مستهترة ومش قد
مسؤولية بيت وجواز, وامبارح بس عرفت انها حامل, حبيبتي
كانت طائيرة من الفرح, وقالت لي هتحاول معاه انه يتعالج
علشان خاطر ابنهم أو بنتهم اللي جاية في السكة, بس..... بس
مالحقتش, لما قالت له انها حامل كدّبا واتهمها انها عاوزة

تخلص منه وتحطه في مستشفى المجانين, و خلاها نايمة
وخنقها بالمخدة!! , هو دلوقتي في مستشفى الامراض العقلية,
وانا... انا خسرت بنتي...خسرتها ... انا اللي لازم يعدموني
مش هو...انا وابوها السبب, آآآآآآه يا بنتي....., حاولت منة
أسكاتها ولكنها كانت هي الاخرى تذرف دموعا غزيرة حزنا
على نشوى التي ذهبت ضحية اهمال الاهل و العنكبوت
المسمّى بالانترنت !!, وكيف لا ومدحت قاتلها كان زوجها الذي
تعرفت عليه من خلال هذه التكنولوجيا المتطورة التي جعلت ما
كان صعبا أو مستحيل سهلا و... يسير!!....

- منة حبيبتى انت مش عاجباني, من يوم ما رجعت من عزا
صاحبك الله يرحمها وانت قافلة على نفسك, بقولك ايه قومي
غيري هدومك وتعالى معايا انا وايناس هناخد العيال وننزل
نشترى شوية حاجات ليهم لزوم المصيف....

اجابت منة والدتها :

- معلش يا ماما, سيبوني أنا, انا تعبانه مش هقدر ألف معاكم,
روحوا انتو وما تشيليش همّي أنا هنام شوية ...

عواطف توصيها بنفسها:

- طيب, بس لو اتأخرنا عندك أم محمود خليها تحضر لك الغدا,
احمد وبابا انهرده مش هيتغدوا معانا كل واحد في شغله, وانا
وايناس احتمال نفوت ع النادي بعد ما نخلص مشاويرنا, انا
عموما وصّيت أم محمود وانت عارفها مش هتعرفي تخلصي
منها....

رنين متواصل لجرس الباب جعل منة تقوم من فراشها وهي تتساءل ترى من القادم, واين أم محمود؟, لتتذكر أن أم محمود أخبرتها أنها ستذهب لابتياح بعض اللوازم من السوق...

اتجهت منة لترى من الطارق وقد تناولت وشاحا وضعتة على شعرها كيفما اتفق فظهرت بعض الخصلات لم تنتبه اليها... تمتمت منة في سرها أنه لا بد ان الطارق زياد ابن جارتها هدى والذي دأب على القدوم للعب مع ابنتيها, فتحت الباب وهي تقول بابتسامة :

- ايه يا زياد؟, لتبتر عبارتها شاهقة بذهول هي تتراجع بضعة خطوات الى الداخل بينما أمسك القادم بمقبض الباب ليغلقه خلفه جيدا فيما تقدم اليها وهو يتحدث بتساؤل وغضب خفي:

- يا ترى مين زياد دا يا مُنايا؟, هتفت منة غير مصدقة عينيها:

- سي... سيف!! إنت....., لم يمهلها سيف لتكمل كلامها اذ امتدت يديه لتجذبها بقوة فارتطمت رأسها بعضلات صدره القوية , وما ان تأوّهت ألما ورفعت رأسها لتصرخ به حتى سارع بالتقاط شفتيها في قبلة ضارية أودعها كل شوقه وحبّه و...غيرته !!!....

تركها سيف بعد مدة طويلة ليلتقطا أنفاسهما المحبوسة, اعتصرها بين ذراعيه بقوة حتى أنه كاد يقسم أنه سمع صوت ضلوعها وهي تنز من قوة ضمّته , وتحدث بصوت لاهث من بين خصلات شعرها التي أسند ذقنه فوقها:

- وحشتيني, وحشتيني أوي أوي ,....

انتبهت منة الى وضعها بين ذراعيه فحاولت الفكاك منه وهى تقول بينما قبضتيها الصغيرتين تضربان صدره:

- ابعد عني يا سيف, انت اكيد اتجننت ابعد...

قاطعها بكلمة وحيدة حاسمة, صارمة, قويّة:

- أبدأ...., ليميل برأسها بعد ذلك محتويًا إياها في عناق طويل,
كان كالذي كاد يموت عطشا وما إن وجد واحة ماء عذبة
رقراقة حتى طفق ينهل منها كي يروي ظمئه ولكن ظمأ سيف
لمنة أبدأ..... لا يُرتوى !!.....

- يتبع -

=====

الحلقة الثانية عشرة:

دفعت منة صدر سيف بقوة فتركها رغما عنه وما إن تحررت
من قبضته حتى رفعت يدها لتهوى على وجهه بصفعة مدوية
من دون شعور !!.....

ساد السكون من حولهما والذي لم تجرحه الا صوت دقات
الساعة الرتيبة, في حين انتبهت منة الى ما فعلت فشهقت شهقة
صغيرة وهى تتراجع بضعة خطوات الى الخلف بينما اكتست
عينا سيف نظرة غامضة, خرق صوت سيف السكون المحيط
بهما وهو يتساءل بهدوء:

- يا ترى القلم دا خلاكي تهدي؟...

نظرت إليه منة بشرارات نارية تتراقص في مقلتيها وتحدثت بغضب:

- ولا... أي حاجه هتخليني أهدي يا سيف!...

اقترب سيف منها بضعة خطوات حتى وقف على بُعد إنشات قليلة منها وأجاب بصوت منخفض:

- مسيرك هتهدي يا منة, بس وإنّ في بيتي, وبناتي في حضني, أنت عارفاني كويس أوي , عمري ما بزهد بسهولة, وفي موضوع انت وبناتي طرف فيه يبقى عمري ما هزهق خالص, أنا غلّطت واعترفت ما أنكرتش , توبت واستغفرت ربنا كثير, إذا كان ربنا ببسامح ويقبل التوبة, إنت مش عاوزة تسامحي ليه؟!...!!

تحدثت منة بصوت خرج بالرغم منها مهزوزا:

- علشان أنا إنسانة عادية, أنا مش ملاك...,, اللي انت عملته دا شيء بشع, انت فاكّر الموضوع بسيط؟, ايه واحده عرفتها وسيبتها علشان بيتك ومراتك وخلاص؟! , لا يا باش مهندس, ما سألتش نفسك الجواز اللي بينكم دا مدى شرعيته إيه؟..

أجاب سيف بابتسامة ساخرة بينما حمل صوته دهشته من سؤالها:

- شرعية إيه؟, بقولك دا .. نِت! , يعني كدا وكدا, لعب في لعب من الآخر , فين الشرع اللي في دا عاوز أفهم أنا؟!...!!

عقدت منة ذراعيها أمام صدرها وقالت باستخفاف:

- علشان فيه حاجه بسيطة اوي تاهت منك يا أستاذ! , نظر اليها سيف بتساؤل وترقب في حين تابعت هي بجدية بالغة:

- الورقة اللي انتو كتبتوها بينكم ع النت.. اتشيرت لناس كثير, أبسط مثال لأصحابك مثلا واصحابها, يعني....إشهار !!, تقدر تقولي ما فكرتش ولو ثانية انه جواز ال... نت اللعبة دي قلبت جد؟! , ما جاش في بالك الكارثة اللي حصلت؟, المفروض أساس الجواز الاشهار بدليل ايام الرسول عليه الصلاة والسلام ما كانش فيه لا ورق ولا حاجه, بيعلنوا عن الجواز بالدفع وولي العروسة يقبل زواج العريس , وفي ايامنا دي لسه في مناطق زي البدو في سينا مثلا.. لا.. فيه مأذون, و... لا ورق, ولا... يحزنون, تقدر تقولي ما فكرتش انك دلوقتي فعلا متجوز انسانه زبالة زي دي؟! , انا مش هقول مثلا لو جالها عريس يبقى هي وضعها ايه متجوزة ولا لأ..لأنه واضح انه مش هيكون فارق معاها, لأنها واضح بردو أن الحلال والحرام دا آخر حاجه بييجي في بالها انها تفكر فيها.... صمتت قليلا بينما تسمّر سيف في مكانه غير مصدق لما يسمعه منها بينما تنهدت منة بعمق وتابعت بأسى:

- الموضوع للأسف عبارة عن كارثة بجميع المقاييس يا سيف, وأنا مش عاجزة أدخل لا أنا ولا بناتي المعمعه دي, علشان كذا يا ريت تقتنع أنه فعلا ما فيش غير حل واحد بس....

نظر اليها سيف بنظرات سوداء وسألها بهدوء بينما فضحت توتره اختلاجة عضلة فكه:

- اللي هو؟,,,

أشاحت منة بعينيهما بعيدا وأجابت بخفوت:

- الط....., ليصدح صوته أمرا بقوة وهو يقطع المسافة التي تفصلهما في خطوتين اثنتين واقفا أمامها يقول بحدة أمرا:

- إياكي, شوفي إياكي تنطقيها, انسي الفكرة المجنونة اللي في دماغك دي, وجواز صح ولا غلط دي مش مشكلتك, دي مشكلتي أنا وأنا اللي هحلها, وحاجه أخيرة يا منة...

وفاجئها بأن أمسك بجانبها بين راحتيه مقربا وجهها منه وهمس أمام شفتيها:

- أنا مش هسيبك, لا انهرده ولا بكرة ولا حتى لو فضلتى بعيد عني عشر سنين!, انتي مراتي وأم بناتي, وانتى وهما كل حياتي, فياريت تدخل الكلام دا في مخك الناشف دا لأنى لما هأجي المرة اللي جاية هأجي علشان ترجعوا بيتكم...

لم يتثنى لها الرد عليه اذ تناول شفتيها في قبلة سريعة ولكن حارقة ثم تركها وهو ينظر اليها بنظرات متوعدة, قبل ان يستدير منصرفا ولكن قبل ان يغادر وقف أمام باب المنزل قائلا:

- بوسيلي هنا وفرح, وقوليلهم بابا جاي قريب اوي علشان ياخدنا ونرجع بيتنا تاني, فاهمه يا منة?...

لم يدع لها المجال للأجابة وانصرف مسرعا صافقا الباب خلفه, في حين جلست هي على المقعد وراءها وهي تشهق بغصات بكاء حار بينما سالت دموع غزيرة تغسل وجنتيها الشاحبتين...

سافرت عائلة منة الى الاسكندرية حيث الخالة سهام, صممت الأخيرة على استضافة عائلة شقيقتها كاملة في منزلها السكني, وعندما تعللت عواطف باستحالة ذلك نظرا لضيق المكان مقارنة بعددهم, فهي ستصطحب معها منة وابنتيها واحمد وزوجته وابنته وطبعا خلافها هي وزوجها, ولكن سهام أخبرتها بأن النساء سيمكثن في منزلها بينما الرجال سيمكثن في شقة نادر التي تعلق شقتها!!!,,,

كانت منة تسير بمحاذاة الشاطيء تاركة ابنتيها تلهوان مع ابنة أخيها مرام تراقبهن إيناس بينما أحمد يسبح في مياه البحر الفيروزية, كان هواء البحر المحمل برائحته العبقة يضرب وجهها الفتى, بينما يتطاير طرف وشاحها الحريري فغدا كشلال من اللون الابيض يتناثر حولها مما أكسبها جمال أخذ جعلها كلوحة تحبس الانفاس لروعته التي تخلق الألباب, وقفت أمام شاطيء البحر تتأمل أمواجه المتلاحقة, وشردت في حالها, هي في الاسكندرية منذ يومين ولا تعلم شيئا عن سيف, كما أنها لم تخبره عن سفرها هي والبنات برفقة عائلتها, ولم يفتحها أحد من عائلتها بشأنها هي وسيف, فشكرت لهم امتناعهم هذا حتى تستطيع جلاء عقلها والتفكير برويةٍ بأمرها هي وسيف, وكلما مرّ الوقت وأمعنت في التفكير تجد أنه لا مناص مما منه بُد, فستظل الكلمات التي قرأتها وما شاهدته من لقطات أمام عينيها حتى عند أغماضهما فإن ما علمته يرتسم أمام مخيلتها وبكل وضوح...

- البحر أفضل كاتم أسرار, لما يكون متضايق ما بلاقيش غيره
أفضفض له ويشور عليا أعمل ايه!....

التفتت منة الى محدثها والذي لم يكن سوى... نادر ابن
خالتها!..

ابتسمت منة وأجابت برزانة:

- دي فلسفة, شكلك بتحب البحر أوي...

وقف نادر بجانبها ونظر الى البحر الذي تتهاذى أمواجه أمامه
وأجاب بهدوء:

- البحر الوحيد اللي بيسمع لي من غير ما يزهدق, بحس أنه
بياخد ويدي معايا في الكلام, البحر هو الوحيد اللي مخذلنيش
حبّه, يبقى طبعا لازم أحبه!!....

ابتسمت منة وقالت وهي تهّم بالابتعاد:

- يا بختك بصديق زيّه...

سار بجانبها وتكلم وهو يتوخى الحذر:

- منة.. أنا مش هدّخل في حياتك إنت وسيف, خصوصا وأنا
معنديش فكرة عن ايه اللي حصل بينكم, لكن احساسى بيقوللي
انه حاجه وحاجه كبيرة اوي كمان, على فكرة انا ماصدقتش
خالتي لما بتقول انك جيتي معهم علشان احمد موجود وانه
سيف عنده شغل فعلشان كدا معرفش يبجي, سيف مش ممكن
يسيبك تيجي انت والبنات لوحدكم, وخصوصا إنتي!! من سابع
المستحيلات انه سيف يسيبك تبعدى عنه ثانية واحده, دا طبعا
غير الحزن اللي انا شايفه مالي عينيكى!!!

أجابت منة وهى تواصل سيرها بابتسامة صغيرة:

- حكيم عيون حضرتك؟!... ثم تابعت حديثها بعد أن زفرت عميقا:

- بص يا نادر, أنا مش هكدب ولا ألف وأدور, طبيعي انه أي زوجين بيمرّوا بمشاكل في حياتهم... بس المهم إيه هي نوع المشاكل دي ويا ترى إيه هو الحل الصح ليها؟! , تقدر تقول اني جيت هنا علشان أعرف افكر من غير أي ضغوط, المهم أني أقدر أوصل لحل مشكلتي, مهما كان صعب, الدوا طعمه بيبقى مرّ بس لازم الواحد ياخده علشان يخفّ , ادعيلي انه ربنا يهديني للدوا الصح....

قال نادر وقلبه الخائن بدأ بالطرق بقوة بين جنبات صدره فمعنى كلامها أن علاقتها بسيف تواجه منحنى صعب قد يكون من الصعب اجتيازه, ولكن لينهر عقله قلبه أنها قد أخبرته ان أي زوجين يواجهان الكثير من الخلافات, ولا يعني هذا بأي حال من الأحوال صعوبة استمرار زيجتهما, ولكن رفض قلبه العاشق الانصياع لحديث العقل!, نفّض عنه أفكاره وقال بابتسامة حانية:

- طيب ممكن توعديني أنك لو احتجت أي حاجه أو علوزه تاخدي رأي حد في مشكلتك , انك تقوليلي؟!...

ابتست منة واجابت:

- أكيد يا نادر, انت معزّتك من معزّة أحمد اخويا بالظبط...

وهمّت بالسير بخطوات واسعة تاركة نادر وقد أصابه الوجوم
من جرّاء تصرّيحها الأخير بأنه بمعزة شقيقها ولكنه نهر نفسه
بعنف من السقوط في فخ الرثاء للنفس وقال محدثا حاله
بعنفوان:

- وانا موافق اني أكون زي أحمد, بس لو حصل وحكايتك مع
سيف خلصت يا منة تأكدي انه في نفس اللحظة دي حكايتنا أنا
وأنتي هتبتدي, أنا مش ممكن أكرر غلطتي تاني أبدا وأسيبك
تضياعي منّي, أنا زي ما يكون قلبي حاسس ولغاية دلوقتي ما
اتجوزتش, ورافض أي عروسة أمي تقولي عليها, زي ما أكون
مستتيكي!!....

لحق نادر بعد ذلك بمنة ليسيرا جنبا الى جنب متجهين حيث
يتجمع الآخرون.....

عاد الجميع الى المنزل للاغتسال وتغيير ثيابهم ثم دعاهم نادر
لتناول الغذاء خارجا, ولكن ما ان انتهى الاطفال من الاغتسال
حتى سارعوا مطالبين بالطعام لشعورهم بالجوع فقد لعبوا كثيرا
في مياه البحر, ما أن قامت كلا من ايناس ومنة باطعامهم حتى
غرق الاطفال في سبات عميق, وفضل كبار السن تناول الغذاء
بالمنزل وأخذ قيلولة بعد ذلك, فلم يذهب لتناول الغذاء سوى
الشباب, احمد وايناس ومنة و...نادر!!.....

كانوا ملتفين حول مائدة الطعام بأحد المطاعم الشهيرة المطلّة
على شاطئ البحر والمشهورة بمأكولاتها البحرية اللذيذة,
قضت منة وقتا سعيدا ولم تكف عن الضحك على الطرائف
والمواقف المضحكة التي كان نادر يرويها لهم مما يصادفه في
عمله ...

قال احمد من وسط ضحكاته:

- بس يا نادر خلاص, بطني مش قادر, انا عارف انت قاصد
تضحكنا علشان بطنا توجعنا فما ناكلش كثير !!...

أجاب نادر مبتسما بينما يرنو ببصره الى سالبة قلبه ومهجته
وكله فرح أنه هو من جعل الضحكة تعود ثانية الى شفاهها
القرمزية:

- لا يا حبيبي كُل براحتك ولو عاوز تطلب اكل ناخده معانا
كمان واحنا مروّحين ولا يهملك...

احمد باستحسان:

- كمان! , دا إيه الكرم الحاتمي دا؟!.....

نادر بابتسامة:

- علشان تعرف بس , ثم أولى انتباهه الى منة قائلا:

- صحيح يا منة , ابن خالتك ربنا فتحها عليه وبدال الشغل في
مكاتب الناس قدرت وبفضل الله اني ألم قرشين وأفتح مكتب
سياحة ليا ومعايا واحد صاحبي شريك فيه , كنت طمعان لو
ممكن تشوفيه وتعمليلي الديكور بتاعه , وما تخافيش دا شغل,
يعني زي زي غيري...

منة باستنكار:

- لا.. طبعاً, ايه الكلام اللي بتقوله دا يا نادر, انت زي أحمد بالظبط, يعني أحمد لو قاللي اعلم ديكور شفته هأخذ منه فلوس؟!..

ابتلع نادر غصّة كادت أن تخنقه من مقارنتها له بأحمد شقيقها,
قال أحمد بمرح:

- ومين اللي قالك اني كنت هعرض عليك فلوس من أساسه؟! ,
يا بنتي انك تعملي ديكور شفتي دا شرف ليكي !!....

ضحكت منة قائلة:

- يا سلام....

تبادل الجميع الضحكات, ووافقت منة على تصميم ديكور
المكتب ولكن بعد معاينته أولاً..., وافق الجميع على المرور
بالمكتب لتشاهده منة لتستطيع البدء بوضع تصوراتها لتصميمه
الداخلي....

اثناء ذهابهم لرؤية مكتب نادر جاء أحمد اتصال من والدته أن
مرام استيقظت من نومها وهي تبكي وقد لاحظت ارتفاع درجة
حرارتها قليلاً فاضطروا لإلغاء أمر الذهاب الى مكتب نادر
والعودة رأساً الى المنزل...

ذهب أحمد وايناس بمرام الى الطبيب الذي وصف حالة مرام
بعدوى برد للعبها في البحر لوقت طويل مع ضعف مناعتها

ووصف لها بعض الادوية والمضادات الحيوية اللازمة
لحالتها....

في الصباح الباكر كانت حرارة مرام قد استقرت ولكنهم آثروا
عدم الخروج هذا اليوم لكي تنال مرام قسطا وافرا من الراحة
وحاولوا على قدر الامكان ابعادها عن هنا وفرح كي لا تلتقطا
العدوى منها, لم ترغب ايناس في ترك ابنتها والذهاب مع
زوجها ومنة ونادر لرؤية مكتب هذا الأخير كي تستطيع منة
وضع التصميم الداخلي لديكور المكتب, فذهب أحمد برفقتها
وتركت منة هنا وفرح في عهدة والدتها بينما خرج عبدالعظيم
وشوقي زوج سهام للجلوس على أحد المقاهي المنتشرة بطول
الشاطيء....

أعجبت منة بمساحة المكتب وموقعه, وصرّحت برأيها هذا الى
نادر عندما سألها عن رأيها به, وبعد أن انتهوا من معاينة
المكتب صمم احمد على دعوتهم الى احتساء العصير في احدى
المقاهي المنتشرة على الكورنيش, بعد أن جلس ثلاثتهم وأملوا
النادل طلباتهم, أتى أحمد مكالمة هاتفية على محموله الخاص
فاستأذن من منة ونادر ونهض ليبتعد عن صوت الضوضاء
الصادرة من السيارات المارة حيث كانت جلستهم خارج المقهى
على احدى الطاولات المنتشرة خارجه, كان نادر يروي إحدى
نوادره والتي جعلت منة تغرق في الضحك عندما هبط ظلّ
فوقهما فرفعت منة عينيها لتطالعها عيانا مشتعلتان بفحم أسود
لاهب جعلتها تشهق غير مصدقة:

- سيف !!, فنظر نادر الى هذا المشرف عليهما كما الطّود وقد غابت ابتسامته واستبدلها بابتسامة رسمية صغيرة بينما يقوم من مقعده بجوار منة ويمد يده لمصافحة سيف قائلاً:

- أهلا يا سيف...

تطلع سيف لوهلة الى يد نادر الممدودة أمامه دون أن يمد يده بالمقابل للسلام عليه, مما جعل منة تندهش وتدعو الله في سرّها أن ينهي أحمد مكالمته سريعا ويلحق بهم فمُنظر سيف لا يبشّر بأي خير!!....

رفع سيف يده وصافح نادر ضاغطا على راحة هذا الأخير بقوة جعلت نادر ينظر اليه بدهشة, بينما تجاهله سيف بعد ذلك والتفت الى منة قائلاً بهدوء يخالف الاعصار الذي بدأ بالهبوب بداخله:

- منة, عاوزك شوية... أشاحت منة بعينيها بعيدا وقالت ببرودة متعمّدة:

- أنا مستنيّة أحمد أخويا, مش هينفع أمشي, عموما لو فيه أي حاجه نادر مش غريب, تقدر تقول اللي انت عاوزه!!.....

عضّ سيف على أسنانه حنقا ولم يجبها وعوضاً عن ذلك تقدّم اليها ورفعها قابضا على مرفقها وهو يقول من بين أسنانه بهمس بينما يراقبه نادر بتحفّز:

- قومي من غير ولا كلمة, الّا بقه لو عاوزة نعمل منظر جميل قودام الناس, خصوصا ابن خالتك اللي مش منزل عينه من

علينا, وصدقيني لو إتدخل هكون أكثر من سعيد إنِّي أعرفه
مقامه !!....

لم ترغب منة في افتعال مشهد يلفت الانظار اليهم, خاصة وأن
نادر يوشك على التدخل كما هو واضح من علامات التحفّز
التي ارتسمت على وجهه, وهي تعلم تماما أن جنون سيف أكثر
من كافٍ لافتعال فضيحة وليس مجرد مشهد مثير!!....

لم يمنعها غضب سيف من تجاهل قواعد اللياقة وإستأذنت من
نادر الذي سألها وهو يطالع سيف بنظرات حانقه إن كانت
ترغب بأي مساعدة ولكنها رفضت بابتسامة صغيرة وحركت
رأسها بنفي مطمئنة اياه أنها ستكون بالجوار ولن تذهب بعيدا,
فيما كان سيف يراقبهما وعلامات الإجرام ترسم على
وجهه!!...

ما ان ابتعدا عن الانظار حتى وقفت منة رافضة التحرك خطوة
واحدة فيما كان سيف لا يزال قابضا على مرفقها بقوة جعلتها
تتأكد من أن يده ستترك أثرا على ذراعها موضع قبضته,
التفتت اليه وهي تحاول الفكاك من قبضة يده قائلة بنزق:

- فيه ايه يا سيف؟, سييب دراعي, انت.. انت جيت ليه؟,
وعرفت منين مكاننا؟...

رفض سيف افلاتها ووقف مواجهها لها وهو يجيب بسخرية بينما
أتون غضب مستعر بدأ بالاشتعال داخله:

- ايه زعلانه علشان قطعت عليكم قاعده الضحك والفرشة؟....

منة بذهول صاعق وغضب بدأ يفور داخلها حتى غدا كالبركان
سيحرق الاخضر واليابس ما أن ينفجر:

- إنت .. إنت بتقول ايه؟, إنت اتجننت؟, لعلمك أحمد أخويا
معانا بس كان معاه مكالمه قام يتكلم بعيد علشان الدوشة ما
كانش سامع, وبعدين أنا برفض تلميحاتك الحقيرة دي, وتابعت
بسخرية:

- بس هقول ايه... ما هو أصل كلّ يرى الناس بعين طبعه!!!...
هزّها قليلا وهو يجيب من بين أسنانه:

- منّة, بقولك ايه , ما تغيريش الموضوع, ايه اللي خلاكي
تخرجي مع الانسان دا؟, حتى لو أحمد معكم ازاي تسمحى
لنفسك انه يتكلم معاكى وتضحكوا بالطريقة اللي انا شوفتها
دي؟...

جذبت منة مرفقها بقوة آلتها ولكنها استطاعت تحرير نفسها
من قبضته وشهرت سبابتها أمامه قائلة بغضب شديد:

- لآخر مرة يا سيف بقولك خد بالك من كلامك, مش منّة اللي
يتقالها الكلام دا, انا كنت مع اخويا وابن خالتي مش قاعده مع
واحد من الشارع, وبنتكلم عادي جدا, لكن دماغك للأسف اللي
مش نضيفة هي اللي بتخليك تتصور حاجات في منتهى السفالة,
مش مشكلتي أنك غلطت مع واحد اخلاقها اخلاق قطط
الشوارع وعلشان كذا بنيت شكاك بالشكل الفظيع دا, دي
غلطتك انت ومشكلتك أنت انا خلاص ماليش أي علاقة
بالموضوع دا, وكله هينتهي يوم ما تخلصني وتنفذ اللي انا
طلبتة منك !!!....

لو كانت منة دقتت النظر الى سيف جيّدا لكانت تيقنت أنه من الخطأ الشديد الإتيان على ذكر هذا الأمر في هذه اللحظة! ,
حيث اكفهرت ملامح سيف فصارت كسماء مظلمة في يوم عاصف شديد الظلمة الحالكة, وظهر جليّا أنه على أتم الاستعداد لارتكاب جريمة قتل !!...

جذبها سيف اليه بقوة آلتها جعلتها تطلق صيحة ألم صغيرة وتلفتت حولها في هذا المكان البعيد نسبيا عن الناس امام البحر, تحدث سيف من بين اسنانه قائلا:

- هقولها للمرة المليون يا منة, طلاق ما بطلقش, هتفضلي مراتي لغاية اخر دقيقة في عمري, مهما قلت وعملي مش هتخليني أوافق, ودلوقتي مش كمان شوية هتيجي معايا زي الشاطرة كدا نروح نجيب بناتنا ونرجع على مصر على طول!..

هتفت منة بغضب :

- لأ..... مش هيحصل يا سيف, انت بتستعبط؟! , هو إيه...
إنت دوست على رجلي من غير ما تاخذ بالك واتأسفت وخلاص؟! , دي خيانة يا أستاذ وأنا من الآخر مش قادرة آامن لواحد خاين !!.

زفر سيف بيأس وقال وهو يطالعها بنظرة سوداء:

- دا آخر كلام عندك؟! ..

جابهته منة بتحدٍ قائلة:

- آه,.... حرّك سيف كتفيه بمعنى لا حول ولا قوة ثم.....انحنى الى أسفل ليرتفع فجأة ولكن.... حاملا منة على كتفه حيث رأسها متدلّ الى أسفل وقابضا على ساقها بقوة بذراعه المتينة, حاولت منة الامساك بوشاح رأسها كي لا يطير وقالت بحنق لسيف الذي كان شبه راكضا بها:

- سيف بلاش جنان, سيف الناس بتبص علينا,....., ولكن سيف لم يجيبها واستمر في سيره حتى وصل الى سيارته المصفوفة, فتح باب المقعد المجاور للسائق بضغطة على جهاز التحكم عن بعد الخاص بالسيارة والمعلّق بمفتاحها وأدخلها بقوة مغلقا الباب خلفها واستدار ليركب في مقعد السائق وقد أحكم اغلاق السيارة ليقودها سريعا مبتعدا بغنيمته عن أيّ خطر قد يسلبه إيّاها !!....

عودة الى الورااء بضعة سويعات..... حيث عمر برفقة سيف في منزل الأخير, كان عمر قادما لزيارته وحثّه على الخروج من سجنه الاختياري والتفكير بحل لمشكلته, كما أشار عليه بالعودة الى العمل كي لا يترك نفسه فريسة للافكار السوداء تعصف به, كان سيف رافضا وبقوة الخروج من محبسه الاختياري, رافضا أي شكل من أشكال الحياة, ولكن كلمة واحده فقط قالها عمر في معرض حديثه جعلته ينتفض من سباته, فقد قال عمر بتلقائية : منة ... سافرت !!, لينتفض الوحش الكامن في اعماقه وينقض على عمر جاذبا إياه من تلايبه وهو يقول بغضب وحشي من بين أسنانه:

- انت بتقول ايه؟, مراتي سافرت؟! , سافرت فين وأزاي؟

حاول عمر الفكاك من قبضة سيف التي كادت تصيبه بالاختناق
وقال بصوت مكتوم:

- انت اتجننت يا سيف؟! , سافرت اسكندرية مع اهلها...

تركه سيف دافعا اياه بقوة جعلت عمر يترنح قبل ان يتمالك
نفسه ويقف مطالعا اياه بدهشة وريبة بينما هاجمته نوبة سعال
قوية جرّاء قبضة سيف له....

تحدث سيف بهدوء خطر:

- راحت اسكندرية؟, ثم تكوّرت يده في قبضة محكمة ولكّم
مسند الاريسة بقوة وهو يرغي ويزبد بينما صورة حبيبته وهي
في نفس المكان مع ذاك ال...نادر - والذي لم يرتح اليه منذ ليلة
خطوبتهما وقد صدق حدسه عندما سمع صدفة اثناء مكالمة من
أم منة لشقيقتها سهام سؤاها عن احوال ابنها وانها تدعو الله له
ليل نهار على أن يرزقه الزوجة الصالحة لتعوّضه خسارته
لمنة والتي كان يحلم بها زوجة له, ولم يصرّح لمنة أو لأيّ كان
بمعرفته بشأن ابن خالتها اللعين هذا - كانت صورتها ترتسم
في مخيلته لتجعله في حالة جنون مطبق, ولم يلبث أن اتجه الى
غرفة نومه ليغتسل ويبدل ثيابه في اقل من عشر دقائق وسط
ذهول عمر والذي تحول الى صاعقة من الدهشة عندما فوجيء
به يرمي اليه ببضع كلمات بينما يتجه خارجا من المنزل:

- انا خارج, انت مش غريب يا عمر, عن اذنك !!....

لحق عمر به عند المصعد بعد أن احكم اغلاق باب المنزل خلفه
وسأله بدهشة بينما يقفان في انتظار المصعد الذي تأخر بالنسبة
لسيف:

- خارج؟, خارج رايح فين؟؟...

زفر سيف بيأس واتجه الى الدرج ليهبط بسرعة وهو يجيب
بصوت عال كلمة واحده جعلت عمر يقف فاغرا فاه وقد تيقن
من جنون صديقه:

- اسكندرية !!...

عودة الى السيارة والتي انطلق بها سيف بجنون مختطفاً منة
والتي كانت تصرخ غاضبة بأن يوقف هذه السيارة اللعينة,
ولكنه لم يلق اليها بالا , حتى اذا ما وصلوا الى منطقة مترامية
الاطراف وغير مأهولة أوقف سيف السيارة والتفت اليها قائلاً
ببرود ينافي الغضب الأسود الذي يعتمل داخله:

- انا وانت مش هنمشي من هنا لغاية ما نشوف حل للمهزلة
اللي احنا فيها دي...

عقدت منة ساعديها وأجابت ساخرة:

- وايه بقه الحل في نظرك؟, وخلي بالك الحل دا لازم أوافق
عليه أنا كمان, مش حل من وجهة نظرك انت بس!!...

أجاب سيف بحدة:

- أي حل إلّا موضوع اننا نسيب بعض دا, الفكرة المجنونة دي
تشيليتها من دماغك خاااالص!!...

همّت منة بالكلام عندما قاطعها صوت رنين المحمول الخاص
بها, أخرجت هاتفها من حقيبتها اليدوية ليطلعها اسم أحمد

شقيقها, فتحت الخط وتحدثت بهدوء نسبي فأخر ما تريده الآن
شجار بين هذا المجنون الذي اختطفها وبين شقيقها الغاضب!,
قالت منة بهدوء نسبي:

- ايوة يا احمد, آه.. انا مع سيف.., لا حبيبي ما تخافش, هنتكلم
شوية وبعدين يرجعني البيت عند طنط سهام..إيه؟! , نادر!, لا
أبدا ما فيش قلق ولا حاجة..... ما كانش لازم يقلق ويقلقك
معاه, ماشي حبيبي مش هتأخر ان شاء الله ,... لا الاله الا الله...
أنصتت قليلا قبل ان تنهي المكالمة ثم سمعت صوت سيف الذي
يقول بنزق :

- ايه دا, ابن خالتك قلقان عليكي من جوزك؟! , واخوكي يأمن
عليكي معاه وساييكم سوا ومعايا أنا خايف!!... , وبعدين ايه
حبيبي حبيبي دي اللي عمله تقوليها عمّال على بطل
لأخوكي?! , انتي عارفة كويس أوي انى رافض أنك تقوليها لأي
حد غيري لا أخوكي ولا حتى أبوكي !!...
أجابت منة من دون النظر اليه:

- دا كان زمان!, توافق ترفض ماليش فيه, حبيبي دي أنا بس
اللي اختار اللي اقولها لمين!, أما بقة بالنسبة لقلقهم فما تقدرش
تلومهم... خايفين عليا!! , عارفين اللي بيننا كويس, حتى لو كان
نادر معندوش تفاصيل لكن الكل حاسس بأنه فيه حاجة غلط ...
جذبها سيف من ذراعها فجأة جعلتها تطلق صيحة صغيرة في
حين تابع بحزن وغضب:

- موضوع حبيبي دي هنتفاهم فيها بعدين !, وبعدين قوليلي هنا... هيبقوا قلقانين عليكي مني أنا؟, أنا...., أنا جوزك يا منة؟! , وأنا ما كنتش قلقان وهتجنن من خوفي عليكي كمان في الفترة اللي فاتت دي كلها؟! , انت ليه مصرّة تعذبينا؟, انت فاكرة أني هصدق انك كرهتيني بالسرعة دي؟, اللي يحب عمره ما يكره يا منة.., وانا محفور جواكي تمام زي ما انت محفورة في قلبي وبتجري في دمي, ولا أي حاجه عمرها هتقدر تمحيننا من جوّه بعض...

منة بحزن وقد هاجمتها الدموع ولكنها جاهدت كي لا تذرفها أمامه:

- الوشم بيروح بماية النار يا سيف, ووشمك اللي في قلبي انت حرقته زي ما حرقت قلبي تمام بعملتك دي !!!...
سيف بذهول وخوف من فقدانها:

- لا يا منة ما تقوليش كدا, أحلفك بإيه إني عمري ما حببت ولا هحب حد غيرك, كلمة بحبك دي عمرها ما طلعت الا ليكي إنتي... , ارحميني حبيبتني أرجوكي, أنا مش عارف أعيش من غيركم, البيت وحش اوي من غير هَنا وفرح وشقاوتهم, البيت كئيب جدا من غير ضحكك اللي بتنوره يا منة, اطلبي مني أي حاجه الا انك تسببيني, مش هينفع, لو وافقتك يبقى بأنتحر!, وأنا مش ممكن أنتحر....

حاولت منة الافلات من بين يديه وهى تنن بينما خانتها دموعها التي بدأت تسيل في صمت:

- مش هينفع يا سيف, صدقني, هيفضل اللي حصل بيننا, مش هقدر أنساه, انت فاكّر إني مبسوفة وبضحك وسعيدة؟, لا يا سيف... اللي حصل في دماغي, بفتكره كل ثانية, اللي شوفته عمره ما راح من بالي, لدرجة إني بنيت أدعي ربنا إني أفقد الذاكرة علشان أنسى, لأنني لو ما نسيتش هتجنن يا سيف, هتجنن!!!..

وشهقت عاليًا لتتخرط ببكاء حار جعله يحتضنها معتصرا إياها بقوة ساندا وجنته إلى شعرها بينما اختلطت دموعهما سوية ف لأول مرة في حياة سيف تعرف الدموع طريقها إلى عينيه, وهو المتبجح دائمًا أنه ما من سبب يدفع الرجل إلى البكاء مهما كان هذا السبب قويًا!, ولكنه لم يعلم وقتها أن حبّه سيجعله يبكي بدلًا من الدموع دماً في سبيل ألا يتركه نصفه الآخر, فعشقه لمنة عشق سرمدى لا نهاية له ولا سبيل له للفكاك منه.... بل إنه لا رغبة لديه أساساً في التحرر من قيد هذا العشق اللاهب!!.....

أبعد سيف منة عن صدره قليلاً محتضناً وجهها بين راحتيه ماسحاً بإبهاميه دموعها التي تغرق وجنتيها بينما هدأت عاصفة بكائها قليلاً, تحدث سيف بصوت مشروخ من شدة الحزن:

- أنا آسف, لو قعدت أعتذر لك من هنا لغاية سنة كمان مش هيوّفّي, أنا مستعد أقعد أعتذر لك عمري كله, لكن ما تبعديش عني, انت اكتر واحده عارفة أنا بحبك وبغير عليكى قد ايه, منظر ك وانتى قاعده مع ابن خالتك خلا الدم ضرب في نافوخي, كويس اوى إني قدرت امسك نفسي وما ارتكبتش جناية فيه!!....

نظرت اليه منة بحزن معلقة بجمود:

- شوفت انت جراك ايه من مجرد قاعدتي مع ابن خالتي في مكان عام ومعايا اخويا كمان!... او مال أنا بقة اعمل ايه؟, لسه صوتكم في وداني يا سيف, الكلام اللي قلتوه, المناظر المقرزة اللي أنا شوفته, أنا... مايتها أليش إني هقدر أنسى!!...

اجاب سيف بصوت متحرج:

- انت مش بتدي فرصة لنفسك انت تهدي حتى شوية, انا غلطت واعترفت وربنا ببسامح, إديني فرصة واحدة بس, مش ممكن كل اللي بيننا يتهدّ وحياتنا كلها تضيع علشان غلطة واحده بس!, أرجوكي يا منة... ما تهديش حياتنا... , ما تخليش نباتنا يدفعوا تمن غلطة ابوهم, افكري يوم واحد بس من ايامنا سوا, مافيش حاجه خالص عملتها تخليكي تسامحني؟, حبي ليكي ولبناتنا ما يشفعليش عندك؟؟.....

اجابت منة وهي تسلط نظراتها على نقطة وهمية أمامها متحاشية النظر الى عينيهِ اللتان تطالعانها بلهفة وشوق:

- الموضوع مش سهل يا سيف, زي ما قلت لك قبل كدا, الست دي ممكن فعلا دلوقتي تبقى مراتك....وانا مش ممكن أقبل انه يكون لي ضرّة فما بالك لما تبقى واحده أقل حاجه تتقال عنها انها بنت ليل!, مافيش واحده بتبقى عاوزة تخرب بيتها بإيدها, لكن لما الاحساس بالأمان يضيع, ..رفعت عينيها اليه تطالعانه بنظرات وخزت قلبه وهي تتابع بحزن:

- لما الشك بيتدي يدخل حياتنا ويتحكم فيها, تبقى الحياة مع الحالة دي ساعتها مستحيلة!, أنا عارفة كويس أوي ان الشك

هيملاني في كل كلمة هتقولها وكل حاجه هتعملها, صدقني أنا
كدا بنقذ الباقي من حبنا ومن ذكرياتنا الحلوة, قبل ما تتحول
بالشك والغيرة لذكريات مؤلمة والحب يتقلب لكره!.....

همّ سيف بالرد عليها عندما قاطعه رنين هاتفه الشخصي هذه
المرة, رفع محموله ليطالعه رقم شقيقته, عقد جبينه بارتياح
وأجاب :

- ايوة يا سمية, ازيكم يا حبيبتي...

لنتكلم سمية من وسط شهقات بكائها بحزن طاغ:

- إلحجنا يا سيف يا خويّ, منعم جوز سلمى طردها بعيالها من
البيت, وجال كلام واعر جوي عليك...

سيف بتساؤل وحدة:

- انتي بتقولي ايه؟, يطردها ازاى؟, وكلام ايه دا اللي بيقوله؟؟

انتبهت منة لكلام سيف فأنصتت باهتمام في حين تابعت سمية
من وسط بكائها الحار:

- بيجول انك ماشي مشي بطل في مصر, وان مرتك فانتك بعد
ما زجرها سيف لتتابع:

- ما إيه ما تنطقي يا سمية؟...,سمية بخجل وحزن:

- بعد ما شافتك مع واحد تانية, والمصيبة انها متزوجة!!...

صرخ سيف بدهشة:

- ايه؟, انتي بتقولي ايه?..

سمية بخوف:

- مش أنا اللي عن بجول يا خوي، البلد كلاتها بتتحدث في الحديث ديه، ويا ريتها جات على جد سلمى ومنعم بس!!!..
قال سيف أمرا بقوة بينما قلبه يطرق بخوف بين جنبات صدره:
- ايه اللي حصل ثاني يا سمية؟.. وابويا الحاج سكت لمنعم
إزاي؟!.....

صمت رهيب قابله من الناحية الاخرى جعل قلبه يوشك عن التوقف عن العمل قبل ان تجيبه شقيقته بصوت مجهش بالبكاء:
- هُوَ ده السبب اللي خلاني أتصلت ببيك يا سيف يا خوي، بوي وجع من طوله يا سيف، واحنا دلوكيت في المستشفى والدكتور بيجول ان حالته وعرة جوي، ابوس يدك يا سيف تيجي بسرعة، انا خايفة أحسن بوي ي.....، .. وسكتت لم تستطع لفظ الكلمة لتتابع بعدها بنحيب عال حتى أن منة قد سمعت صوت صياحها :
- و أومائي ما بطلتش بُكا من وجتها..

وانخرطت في بكاءها الحار، انتظر سيف قليلا ليستطيع استيعاب هذه الأخبار السيئة ثم تحدث محاولا بث الهدوء في نفسها:

- اهدي يا سمية، اهدي يا حبيبتي، انا جاي حالا، مسافة السكة هكون عندكم..

انهى المكالمة ونظر الى منة وهو يقول بينما اعتلى الشحوب وجهه حتى غدا يحاكي شحوب الموتى:

- أبويا يا منة.., قطبت منة في انتظار سماع باقي عبارته,
نظر سيف اليها متابع بينما يحارب عبراته التي غزته بقوة:
- ابويا بين الحياة والموت يا منة, ربنا بياخذ لك بحقك وبأسرع
مما تتصورى...

شهقت منة واضعة يدها على فمها خوفا وقلقا على هذا الصّرح
الشامخ والد سيف والذي كان دائما يغدق عليها بحبه ورعايته
ويقف بالمرصاد لأي شيء أو أي شخص يكون السبب في
اصابتها بحزن أو سوء حتى وان كان هذا الشخص.. حماتها..
زوجته نفسها!!....

حدثت منة بخوف متقطع:

- عمّي !!, وافقها سيف بهزة من رأسه بينما انهمرت الدموع
تغطي وجهها ولسان حالها يقول بينها وبين نفسها:
- مش قلت لك يا سيف, اللي حصل كارثة بجميع المقاييس,
وربنا يستر من اللي جاي !!....

- يتبع -

الحلقة الثالثة عشر:

نظرت منة الى ابنتيها الغارقتين في النوم على المقعد الخلفي للسيارة, رنت بطرف عينها الى سيف الذي كان يتطلع الى الطريق بنظرة جامده وجبين معقود, وقد اعتلت سيمات التجهّم والقلق وجهه...., كتمت تنهيدة عميقة وأسندت رأسها الى زجاج النافذة بجوارها وقد شردت في احداث السويغات الاخيرة منذ تلقي سيف نبأ سقوط والده فريسة المرض وعودتهما سريعا الى والديها واللذان ما إن علما بما حدث لوالده حتى أصرا على ان تسبقهما منة مع زوجها وأن يبلغوهما بالأخبار أولا بأول, على أن يلحقوا بهم ما ان تستقر حالته الصحية, فكما اخبرهم سيف الزيارة ممنوعة تماما بأمر الطبيب المعالج....., تذكرت منة كلمات والدها الاخيرة لها حين انفرد بها قبيل مغادرتها مع سيف, حيث ربّت على كتفها ناصحا لها:

- منة حبيبتي, انسي دلوقتي أي خلاف أو زعل بينك وبين جوزك, لازم تكوني معاه في وقت زيّ دا, أهله ناس كويسين وماشوفناش منهم أي حاجه وحشة لا سمح الله, وحماتي الحاج عبدالهادي بيحبك وبيعتبرك بنته الخامسة, لازم يشوفوكي معاه, أنا متأكد ان وجودك جنبه في الظروف دي هيسرّع من شفاء عمك بإذن الله, لأنك على ما حكيتيلي سبب اللي حصله انه عرف باللي ابنه عمله, يبقى وجودك معاه هيفرق مع الحاج عبدالهادي كتير...

أومات منة برأسها موافقة وقالت بهدوء:

- اطمن يا بابا, بنتك هتتصرف زي ما ربيتها بالظبط, انا بنت ناس يا بابا وعارفة ان بنات الناس في محنة زي دي لازم يسدّوا فيها, واي خلافات أو مشاكل تتأجل لبعدين!!!...

عادت منة من شرودها على صوت استيقاظ ابنتيها اللتان تساءلتا عن موعد وصولهما فأجابتا بابتسامة صغيرة:

- قرّبنا حبايبي خلاص,خدوا اشربوا العصير دا وكلوا الساندوتشات اللي عملتها تيته, اكيد انتو جعانين دلوقتي...

فتحت الحقيبة البلاستيكية التي بحوزتها وناولت ابنتيها علبة عصير وبعض الشطائر الخفيفة والتي سبقت أن أعدتها أمها لها, ألقت بنظرة خاطفة الى سيف ثم مدّت يدها اليه بشطيرة وعلبة عصير, نظر اليها بلمحة سريعة ثم أعاد انتباهه الى الطريق قائلاً بجمود:

- ماليش نفس يا منة, كُلي إنتي والبنات...

لم تستطع منة التزام الصمت وأصرت عليه قائلة:

- ماينفعش يا سيف, انت من امتى ما اكلتش؟, لازم تاكل علشان تعرف تقف على رجائك وتصلب طولك, والدتك واخواتك محتاجين لك, ووالدك اكيد محتاجك جنبه دلوقتي..

رماها بنظرة سريعة قبل ان يتساءل بهدوء:

- وانتى يا منة؟, تطلعت اليه بحيرة فتابع:

- محتاجالى؟!..., لم تُجر منة جواباً ففضلت الصمت, في حين زفر سيف زفرة عميقة ثم مد يده اليها متناولاً الشطيرة

ليقضمها فيما فتحت له علبة العصير ليحتسيها, أشار اليها برأسه مغيراً سير الحديث:

- وانتى.. مش هتاكلي؟!....., نظرت اليه منة بتردد ولكنها رحبت بتغييره للموضوع وأومات مجيبة وهي تقضم شطيرتها بوجوم وشرود !!!....

وصلوا بعد رحلة قاربت الخمس ساعات, اتجهوا رأسا الى المشفى حيث والده, وكان قد علم عنوانها من سمية شقيقته عندما هاتفها وهم في الطريق الى البلدة....

صعد سيف الى الطابق حيث غرفة الرعاية المركزة بعد أن سأل في استقبال المشفى الخاص , يرافقه زوجته وابنتيه..., ما ان وصلوا الطابق المنشود حتى علمت منة أنه الطابق الصحيح, فقد شاهدت عددا غفيرا من الرجال يتجمع في ممر الطابق, ولاحظت تواجد شقيقات سيف اللاتي يجلسن بجوار والدتهن المتشحة بعباءتها السوداء بينما يلتف وشاحا أسود اللون حول رأسها, وتجلس مطأطأة برأسها الى الأسفل بينما تضع يدها على رأسها ومنظرها يوحي بحزن قوي...

اتجه سيف الى والدته تتبعه منة تمسك بيدي ابنتيها, انتبه لحضوره الموجودون, فسارعوا بالقاء التحية عليه, احترمت منة طريقة استقبالهم لسيف, فمع أنه مؤكد أنهم يعلمون ولو بضع معلومات بسيطة عن سبب سقوط كبيرهم صريع المرض, ولكنهم لا يملكون سوى احترام الابن, فهو ابن كبير بلدتهم, وأمره فيهم مطاع, واحترام ولده من احترامه هو

مال سيف على رأسه أمه مقبلا اياها , انتبهت زينب لحضورها وحيدها , تعلقت برقبتة ووقفت فسارع باحتوائها بين ذراعيه بينما أجهشت هي ببكاء مرير يقطع نياط القلب وهي تنتحب قائلة:

- شوفت اللي حوصل يا سيف يا ولدي؟, بوووك وجع مرة واحدة يا ولدي , أنا مجدرش أصدج لدلوك اللي حوصل!!....

ربت سيف على رأسها مهدئاً إياها وهو يقول راغبا ببعث الطمأنينة في نفسها, طمأنينة هو أبعد ما يكون عنها:

- أطمني يا أمي, الحاج هيقوم منها ان شاء الله....

التفت شقيقاته حوله وهن يبكين, حتى سلمى كانت معهم والتي طردها زوجها بعدما علم بأمر سيف, فهو شقيقهم الوحيد وعزوتهم, ولم يستطعن تصديق ما سمعنهن, بل هن على يقين من أن هناك سرّ مخفي وأن سيف سيزيح النقاب عنه ليضع كل فرد لسانه داخل فمه, وليعلم الجميع ان ابن عبدالهادي ليس من يقوم بهذه الافعال الشائنة المعيبة...

اقتربت منة جاذبة ابنتيها لتسلم على حماتها التي بادلتها السلام بصوت مشروخ لكثرة البكاء, رحب بها شقيقاته, وأفسحن لها لتجلس بجوارهن بينما تركهن سيف متجها الى غرفة الطبيب المعالج للوقوف على حالة والده تماماً...., ولكن سبقه الطبيب الذي قدم اليهم فسارع سيف اليه مستفسرا عن حالة والده, أجابه الطبيب والذي يعلم مدى أهمية هذا الرجل الذي يرقد بالداخل بالنسبة لهذه العائلة بل والبلدة أجمع, قال الطبيب بلهجة رسمية وان تخللها بعض الشفقة:

- الوالد حالته حرجة أوي للأسف, الضغط ارتفع عنده أوي وهو دا سبب اللي حصل له...

سيف برجاء:

- أرجوك يا دكتور صارحني , والدي عنده إيه بالظبط?...!

الطبيب متتهدا بعمق وهو يربت براحته على كتف سيف:

- للأسف, الوالد اتعرض لأزمة قلبيةّ حادة, احنا هنعمل قسطرة, وربنا يسهّل ونشوف نتيجتها هتبقى ايه, المهم انه مافيش أي انفعال من أي نوع, علشان كذا أنا مانع عنه الزيارة خالص, حالته ما تستحملش أي انفعال سواء زعل أو فرح... ثم قطب متسائلا:

- صحيح, الحاج بيسأل على واحده من بناته, وما بطلش يندهلها!!....

قطب سيف متسائلاً:

- مين من اخواتي يا دكتور؟

الطبيب بتلقائية:

- أعتقد.. منّة!, كان بينادي طول ما هو في نومه عليها!!....

شحب وجه سيف وأغمض عينيه بشدة ليفتحهما على اتساعهما محدّقا بقوة أمامه وهو يكرر عبارة الطبيب:

- منّة!!....., ثم التفت الى الطبيب مستفهما:

- هي ممكن تدخل له؟, سكت الطبيب قليلا ثم نظر اليه قائلا بهدوء:

- هو المفروض لأ, لكن بما انه ما بطلتش ينادي عليها من ساعة ما جه فأعتقد انها ممكن تدخل له بس مش أكثر من 5 دقائق ويا ريت ما تتعبوش في الكلام, تدخل تبص عليه وبس..

اتجه سيف حيث منة وشقيقاته ووالدته وأشار لمنة التي قامت متجهة إليه بينما أخذت سميحة شقيقته البنتان قائلة أنها ستذهب لشراء الحلوى لهما من كافيتيريا المشفى, سارت منة الى سيف ووقفت أمامه متسائلة:

- خير يا سيف فيه حاجة؟, نظر اليها سيف بغموض قبل أن يشيح برأسه مجيباً:

- الحاج عاوز يشوفك, وانا استأذنت من الدكتور انك تدخلي له 5 دقائق بس....

منة بدهشة وحيرة:

- وانت مش هتدخل معايا؟...

أشاح سيف بنظره بعيدا وأجاب بجدية تخللتها نبرة حزن وأسف:

- أنا بالذات مش لازم يشوفني دلوقتي خالص, انتي ناسية ان الدكتور مانع عنه الانفعالات؟!...

هزّت منة رأسها لأعلى وأسفل , وتقدمته حتى غرفة الرعاية حيث أعطتها الممرضة المسؤولة كمامة للأنف لترتيديها.....

تقدمت منة الى الداخل بينما انتظرها سيف خارج الغرفة,
اتجهت الى الرجل الكبير الراقد فوق فراش المرض تحيط به
الخراطيم ويوصل انبوب للتنفس بأنفه , مدّت يدا ترتعش لتلمس
يده الموصول بها الأنبوب المغذي وترقرقت الدموع في عينيها,
فهي لا تصدّق ان هذا الصرح الشامخ راقدًا الآن أمامها فوق
فراش المرض لا حول له ولا قوّة, مالت على ظهر يده لتقبلها
وهي تقول بخفوت:

- ألف لا بأس عليك يا حاج, إن شاء الله أجر وعافية, وهتقوم
لنا بالسلامة قريب بإذن الله....

ارتعشت جفونه قبل أن يفتحها بضعف فأضحت الصورة مهتزة
أمامه, ثم تحدث بصوت بالكاد يخرج منه:

- من...منة... بتي , شهقت منة عاليًا ورفعت رأسها لتطالعها
عيناه المتعبتان وهما تطالعانها بوهن , هتفت منة بصوت باك:

- ألف لا بأس عليك يا حاج, ما تجهدش حضرتك نفسك في
الكلام , الدكتور طمّنًا.. ان شاء الله خير ..

ابتسم عبدالهادي ابتسامة خفيفة وتحدث بصوت واهن متقطع:

- اللي يريد رّبنا هيكون يا بتي, أني عاوزك تسمعيني منيح,
أنى مش هسيّب حجّك واصل, اللي عملهُ فيكي هرجّعك حجّك
منيّه تالت وملتت..

ابتسمت منة وقالت وهي تربت على يده:

- قوم لنا إنت بالسلامة الأول يا حاج, وبعدين سيف معملش
حاجه, سيف ابنك يا حاج عمره ما هيعمل حاجه تزعلك منه..

نظر اليها عبدالهادي نظرات لومٍ وعاتبها قائلاً بصوته الضعيف:

- بتكدي عليّ يا بتي! إنت فاكراي مش هجدر أعرف إذا كان عَمِلْ صُح ولا معْمِلْشْ؟!...

نظرت منة الى البعيد وهي تجيب داعية الله في نفسها أن يغفر لها كذبتها فهي لا تريد إلا رَأب الصّدع بين حماها وإبنه, وأن يشفى من محنته تلك, فهي ابدا لن تكون المعول الذي يهدم ترابط هذه الأسرة ويجعل قائدها ينهار كما حدث, اجابت منة بابتسامة صغيرة:

- يا حاج الكلام اللي وصلك وعرفناه من سمية دا مش مضبوط, قوم حضرتك بالسلامة واحنا هنفهمك كل حاجه, وعلى فكرة بقه سيف واقف برّه مقعدش من ساعة ما جينا, الخبر جالنا واحنا في اسكندرية وجينا على هنا على طول, وما ريّحش ثانية واحده في السّكة, ولما الدكتور سمح اننا ندخل هو رفض خاف عليك أحسن تنفعل لما تشوفه...

سأل عبدالهادي:

- انتو جيتو من اسكندرية مش من مصر؟!..

التقطت منة ترده وانتهزت الفرصة لتعصد كلامها السابق واجابت ببراءة مزيّفة:

- آه, احنا سافرنا يومين اسكندرية نغيّر جو, فرصة احمد اخويا هنا في اجازة, والخبر جالنا انه رده الصبح واول ما عرفنا جينا على طول, حتى بابا وماما كانوا عاوزين ييجوا معانا بس

للاسف المشوار من اسكندرية لهنأ طویل شویة وماما مش
هتقدر تركب المسافة دي كلها , بس أول ما ينزلوا القاهرة ان
شاء الله هيجوا يسلموا على حضرتك على طول...

تقصدت منة أن تخبره برحلتهم الى الاسكندرية, فمعنى ذلك أن
حياتهما سوية تسير بشكل طبيعي, بدليل سفرهم الى الاسكندرية
بصحبة أهل زوجته, فلو كان ما سمعه صحيح لم تكن عائلتها
لتسمح له بالاقتراب من ابنتهم ثانية, او الاجتماع بهم في أي
أمر , هي إذن لم تكذب!, بالفعل هي سافرت برفقة ذويها, وهو
سافر بمفرده, ولكنها فقط خبأت عنه أن كلا منهما قد سافر
بمفرده وان سفر سيف للاسكندرية كان بقصد اقناعها بالعودة
اليه, كل هذا لا يهم ما يهم الان أن يشفى هذا الأب العظيم,
وبعد ذلك لكل حادث حديث !!....

قطب عبدالهادي وتحدث في ريبة:

- الحديث ديه صُح يا بتي؟, انتو كلاتكم كنتو في اسكندرية
سوا؟..

أقسمت منة قائلة:

- والله العظيم يا حاج, كلنا كنا في اسكندرية انا وبابا وماما
واحمد ومراته وبنته ومعايا البننتين وسيف كمان...

ولم تستطع سوى قول ذلك, فهذه مهما كانت هي الحقيقة وهي
لن تؤثم , فهي لم تقسم بالله زورا وبهتانا, لقد أقسمت على
تواجدهم جميعا في الإسكندرية وهذا ما حدث بالفعل !!.....

تنفس عبدالهادي بعمق وأغلق عينيه وهو يعلّق بصوت ضعيف
وان كانت الابتسامة قد ارتسمت على وجهه عميقاً:

- ربنا يطمّن جلبك زي ما طمنتيني يا بّتي, أجوم بس من
وعكتي ديّ وأناي أعرف مين ابن الفرطوس اللي جال الحديث
العفش ديه على ولدي...

أجابت منة بابتسامة :

- انت بس شد حيلك وقوم لنا بالسلامة, واللي عايز تعمله كله
اعمله, بس علشان خاطرنا, خلّي بالك من نفسك, يا حاج انت
ضهرنا وسندنا, قوم لنا بسرعه يا حاج...

خرجت منة من غرفة الرعاية وأغلقت الباب خلفها لتستند
بكتفها اليه وقد أغلقت عينيها زافرة بعمق إعياءاً , انتبهت الى
صوت سيف الهامس بجانبها ونبرة القلق تغطي على صوته:

- خير يا منة؟, طمنيني..

فتحت عينيها لتتنظر اليه مجيبة بابتسامة شاحبة:

- الحمدلله, اطمّن يا سيف, انا سايبه الدكتور معاه دلوقتي وان
شاء الله خير , عمي هيقوم لنا بالسلامة بإذن الله.

خرج الطبيب المعالج ونظر اليهما, ابتسم بأبوة وقال لهذا الشاب
الذي لم يجلس دقيقة واحده منذ وصوله الى المشفى قلقاً على
حالة والده الصحيّة:

- اطمئن, والدك تقريبا عدّى المرحلة الحرجة,...., نظر الى منة الواقعة تستند بضعف الى الحائط خلفها وتابع بابتسامة:

- تقريبا آنسة منة ليها الفضل بعد ربنا سبحانه وتعالى في تحسّن حالته الواضح دا, واضح جدا انه بيحبها أوي وتقريبا كلامها معاه الدقايق دي كان له مفعول السحر, اللي مقدرتش كل أدويتنا أو مُعدّاتنا تعمله هي بفضل الله عملته وفي اقل من عشر دقايق!!

نظر سيف الى منة بشكر وقال:

- أصل حضرتك متعرفش غلاوتها عندنا كلنا قد إيه, وهي بالذات ليها عند الحاج معزة خاصة جدا...

أوما الطبيب موافقا وقال:

- واضح جدا, عموما تقدروا كلكم تروّحوا دلوقتي, مالوش لزوم قعدتكم كدا, وان شاء الله من هنا للصبح يكون مؤشراتاه الحيوية اتحسنّت أكثر ونقدر ننقله أودة خاصة لغاية ما نحدد معاد القسطرة....

ثم استأذن منصرفا, في حين اقترب سيف من منة وهمس لها وهو يقف على مقربة منها مستندا بيده على الحائط بجوار رأسها:

- مش عارف أشكرك ازاي يا منة, انا معرفش انتي قولتيله ايه جوّه, بس اكيد حاجه خلّيت معنوياته ترتفع بالشكل دا, بجد أنا معرفش من غيرك كنت اعمل ايه!..

أشاحت منة بنظرها بعيدا وأجابت بهدوء:

- انت عارف ان عمي غالي عندي أوي, وعلى قد ما أقدر لازم أساعده انه يقوم بالسلامة, وفي الاول والآخر الشفا دا بإيد ربنا سبحانه وتعالى, واحنا كلنا أسباب...

همّ سيف بالكلام عندما قاطعه صوت والدته التي وقفت بجوارهم مستندة الى ذراع سميحة ابنتها من جهة وسمية من الجهة الأخرى تستفسر عن حالة زوجها ولماذا لم يدعها تدخل اليه كما فعلت منة, ليجيبها سيف أن حالة والده الصحية قد استقرت وأن الفضل في ذلك يعود الى منة بعد الله سبحانه وتعالى, وأخبرها بضرورة عودتهم, وعدم جدوى بقائهم بالمشفى أكثر من ذلك, فوافقت بعد عناء كبير, ولكنها قبل ان تهم بالسير منصرفه, تركت يد ابنتها سميحة وأشارت الى منة قائلة بابتسامة حانية مترددة:

- ممكن أتسند عليك يا بتي؟!...!!

نظرت منة بدهشة الى حماتها تلك السيدة التي كانت حانية عليها أول الأمر ثم ما لبثت أن تبدّلت قليلا بسبب تأخر حملها أول الزواج, لتعود وتنقلب عليها ما ان رزقها الله ببنتين ولم تنجب ذكورا كما لم يحدث حمل آخر من وقتها, استغربت من هذه السيدة قوية الشكيمة والتي لم تكن تمتنع عنها الا بأمر من زوجها, هو الوحيد الذي كان يدافع عنها بل ويزجرها إن سمعها وهي تلقي اليها بكلمات جارحة, لم تكن منة أبدا تشتكي سواء له أو لزوجها, بل كانت تلجأ في شكواها الى الله وحده, لم تكن تفصح عما يحزنها حتى لأقرب المقربين منها, ولا حتى لوالدتها نفسها !!....

ابتسمت منة وتناولت يد حماتها قائلة:

- انت تؤمري يا حاجّه, وإن شاء الله الحاج هيقوم لنا بألف سلامة....

امسكت حماتها بيدها وقالت لسيف:

- سيف يا ولديّ, بناتك هيرجعوا معنا في عربية فضل زوج أختك سميحة, وانت هات معاك سمية وسلمى وحصلنا, بس لول مشي الرجاله مالوش عازة وجفتهم إهنيه....

قطب سيف معترضا:

- طب ما أروحكم أنا يا أمي وسمية وسلمى يركبوا مع فضل؟ نظرت اليه والدته قائلة بصوت منخفض ولكن بجدية تامة:

- البنات خلاص ركبوا مع فضل, وبعدين أنا عاوزة مرّتك معايّ أتسند عليها, اعمل زيّ ما جولتلك !!, وانصرفت زينب محاطة ببناتها تحت أنظار سيف المندهشة !!....

جلست زينب فوق فراشها تساعد منة, كانت زينب قد صرفت بناتها كل واحد الى منزلها فيما عدا سلمى بالبطبع التي رافقت بنات أخيها تحت إلحاح من زينب لغرفتهما في الجناح المخصص لسيف, حيث تقوم بالاشراف على اغتسالهما تساعد منة مهجة الخادمة, وقد أمرتها زينب بأن تهتم بإطعامهما فمنة متعبة ويجب عليها الخلود الى الراحة, اعترضت منة باديء الأمر ولكنها سرعان ما أذعنت تحت إصرار كبير من حماتها...

جلست زينب الى الفراش وهى تتنهد وطالعت منة التي وقفت بجانبها لترى إن كانت تريد مساعدتها في شيء آخر قبل أن تنصرف للاهتمام ببناتها فهي لم تعتد على أن يراعى شؤون بناتها غيرها...

ربت زينب بيدها على الفراش بجوارها قائلة:

- تعالى يا بنيتي, إجُدي جاري إهنه...

جلست منة حيث أشارت زينب التي نظرت اليها بابتسامة حانية قبل ان تتحدث قائلة:

- جَبَلْ أي حاجّه أنا عاوزة أشكرك و...أتأسف لك!!..

شهقت منة معترضة:

- تتأسفي لي على إيه يا حاجة, ما فيش أم بتتأسف لبنتها, وبعدين أنا معملتش حاجه تستحق الشكر!!..

ترقرقت الدموع في عيني زينب وهى تقول:

- كلامك ده أكبر دليل إنك تستحجي الواحد يشيلك فوج راسه شيل....

اعترضت منة بشدة:

- حاجة لو سمحتيلي لو حضرتك فضلتى مصممة على حكاية الأسف والأعتذار دي أنا هقوم !!..

ابتسمت زينب وقالت وهى تمسكها ما إن همّت بالنهوض بالفعل:

- استنتي بس, إصْبُرِي, ما تُبْجِشْ حَنْبَلِيَّةَ إِكْدَه.....

انتظرت حتى جلست منة ثانية قبل ان تواصل حديثها وهي تلتفت اليها بكلّيتها:

- يا بْتِي اللي غُلط لازم يعترف بغلظه, وما تجاطعنيش, سيبيني أجول اللي في نفسي.., قالت هذا عندما شاهدتها تحاول مقاطعتها, أذعنت منة بالموافقة مومنة بصمت فأكملت زينب حديثها:

- أولا.. أنا سمعت الدّكتور وهو بيجول أن الحاج صحته اتحسنّت بعد ما دخلتي عنديه, علشان إكده لازم أشكرك, أنا متوكدة إنك جولتيله حاجه عن اللي حوصل وكان السبب في اللي جراه, دي حاجّه, الحاجّه الثانية اللي لازم أجولها, إني غلّطت في حجّك لما كنت بلجّح عليك بالكلّام في الرايحة والحاية, وانت عمرك ما رديت عليّا بحرف واحد, حتى عمرك ما حكيتي لجوزك, لأنك لو كنت جولتيله كان لازم هيفاتحني ويعاتبني, ولدي وأنا عارفاه زين, ميعرفش يداري اللي في جلبّه, الوحيد اللي كان بيسمعنا بالصدفة كان عمك الحاج, وهو اللي كان ياما بيزعل منّي ويجولّلي بكرة تندمي يا زينب على حديثك الماسخ ديه مع بنت الناس, لما تعرفي معدنها صُوح تمام زي ما أني جريتها من أول مرة شوفناها هي وأهلها فيها, ربّك والحاج أنا كنت بغير منيكي !!... طالعتها منة بدهشة وتساؤل فتابعته زينب اعترافها بخجل:

- ما هو أصلي حاسيت إنك أخذتي ولدي منّي, ومش بس إكده لا وزوجي كُمان !!, لما كنت بتكلم مع سيف على انكو إتأخرتوا في الخلفة كان بيحفل الكلام في ساعتها ويجولّلي أنا

مبسوط معها وان ربنا راد عطانا من فضله, ديه كرم ربنا
سبحانه وتعالى, ما رادش يبجي ديه نصيينا من الدنيا وأني
راضي بيه, أي حاجه تهون إلا أن منة تبعد عني !!, عارفة
وجتها كنت بحس بنار بتجيد فيا , جَدْ إكده وَلَدِي بيحبك
وبيخاف على زعلك وكل مرة لازم يأكد عليا ماجبلكيش سيرة
الموضوع ديه واصل!, ولما الحاج سمعني في مرة بعد ما ربنا
عوّضك بهنا وفرح وأني بجولك أنك لازم تخاويهم بولد
علشان يشيل اسم العيلة من بعد أبوهم بعد عمر طويل يا رب,
سمّعني كلام جامد جوي, كان بيحول الولاد دول عطية ربنا,
انتي هتدخل في رزق ربنا لولدك؟! , ولما جولت له أن الشرع
محلل للراجل مش بس واحده لاه... أربعة كمان, جالي تجدري
تتوكدي كيف إنه برضيك هيجيب ولاد؟, ما يمكن خلفته تكون
كلاتها بنات !!, وجتها كنت بسمع من ودن وأطلع من الثانية,
لغاية ما عرفنا بحكاية سيف وإنه أتزوج عليك , وجتها أني
مافهمتش هو ليه الحاج إتعصب جوي إكده, وجولت له حجّه
يتزوج علشان الولد!! , وجتها صرخ فيا جامد وجالي ابنك جاب
لنا العار وحط رأسنا في التراب, يا ريتني ما خلفته, يا ريت
خلفتني كانت كلاتها بنات, هو ديه الولد اللي أنت عاوزاه
لولدك?, الولد اللي يجيب لأهله العار يُبجي جلتّه أحسن !!,
و...وجع في لحظتها, جريت عليه ابكي وأنوح وخصوصي
كمان لمان سلمى جات لنا.. الناجص منع زوجها طردها
بعيالها من البيت, هو ديه كمان اللي خلاه يتعصب ويتنرفز
بزيادة وجه كلامي معاه غطى ووطى, بصي يا بتي أنا
معرفاش إنتي جولتي إيه للحاج, ومافهماش إيه اللي حوصل

بالضبط من سيف ولديّ, لكن اللي حاسّاه إنه عمل حاجه وعرة جوي, صوح ولا لاه؟...

لم تستطع منة الانكار, والتزمت الصمت بينما بدأت عيناها تسبح بالدموع, ربّنت زينب على يدها الموضوعه في حضنها وقالت بلهجة حانية:

- منة يا بّتي.. يشهد ربنا إن غلاوتك زادت في جليبي, وانك بجيتي كيف بناتي الاربع وأكثر, أني عاوزاكي تصارحيني بكل حاجه, واطمني الحديت اللي بيننا دلوكيت مش هيطلع لحد واصل ولا للحاج ذات نفسه, بس لازم أعرف ابني عمل إيه؟! يمكن الكلام اللي جولتيه للحاج صدّجّه, لكن انا ستّ يا بّتي, والست ما تفهمهاش غير ستّ زيّيها, واني إحساسي بيجولي إنك موجه من جواتك!, علشان إكده لازم أعرف كل حاجه...

لم تستطع منة التزام الصمت أكثر من ذلك أمام حنان حماتها, فهي لم تتحدث مع أيّ كان في هذا الأمر حتى والديها إكتفت بما علموه من شقيقها, ولكنهم لم يفتحوها في هذا الأمر خوفا عليها من تذكيرها بما لن تنسّه يوما !!, نظرت الى زينب وقالت ودموعها بدأت تسيل بصمت :

- هحكيلك يا حاجة, لأنني بجد تعبت أوي, وفعلا أنا موجهه أوي أوي... قلبي وجعني أوي يا حاجة, أوي....

وطفقت منة تروي لحماتها كلّما حدث منذ لحظة اكتشافها خيانة سيف لها حتى وقتها هذا....

احتضنت زينب منة بين ذراعيها والتي انخرطت ببكاء حار بعد انتهائها من سرد حكايتها, ربتت على ظهرها وهي تقول بحزن:

- إبكي يا بتي, لو البكا هيريحك إبكي...

منة من بين دموعها المنهمرة كالشلال وشهقات بكائها الحار بصوت متقطع من شدة البكاء:

- مش.. مش عارفة .. أعمل... أعمل إيه؟, تعبت... تعبت والله... لا أنا قادرة أنسى ولا أنا قادرة أسامح وأصفي , وبردو مش عارفة أعمل إيه, بناتي صعبانين عليا ونفسي صعبانة عليا أكثر!! , أعمل إيه .. شوري عليا أعمل إيه!!...

قالت زينب وهي تشاطر منة بكائها رغما عنها:

- بس يا بتي بس, كفاياكي بكا يا ضنايا, جومي إغسلي وشك بشوية مائة إهنة في الحمام اللي جصادك ديه وبعدين تعالي وأناي هجولك نعمل إيه... , ورغبة منها في التخفيف عن منة قالت بمزح خفيف:

- عمك الحاج واحنا بنجدد الصرايا, صمم إنه يعمل زي حدكو في البندر, حط في كل دار حمام , وجالي – وضخمت صوتها مقلدة زوجها - هُمّا بتوع البندر يا زينب أحسن منينا في إيه.... , جومي يا بتي جومي ...

ابتسمت منة من وسط دموعها وقامت لتغسل وجهها, ثم عادت ثانية وجلست بجوار حماتها التي تحدثت بهدوء:

- لَوِّلْ انتي لساتك رايدة سيف ولدي ولا لاه؟, وجبل ما
تجاوبي, انسي أي حاجة تانية, جلبك لسّاته رايده؟!..., نظرت
منة الى أسفل وأجابت بآلم:

- لو كان قلبي كرهه ما كنتش اتوجعت منه أوي كده, ما كنتش
لسه على ذمته...

ابتسمت حماتها وأجابت :

- حلو جوي, ثم تابعت بهدوء:

- اسمعي منّي بجه وشوفي هنعمل فيه ايه..., اعترضت منة
قائلة:

- أنا مش عاوزة أعمل ولا أسوي, أنا عاوزاه يسيبني أنا وبناتي
في حالنا, يا حاجة اللي سيف عمله مش شويّة !!...

قالت زينب بجدية:

- منة يا بتي... اللي هجولها لك ديه مش علشان مرّت ولدي,
لاه.. لو كان اللي حُصِّلَك ديه حُصِّلَ لحدا من بناتي كنت
هجولها نفس الكلام , ما تخربيش بيتك يا بتي, ما تسيبش
واحد ولا تسوي في سوج الحريم معدن تخطف زوجك منك,
بالعكس إنت تمسكي في زوجك بإيديكي وسنانك وفي نفس
الوجت تاخدي بحجّك منه تالت ومثلّت !!..., بس لَوِّلْ في حاجة
مش فاهماها!!...

تطلعت منة اليها وهى تمسح وجهها براحتها وسألتها:

- حاجة إيه دي؟..

أجابت زينب في حيرة:

- الكلام اللي طلع عندنا إهّنه أنه مشي مع واحد متزوجة, لكن إنتي بتجولي انه عرفها عن طريق السوخام اللي اسمه البت ولا انت ديه, يُبجى اتزوجها كيف طالما هو عمره ما شفهاش ولا جعد معاها؟, ايه زواج بالمراسلة؟!...

ابتسمت منة بكآبة وقالت:

- تمام يا حاجه, هو دا, زواج بالمراسلة!!..

تساءلت زينب في حيرة أكبر:

- معلّش يا بّتي ما تواخذنيش, يُبجى خانك كيف وهو بالمراسلة؟, ازاي اتجوزها؟..

سكتت منة ولم تعلق في حين تابعت زينب متممة بحيرة كأنها تخاطب نفسها:

- الله, اتزوجها كيف وكيف خانك, ومنين بيجولوا انه لهم تصاوير على المخروب ديه؟, تاجي ازاي دي؟!...

وطالعت منة في حيرة التي أشاحت بنظرها بعيدا ولم تحر جوابا فهي لا تعلم كيف تشرح لها خيانة ابنها لها وما فعله بـ...المراسلة, كما سبق وقالت!!....

قالت زينب عندما لم تجيبها منة على تساؤلها:

- عموما, ديه مش موضوعنا, انت تجومي دلوك تروحي دارك وتتسبحي, وأناي هخلي سلمى تبعت لك الوكل مع مُهجة, أما بجه الباشي مهندز... فأني هعرفك ازاي تربيه من أول

وجديد...., وارتسمت ابتسامة مكر على شفثيها ومالت على أذن
منة تهمس لها بخطتها مما جعل منة تحمر خجلا
و.....حماساً!!..

اطمأنت منة على بناتها في غرفتهما الملحقة بالجناح الخاص
بهم, وقد طمأنتها مهجة التي أتت اليها بالطعام بناءا على أمر
سيدتها أن البننتين قد تناولوا طعامهم قبل أن يخلدا للنوم, تمتمت
منة بالشكر قبل ان تنصرف مهجة التي أخبرتها أنها قد قامت
بترتيب الثياب في خزانة الملابس....

اتجهت منة الى الحمام الملحق بالغرفة فقد كانت مجهدة لأقصى
مدى, لم يخطر ببالها السؤال عن سيف, فلا بد أنه مع الأناس
الذين حضروا للسؤال والاطمئنان عن صحة كبيرهم, وهي
تعلم تماما أنه لن يأتي قبل وقت طويل, ففي المرات التي كانت
تأتي فيها بصحبته, لم تكن تراه إلا لماماً, فقد كان معظم وقته
يقضيه في الاستراحة الخاصة التي شيدها والده للقاء الناس
وقضاء حاجاتهم...

توجهت الى الحمام وملئت المغطس بالماء الدافئ, وقد وضعت
به بعضا من صابون الاستحمام الخاص بها والذي جلبته معها,
ثم رقدت في المغطس لتزيح عن كاهلها تعب اليوم, وتحاول
الحصول على بعض الراحة الجسمانية والنفسية...

بعد مضي ما يقرب من النصف ساعه شعرت ببرودة المياه من
حولها, فقامت وأكملت اغتسالها بالمرشّة مزيلة بقايا الصابون
من شعرها وجسمها , ثم أغلقت المياه وقامت بتجفيف نفسها

بالمششفة العريضة وارتدت منزر الحمام الخاص بها, ثم خرجت لتكمل ارتداء ثيابها حينما تفاجئت ب... سيف يقف مديرا ظهره لها والذي التفت على صوت شهقتها المكتومة!

طالعها سيف مليًا من أعلى رأسها المكلل بخصلات كستنائية تنسدل حتى نهاية خصرها يقطر منها الماء, حتى قدميها الحافية التي ظهرت من أسفل رداء الحمام, جمعت منة طرفي رداء الحمام بيدها وقد انتبهت انها لا ترتدي سواه, أخفضت نظرها الى أسفل وقالت وهي تحاول الابتعاد من أمامه بصوت خرج مهزوزا بالرغم منها كيف لا وسيف يقف أمامها لا يرتدي سوى سرواله فقط بينما نصفه العلوي عار تماما وتلمع عليه قطرات الماء التي تدل على أنه قد قام بالأغتسال هو الآخر في الحمام الخارجي الملحق بالجناح !!...., قالت منة بصوت يرتعش:

- عن... عن إذنك, عاوزة أغير هدومي...

اقترب منها سيف وتحدث بصوت أجش بينما تسمر نظره على شعرها الذي يخفي وجهها تقريبا :

- ما تغيري يا منة, هو أنا مانعك؟!...

رفعت نظراتها اليه مجيبة بغیظ وقد احمر وجهها خجلا و.. غيظاً:

- لا... بس المفروض تخرج برّه علشان أعرف آخذ راحتني!

تحدث بابتسامة مستفزة وهو يميل عليها بوجهه حتى ضربت أنفاسه الساخنة صفحة وجهها القشدي :

- أنا جوزك يا منة, ها.... جوووزك!, وشدد على لفظة
زوجك ثم تابع:

- أعتقد انه مافيش بين الأزواج.. إحراج !!..

تحدثت منة من بين أسنانها وهى تبعد بوجهها عنه ولكن لم
تستطع منعه من شم رائحتها المحملة بعبير الزهور الممتزج
برائحة الصابون الذي استعملته لتكوّن مزيجا عطريّا مثيرا يكاد
يسلب سيف رُشده, لم تنتبه الى تغيّر تنفس سيف وتحدثت
بغضب:

- بس أنا مقدرش أغير قودامك, واتفضل بقه يا تخرج يا إما
هاخذ هدومي وأدخل أغير في أودة البنات !!....

امتدت يديّ سيف وكأنها تملك إرادة خاصة بهما فقط وحاولتا
جذبها اليه بينما تحدث بصوت متهدج:

- خايفة مني ولا مكسوفة يا منة?, لو خايفة يبقى مالكيش حق
انتي عارفة أنني عمري ما هعمل حاجه تخوّفك مني, لو
مكسوفة , يبقى برودو مالكيش حق, أنا وأنتي واحد يا مُنايا !!....,
ثم مال عليها محاولا تقبيلها بينما حاولت هي التملّص منه هاتفة
بشدة:

- سيف, سيف مش هينفع اللي انت بتفكر فيه دا, انت ناسي أنني
طالبة الطلاق, ومجيتي معاك بس علشان عمي ربنا يشفيه!..

وكانها سكبت فوقه دلوا من الماء البارد, ارتد الى الخلف وقست
يداه الممسكتان بذراعيها ونظر اليها نظرة سوداء قائلا بغضب
يلمع في فحم عينيه المشتعل:

- أنا حذرتك كم مرة قبل كذا إنك تجيبي سيرة الطلاق دا؟, لكن واضح انك مش بتتعلمي!, مافيش غير طريقة واحدة بس تخليكي تتأكدي أني مش ممكن أسيبك أو تكوني لحد ثاني غيري !!, قطبت بحيرة وتساؤل وقبل أن يتثنى لها أن تستفهم منه عما يعنيه, انقض عليها ملتتهما شفتيها بقبلة أودعها غضبه وشوقه وغيرته, فهو أولاً وأخيراً رجلٌ عاشقٌ حتّى النّخاع, وبين يديه حبيبته التي تستفز رجولته لكي يثبت لها بما لا يدع مجالاً للشك أنه الوحيد الذي له كامل الحق فيها سواء روحاً أو جسداً, فقد ختم قلبها وجسمها بصك ملكيته, ملكيةً أبديةً لا سبيل لحلّها مهما كان !!.....

حاولت منة الفكاك من قبضته التي كانت تزداد قوة كلما زادت محاولتها للافلات منه, كانت كما العصفور بين مخالب نسر جامح, حتى شعرت بأن سيف قد تمادى إذ عبثت يده بعقدة رداء الحمام الذي أوشك على السقوط عنها فانتفضت بقوة بين ذراعيه ولم تجد بداً من ركله بقوة في قصبة ساقه فتركها فجأة لا عناية من بين أنفاسه الهوجاء, حتى أنها تماسكت بصعوبة فقد كادت أن تسقط أرضاً, نظرت إليه وهي تعيد ربط عقدة رداها بإحكام وأشارت إليه بسبابتها قائلة وهي تلهث بينما تحمل شفتيها المنتفختين علامات إكتساحه لها!, قالت لاهثة:

- بقولك ايه يا سيف, دي آخر مرة تحط إيدك عليا, المرة الجاية هعملك عاهة مستديمة كل ما تشوفها تفتكر سببها فما تقرّ بش منّي!..

ابتسم سيف من وسط ألمه وقال وهو يقفز على قدم واحدة مقترباً منها بينما تبتعد هي الى الخلف ناظرة اليه بريية:

- أنا راضي بأي حاجة تيجي منك, العاهة اللي هتعملها لي هتكون علامة منك هتفضل معايا لحد ما أموت!, وإطمني يا مُنايا, أنا فدائي , مش عبد الحليم بيقول قد مات شهيدا يا ولدي من مات فداءا للمحبيب؟! , أهو أنا راضي أني أفديكي بروحي ودمي, وبُعاد عنك مش هبعد!, انت مراتي وأنا بقولك من دلوقتي أهو , أنا مش هجبرك على حاجة, لكن الأمر ما يمنعش أني أروي نفسي كل شوية كدا بحاجة بسيطة, لكن أنتي مسموح لك تعملي اللي انتي عاوزاه!!...

تخصّرت واضعة يديها في وسطها وسألت بريية :

- يعني ايه بقه إن شاء الله مش فاهمه?, ليجيبها وقد اقترب منها حتى وقف على بُعد إنشات قليلة:

- يعني عاوزة تقرّبي, تحضني, تبوسي , ت...., شهقت منة عاليا وسارعت بوضع يدها على فمه مانعة اياه من المتابعة وهي تقول بحق و غضب من بين أسنانها المطبقة:

- أنت سافل ووقح وقليل الأدب يا سيف, وفعلا المفروض إني ما أقفش أسمع كلامك السافل دا, وتركته بعد أن رمته بنظرة زاجرة جعلتها أشبه بمعلمة المدرسة التي تنهر تلميذا لديها قام بفعل شائن!!.....

تعالّت ضحكات سيف بينما اتجهت منة الى خزانة ثيابها وتناولت أول شيء وقع عليه يدها فيما تعالت طرقات خفيفة سمعا بعدها صوت مهجة يخبر سيف بوجود زوّار في الاستراحة الخارجية, أخبرها سيف أنه سيلحق بها, ثم أعاد انتابهه الى منة وقال بمرح وهو يغمز بمكر:

- للأسف هضطر أنزل للضيوف, كنت عاوز أحاسبك على الضربة اللي ضربتها لي دي, وأعرفك يعني أيه قليل الأدب اللي قولتها علشان تتأكدي أنني في غاية الأدب معاك, لكن الجيآت أكثر, واتجه الى خزانة الثياب حيث تناول بلوزة صيفية أدخلها في رأسه ليخفي جزءه العلوي, ورمأها بنظرة خُبث قبل أن يتجه الى الباب ليغادر الغرفة بينما ضربت منة بقدمها الأرض غضبا و... غيظا وهي تزفر حانقة !!....

استيقظت منة في الصباح الباكر ونظرت الى الأريكة المقابلة للفراش والتي نام فوقها سيف بالأمس بعد تهديد منها أنها ستذهب للنوم برفقة البنات في غرفتهن, فقد كان مصرًا على النوم معها فوق الفراش الواسع بينما الأريكة ضيقة ولن يستطيع النوم بحرية, ورفض رفضا باتًا عرضها أن تنام هي بدلا عنه فوق الأريكة.....

تذكرت كيف انقضت أحداث الليلة الماضية, فلم تراه حتى صعدت لتنام, حيث لم تخل الاستراحة من الزائرون اللذين قدموا من كل حذب وصوب للاطمئنان على صحة والده, كانت قد أبدلت ثيابها واستقرت في الفراش بعد أن اطمئنت على نوم ابنتيها عندما سمعت صوت فتح باب الجناح, أعقبه صوت قدميه متجها الى غرفتهما, أغلقت عينيها مدعية النوم وهي تدعو في سرّها أن يوافقها النوم قبل خروجه من الحمام حيث توجه للاغتسال, ولكن هيهات أن تغمض عينيها بينما تسمعه وهو يتحرك بمنتهى الأريحية في المكان حولها !!....

بعد أن أنهى ارتداء ثيابه لفت نظره المنامة التي قد أعدتها له فوق الأريكة حيث وضعت وسادة وغطاء, ابتسم وهو ينظر إليها وهي توليه ظهرها مصطنعة النوم وهو يعلم جيدًا أنها ليست نائمة, اقترب منها ومال فوقها فاضطربت أنفاسها فيما أغلقت عينيها بقوة, همس لها في أذنها وهو يمد يده:

- عينيكي هتتفحص من كُتر ما إنتي مغمضاهم بالشكل دا!! عن إذنك, ... قطبت في حيرة وهي لا تزال مغمضة عينيها مما جعله يبتسم فهي لا تعلم عن أي شيء يعتذر حتى شعرت بشيء يُسحب بقوة من تحت رأسها, فتحت عينيها واسعا بدهشة, فقد سحب وسادتها من تحتها!! قال ببراءة مصطنعه:

- معلش أصلي مبعرفش أنام غير على مخدتين, انتي مش بتنامي على مخدّات, عارفك ما كنتيش بتنامي غير في حضني!...

تحدثت بحدة وهي تزحف الى الناحية الاخرى بعيدا عنه:

- خُد المخدة اللي تعجبك وسيبني أنام...

ليفاجئها سيف بسؤاله فيما يقف مشرفا عليها:

- انتي ليه ما حكيتليش على اللي كانت أمي بتعمله أو بتقوله ليكي؟!....

تسمرت منة في مكانها ثم تساءلت بوجل وريبة:

- حاجات ايه اللي مامتك عملتها عاوزني أحكيهالك?...

مد يده وأدارها ناحيته ومال عليها قائلاً:

- الكلام اللي كانت بترميه عليكي علشان تأخير الحمل كل شوية, ولما ربنا رزقنا بالبنت , ولما ما حاصلش حمل ثاني لغاية دلوقتي!!

اضطربت منة قليلا ولكنها حاولت التماسك وقالت وهي تحاول الهروب من نظراته القوية التي تتفرس فيها:

- مين اللي قالك الكلام الغريب دا؟, ماحصلش...., قاطعها سيف بحزم:

- أنا سمعتكم انهرده يا منة !!, شهقت منة بدهشة وقالت بتلعثم طفيف في حين أصبح عقلها يعمل كالمكوك لتتذكر الحديث الذي دار بينها وبين حماتها وعمّا إذا كان سيف قد سمع كلّما دار بينهما أم لا:

- انت.. انت بتقول ايه؟, أوأ سيف برأسه موافقا وقال:

- أيوة يا منة, أنا سمعت أمي وهي بتعتذر لك على الكلام اللي كانت بتقوله في حقك, وإنى أبويا هو اللي كان بيمنعها عنك, وأنا يا منة؟, أنا فين من دا كله؟, مش المفروض كنت أنا اللي أعرف علشان أنا جوزك المفروض ما أخليش حد يضايك خالص...

ابتسمت منة باستخفاف وأجابت:

- إنت قلتها يا سيف, دي أمك!, يعني ما كانش ينفع أني احطك بيني أنا وهي, لأنك مهما حصل مش هتخسر والدتك, وكنت هتبقى بين نارين ترضيني ولا ترضيها, وأنا كنت بحاول أحط نفسي مكانها, يعني والدتك ست بسيطة وانت ابنها الوحيد ومن

حقها حسب المجتمع اللي هي اتلابت فيه انها تحلم بولد لأبنها
يشيل اسم العيلة, دا كان بيخليني أقدر أعذرها, وبعدين عمي
ربنا يشفيه كان دايمًا مش بيسمح لها أنها تزود في الكلام معايا,
وأديك سمعتها في الآخر وهي بتراضيني وتطيّب خاطري,
كفاية عليًا كدا, لكن لو كنت قلت لك ما كنتش هكسب غير
عداوتها ليا أكثر وأكثر, وتعيش في حيرة بيني وبينها, اختيار
ما أقبلش أني أحطط قودامه, الأم مهما كان الأم !!....

نظر اليها سيف مطوّلا قبل أن يتكلم بصوت خشن:

- ومستغربة انا ماسك فيكي ليه؟, صدقيني الكون دا كله في كفة
وانتي في كفة, وساعتها كفتك بردو هي اللي هتكسب!! , كان
نفسي أسمع الكلام اللي دار بينكم للآخر بس مهجة الله يسامحها
جات نادنتي علشان فيه ناس جوم... ومال عليها مقبلا جبينها
بعمق قبل أن يتنفس نفسا طويلا مشتّمًا رائحتها العطرية وقال :

- تصبحي على خير يا أحلى حابه في حياة سيف, يا عمري
كلّهُ إنتي !!... وابتعد ليرقد فوق الأريكة وقد أولاها وجهه,
لينظر اليها حتى داعب الكرى جفونه فغرق عميقا في النوم,
بينما تقلّبت هي مراراً قبل أن يغلبها النوم هي الأخرى....

اغتسلت منة وأبدلت ثيابها ثم خرجت لتتفقد ابنتيها فوجدتهما
بالاسفل مع أولاد عماتهما يلعبان, ألقت تحية الصباح على
حماتها التي أمرت بتحضير طعام الفطور لها قبل الذهاب
لزيرة زوجها فقد أعلمتها والسرور يعتلي ملامحها أنه قد تم
نقله الى غرفة خاصة بعد أن استقرت حالته الصحيّة...

تم عمل القسطرة لعبدالهادي وجاءت النتيجة مطمئنة للغاية,
ولكن أثر الطبيب ان يمكث بالمشفى أسبوعا على الأقل حتى
تتحسن صحته تماما ويبدأ الدواء الجديد الذي تم وصفه بإعطاء
النتيجة المرجوة منه..

كانت منة تذهب اليه يوميا في الصباح الباكر حيث تظل برفقته
الى موعد انتهاء الزيارة الصباحية, فتعود الى المنزل لتغتسل
وتبدل ثيابها وتطمئن على بناتها ثم ترجع ثانية بصحبة سيف
في موعد الزيارة المسائية...

لم يلتقي عبدالهادي مع سيف إلا بعد يومين من انتقاله الى غرفة
عادية, وذلك بطلب من عبدالهادي نفسه, بينما لم يستطع سيف
أن يضع عينيه في عيني والده, كما أنه لم يعلم الحديث الذي
دار بين منة ووالده أثناء مكوث الأخير في غرفة الرعاية...

دار حوار طويل بين سيف ووالده, صُعق سيف عندما أخبره
والده بما أخبرته منة, قال بجدية:

- مَرَّتْكَ جالت إنه مافيش حاجه حوصلت واصل من الحديث
اللي احنا سمعناه ديه, مش عارف ليه مش إمصدج, لكن يكون
في معلومك يا سيف لو ظهر انه الكلام بحج وحجيج وجتها
حسابك معايا هيكون عسير جوي !!...

تدخلت منة محاولة تلطيف الأجواء بينما عقد سيف جبينه منتقلا
بنظراته بين والده ومنة في ريبة فهو لم يفهم قصد والده من
كلامه أن منة قد أنكرت ما سمعه!, قالت منة محاولة تلطيف
الاجواء:

- أنا قلت لحضرتك يا حاج, صدقني مافيش حاجه من دي حصلت !!, نظر اليها سيف مصعوقا بينما سألها عبدالهادي:

- أكيد يا بتي؟, مالكيش صالح بصّحتي, أنا أدري بنفسي من الحُكْمَا, لو كان ضايحك أو عمل اللي احنا سمعناه , جوليلي وأني أعرف شغلي أمعاه !!,,,,,,,,,

ابتسمت منة وقالت وهي تجلس على طرف فراش عبدالهادي:

- يعني أزعل منك يا حاج؟, انت مصرّ تكذبني ليه؟!....

نفى عبدالهادي بشدة وقال:

- لاه لاه لاه, مش بكذبك لا سمح الله, أني بس عاوز أتؤكد أنك مش بتاجي على نفسك علشاني, حجّك أني جادر أخده ولو من ابني نفسه, انما طالما أنتي أكدي لي بدال المرة عشر انه ما حوصلش حاجه يبجي ما حوصلش حاجه, ومنعم زوج أختك سلمى حسابه عاندي أنا , لما أجوم بالسلامة ان شاء الله هلففه حوالين نفسه علشان بس يشوف ضوفر حد من عياله ولا مرّته! لم يستطع سيف الانفراد بمنة بعد حديثه مع والده, بل أنه أنغلق على نفسه واستأذن مغادرا تاركا منة برفقة والده على أن يرجع اليها ليعودا سوية....

كان الطبيب المعالج يمدح منة دائما ودائما ما كان يقول لعبدالهادي أنه محظوظ بوجود ابنة مثلها بجواره, لم يهتم عبدالهادي بإيضاح أنها ليست ابنته بل زوجة ابنه, حتى كان يوم!!....

دخلت منة وسيف وبعد أن ألقيا السلام على عبدالهادي تحدث عبدالهادي بصوت ضاحك:

- سيف... ايه رأيك في الدكتور مصطفى اللي متابع حالتي؟. تحدث سيف الذي جلس على كرسي بجوار فراش والده بينما كانت منة تقوم بتنسيق الزهور التي ابتاعتها من المتجر في طريقهما الى المشفى:

- الدكتور مصطفى ممتاز, انما بتسأل ليه يا حاج؟

أجاب عبدالهادي بابتسامة مكر تعلو ملامحه:

- أصله عنده ولد, دكتور زيّيه إكده, ..ثم وجه حديثه الى منة متابعاً:

- الدكتور نبيل انت شوفتيه يا منة يا بتي..

اقتربت منة من عمّها الراقد فوق الفراش ووقفت مستندة إلى حاجز الفراش المعدني وقالت بابتسامة:

- ايوة صحيح يا حاج, يوم القسطرة الدكتور نبيل كان مع الدكتور مصطفى, دا أنسان ممتاز بصراحه, كان شايفنا كلنا قلقانين على حضرتك ازاي وفضل معانا ما سابناش الا لما اطمنا على حضرتك, بصراحه دكتور بيشوف شغله بمنتهى الاخلاص, زي والده الدكتور مصطفى تمام, يا ريت الدكاترة تعرف ان الطب مهنة كلها رحمة مش تجارة !!!..

لم يستسغ سيف قصيدة المدح التي ألقها منة في حق هذا الطبيب ووالده والتفت الى عبدالهادي متسائلاً:

- انما أنت بتسأل ليه يا حاج؟؟

أجاب الحاج بصوت ضاحك:

- أصله بصراحه حوصل لخبطة!، الدكتور مصطفى كان فاكّر منة بّتي، وأني ما جاتش مناسبة إني أجوله أنها مرّت ولديّ، لكن لاجيت أني كنت غلطان بعد اللي حوصل انهرده الصّبح!..

عقدت منة ذراعيها وطالعتّه بابتسامة وهي تقول:

- وايه اللي حصل انهرده الصبح يا حاج؟

ليجيب الحاج بمرح:

- جالك عريس!، الدكتور مصطفى طلب يدك لولده الدكتور نبيل، واضح إكده ان الدكتور نبيل مستعجل جوي، علوز يعرف رذك بأي طريقة انهارده!، ديه ما سابليش فرصة أني أجوله أنك مرّت ولديّ!!..

هّب سيف واقفا وهو يهتف صارخا:

- نعم؟!، بينما اعتلت الدهشة ملامح منة التي أنزلت ذراعيها وقالت بصوت خافت مذهول:

- أزاى دا يا عمي الحاج؟، حضرتك علوز تقول أنه جالي عريس وحضرتك ما قولتلوش أنى متجوزة ابنك؟!..

تحدث سيف صارخا ناظرا اليها بغضب أسود:

- إيه جاي لي عريس دي أنتي الثانية!!، ثم التفت الى والده متابعا بحنق:

- ازاى يا حاج ما تعرفهوش أن منة مراتي؟!..

قال عبدالهادي وهو يحاول تهدئة ولده:

- يا سيف يا بني إهدى مش إكده, أنا صحيح ما جولتش للدكتور نبيل لأنه ما أدانيش الفرصة إني أجولّه, لكن أنا جولت لـ بوه...
الدكتور مصطفى, وهو اعتذر من سوء التفاهم ديه, وخلص ما حوصلش حاجه لزعايبب أمشير اللي إنت عاملها دي!!..

تحدث سيف محاولاً تمالك نفسه بينما داخله بركان يوشك على الانفجار فيكفيه ما يعانيه من حرمان من نعمة القرب منها, فهو لا ينام أكثر من ساعتين كل ليلة, تصاحبه فيها أحلام تجعله يصحو منتفضاً لتطالعه هيئتها وهي نائمة فوق الفراش براحة لا يشعر بمقدار عُشرها!, ولا يطفىء ناره المستعرة التي تأكل أحشائه سوى حمام بارد!, حتى أنه أصبح لا يعلم كم عدد الحمامات الباردة التي يضطر الى أخذها كل ليلة, حتى يسقط في النوم من شدة الارهاق ولا يدوم نومه أكثر من ساعتين يستيقظ على إثرها ليغادر الغرفة وكأنه يفرّ من شيء يركض خلفه!, وأقربها ما حدث اليوم صباحاً أثناء خروجه من الغرفة اذ حانت منه التفاتة الى الفراش لتطالعه منة وهي تنام بمنتهى الراحة, وقد انحسر الثوب الى أعلى ساقبها مما جعله يشعر بالدم الساخن وهو يهدر بقوة في عروقه, ومد يدا ترتعش وأعاد الغطاء فوقها, ثم سارع الى الحمام الخارجي للاغتسال للمرة التي قد تكون الرابعة في هذه الليلة!!...

تحدث سيف وهو يزفر بقوة:

- كويس انك قولت له يا حاج, عموماً أنا شايف ان صحة حضرتك بنيت كويسة, ممكن الدكتور يكتب لك خروج, وأنا هكلمه على ممرضة كويسة تيجي تباشرك في البيت!!..

استدار ليغادر فهتّت منة بالذهاب معه عندما نهرها بنظرة
زاجرة وهو يتحدث بحق من بين أسنانه:

- أنتي راичه فين؟, يكون تطلعي بره الاودة دي خطوة واحده!
انا هروح أكلم الدكتور وأجي, سامعاني يا منة؟, اوعي تتكلمي
مع حد.. فاهمه؟!....

وانصرف دون أن يسمع جوابها لما أمرها به !!....

خرج عبد الهادي من المشفى وتم الاستعانة بممرضة خاصة
للاهتمام بمواعيد تناول الدواء.....

كان الجميع فرح بعودة الأب الحاني والزوج والسند اليهم ثانية
, ساعد سيف والده في الذهاب الى غرفته بينما انفض الباقين
حيث ذهب كلّ منهم للاهتمام بشؤونه الخاصة ..

- يا مهجة, انتي يا مهجة

صدح صوت رمّاح الغفير عاليا, أتت مهجة سريعا وهي تنهره
بقوة :

- جراك أيه يا رمّاح؟, عمّال تزعّج زي الجاموسة اللي عتولد
ليه؟, انت ماتعرفش أن أبويا الحاج بيرتاح في داره؟!....

قلب رمّاح وجهه وقال بأسف:

- أني جاموسة بتولد؟, الله يسامحك !, أني كنت عاجز الحاج في
حاجه مهمة جوي !!...

عدلت مهجة من وضع وشاحها الأسود الذي يستر رأسها وقالت
مقطبة بتساؤل:

- حاجة إيه المهمة جوي دي اللي عاوز فيها أبويا الحاج؟!..

مال عليها رمّاح وكأنه سيخبرها بسرّ خطير وهو يهمس:

- فيه ضيوف عاوزين يشوفوا أبويا الحاج ضروري, ومستنيينه
في المُنْدرة !!....

سألت مهجة بحيرة:

- ضيوف؟, ضيوف مين دول يا رمّاح؟!....

هز رمّاح أكتافه التي يعلق في أحداها البندقية الخاصة
للحراسة:

- ما خَبرش... هي جالت لي انها عاوزة الحاج عبدالهادي
ضروري!!,,

سألت مهجة ثانية:

- هما الضيوف دول فيهم ستات يا رمّاح؟!..

زفر رمّاح عاليًا وقال:

- يا بووووي, ومش أي ستات!!, ديه ست وست وست كُمان..

سكتت مهجة قليلا ثم صرفت رمّاح قائلة:

- طيب أمشي أنت دلوك, أني هبلغ سيف بيه, ابويا الحاج
بيرتاح في داره مش هيجدر ينزل يشوف حد...

اتجه سيف بخطوات سريعة حيث الاستراحة لمقابلة الضيوف
التي أخبرته مهجة برغبتهم في مقابلة الحاج عبدالهادي كما
أخبرها رمّاح, فتح الباب الاستراحة وهو يقول مبتسما:

- أهلا وسهلا... لتغيب إبتسامته ما أن وقع بصره على هؤلاء
الزوّار والذين لم يكونوا سوى زائرة واحدة!, زائرة لا يرغب
برؤيتها بالمرّة!..

قامت من مكانها واتجهت بخطوات مغناجة إليه وهي تتمايل
أثناء سيرها في ثيابها التي تلتصق بها فلا تدع للمخيلة شيئا,
حيث تبرز مفاتنها الانثوية بصورة فجّة, وقفت أمامه ومدت يدا
ذات أظافر طويلة كأظافر الساحرة الشريرة مطلية باللون
الأحمر الناري, وقالت بصوت به بحة مثيرة:

- أزيك يا فوفو, وحشتني أووي.....

لم يتثنى له الرد عليها اذ سرعان ما فُتح الباب خلفه واندفعت
منة هاتفه:

- سيف انت هنا أنا كنت عازرة... لتبتر عبارتها وهي تتطلع
بتساؤل الى هذه السيدة التي يبعث مظهرها على الريبة, سألت
سيف بينما لا تزال نظراتها معلقة على تلك الغانية التي تتمايل
أمامها على كعب حذاءها المدبب:

- مين دي يا سيف?...

ابتلع سيف ريقه بصعوبة وقال وهو لا يزال تكنفه الدهشة:

- دي.. دي... لتقاطعه الأخرى وهى تقترب منه وترفع ذراعيها لتحيط بهما عنقه مجاوبة سؤال منة بدلا منه بصوت يقطر دلالا كاد يصيب منة بالسقم:

- أنا... أنا مراته!..... شهقت منة وتراجعت للوراء بضعة خطوات ولكن الأخرى لم تهتم وتابعت وهى تطلق الرصاص على قلب أخضر تم ذبحه بأبشع الطرق:

- أنا, أنا.... قلبي دليلى !!.....

- يتبع -

=====

الحلقة الرابعة عشر:

طرقات متتالية سريعة جعلت زينب تتجه ناحية باب الجناح الخاص بها وزوجها والذي يرقد نائما بعد أن تناول دواءه, أسرعت وهى تضع الوشاح فوق رأسها تريد صرف الطارق أيّا كان كي لا يقلق منام زوجها... فتحت الباب سريعا لتقابلها مهجة وهى تستعد لمعاودة الطرق ثانية, نهرتها زينب وهو تخرج مواربة الباب خلفها كي لا يُزعج صوتهما عبدالهادي:

- مالك يا بتّ, اتخبطتي في نافوخك ولا إيه؟, حوصل إيه عشان تاجي وتخبطي إكده؟, اتهبلتي إياك!!.....

هتفت مهجة وهى ترتعش:

- أني .. آسفة يا ستّ الحاجة , بس....., وسكتت ولم تكمل,
زفرت زينب حانقة وزجرتها قائلة:

- بس إيبيه؟, مالك مش على بعضيكي إكده؟, ما تتحدثي على
طول جاك خابط في نافوخك...

تحدثت مهجة وهي تفرك يديها في توتر:

- أصل...أصل فيه ضيوف جوم عشان يجابلوأ أبويا الحاج...
فأنى جولت لرمّاح أنه نايم وهجول لسي سيف , وخبرت سي
سيف , راح المُنْدرة , وكانت وراه ست منة ... بس.. بس...
زفرت زينب بحنق وغيظ وهتفت فيها بسخط محاولة ألا يعلو
صوتها:

- بس ايه؟, أنطجي يا مجصوفة الرجة !!....

أجابت مهجة وهي توشك على البكاء بينما ترتجف من قمة
رأسها لأسفل قدميها:

- حاضر يا ستّ الحاجة, أني روحت أشوف الضيوف يشربوا
إيبيه ,... سمعت ست منة بتسأل سي الاستاذ سيف تبجى مين
الحرمة دي؟, وسمعت الحرمة وهي بتجول انها تُبجىتُبجى
مَرَتْ... مَرَتْ سي سيف !!...

رفعت زينب رأسها عاليا وهتفت:

- أييه؟, أجابت مهجة وهي تلعن حظها العاثر لوقوعها في هذا
المأزق فهي أعلم الناس بغضب سيّدتها:

- والله العظيم زي ما جولت لحضرتك إكده, الحُرمة اللي موجودة جالت إكده وأناي أول ما سمعتها جيت جري أجولك لأنني ست منة موجودة معاهم وما خابراش حوصل أيه دلوك؟ نظرت زينب أمامها وشدت قامتها وتحدثت أمره بهدوء يخالف ما يمور في داخلها من غضب أسود:

- ماشي يا مهجة, روعي إنت دلوك وابتعلي رمّاح, وجوليلو يجيب معاه عوضين وصابر وما يجيبيش سيرة لحد واصل هو رايح فين ولا لمين؟....

أومأت مهجة بالإيجاب سريعاً وما أن التفت للانصراف حتى نادتها زينب فوقفت ناظرة إليها فيما قالت زينب بنبرة تحذير جاد:

- إوعاكي أي كلمة من اللي جولتيهالي إهنه ولا سمعتيها تخرج برّات خشمك, إنت عارف أناي هعمل إيه وجتها !!!..

قالت مهجة بخوف:

- عارفي يا سّتي الحاجه, هتجصّي لساني !!!..

ابتسمت زينب وأجابت ببرود وهي تشير الى رقبة مهجة بسبابتها راسمة خط وهمي أمام رقبتها من اليسار الى اليمين:

- له وانتى الصادجة.... هجّص رَجَبَتِكَ !!!..

أومأت مهجة في ذعر وركضت لتنفيذ ما طلبته منها سيدتها في حين لمعت عيني زينب وقالت متوعدة:

- بجى وصلت فيكي البجاجة أنك تاجي لغاية عندينا برجليكي,
ماشى يا غندورة,.... جبتيه لنفسك... ماحدش يدخل بيت الاسد
برجليه ويخرج منه صاغ سليم !!!....

لم تعرف منة كيف استطاعت الصمود أمام هذه الساقطة,
ولكنها لم تكن لتهرب من المواجهة في نفس الوقت الذي حاول
فيه سيف تجنيبها مثل هذا اللقاء إذ سرعان ما تحدث قائلاً وهو
يفك ذراعي تلك المرأة من حول رقبتة بإشمئزاز ليدفعها جانباً
بنزق :

- أظن مالوش لزوم الحركات دي, ومعرفش أنتي جاية اساساً
ليه ولا إيه اللي جابك, ولا منين عرفت طريقي, كل اللي انا
عاوزه دلوقتي انك تخرجي فوراً من غير مطرود, وما أشوفش
وشك ولو صدفة بعد كدا !!!....

وقفت تلك المرأة تطالعه بنظرة اغواء فجأة أصابت منة بالغثيان
المفاجيء ولكنها حاولت مقاومته فهي لم تكن لتتسحب من دون
أن تضع هذه الساقطة في حجمها الطبيعي, تكلمت تلك المرأة
وهي تنظر الى سيف نظرة مغوية من تحت رموشها الثقيلة,
وبصوت زادته بحته إثارة:

- تؤ تؤ تؤ , إخص عليك يا فوفو , دلوقتي الوشّ دا مش
عجبك!, الله يرحم أيام ما كنت بتتحايل بس أني أفتح الكاميرا
علشان تلمحه, وأنا وانت عارفين ان الموضوع ما كانش
بيفضل كلام وبس!! , غامزة اياه بصفاقة , ثم نظرت الى منة
قائلة باستهتار وسخرية:

- شكلك كدا المدام؟! , على فكرة جوزك دا شقي أوووي,
..أطلقت ضحكة عالية خالية جعلت منة تتمنى لو أطبقت
بيديها حول عنقها فلا تتركها إلا جثة هامة! , ولكنها تطلعت
الى سيف بنظرة تعبر عن إشمئزازها مما قيل بينما أمسك سيف
بيد المرأة وقال وهو يدفعها الى الخارج:

- البيت دا شريف ونضيف , واللي زيّك ما تدنسوش برجليها,
من مصلحتك انك تختفي حالا من قودامي وإلا أنا مش مسؤول
عن اللي يحصل !!....

جذبت المرأة يدها بقوة من قبضة سيف ووقفت أمامه تقول
وهي تتخسر بينما أطلقت ضحكة رنانة عالية:

- أخاف وأكش من دا الوشّ !! , أموت أنا في الحمشة !!...!

ثم اتجهت اليه بخطوات متمايلة راقصة ووضعت يديها على
صدره وهي تقول بهمس مغو:

- بس حمشنتك دي هي اللي جابت رجليّا , وحشتني يا فوفو , ما
وحشتكتش شاهي! , انت ناسي كنت بتقولي ايه؟ , ,

أمسك سيف بمعصميهما ليبعدهما عنه وهو يهتف بغضب:

- ومش عاوز أفكر! , أنتي كنت غلطة سودة هفضل أكفر عنها
طول عمري , شاهيناز امشي من قودامي , أنا مش همسك نفسي
كدا كتير , ومالكيش دعوه بمراتي , ويا ريت ما أشوفكيش ولو
صدفة بعد كدا !...!

وقفت شاهي أمامه رافعة ذقنها بتحد وقالت ببرود وهي ترفع
حاجبها:

- بس أنا مراتك يا باش مهندس, وليّا زيّها بالظبط!) (في إشارة منها الى منة التي وقفت تراقب ما يحدث أمامها في ذهول غير مصدقة لما يجري مرودة في نفسها أنها لا بد وأنها تحلم وليس بحلم عادي بل هو كابوس رهيب)...

سيف بحدة:

- مرات مين؟, انتي هتستعبطي!, اللي كان بيننا دا لعب عيال, اوعي تفتكري أنك مراتي بجد!, ساعتها تبقي اتجننت رسمي وعاوزة مستشفى المجانين !!...

أجابته شاهي وهي تطالعه بنظرات مستفزة:

- بس جوازنا حصل يا سيف بيه!, انت ناسي انه أتشهر قودام الناس!?, والجواز أساسه ايه غير الاشهار!?!...!

انطلقت ضحكة فجائية جعلت كلا من سيف وشاهي يطالعان مصدرها والذي لم يكن سوى منة التي كانت تضحك بشكل هستيري وقد انتبهت لنظراتهما المتسائلة فقالت وهي تشيح بيدها من وسط ضحكاتها:

- حلو أوي حته انه الاصل في الجواز الاشهار!, مش مصدقة!, معقولة انتي عارفة ايه الصح من الغلط فيه الجواز!?!...!

مسحت دموعها التي نزلت نتيجة ضحكها , ثم هدأت قليلا وقالت وهي تنقل نظراتها بينهما:

- كويس انك تكوني عارفة الصح من الغلط, بس انت عاملة زي اللي بيسأل اللحمة حلال ولا حرام من غير ما يسأل اللحمة دي نفسها جابها منين؟, حتى لو جابها من واحد ميّت !, مش

مهم عنده, المهم انه اللحمة حلال !!.....وانتو مش مهم جوازكم
كان ازاي لكن المهم أنه أتشهر !! , تحدث سيف محاولاً تهدئة
منة:

- منة, ما تتكلميش مع الاشكال دي, دي مش من مقامك!!..

طالعه شاهي باستهجان في حين نظرت اليه منة بلؤم وعتاب
وهتفت:

- ومين اللي خلّا الاشكال دي تقف قودامي دلوقتي؟,
مش..إنت! , مين اللي عمل للزبالة دي سعر وقيمة؟, قبل ان
تتابع قاطعتها شاهي وقد تغضن وجهها بتعبير شيطاني أخفى
أي جمال زائف- صنعته كثرة الالوان التي أغرقت به وجهها -
كانت تتحلى به بينما صوتها يعلو كمن يتشاجر في بيئة شعبية:

- بقولك إيه .. احفظي أدبك يا حلوة.... أنا ماضربتوش على
إيده يا حبييتي!, جوزك راجل زي أي راجل بيريل على واحد
سمعته كلمتين حنينيين!!..

شهقت منة وابتعدت وهى تخفي فمها بيدها وتحرك رأسها
يسارا ويمينا باستنكار تام لما تسمعه بينما أمسك سيف بساعد
شاهي وهو يتوعدها قائلاً رافعا يده الأخرى:

- إخرسي يا بنت ال-***** , وهوى بيده بصفعة مدوية على
وجنتها رمتها بضعة خطوات الى الوراء من قوتها حتى أنها
كادت تسقط لولا أنها أمسكت نفسها , وقفت وهى تقول بغضب
بين فحيح أنفاسها:

- بتمد إيك عليّا يا سبع الرجالة! , طيب لما نشوف أبوك كبير
البلد هيقول إيه ولا يعمل إيه , وحياة دا , وأمسكت خصلة من
شعرها وتابعت بحقد أسود:

- وحياة دا لا أخليك لبانة في بؤ اللي يسوى واللي ما يسواش,
انت متعرفش شاهي يا حبيبي, انت دخلت لعبة ما إنتش قدها يا
عينيا , فاكرنى هتهوّش بقلم وكلمتين؟! , لا يا روجي دا أنا
شاهي والأجر على الله , انت مش هتكون أول مغفل ولا آخر
مغفل , دا شغلي يا بابا , واللي زيّك كثير, وماهيش أول مرة
و....., كان سيف يطالعها بدهشة ممزوجة وغضب واحتقار
لها ولنفسه وهمّ بمقاطعتها عندما دوى صوت عالٍ يقول
بصرامة:

- بس هتكون آخر مرة !!, هتفت منة بما جال ببال سيف ما إن
سمع الصوت :

- ماما الحاجة !! , راقب سيف والدته وهي تدخل رافعة هامتها
بكل هيبة ووقار , تطالع شاهي بنظرات احتقار وقالت مخاطبة
اياها وهي تشير بسبابتها:

- اسمعيني زين , الكلام اللي هجوله مش هتنيّه, انتى هتخرجي
من أهنة على أي داهية تاخذك, مش هتجفي في طريق ابني أو
مرته أو حد من عيلته ولو حتى صدفة! , مفهوم يا بتّ ال.....,
ولا بلاش , مع أنك جايبة العار لهالك, حجهم يجتلوكي علشان
يغسلوا عارهم...

تحدثت شاهي بعد أن أفاقت من ذهولها قائلة بنبرة ساخرة:

- وانتى أن شاء الله فاطمة تعلبة بتاعت العيلة دي؟, اسمعي يا حاجة .. ابنك اتجوزني, وفيه شهود , وانا مراته, وخروج من هنا من غير ما نتفاهم مش هيحصل, وأدي قاعده!! ,....

تقدم سيف منها صارخا:

- انت بتتكلمي أزاي مع أمي بالاسلوب دا, أنتى اتجننتى ! , ورفع يده ليصفعها فأوقفته يد والدته التي أمسكت بيده بقوة وهي تطالع تلك العاهرة التي جلست أمامهم بكل أريحية واضعة ساق فوق أخرى وتؤرجح ساقها بلا مبالاة بينما ترسم ابتسامة برود مغیظ على شفתיها اللتان تصطبغان بلون الدم, قالت والدته بصرامة وحسم:

- مالکش صالح انت بالحديث ديه!, خُد مَرَتَكَ , وأطلعوا فُوجًا!

إنّبه سيف الى وجود منة التي تتباع ما يحدث امامها في صمت تام, التفت اليها ليراها تراقب ما يجري حولها وتعبير من الذهول الممتزج بالاستنكار يلوّن محيّاها, لاحظت منة نظرات سيف اليها فابتعدت بضعة خطوات وهي تهتف بحدة:

- ابعد عني, أنا لا يمكن أفضل على ذمتك ثانية واحده بعد كدا,...., ثم تابعت باشمئزاز وهي تنقل نظراتها بين سيف وتلك الساقطة التي تبادلها النظر ببرود ثلجي:

- جاتك القرف, جاتكو القرف انتو الاتنين !!, وهرعت خارجة ليركض سيف في أثرها وهو يناديها تاركا والدته بمفردها مع تلك ال...عاهرة !!....

لحق سيف بمنة الى جناحهم الخاص ولكنها استطاعت الدخول الى غرفة النوم واغلاق الباب خلفها بإحكام قبل أن يصل إليها..
طرق الباب بقوة مناديا عليها بالحاح:

- منة, منة ... افتحي الباب ... , تصنّت قليلا ولكنه لم يسمع صوتا , أعاد ناده بالحاح:

- منة حبيبتي علشان خاطر بناتنا طيّب افتحيلي , سمع صوت مكتوم ثم أتاه صوتها يقول بنبرة مشروخة وبغضب صارخ:

- ما تقولش حبيبتي!, انا مش حبيبتك يا سيف , انت مش بتحبنى, لا يمكن تكون بتحبنى وتعمل فيّا اللي إنت عملته دا!

مال سيف برأسه الى الباب وقال وكأنه يراها فلا يفصل بينهما سوى الباب الخشبي:

- والله العظيم بحبك, أنا مش بس بحبك, أنا بعشقك يا منة,
علشان خاطري خليني أدخل واعمل فيّا ما بدالك , بس خليني أطمئن عليكى !!...

أجابته بانهيار تام وصوت بكائها يعلو يكاد يصمّ الآذان:

- لا اللي بيحب حد ما يجرحوش, ما يخونوش يا سيف, انت قتلتني بعملتك دي يا سيف, قتلتني , وكفاية لغاية كدا....أنا مش ممكن هسمح لك أنك تدوس عليّا بعد ما دبحتني بإيدك !!...

كاد سيف أن يقتلع الباب ويدخل اليها عنوة, فحبيبته ليست بحالتها الطبيعية, لأول مرة يرى منة بهذه الحالة الهستيرية, أوشك على فقدان عقله خوفا من أن تؤذي نفسها وهي بحالتها تلك, أعاد الطرق على الباب ولكن بهدوء نسبي وقال بصوت

يغلفه الحزن الشديد بينما شعر بغصة بكاء تكاد تكتم حلقه,
وسبحت عيناه بدموع خوف وحسرة, خوف على فقدان حبيبته
وحسرة على ما فعله بها وبنفسه وبحياتهما سوياً, قال سيف
برجاء حار:

- انا مش ممكن أذيكي يا منة, أنا بموت لو شوفتك تعبانة من
حاجه, أنت عارفة انتي وبناتي كل حياتي, أنا غلطت
واعترفت, غلطت غلطة غبية ومشيت ورا شيطان ملعون, لكن
حتى أنا ما استاهلش انك تعملي في نفسك كدا علشانه, أرجوكي
يا منة افتحيلي, هتجنن عاوز أطمئن عليكى , وأوعدك هشوفك
وأمشي على طول, بس أشوفك يا منة....

سمع صوت حركة بطيئة فنظر الى مقبض الباب بأمل وابتسامة
رجاء بدأت بالظهور على وجهه لقبولها رجائه, ولكن سرعان
ما غابت الابتسامة وإندثر أمله عندما سمعها تتحدث بصوت
غريب وكأنها تهذي من خلف الباب , حيث قالت بصوت
مهزوز وكأنها في حالة اللاوعي:

- أنت وعدتني قبل كدا يا سيف وما وفيتش بوعدك, فاكرك؟! ,
فاكر لما وعدتني انك عمرك ما هتخلي الحزن يعرف طريقه
لقلبي؟, فاكرك لما وعدتني إنك عمرك ما هتخلي عينيا تنزل منها
دمعه واحدة؟, مش قلت لي أنك مش هتخلي على وشي غير
الابتسامة بس! , واياه اللي حصل؟, اللي حصل ان عينيا
مابتبطلش دموع, وقلبي الحزن سكنه ومش عاوز يفارقه,
ووشي ما بقاش يعرف يعني ايه الابتسامةإنت.. إنت كذاب
يا سيف.. كذاب.., ثم انهارت ضربا على الباب الفاصل بينهما
بقبضتيها وهي تصرخ بصوت عال:

- كذاب , كذاب يا سيف... كذاب

هتف سيف في الجهة المقابلة من الباب بلوعة:

- منة .. منة حبيبتى اهدي , منة افتحي وإلا هكسر الباب , منة ..منة ...

وفي الناحية الاخرى كانت منة كالمغيبة, سقطت على الارض بجوار الباب وهي تكرر بخفوت وقد نضبت طاقتها فلم تعد قادرة على الوقوف بينما صوتها يخفت وهي تكرر من بين نشيج بكائها:

- كذاب يا سيف, كذاب, خاين وكذاب... كد... كد... كد...

ليسود الصمت بعد كلماتها بينما سقط سيف هو الآخر على الأرض بجوار الباب وهو يقول بتوسل حار بينما يقطع الحزن على ما آل اليه حال حبيبته بسببه نياط قلبه, وقد فرّت دمة خائنة من عينيه لتسقط على لحيته فيذوق ملوحة دمعته بينما يتوسل بالحاح:

- بحبك... والله بحبك ... بحبك , ويظل يكرر كلمته تلك بينما على الناحية الاخرى استندت منة برأسها الى الباب وسقطت رأسها وكأن سيف يهددها لتنام, فغفلت عيناها على صوت هذيانه بحبها وكأنها أنشودة قبل النوم حيث سمعتها فنامت من فورها بينما لم تسكت شهقاتها اثناء نومها ذاك حيث كانت تنتفض بين أن وآخر وهي تكرر وكأنها تهذي في نومها:

- كد... كد... كد... , بينما يقابلها سيف بهذيانه الخافت بكلمة واحدة:

- بحبك ... بحبك..... , مراراً وتكراراً....

تقدمت زينب من شاهي الجالسة تطالعها بإستعلاء, نظرت اليها
زينب مليًا قبل أن تقول بصرامة:

- من غير تضییع وجت, أنا ولدي مالوش غير حرمة واحده
بس, هي منة اللي انت شوفتيها إهنة... واحده بنت ناس,
ومحترمة , والعيلة كلاتها بتحبها, وتبجى أم بناته, لكن غير
إكده .. ابني لا تزوج ولا نعرف حاجه واصل من الحديث
الماسخ الي انت بتجوليه ديه, يعني جُصر الكلام تاخدي
بعضيكي وترحيلي من إهنة, وتنسي اسم سيف ولدي ديه
خالص!!!...

سكتت شاهي لثوان قبل أن تطلق ضحكة ساخرة عالية وقالت
وهي تطالع زينب بنظرات متفكّهة:

- لا بجد خوفتيني يا حاجة , ثم قامت من مكانها وسارت حتى
وقفت إليها وتابعت بلا مبالاة:

- بصي يا حاجه, ابنك اتجوزني , صحيح مش عند مأذون لكن
الجواز أساسه الإشهار , وجوازنا مُشهر, والناس كلها تقريبا
عارفة ان شاهيناز زيدان سيف عبدالهادي, ولو ابنك
مش عاوز يكمل في الجواز ,حرکت كتفيها بلامبالاة وهي
تتابع:

- براحتہ, بس....., وفرکت اصبعيها الابهام والسبابة وهي
تتابع بابتسامة لزجة:

- كله بتمنه يا .. حماتي !!!..

نظرت اليها زينب بنظرات غامضة قبل أن تتحدث ببرود ينافي ما يشتعل في قلبها من غضب حارق تجاه تلك الساقطة التي تقف أمامها تتغنج عليها بمنتهى الوقاحة:

- جولتيلي! , تمنه !!, وايه هو التمن بجاه اللي انتي عاوزاه ؟!

أجابت شاهي وقد بدأت تشعر بالظفر لاقترابها من تحقيق هدفها , فسيف مثله مثل غيره من مئات الرجال اللذين قامت بمثل هذه الحيلة الرخيصة معهم , زواج عن طريق النّت , ثم فضيحة مدويّة , ولكي تنتهي لا بد من الدفع لكي تبتعد نهائيا عن طريقهم , وسقوط هؤلاء الرجال ليس بالعسير , ف... النّت جعل الامر غاية في السهولة , فبالنسبة إليهم النّت ليس بشيء حقيقي , وبالتالي ما يقومون به من خلاله لا يُعدّ أمراً جاد , كحالة سيف , فلم يكن أمر وقوعه في شباكها بالصعب , الامر بمنتهى السهولة , تعارف عن طريق احدى المجموعات المشتركة على موقع التواصل الاجتماعي الفيس بوك , والتمثيل جيدا فأكثر ما يعجبها أنها لا تضطر الا للكذب بالكلمات فقط ! , فهي ترسم لها صورة في عيون الآخرين بعيدة تماما عن صورتها الحقيقية بل وتتقمص شخصيتها الجديدة جيدا , ويبدأ الأمر بصداقة عادية , الى أن تتوطد العلاقة , ثم تبدأ هي برمي بعض الايحاءات لترى مدى قبول الطرف الآخر لها , وكأي رجل يبيح لنفسه التماذي معها , فهو قد فقد احترامه لها , وهي من تقوم بإعطائه الضوء الأخضر ليقوم بما يريد سواء قولاً أو فعلاً !! , و يظن الرجل بعنجهية ذكورية أنه يستطيع اخراجها من حياته بكبسة زر بسيطة لعمل " حظر " لها أو " بلوك " , لتنتهي صفحتها ولكنه لا يعلم أنه قد سار الى شباك العنكبوت

بقدميه , وأنه قد وضع نفسه تحت فكّيها بكامل وعيه, فهي لم تكن لتسمح بذلك, وتبدأ المرحلة الثانية من اشهار لهذا الزواج الاضحوكة , وبالتالي فضيحة مدويّة , ثم ظهورها كنجوم الحفل كما فعلت مع سيف, لتعلن نفسها زوجة , ولكن سيف اضطرها للذهاب بعيدا هذه المرة, ففي المرات السابقة لم يكن الأمر يصل الى الأهل , بل ما أن تبدأ بالتهديد أنها ستصل الى زوجته حتى يسارع بدفع ما تريد كي يرفع أذاها عنه, بينما سيف قد بدأ بالهروب منها قبل أن تعلم زوجته بوقت طويل ما جعلها تقوم باشهار الزواج عن طريق اختراق موقعه على الفيس بوك , ثم تقصّت عنه حتى علمت عن طريق إحدى العاملين بمكتبه بوجوده في بلدته فشددت الرحال الى هناك كي تكمل الجزء الاخير من لعبتها القذرة, وما ان رأت الثراء الفاحش الذي تعيش فيه عائلته حتى سال لعباها وصممت على أن تكسب من وراءه أضعافا مضاعفة مما كانت تناله من أي ضحيّة أخرى ...

برقت عيناها بنظر ظفر وهي تقول :

- شوفي انتي يا حاجه, اسم عيلتكم, واسم سيف , وسمعتكم وسمعة الحاج , وسمعة ابنك .. كل دا يساوي في نظرك كم؟, وزري ما أنا شايفة انتو ربنا مديكمفبيتهيا لي يعني ان الفلوس بالنسبة لكم حاجه تافهة, تقدروا بيها تشتروا سمعتكم واسمكم !! ابتسمت زينب وقالت ساخرة:

- دا إنتي على إكده عارفه عنينا كل حاجة تجريبيا , بس
تصدجي حلو انك عارفة يعني ايه سمعة واسم و... شرف يا
.... عديمة الشرف! , جوصر الكلام عاوزة كم ؟ ..

ابتسمت شاهي وأجابت ببرود مُغيظ:

- أنا بردو مش هزعل منك لأنني مقدرة حالتك كويسة والصدمة
اللي انتي خدتها , وأنا هجيب من الآخر .. 300 ألف جنيه ,
ودا علشان خاطرك !! ..

سكتت زينب قليلا قبل أن تتطلق ضحكاتهما عاليا لتهدأ بعد ذلك
وهي تقول :

- يا سلام بس إكده ! , لَه تصدجي ... طلعت كريمة

قطبت شاهي بينما تابعت زينب بصرامة مفاجئة:

- ولو جولتلك مالكيش عندي ولا مليم , ولمصلحتك إنك
تخرجي من إهنة على المخروب اللي إنتي جيتي منيه,
وإو عاكي تفتكري انك تجدري تلوي دراعنا , ديه بُعدك !! ..

صمتت شاهي قليلا قبل ان تتحدث بهدوء:

- دا آخر كلام عندك يا حاجة؟ , تمتت زينب بالايجاب فيما
تابعت شاهي بلا مبالاة:

- وأنا هشتري نفسي زي ما قولتيلي , انما صحيح , صحة
الحاج عامله ايه دلوقتي , تصدقي زعلت اوي لما عرفت انه
وقع وجات له أزمة قلبية , بيتهيلي الدكتور مانع عنه
الانفعالات , انما في دنيا زي اللي احنا عايشين فيها دي ازاي

الواحد يقدر يهرب من الانفعال ولاالاخبار اللي ممكن
تصدمه والمرة اللي جاية تكون فيها ... نهايته مثلا !!!..

ضيق زينب عينيها وتحدثت بهسيس غضب من بين أنفاسها:

- انتي بتهدديني يا فاجرة؟!....., أشارت شاهي برأسها يمينا
ويسارا وهي تقول :

- تؤ تؤ تؤ , ما أحبش الشتيمة , دا عرض انا عرضته وانتي
رفضتيه , دي صفقة , بيزنيس يعني شغل يا حاجة , ماتستنش
مني اني اخاف وأجري, دا أكل عيش, ومعاكم انتو جاتوه كمان
مش عيش , ابقى غبية لو خفت وجريت !!..

هزت زينب برأسها وأجابت بجدية :

- ماشي, ديه آخر كلام عنديكي,....فأومات شاهي ايجابا,
تابعت زينب بغموض:

- تومام, هتاخدي اللي تستاهليه وزيادة كومان, عشان بس
تعرفي اننا كُرمّا

ابتسمت شاهي منتشية , فيما توجهت زينب الى باب الاستراحة
الذي أغلقه سيف خلفه , ففتحته وأشارت بإصبعها ليدخل على
إثر اشارتها رجل أسمر ضخم يحمل بندقية على كتفه, يعلو
وجهه شارب عريض يكاد يخفي نصف وجهه, تحدث بصوت
جهوريّ أجش يثير الذعر في النفوس لخشونته:

- أمرك يا كُبيرة ..., سارت زينب الى الداخل ثانية يتبعها
رماح وقالت بابتسامة صغيرة وهي تتطلع الى شاهي التي تنظر
اليها بريية وتسأول:

- عندينا ضيفة عاوزين نعملوا معاها الواجب!!...., وأشارت بحركة طفيفة من رأسها الى شاهي الواقفة امامها فاتجه اليها رماح بخطى واثقة فيما تقهقرت شاهي بضع خطوات الى الوراء وهي تقول بحدة مشهرة سبابتها في وجهه:

- إيه, عاوز إيه?, إبعد عني....

لم يعرها رماح التفاتا وأمسك بمرفقها بقوة بينما تحدثت زينب بابتسامة تشف بأسف زائف:

- مالك يا غندورة, انت ضيفة وواجب نكرموكي... لم تنتظر ردّ منها ووجهت كلامها الى رماح أمرة:

- فينهم يا رماح?, أجاب رماح بخشونة:

- تحت أمرك يا كبيرة, واجفين برّه, منتظرين إشارة واحده منيكي....

سارت الى الباب ففتحته وأشارت بسبابتها للدخول , فدخل رجالان أضخم من رماح, فالأخير بالنسبة لهم لم يكن سوى أقزمهم!! , وأشارت بسبابتها الى رماح فاتجها اليه فيما فتحت شاهي عينيها على وسعهما وهتفت صارخة:

- إيه شغل العصابات دا?, انتو فاكرينها سايبه?, أنا هوديكوا في ستين داهي...., وكتمت باقي عبارتها عندما أمسكت زينب بذقنها بعنف وقالت بغضب قوي:

- لسانك ديه تحطيه جوه خاشمك وما أسمعشي نفسك واصل!, انتي بتجولي فاطنة تعلبة!, أني بجه هوريكي شغل التعالب صوح...., رماح....

- أومري يا كبيرة ... , أجاب رماح في التّو واللحظة , تابعت زينب وهي لا تزال قابضة على ذقن شاهي التي تنظر اليها بعينين كعيني قطط الشوارع وقالت بابتسامة ظفر:

- ضايفوا البرنسيصة في الكوخ الغربيّ , مش علوزاها تشتكي واصل,....

- أمرك يا كبيرة , أفلتت زينب يدها ليكمم رماح فمها بيده الغليظة وهو يشير للرجلين قائلاً بغلظة وكأنه قائدهم:

- عوضين .. صابر , فأوماً الرجلين برأسهم وسرعان ما أخرج أحدهما كيس خشن كبير واقترب منها فحاولت الصراخ ولكن شدد رماح قبضته على فمها في حين تحدثت زينب بصوت مسموع بافتخار:

- ما تخافيش يا سنيورة , واضح إكده انو مالكيش أهل يربوكي , أحنا إهنة بجه هنكسبو فيكي ثواب ونربوكي من أوّل وجديد , بعون الله هتطلعي من عندينا وانتي مكفرة عن كل اللي عملتيه سوا مع ولدي ولا مع غيره , عشان تعرفي انه مش كل الطير اللي يتاكل لحمه , وانك غلطت غلطة عمرك لما حبيبتي تلعب معانا احنا السوالمة , عارفة يعني إيه السوالمة؟ , يعني الداخل مفجود والخارج مولود.....واللي زييكي مالهاش دية , هي رصاصة بربع جنيه تخلص عليك ونرميكي في الريّاح ولا من شاف ولا من درى , لكن أنا حابة أكسب ثواب فيكي,...., ثم وجهت كلامها الى رماح قائلة :

- شوف شغلك يا رماح !! , ..اقترب من شاهي المنتفضة ذعرا احد الرجلين ليلقي فوقها بالكيش الخشن ويحكم ربطه , ثم حملة

كجوال من البطاطا واتجه خارجا يتبعه الاخر مع رماح الذي نادته زينب فاتجه اليها فقالت محذرة:

- ولا حرف من اللي حوصل إهنة يطلع لحد واصل , ولا حتى سيف بيه, وطبعا الحاج ما يعرفش كلمة , مفهوم ولا لاه؟...

أوما رماح برأسه مرارا وهو يقول بخوف ينافي هيئته المرعبة:

- مفهوم, مفهوم يا ستي الحاجة, مفهوم يا كبيرة ..

قالت زينب بتهديد:

- انت عارف لو حرف واحد خرج من خشمك إنت ولا حد من الرجالة الثانية هعمل فيك إيه؟. أجاب رماح بخوف بينما نظراته تدل على خفة في العقل:

- هتضربيني يا كبيرة !, همست زينب بوعيد :

- لاه, الضرب ديه مش لِسْنَك يا رماح, انما هخليك لا تحصل راجل ولا....مَرَّة! , فهمت؟!...

فتح رماح عينيه على وسعهما وتمتم بذعر:

- فهمت , فهمت يا كبيرة ..

زينب وهى تأمره بالانصراف:

- خلاص, روح دلوك , وزى ما جولتلك الوكل والشرب يتحطوا لها مرة واحده بس في اليوم , والحاجه اللي تخليها تصلب طولها بس, احنا مش هنعلفها, خليها تكفر عن بلاويها, مفهوم كلامي؟!...

أوما رماح متمتما بنعم وانصرف لتنفيذ أمر سيدته التي زفرت
بعمق وحمدت الله في سرّها على أستطاعتها ازاحة هذه العاهرة
قبل ان ينتبه زوجها , ثم حانت منها نظرة الى خارج الباب
حيث اختفى سيف ومنة منذ فترة وقالت وهي تتنهد:

- يا ترى يا سيف يا ولدي عملت إيه مع المسكينة دي؟!...!

- سيف يا ولدي, ايه اللي مجعدك إهنة؟!...! هتفت زينب بذلك
ما أن أبصرت سيف جالس على الأرض مستندا بظهره الى
باب غرفة النوم, ما ان سمعها سيف حتى انتفض واقفا واقترب
منها وهو يقول برجاء:

- منة, منة يا أمي , من ساعة ما دخلت وهي قافلة على نفسها,
انا هموت من قلقي!....

أبعدته عن طريقها واتجهت الى الباب لتطرقه بدقات حانية
وهي تناديه قائلة:

- منة, منة يا بتي, افتحي الباب يا حبيبتي, أني أمك الحاجة...!
لم يكن هناك أي استجابة, فانتقل قلق سيف اليها, نظرت الى
ولدها وقالت:

- ماتخافش يا ولدي, ثواني وجاية...! وانصرفت وما هي الا
دقائق معدودة مرّت على سيف كسنوات ضوئية.. حتى أتت
زينب مهرولة واتجهت الى الباب ففتحته بمفتاح آخر, قالت
وهي تدير المفتاح في قفل الباب:

- الحمد لله إن معايا نسخة من كل مفاتيح الابواب اللي إهنة,
إطمن يا ولدي... فتحت الباب ولكنها عندما دفعته أبى أن يُفتح
سوى شق بسيط, نادى بقلق:

- منة, منة يا بتي, سمعت صوت أنين مكتوم, فنظرت الى
سيف الواجم أمامها وهتفت:

- إلحج البنية يا ولدي, لم تكمل عبارتها إلا وسيف يدفع الباب
بكتفه وهو يقول:

- عنك يا أمي, وانفتح الباب ليكشف عن منة الساقطة مغشياً
عليها خلفه!!!...

ضربت زينب على صدرها براحتها وانتحبت وهي ترى منة
وقد شحب وجهها وحاكى شحوب الموتى:

- يا ضنايا يا بتي, بينما أسرع سيف بحملها ووضعها فوق
الفراش بخفة, ثم جلس بجانبها وأخذ يربت على وجنتها وهو
ينادي بألحاح بينما سكبت والدته كوب ماء وناولته اياه لينثر
بعضاً منها على وجهها ولكنها لم تستجب وما أثار الذعر في
أوصاله أنها استحالت كقطعة رخام باردة بين يديه!!!...

هرولت والدته حيث منضدة الزينة لتأتي بأحدى العطور
المصفوفة, رشّت بعضاً منها في راحتها ووضعتها على أنف
منة والتي أيضاً لم تستجب, فما كان من سيف إلا أن إحتضنها
بقوة وأزاح يد أمه وتحدث بنبرة شاردة غريبة:

- إبعدي عنها يا أمي, خلاص, هي هتبقى كويسة, لازم هتبقى كويسة , ...ثم أسند وجنته الى رأسها وهو يتابع بينما رفع يدها اليمنى ليقبل باطنها:

- منة حبيبتي, منة انا مقدرش أعيش من غيرك, منة... وطفق يقبل كل إنش في وجهها ويدها ثم يعود الى زرعها في أحضانها مجددا وهو يتمنى لو استطاع إدخالها الى داخل صدره ليغلق عليها فيضمن ألاّ تبتعد عنه مقدار أنملة!!...
هتفت زينب بلؤم:

- جرى ايه يا سيف ولدي, ديه وجت الحديت ديه, مرتك هتبجي زي الفل ان شاء الله, روح إنت جيب الدكتور, وأني هفضل معاها لحد ما تاجي..

رفع سيف عينين معترضتين وقال:

- لا, أنا مش هسيبها , خلّي رماح يروح للدكتور!,,

لم تستطع زينب اخباره بمكان وجود رماح الآن, فهتفت به:

- جوم يا ولدي, رماح راح مشوار شوية وراجع ولازم نطمن ع البنّية ... لم يجد سيف بدّا من الاستماع الى نصيحة والدته, احتضن منة بقوة مقبلا إياها وكأنه ينفث فيها قبلة الحياة, ثم تركها هامسا:

- شوية صغيرة يا مُنايا وجاي, اوعي تسبييني ..

ثم نهض سريعا متجها الى الخارج وقال قبل ان يخرج لأمه:

- خلّي بالك منها يا أمي, أنا مسافة السكة!!..

خرج الطبيب من غرفة منة وكانت ترافقه زينب, أجاب على سؤال سيف الظاهر في عينيه:

- المدام عندها حمى شديدة للأسف, أنا كتبت لها ادوية خافضة للحرارة, لو الحرارة من هنا للصبح ما نزلتش لازم تدخل المستشفى, الحرارة ارتفعت مرة واحدة وبصورة غريبة وفوق الـ 40 كمان, لازم تنزل بأي طريقة, أنا ادتها حقنة دلوقتي, وحقنة تانية تاخذها بعد 12 ساعة, غير الادوية اللي لازم تاخذها في مواعيدها, وأهم حاجه الغذاء, واضح جدا ان المدام بتعاني من سوء تغذية, ولو اتكرر موضوع الاغما دا تاني يبقى لازم تحليل دم كامل, شكر سيف الطبيب وأشار لمهجة بمرافقته الى الباب بعد أن أعطاه أجرته ...

دخل الى الغرفة فوجد والدته وهي تقوم بعمل كمادات باردة لها, تناول منها المنشفة القطنية الصغيرة, وقال:

- قومي انتي يا أمي ارتاحي, أنا هسهر جنبها!!..., ربتت أمه على كتفه قائلة:

- أني هروح أعملها عصير برتُجان, الدكتور جال العصاير مهمة جوي لحالتها...., الحمدلله أن البنات راحوا مع سميحة أختك ولا كانوا اخترعوا عليها دلوك!!...

وانصرفت تاركة اياه غير واعى لمغادرتها فجُلَّ اهتمامه راقدا أمام عينيه لا حول له ولا قوة !!...

- عشان خاطري يا بنيتي, خلصي وكلِّكِ, احنا ما صدجنا, انتي كنتي فين وبجيتي فين!!!....

نظرت منة الجالسة فوق فراشها الى حماتها بابتسامة صغيرة بينما يشي ذبول وجهها الواضح بمدى مرضها الذي شارف على الانحسار, وقالت بصوت واهن ضعيف:

- معلّش يا ماما الحاجة, مش قادرة , حاسة اني لو أكلت لقمة كمان هرجّع.....

أجابت زينب وهي تضع ملعقة الطعام جانبا:

- أني مش عاجبني حالك يا بّتي, إنت عارفة ان عمّك الحاج هيتجنن عاوز يشوفك لولا الدرج عفش عليه كان طلع لك, جولناله انه جاتك نزلة برد وعرة جوي هي اللي رجدتك إكده, تمام زي ما جولنا لِهَلْكَ لما كلمونا يطمنوا عليكي وعلى الحاج إكمنك جعدت كم يوم مش تكلميهم, شوفي يا بتي أني مش عاوز أتكلم في حاجه تكدرّك, لكن لازم تسمعي الكلمتين اللي هجولهوملك دول, سيف ولدي غلط, وغلطة كبيرة جوي, بس مين منينا مش بيغلط يا بّتي؟! , اني عمري ما شوفت سيف بالحالة اللي هو فيها دي!, صدجيني مش بتكلم اكمنه ولدي, لكن شكله يا نضري لا يسر عدو ولا حبيب, وجولتلك جبل سابج لو حد من بناتي حوصله اللي حوصلك ديه كُنت هجول نفس الكلام, انتي المهم تاخدي بالك من صحتك, أما سيف فديه

هنريه من اول وجديد, زي ما اتفجنا , وأي حاجه تانية شيليه
من بالك, ما تستاهلش انك تفكري فيها!!.....

نظرت منة اليها وقالت بابتسامة ساخرة صغيرة:

- أنسى!, أنسى ايه يا ماما الحاجة?, أنسى انه خانني, ولا انه
جانب واحد من الشارع وعمل راسها براسي?, ولا ... أنسى
منظرها لما جات له هنا?..

ربتت زينب على يدها وقالت:

- معلش يا بتي واحدة واحدة, المهم دلوك صحتك انتي..

قاطع حديثهما رنين محمول منة فاجابت المتحدث الذي لم يكن
سوى نادر!, الذي سارع للاطمئنان عليها فور معرفته بمرضها
من خالته والتي لا تزال لديهم هي وعبدالعظيم زوجها بينما عاد
احمد الى القاهرة لينهي أوراقه اللازمة لعودته الى البلد
الخليجي حيث يعمل, كانت مكالمه قصيرة تبادلا فيها الاخبار
واعذرت منة من نادر على تقصيرها في عملها بالنسبة الى
مكتبه, حيث كانت قد أحضرت النماذج معها للعمل عليها,
ولكنه قاطعها مؤكدا أن أهم شيء سلامتها وألا تلتفت الى أي
شيء آخر, وقام بسرد نادرة من نوادره الطريفة ليذهب عنها
الحزن الذي سمعه في صوتها, ضحكت منة على طرفته وأنهت
المكالمة وهي لا تزال تبتسم, نظرت اليها زينب وابتسامة

صغيرة ترتسم على محياها وقالت وهي تشير الى المحمول في يدها:

- الحمد لله اني سمعت ضحكتكي!, شكل المكالمه ديه وشها حلو عليكى ..

أجابت منة بتلقائية:

- دي من نادر ابن خالتي كان بيطمّن عليّا, عرف من ماما اني تعبانة, بصراحه نادر الوحيد اللي لما تقعدى معاه يقدر تخليكي تضحكي وانت في عزّ زعلك !!...

سكتت زينب قليلا ثم سألت باهتمام :

- هو ولد خالتك ديه متزوج?, أشارت منة برأسها نفياً وقالت:

- لا .. , ابتسمت زينب ابتسامة نصر صغيرة على شفثيها وقالت وهي تغمز بعينها اليمنى في خبث:

- حلو جوي, فاكرة الخطة اللي جولتلك عليها عشان نربي سيف ولديّ?, أومأت منة بالايجاب وهي في حيرة من أمر حماتها التي تابعت بحماس:

- اتفرجي بجه عليّ وأتعلمي يا بت المدارس, أني صحيح حرمة جاهله لا دخلت مدارس ولا جامعہ, ومتربية في الصعيد إهنة مش في البندر, لكن وبفضل الله حماتك محّها يوزن بلد, ولما وعدتك اني هجييلك حجّك من ولديّ , ما كانشي كلام

وبس,لاه....., بكرة هتتوكدي من كلامي صوح.....ودلوك بجه
جه الوجت اللي هنربيه فيه لحد ما يجول حجي برجيتي !!...

لم يتثنى لمنة التعقيب على كلام حماتها اذ سرعان ما طرق
الباب بطرقات صغيرة أتبعها دخول سيف, تجهم وجه منة ما
ان شاهده, فهي لم تخاطبه ولم تنظر اليه منذ ما حدث, فما ان
أفاقت من اغمائها وقد شاهده راقدا بجوارها حتى قاطعته ولم
تقبل بالحديث معه أبدا, ولكنه لم يكف عن زيارتها والاطمئنان
عليها, بينما ذهبت البنات لدى سميحة للاقامة معها لحين شفاء
أمهما وكانا يأتیان لرؤيتها يوميا والعودة مع شقيقته ثانية والتي
أحباها وأحبا اللعب مع أولادها.....

أشاحت منة بوجهها جانبا في حين تعامل سيف مع الأمر
بصورة عادية, سار حتى وقف الى جوارها ونظر الى صينية
الطعام ليرى أنها لم ينقص منها الا أقل القليل, تحدث بعتاب
خفيف:

- كدا بردو يا منة ما أكلتيش!..

قالت زينب بزفرة عميقة:

- مرتك مخها ناشف جوي, غُلبت فيها يا ولدي , ما عيزاشي
تاكل واصل, يدوب شربت حبة شوربة بالعافية, شكلها إكده
صعيدية, مش بتوافج بسهولة, ..سكتت قليلا لتتابع غامرة منة
في غفلة من سيف بمكر:

- ولا نجيب لك ولد خالتك علشان ترضي تاكلي؟, اللي يخليه
يجدر يضحكك يجي سره باتع !!...

شحب وجه منة وهي ترى سيف والانطباع الذي وصله,
أغمضت عينيها بقوة وهي تتمتم في سرها:

- لا لا , ما لاقيتيش غير نادر يا حماتي!! دا غلبان !!, هي تعلم
تماما مدى ضيق سيف من ذكر نادر, حانت منها التفاتة اليه
لتراه ينظر اليها بتساؤل ونظرة سوداء أعتمت مقلتيه, بينما
ينتفض عرق في رقبته دليل توتره, تحدث سيف بخشونة:

- ابن خالتها؟,....اجابت زينب:

- ايوة يا ولدي, اسمه نادر!!...

لاحظت منة بطرف عيناها قبضة سيف وهي تتكور بقوة ويشد
على اصابعه حتى بانّت سلاميات اصابعه البيضاء, تساءل
سيف محاولا قمع غضبه الذي بدأ بالتصاعد:

- وانتى تعرفي نادر منين يا أمي؟...

أجابت زينب:

- ما هو بسلامته كان بيتحدث إمعاهها دلوك علشان يطمّن عليها,
بصراحه من يوم منة ما جات إهنه واني ما اسمعتش ضحكتها
زي دلوك....

نظر سيف الى منة بحدة وعلّق:

- طيب كويس, يعني ضحكت معاه...

قالت زينب وهي تقف وتتناول صينييه الطعام قبل ان تتجه الى الخارج:

- أومال, ديه كركعت كمان مش ضحكت بس, إتعلم منيه شوفه
بيجول ايه يخلي اللي جودامه ما يجدرش يمسك نفسه من
الضحك زي ما مرتك حاكتلي!!....., وانصرفت غير مدركة
للقنبلة المدويّة التي فجّرتها بكلماتها!!

نظر سيف الى منة قليلا بنظرات تسودها الغموض, قبل ان
يتقدم ليجلس بجوارها فوق الفراش وهو يمد يده ليمسك يدها
قائلا بهدوء:

- مش راضية تاكلي ليه يا منة؟, عجبك رقدتك دي؟!..

نفضت يدها بقوة من يده ورمته بنظرة ساخطة ثم أشاحت
بوجهها جانبا ولم ترد عليه, كتم سيف غضبه بصعوبة وأعاد
إمساكه ليدها ولكن بإحكام هذه المرة فكان نصيبه نظرة زاجرة
لم يعلّق عليها وتابع بصوت بدأت وتيرته تتغير وان كان يحاول
التحكم في غضبه الوحشي كي لا يفلت من عقاله:

- ما كنتش أعرف يعني إن نادر ابن خالتك بيكلمك!, لا تصدقي
فيه الخير....كله زوء بصراحه!!....

استنكرت منة نبرة السخرية التي يتحدث بها سيف, وجذبت
يدها من قبضته بقوة فيما نهضت من فوق الفراش والتفت
لتنظر اليه ليتطاير شعرها حول وجهها بينما انعكست اشعة
الشمس القادمة من النافذة خلفها على شعرها لتجعل خصلاته
الكستنائية تتوهج كألجنة الذهب, فيما بدا مظهرها في رداء النوم
المحتشم الذي يلتف حولها يغطيها من أعلاها الى أسفلها بلونه
الأبيض المزدان بكشكشات حول أساور أكمامه, بينما تحيط
برقبته قبة من الدانتيل الأبيض تمتد حتى بداية صدر الثوب,
كان مظهرها بالرغم من احتشام ثوبها في غاية الفتنة بالنسبة
له!, فقد بدت كطفلة صغيرة ترتدي رداء النوم الخاص
بوالدتها!, بينما أظهر انعكاس ضوء الشمس عليها مفاتها
الانثوية المختفية خلف هذا الثوب الذي أتها به حماتها في لفة
منها كي تبعث السرور الى نفسها, فقماشه الحريري المزدان
بالدانتيل كان في غاية النعومة والرقّة مما جعلها تلبسه كي
تحاول إرضاء هذه السيدة التي لا تألوا جهداً كي تسري عنها!
وقفت امامه قائلة باستخفاف ظاهر:

- نادر طول عمره بيفهم في الزوء والواجب والأصول, وما
اسمحش أنك تتكلم عليه بالاسلوب دا !!..

كان يستفزها عامدا كي تتحدث معه وان كان للمشاجرة!, فلقد
افتقدها حقاً وافتقد حديثها وصوتها ونظراتها المنصبة عليه وان
كانت لوما أو تقرّيعاً أو عتاباً كما هو الحال الآن!, ولكن دفاعها

عن ابن خالتها لم يرق له, فنهض من مكانه وتقدم بضعة خطوات حتى وقف أمامها وقال فيما هو يضع يده اليمنى في جيب بنطاله:

- وأنتي ايه اللي ضايك بالشكل دا؟, ولا يمكن تكوني ندمانه انك ما استنيتيش يتقدم لك رسمي ووافقتي عليا أنا الأول؟! , قطبت منة وهتفت باستهجان وهي تشيح بيدها:

- إيه؟, انت بتقول ايه؟, هو مين دا اللي يتقدم لي؟...

أجاب سيف ساخرا بينما تكورت يده في جيبه لتشكّل قبضة قوية من فرط غضبه:

- ايه.. عاوزة تقوليلي انك ماتعرفيش ان ابن خالتك المحترم كان عاوز يتقدم لك واتصدم لما لاقانا اتخطبنا؟!...

شهقت منة واضعة يدها فوق فمها قائلة:

- معقولة؟, نادر...

كرر سيف عبارتها باستخفاف:

- ايوة نادر!, نادر اللي بيكلم واحده ست متجوزة وبيتعمد يصطاد في الماية العكرة وهو حاسس انه فيه خلاف بيننا!, نادر اللي عمّال يلف حواليكى , من امتى تقدرى تقوليلي بيكلمك فون يطمّن او أي حاجه؟, احنا متجوزين بقالنا اكتر من 4 سنين عمره في مرة كلمك حتى في ولادة بناتنا؟, كانت خالتك بس

اللي بتيجي تزورنا او تتكلم وهو ..لأ, تقدري تقوليلي ايه اللي
خلّاه يتكمل دلوقتي علشان يطمّن عليكي ؟, لأ واياه ما
خلصوش تكوني زعلانه فضل وراكي لغاية ما ضحكتي!!...
هتفت منة عاليا وهي تشهر سبابتها في وجهه قائلة :

- إخرس !!... , بُهت سيف وقال:

- إيه؟... , تابعت منة بعنفوان:

- بقولك إخرس! , او عى تقول كلمة زيادة بعد كدا! , انت فاكّر
علشان انت خاين يبقى انا كمان خاينة زيك؟ , ولا نادر هيخون
اهله وربّه قبلهم ويبص لواحد متجوزه؟ , لكن هقول ايه... كل
يرى الناس بعين طبعه! , وطالما وصلت لغاية هنا .. يبقى كدا
خلصت !!...

تحدث سيف بهدوء ينذر بهبو عاصفة هوجاء لم تنتبه اليها منة
في خضم غضبها الصارخ:

- يعني ايه مش فاهم؟..

أجابت منة وهي تنتظر اليه بتحد:

- يعني ماما وبابا جايين مع نادر بكرة ولا بعده بالكثير وأنا
هاخد بناتي وأرجع معاهم !!...

تقدم سيف بضع خطوات وثييدة ووقف على بعد انشأت منها
وقال :

- معلّش ممكن تعيدي كدا؟, مين اللي هيسافر مع مين؟, ومين أصلا اللي هيسمح لك بالجنان اللي انتي بتقوليه دا؟...

لم تستطع منة الصمت أو ادعاء البرود أكثر من ذلك وصرخت
عاليا:

- أنا اللي بقول! , وانت خسرت حقك انك توافق أو ترفض,
بقول أني أرفض أعيش مع واحد خاين كذاب زيّك, عرفت
بقول ايه يا باش مهندس ولا أقول كمان؟!!!

سكتت وهي تلهث بعد انفجارها المدوي في وجهه بينما
انتشرت خصلات شعرها الثائرة حول وجهها فيما كان صدرها
يعلو ويهبط وهي تحاول إلتقاط أنفاسها اللاهثة, ودموعها تلمع
بإباء في مقليتها رافضة النزول, لن تبكي ثانية, يكفي ما سكبته
من دموع من أجل ما فعله بها , وقفت شامخة بينما تقضم
شفتيها بأسنانها اللؤلؤية الصغيرة بتوتر ظاهر كعادتها دائما
عندما تتعرض لأي انفعال أو قلق , تقدم منها قاطعا الانشأت
البسيطة التي تفصلهما بخطوات وئيدة ووقف أمامها يطالعها
بنظرات يسودها الغموض, ثم أخرج يده من جيبه , بينما وقفت
هي تراقبه بنظرات حاقدة غاضبة لتتحول الى شهقة مختنقة
عندما مد يده الى شفتها السفلى ليخلصها من براثن أسنانها,
ويمسح عليها بطرف إبهامه الخشن, ثم مال عليها يهمس
بخطورة:

- علشان أنا عاذرك ... مش هحاسبك على الكلام اللي قولتيه
دا, ومش محتاج أقولك أنا عملت إيه, أظن انت كنت حاضرة
كل حاجه , وواعية للي انا عملته وبعمله علشان أكفر عن
غلطتي في حقك وحق نفسي وحق ربي قبل أي حاجه ثانية,
لكن أقسم بالله يا منة اني هعرف أحط لعنادك دا حد, هي كلمة
واحد ... سفر من هنا مستحيل , مش هتتنقلي خطوة واحد من
غيري , رجلي على رجلك , وسي روميو اللي مستنيكي دا
وجاي لغاية هنا برجليه أنا هعرف أتصرف معاه , قودامه حل
من اتنين , يا يبعد عنك خالص وينسى إسمك بالمره , يا إمّا
.....عُمره !! ,,,

شهقت محتجه ورفعت اليه عينان ثائرتان تموجان بغضب
عاصف وحاولت الفكاك من أسر يده لوجهها ولكن دون طائل
بينما همست بفحيح من بين أسنانها جعلته يشتم عطر أنفاسها
الساخنة التي لفحته برائحتها التي استثارت جميع حواسه فغدا
الدم يجري ساخنا في عروقه , وقد غشيت عيناه نظرة مبهمه لم
تعيها وهي تتحدث بانفعال:

- أوعى تفكر انك تقدر تسجني عندكم هنا, لو عاوزة أمشي من
هنا مافيش قوة على الارض هتقدر تمنعني أني آخذ بناتي
وأمشي , وتهديك دا علشان نادر أحسن لك تسحبه , نادر بني
آدم محترم وعمره ما تجاوز حدوده معايا , حتى لو كان فُكر فيّا
في يوم من الأيام زي ما قلت فدا شيء طبيعي , لكن عمره ما

قلل من قيمتي, ولا عمل أي شيء يقلل من احترامي له أو
احترامه ليّا!

تحدث سيف بنرة هامسة تحمل في طيّاتها خطورة كامنة بين
أحرف كلماته:

- واضح انك لسه مافهمتيش!, انتي خط أحمر بالنسبة لي,
منطقة محرّمة.....وأي حد يقرب من المنطقة دي يبقى حكم
على نفسه بالموت !!....

فتحت فاها دهشة مما تسمعه, فما تراه أمامها الآن جانب جديد
من سيف لم يسبق لها وأن اختبرته سابقا!, تابع وهو يمسك
بشفتها السفلى بين إبهامه وسبابته :

- وأظن سبق وإني حذرتك قبل كذا إنك تلعبى في ممتلكاتي!!
قطبت مستهجنة وهمّت بالسؤال ليسبقها قائلًا وهو يميل ناحيتها
لتشتم رائحته الرجولية المثيرة التي استنشقتها بالرغم منها حتى
أنها شعرت بها تسري في دمها وتشيع الفوضى في أوصالها:

- انتي كلك ملكي, و... شفايفك دي ممتلكات خااااصة جدااا
ليّا!!....

لم يمهلها الحديث لينقض عليها ملتهما شفتيها في قبلة حسيّة
خدّرت جميع حواسها, بينما التفت يداه حولها يطوقانها بقوة
آلتها, ولكنها لم تستطع الابتعاد عن أسر ذراعيه, لتستسلم الى

طوفان حبه بعد مقاومة شرسة منها في البداية وإصرار أعنف منه قبل أن تضعف مقاومتها لتصبح مقاومة واهنة حتى خضع قلبها لجبروت عشقه فرفعت راية الاستسلام, لترتفع ذراعيها عاليا يعانقان عنقه الضخم القوي, بينما تعتصر ذراعيه جسدها الهش لتلتصق به بشدة, حتى أضحا وكأنهما شخصا واحدا , تماما.. كالتوأم السيامي لا سبيل لفصلهما !!.....

=====

الحلقة الخامسة عشر:

استيقظت منة واستدارت الى جانبها لتجد مكان سيف بجوارها خالٍ, حمدت الله في سرها على انصرافه قبل إستيقاظها, تجعد وجهها لتنخرط ببكاء حار عند تذكرها لما حدث بينهما قبل ساعات, شتمت نفسها للمرة الألف, وهي تلومها أنها ستظل أبدا ضعيفة أمامه, فهي لم تقاومه كما يجب, بل سرعان ما استسلم قلبها الضعيف لهمساته العاشقة والتي تذيب الحجر الصوان!!..., ولكن كيف لا تفعل وهي تذوب عشقا به؟! , هي لا تنكر أنها تحبه, فسيف كان أول حب يدخل قلبها, لقد أحبته بكل أحاسيسها المختزنة, والتي كانت تدخرها الى زوجها, لتمنحه كامل حبه عن طيب خاطر ومن غير خوف من غضب الله او من خيانة ثقة والديها, فحبهما كان في النور وبمباركة أهليهما!, ولكن كيف أصبح حالهما الآن?, لقد خانها سيف, ذبحها بأبشع طريقة ممكنة, ولأنها عشقته بكل قطرة دم فكل خلجة من

خلجات قلبها كانت تهمس باسمه, فهي لا تستطيع النسيان أو
الصفح, ليس بهذه السهولة!, لو لم تكن تحبه بمثل هذا القدر من
الجائز أن تسامحه وتنسى, ولكن كما أن حبها له كبير فغضبها
منه أكبر !!....

لمست شفتيها الملتهبتين بأصابعها واللتان تحملان دلائل ما
تقاسماه لفترة طويلة!! , كان يبيثها شوقه وحبّه بينما يدها تضعان
صك ملكيته لجسدها وروحها على حد سواء!, لم تستطع
الوقوف في وجه سيّل حبّه الجارف الذي أغرقها به ليجرف
معه مقاومتها بعيدا, فقد كان عشقه كالطوفان الهادر لا سبيل
للوقوف أمامه أو صدّه !!....

التحفت بالغطاء ونهضت عازمة على الاغتسال أولا ثم التحدث
معه بشأنهما, لا بد أن توضح له أن ما حدث بينهما لا يعني أبدا
أنها ستنسى أو تصفح, بل ما حدث جعلها أكثر تشبثاً وإصراراً
على الطلاق وقبلاً... الرحيل من هنا مع والديها !!....

خرجت من الحمام بعد أن أنهت اغتسالها, كانت ترتدي ثوبا
قطنيا أخذته معها تحسّبا لحضور سيف في غيابها, وحدث ما
كانت تخشاه!, إذ فوجئت به يقف في منتصف الغرفة وشعره
يلمع بقطرات من الماء وقد ارتدى بنطالا من الجينز وقميصا
قطنيا أبرز عضلات صدره, كانت تجفف شعرها بالمنشفة
عندما شاهدته فكتمت شهقة صغيرة فيما اندفع اللون الأحمر الى
وجهها راسما لوحة أخاذه لحرورية تقف أمامه كاد أن يندفع اليها

ليغرقا مجددا في طوفان حبهما الجارف! , ولكنه تماسك وقال
بصوت هاديء بابتسامة خفيفة:

- صح النوم !, لم تجبه وبدلا من ذلك رمته بنظرة سخط ثم
التفتت الى مرآة الزينة لتمشط شعرها , كادت أن تقتلع خصلاته
من جذورها لشدة تمشيظها له , تقدم بضعة خطوات منها واقفاً
خلفها وغافلها ساحبا فرشاة التسريح منها , حاولت جذبها منه
ولكنه أبعد يده وقال بهدوء ولكن يحمل رنة تحذير واضحة:

- كدا هتقطعي شعرك , هسرحهولك أنا! , ليمشط شعرها برقة
ونعومة يخالفان خشونة يديه , وما ان انتهى حتى ألقى بفرشاة
الشعر جانبا ثم دفن أصابعه في خصلاتها ناثرا اياها فوق
كتفها , ليميل بعد ذلك عليها مقتربا بأنفه من خصلاتها
الكستنائية ليشتم عبير الزهور الذي يفوح منها مغمضا عينيه
ليتوه في رائحتها العذبة , شعر بها تحاول الفكاك من قبضته ,
فوضع يديه على كتفها مديرا إياها له , طالعها بنظرات شوق
وعشق سرمدي وتحدث بصوت مخنوق من فرط مشاعره
الجياشة بينما نظرت هي الى الأسفل:

- بحبك! , والله بحبك , ولا عمري حبيت قبلك ولا هحب بعدك! ,
بحبك ومش عاوز حد إلا .. إنتي !!...

رفعت عينيها اليه ليصعق بنظرة الكراهية التي انبعثت من
مقلتيها , تكلمت بصوت هامس ولكن يحمل غضبا مكتوما:

- إوعى تفكر ان استسلامي ليك دا معناه اني خلاص نسيت
وسامحت!.....لأ؟؟؟! , تبقى غلطان يا باش مهندس, أنا ما
انكرش اني ضعفت في لحظة, لكن عارف بعد ما فوقت حسيت
بإيه؟, حاسيت بنفسي غامّة عليا!, كنت عاوزة أرجع!, افكرت
كل كلامك للتانية والقرف اللي انا شوفته, علشان كدا مهما
عملت انا وإنت حكايتنا انتهت يا سيف, وياريت تحط كلمة
النهاية بدري بدري لان المماطلة ما فيش منها فائدة !!..

قست يداه فوق كتفيها وصرخ بغضب بينما طالعها بنظرة
ملتعبة من بين فحم عينيه المشتعلتين:

- إنتي إيه؟, مش عاوزة تفهمي إيه؟, أنا غلطت وندمت وثبت
لربنا , واتأسفت بدال المرة ألف ومليون, أعمل إيه تاني ؟!..
لم ينتظر ردها وتابع بقسوة بالغة:

- انما عارفة لغاية هنا وكفاية يا منة, انا اعتذرت لك كثير
وانت مش راضية تديني وتدي لنفسك فرصة تانية, واسمعي
آخر كلام عندي بقه علشان نقفل الموضوع دا خالص, طلاق
مش بطلاق, وسفر من هنا مش هيحصل غير ورجلك على
رجلي , ولما نشوف يا منة.... أنا ولّا.. إنتي !!... , ودفعها
جانبا متجها بخطوات تحفر في الارض من قوتها الى باب
الغرفة ووقف قبل ان يغادر ناظرا اليها بسخرية:

- ولو على اللي حصل, اطمني خالص , مش هيتكرر تاني ولا
هتضطري انك تقرفي من نفسك ولا ترجّعي, مش هقرب لك يا
منة حتى لو وقفتي من غير هدوم قودامي... عن إذنك !!,
وانصرف صافقا الباب خلفه بعنف بينما هَوَتْ جالسة فوق
الكرسي خلفها دافنة وجهها بين راحتها وقد انخرطت في بكاء
حار يقطع نياط القلوب !!!..

=====

كان سيف جالسا في حديقة منزلهم الكبير مستندا برأسه الى
ظهر مقعده المصنوع من أغصان البامبو, أغمض عينيه زافرا
بتعب, كان يفكر كيف يقنع هذه العنيدة التي تقبع في غرفتها
بالأعلى أنه لا سبيل إطلاقا لما تفكر فيه؟! , أنه من رابع
المستحيلات أن ينفذ لها طلبها المجنون والتي ما أنفكت ترميه
في وجهه! , كان يظن أنه بعدما حدث بينهما ستلين, فقد بثها حبه
ولواعج شوقه, ألم تشعر بعشقه لها?, ألم يصلها مدى حبه
وولعه بها?, ألم تعلم بعد أنها بمثابة روح ثانية لهذا الجسد وأنه
بدونها يفنى ويهلك!.....

زفر بتعب, وهو يدعو الله في سرّه أن يلهمه الصواب عندما
تناهى الى سمعه صوت والدته يناديه بحنوّ:

- سيف, سيف يا ولدي...

فتح عينيه وطالع أمه الواقفة بجواره, اعتدل في جلسته وهمّ
بالنهوض عندما منعته واطعة يدها على كتفه وهي تجاوره
على الكرسي المقابل له قائلة:

- خليّك مرتاح يا ولدي... مالك يا نضري؟, وشكّ مش
عاجبني..

أجاب سيف بابتسامة صغيرة:

- يعني مش عارفة يا أم سيف؟...

ابتسمت أمه بحنان وأجابت:

- منّة!....

ليطلق سيف زفرة حارة من صدره وكأن مجرد سماعه لإسمها
يثير فيه العواصف اللاهبة, فأسمها كفيل بجعل دقات قلبه
تتسارع وتعلو وكأن قلبه يرفض الاستمرار
بدونها...هي...وقوده !!...

تحدث سيف بنبرة مشروخة بالرغم عنه:

- مش عاوزة تنسى يا أمي مهما عملت مش عاوزة
تسامحني...

اجابت الأم بشفقة على حاله ولكنها في ذات الوقت تريد تقريره
على ما فعله في حق ربّه اولا وامرأته بل ونفسه ثانيا:

- اللي حوصل ما كانشي شويّة يا ولديّ, مَرَّتْكَ بتحبك وجوي
كمان, بس هي برضيكي موجوعه جوي جوي من عملتك
دي... سكنت قليلا لتتابع بعد ذلك وهي تطالعه بحزن ممزوج
بأسى وقد أبعدت يدها عنه:

- أني ما سابجليش واتحدث معاك في الموضوع ديه, لكن
عاوزه أعرف ليه يا ولديّ؟, ايه اللي خلاك تعمل إكده؟..

زفر سيف بعمق قبل أن ينظر الى أمه بخجل وقال بندم بالغ:

- أنا عارف أنك زعلانة مني, وأكيد كمان مصدومة فيّا, بس
صدقيني يا أمي, لما برجع أفكر في اللي حصل بحس أنه اللي
عمل كدا مش أنا!, الشيطان الملعون بيزين لنا دايمًا الغلط,
وللأسف هو أول تنازل وبعد كدا التنازلات بتكتر, وانا
الموضوع ابتدئ كلام, ونسيت انه فيه زنا عين وزنا أذن,
نسيت ان الكلمة اللي بتخرج منّا بنتحاسب عليها, وسلّمت
وداني للشيطان, في وقت كانت منة مشغولة عني بالبنات
والبيت, انا مش ببرر الغلط اللي عملته, لأنني عارف ان اللي
عملته جريمة مش مجرد غلط بسيط, لكن أنا عاوز أقول اني ما
كنتش في وعيي, أنتي عارفة أنا بحب منة قد إيه, منة حياتي
كلها, وفي لحظة ضعف أو ممكن نسميها لحظة غياب سلمت
نفسى للشيطان ومشيت وراه, والتانية طلعت دي شغلتها,
ويمكن الفضيحة اللي حصلت دي ربنا أراد بيها أني أكفر عن
جرمي في حق ربي وحق نفسي ومراتي, على فكرة يا أمي أنا

نهيت علاقتي بيها قبل منة ما تعرف, ابتسم بمرارة وهو
يوصل:

- بس مافيش جريمة كاملة!, الرسايل اللي كانت بيننا نسيت
أمسحها, منة شافت وقرّيت كل حاجه, والتانية اتغاظت ان
شغلها كدا هييوظ, عرّفت الكل اننا اتجوزنا, ازاي.. مش
مهم!..., المهم اننا متجوزين!!....
تحدثت زينب بقلق:

- صحيح يا ولدي .. الكلام اللي جالتو الفاجرة دي انكم
متزوجين دلوك ديه صوح؟.....

نظر سيف الى امه وهو يزفر بعمق:

- والله يا أم سيف ما أنا عارف, بس منة قالت لي نفس كلامها
دا, قالت لي انه الاساس في الجواز الاشهار واني دلوقتي أعتبر
متجوز عليها...

قطبت زينب متسائلة:

- ودي حلّها كيف دي؟..

سيف بحيرة :

- مش عارف, بس أنا قرّيت كتير في الموضوع دا, ولو قيسنا
على الجواز العرفي, الجواز العرفي مش مُعترف بيه قانونا أو
شرعا, لكن لو حصل واتنين متجوزين عرفي وعالوزين يسيبوا

بعض يبقى لازم الزوج يرمي يمين الطلاق على زوجته في وجود شهود, هو الجواز طبعاً في السرّ, لكن دا لازم علشان الواحد ييري ذمته قودام ربنا, فرضاً اللي اتجوزت عرفي دي عاوزة تتجوز رسمي من واحد تاني, لو اتجوزت من غير وقوع يمين الطلاق تبقى كذا متجوزة اتنين, والعدة بتاعت المطلقة بتخليها تتأكد اذا كانت حامل مثلاً من عدمه, يعني اللي ماشوفه ومش وهما بيسرقوا هيشوفوهم وهما بيتقاسموا !!..

زينب بنظرة تفكير عميق وجهتها اليه:

- وانت يا ولديّ, هتعمل إكده؟, هتطلبها في وجود شهود؟..

سيف بقلة حيلة:

- انا مش عارف اعمل ايه, فيه قودامي حاجه من اتنين يا إما أنكر كل حاجه خالص, وما أسألش فيها, يا إما أطلقها وبكدا الناس هتتأكد انها كانت على حق وأخسر كل حاجه, بيتي وشغلي وحياتي المستقرة كلها؟!..

زينب بحكمة:

- لاه يا ولديّ... ما بتتحسبشي إكده!, انت لو طلبتها هتكسب رضا ربك عليك, ولو ما طلبتهاش هتخسر.... ربك!, أنهى أبدى ربك ولا الناس؟! , انت غلّطت يا سيف, بس ما هنصلحش الغلط بمصيبة أكبر!, فكّر يا ولديّ زين, وأني متأكده ان مرّتك

هتبتدي تصفالك لما تطلع الفاجرة دي وترميها من حياتك
كلاتها, ولو على مسألة الشهود ماليكش صالح أنا هحلّها!...
ابتسم سيف لأول مرة منذ بدء محادثته مع والدته وتنهد براحه
قائلا:

- تصدقي يا أم سيف أنتي أجدع أم, طبعا دول الصعايدة أجدع
ناس, ومال على يدها مقبلا إياها وهو يتابع:

- ربنا يخليكي ليا أمي, ثم انحسرت ابتسامته بينما تطالعه أمه
بابتسامة متسائلة وهو يقول بحيرة:

- لكن شاهي من يوم ما كانت هنا ماشوفتهاش, ومعرفش هي
راحت فين؟...

ربتت زينب على يده وقالت بغموض:

- لاه, ان كان على إكده ما تشيليش همّ, هنجيبها لحدّيك
ونرميها تحت رجلك كُمان....

نظر سيف الى والدته عاقدا جبينه وعلّق متسائلا:

- ازاي يا أم سيف؟؟..

أجابت بثقة:

- ماليكش فيه, انت كل اللي يهملك انها تاجي إهنة علشان
نخلصوا من الموال العفش ديه, ساعتين زمن وكل حاجه

هتكون إترتبت...، أني هجوم دلوك أشوفهم عملوا ايه، منبهة
عليهم يوضبوا جناح الضيوف علشان أهل مَرَتكَ، بيجولوا
هيوصلوا على بكرة الصبح تجريباً، بس أخو مرتك اتصل
وجال انه هايجي بكرة ع العشا إكده علشان يسلم ع الحاج
وعلى منة جبل سفره، هوّ هياجي من مصر لكن حماك وحمااتك
هياجوا من اسكندرية مع ولد خالة مرتك، تصدج ... ابن حلال
هيطخ المشوار ديه كلاته عشان اهل مرتك ييجوا مرتاحين في
جيتهم، شكله ابن حلال جوي الجدع ديه!...

زفر سيف بحنق فلم يكن ينقصه سوى أمه هي الأخرى تتلو
على مسامعه قصائد شعر في مديح ذاك الـ.. نادر!، ألا يكفي
تلك الغضبى التي تحبس نفسها في الأعلى رافضة النزول حتى
لا تراه !!

ابتسمت زينب فهي أعلم الناس بابنها وبما يدور في ذهنه وقالت
بابتسامة صغيرة:

- خير يا ولدي، سرحت في ايه؟...

انتبه سيف على سؤالها فحاول تغيير الموضوع قائلاً:

- أبدا يا أمي، انما صحيح هنعمل ايه مع سلمى، منعم كلمني كذا
مرة واتأسف لي، بس ابويا الحاج رافض أي كلام في
الموضوع دا؟!...!

زينب بثقة:

- خليه يتربى شوي، علشان يعرف ان الله حج، بتي مش شوية
عشان يبهدلها إكده، خليه يعرف جيمتها صوح عشان بعد إكده
يُجى يفكر ألف مرة جبل ما يزعلها أو ... يزعلنا، اللي عمله
ديه مالوش غير معنى واحد، انه راجل ناجص!، ما خواتك
التانيين ماحدش منيهم زوجه عمل إكده ليه؟، علشان عارفين انه
حتى لو انت غلطت همّا مالهومش صالح في اللي حوصل
منّيك، وعارفين كُمان ان الشيخ عبد الهادي مش هيسكت على
اللي حوصل، وانه أول واحد هيعرف شغله معاك، خلّه يتربى
شوي، ما ليكش انت صالح بيه واصل ، ثم نهضت واقفة
وهي تكمل:

- عموما أني هسيبك دلوك، هروح أطل عليهم علشان الضيوف
اللي جايين دول، وانت حاول تنام لك شوية، وشك بيجول انك
مش بتننام يمكن من يوم ما حوصل اللي حوصل، نام يا ولدي
وسيبها على ربك...

أوما سيف قائلا:

- ونعم بالله، اتفضلي إنتي يا أمي وأنا شوية وهحصلك..

ابتعدت والدته تاركة سيف ليغوص عميقا في افكاره والتي
تنحسر في شعر كستنائي لاهب وعينين لوزتين تلمعان بغضب
عاصف تسلبان لبّه كلما وقعت عيناه عليها فأضحىأسيرها
منذ اللحظة الأولى لرؤيتها !!....

- حمد الله على السلامة يا استاذ عمر, الحاجة هتفرح جوي لما تشوفك هي وسيف بيه..

دخل عمر وسط تهليل مهجة بقدومه, فعمر ابن بنت خال سيدتها زينب, ويعدّ كأخ لسيف, قال عمر وهو يتلفت حوله:
- الله يسلمك يا مهجة, أومال فين الناس؟..

قالت مهجة وهي تحمل حقيبة ثيابه:

- الحاجه في دارها وسيف بيه في الجنينة, أوماً عمر برأسه وقال:

- طيب أنا هروح لسيف بيه....

- اهلا ازيك يا عمر ايه المفاجأة دي؟..

سلم عمر على سيف وجلس حيث أشار سيف قائلاً بمرح:

- أعمل ايه جالي استدعاء رسمي من الحاجة زينب, وانت عارف كله الا أوامر الحاجه مقدرش أطنشها !!..

قطب سيف بحيرة وقال:

- هي الحاجه كلمتك؟, أوماً عمر بالايجاب فواصل سيف بتساؤل:

- غريبة! ما قالتليش يعني؟, وكلمتك ليه؟....

قال عمر وهو يحرك كتفيه علامة الجهل:

- علمي علمك, كل اللي قالته تكوني عندي مسافة السكة!, واهو اقل من 3 ساعات وانا هنا, جاي سايق على 120 !!..

سمعا صوت زينب وهو يقول مرحبا:

- أهلا بولد الغالية, توك ما جيت!, يعني لازم كنت أكلمك علشان تاجي تشوفنا؟!..

نهض عمر للسلام عليها وأجاب:

- معلهش يا حاجه, انتو في بالي والله بس ظروف الشغل....

قالت زينب بابتسامة:

- وكيفها نيّرة؟, اتوحشتها جوي!!..

أجاب عمر بابتسامة:

- الحمدلله بخير, وحضرتك كمان وحشتيها وان شاء الله هيجوا قريب علشان كمان يطمنوا على عمي الحاج....

قالت زينب وهي تشير الى سيف:

- يشرفوا, ودلوك ناجي للمهم, سيف يا ولدي هات ولد خالتك والحجني !!..

تبادل عمر وسيف نظرات التساؤل ولم يجدا بدا من اللحاق بزينب..

- انتو عايزين مني ايه؟...، صرخت شاهي في وجه رماح
الذي قال بغلظة:

- واحنا هنعوز منيكي ايه؟، الكبيرة جالت جيبها يبجي جيبها،
ياللا بلاش لكاعه الكبيرة مستنياكي برّه، علشان تعرفي اننا إهنة
بنراعي الاصول، مارضيتش تدخل عليكي دارك !!..

شاهي بسخرية وهي تنظر الى ملابسها المزرية التي تتكون من
عباءة ريفية سوداء، يتداخل بها بضع ألوان ولكن قد كلح لونها
دليل على قَدَمِها، قالت بصوت كالفحيح من بين أسنانها وهي
تتقدمه:

- دا على أساس انكو منزلني في اودة في فندق 5 نجوم، أي حد
يشوف الاودة دي أنا متأكده انه هيقرف يقعد فيها 5 دقائق،
كفاية ريحة العفونة اللي فيها ولا الفيران اللي عماله تصوّت
طول الليل ولما صعبت عليكم خرجتوا الفيران بعد ما كنت
هموت فيها، انما اقول ايه على الصراصير والقرف اللي
موجود هنا، ياللا ياللا خلينا نشوف الكبيرة بتاعتك دي عاوزة
إيه، أما أشوف هخلص من فيلم شيء من الخوف دا إمتى؟..

خرجت شاهي الى ردهة الكوخ المحتجزة به, ما إن وقع نظر سيف وعمر عليها حتى نظرا الى بعضهما البعض بحيرة وريبة وتحديث سيف بدهشة:

- ايه دا؟, انتي هنا؟, ثم نظر الى والدته متابعا:

- فيه ايه يا أمي؟, ايه اللي جابها دي هنا؟..

تحدثت زينب بصرامة :

- ماليكش صالح بجات إزاي!... انت دلوك ترمي عليها اليمين, واللي بعمله ديه مش علشانها, لاه... دي واحد عاصية ربها, لكن لأن مرتك بنت الاصول ما تستاهيلش تبجى ضرتها واحد زيبها!....

تحدث عمر بعدم فهم:

- هو فيه ايه بالظبط يا حاجه؟, من ساعة حضرتك ما كلمتيني وانا مش فاهم ايه الموضوع بالظبط؟..

زينب بجدية:

- أني كلمتك علشان تاجي , عاوزاك تُبجى شاهد على طلاق ولدي من بنت الفرطوس دي... ثم وجهت كلامها الى سيف بأمر:

- ياللا يا ولدي خلّصنا, وما تخافش رماح وعوضين وصابر رجالتنا وخشمهم مش هيجول حاجه لحد واصل !!....

نظر سيف الى شاهي وبكل ما يعتمل في صدره من حقد
وكراهية صرخ:

- انتي طالالاللق, ومش بس كدا لأ... زي ما شيرتي بوست
جوازنا ع الجروب, بوست الطلاق بردو هيتشّير على نفس
الجروب, علشان أبقى كدا بريت ذمتي منك, وربنا يغفر لي..
زينب وهي تنظر الى شاهي بينما موجهة كلامها الى سيف:
- خلاص يا سيف , امشي انت وعمر يا ولدي دلوك, وأناي
هحصلك..

ما ان انصرف سيف وعمر حتى نظرت شاهي الى زينب
وقالت بسخرية:

- فيه حاجه تانية عاوزاها مني؟, ممكن أمشي بقه؟, وشكرا
على كرم الضيافة!!..

صدحت ضحكة زينب الساخرة عاليا وقالت :

- لاه, جوام زهجتني منينا!, عموما ما تخافيش يا غندورة,
هتمشي , بس لول فيه حاجه هتعملها بعدين تمشي من غير
مطروود, نظرت الى رماح وقالت:

- رماح... فهم رماح وسريعا أخرج أوراق كثيرة وقلم وتقدم
الى شاهي التي تقف تتفرس فيه بريية, قالت زينب بهدوء فيما
رماح يناولها القلم والأوراق:

- أمضي على الورجات ديّ الّولّ..

تناولت شاهي الاوراق والقلم من يد رمّاح وهي تتساءل في دهشة وحيرة:

- ورق ايه دا؟....., لتشهب مدهولة فاعرة فاها وهي تفتح عينيها على وسعها هاتفة بسخط:

- ايه دا؟, عاوزاني أمضي على نفسي وصولات أمانة وشيكات؟, انتي أكيد مش في وعيّك!!....

صرخت بجزع عندما جذبها رمّاح من غرّتها وقال زاجرا بغضب:

- لما تتحدثي مع الكبيرة تتحدثي بأدب....

انهمرت دموع الذل من عينيها وصرخت بألم وهي تحاول الافلات من قبضته الشديدة لخصلاتها, قالت زينب بأسف زائف:

- لاه, لاه, يا رمّاح مش إكده, هي برضيكي معذورة, جاهلة متعرفش اللي ممكن يحصل من ورا كلامها ديه!!....

صرخت شاهي بعنف ومقت:

- أي, سيب شعري يا جاهل يا متخلف, انتو فاكرين نفسكم مين, هي سايبة؟, أنا هوديكو في ستين داهية!!...

هزت زينب رأسها بحزن مصطنع وقالت وهى تطالعها بشفقة مزيفة:

- وأني اللي كنت هسيبك بعد ما تمضي الاوراج دي! شكل الجاعده إهنة عجبك وعازرة تكلمي باجية حياتك في الكوخ الجميل ديه !!....

هتفت شاهي بجزع:

- لا يا حاجه, الا هنا.., المكان هنا مخيف اووي...

زفرت زينب بيأس زائف:

- ما انتي مش عازرة تهاودي وتعملي اللي بجولك عليه!,
أجولك.... اختاري يا اما توجعي الاوراج دي وتطلعي على بلدكم ويا دار ما دخلك شر, يا ترفضني وتفضلي مأنسانا لغاية ما يأذن ربنا, يا إما....., وسكتت لتهتف شاهي بيأس:

- يا إما ايه يا حاجه؟؟...

سارت الحاجه الى رماح القابض على خصلات شاهي بقوة وربتت على كتفه قائلة بزهو:

- تتزوجي راجل من عندينا وتعيشي كيفك كيف المداس اللي في رجليه.... صدجيني مش هتلاجي جدع زي رماح, ديه ولدي أنا اللي مربياه!...., ها... جولتي ايه يا غندورة !!...!

ارتسمت ابتسامة عريضة على وجه رماح فظهرت أسنانه
الصفراء بشكلها الغير مستوي, ذعرت شاهي وصرخت:

- لا ... همضي همضي....

و....وقّعت بإسمها وهي في قمة الذلّ, كانت الاوراق عبارة عن
5 شيكات و 5 وصولات أمانة كل منها بقيمة 100 ألف من
الجنیهات, فيصبح المجموع مليوناً من الجنیهات, كي تضمن
زينب ابتعاد تلك المأفونة عن طريق ابنها تماماً, قالت لها قبل
ان تنصرف:

- لو جليتي عجلك الوصولات هطلعهم, وهجدمهم للنيابة بس
مش مرة واحده... لاه....وصل وصل, وشيك شيك, علشان كل
ما تخلصي مدة تدخلني تاني بمدة تانية, مش بدمتك زواجك
برمّاح أرحم!....., ثم نظرت الى رماح أمرة:

- لما الغندورة تجهز نفسها انت عارف هتعمل ايه?, أوما رماح
برأسه هاتفا:

- أوامرك يا كبيرة....

أومات زينب باستحسان ورحلت وبحوزتها الأوراق التي تقبض
بها على عنق شاهي, وهي تحمد الله في نفسها أنها استطاعت
بفضله الخلاص من هذه الملعونة, يبقى ولدها وكيفية عودته
الى زوجته !!!... ابتسمت وهي تتمتم بخبث:

- هيرجعوا لبعض ان شاء الله, مافيش حاجة تعصى عليّ, دا
أني زينب والأجر على الله !!.....

التزمت منة غرفتها معتزلة بها, كان عبدالهادي دائم السؤال
عنها, وعلم أن عائلتها سيحضرون لزيارته, فصمم على أن
تشاركهم طعام العشاء وإلا فهو سيصعد بنفسه إليها ليرى ما
بها....., ولم تستطع منة ايزاء موقف الحاج المتشدد سوى أن
تنزل عند رغبته وتشاركهم طعام العشاء خاصة وأن عمر يحل
ضيف على المنزل, ولم تكن قد علمت بعد بتطورات الموقف
بين سيف و.....الغدورة !!....

- نورت المكان, شوفت الدنيا نورت كيف لما جيتي يا بتيّ؟!.

ابتسمت منة للحاج عبد الهادي الذي يجلس مترأس لمائدة
العشاء بينما تجلس الى اليمين منه زينب والى اليسار سيف
وبجواره منة, بينما يجلس عمر الى يمين زينب, ولم تشأ سلمى
تناول الطعام معهم مفضلة تناوله بمفردها, ولم تستطع منة
الاعتذار عن مشاركتهم الطعام بحجة سلمى التي تفضل تناول
الطعام معها, فقد قرر الحاج وانتهى الأمر !!....., وكانت
مفاجئتها كبيرة عندما وجدت أنها ستجاور سيف على المائدة,

ولكن ما باليد حيلة, فيجب أن يلعبا دور الزوجين السعيدين أمام
الحاج خوفا على صحته العلية....

ابتسمت منة قائلة:

- ربنا يخليك يا عمي, تسلملي يارب...

أجاب عبدالهادي بابتسامة وهو ينظر الى سيف:

- عارفة انا لول ظنيتك زعلانه من ولدي, لكن دلوك توكدت
أنك تعبانة صوح, وشك كيف اللمونة إكده, خلي بالك من
صحتك يا بتي, أنت غالية عندينا جوي, ولو حد زعلك مهما
كان بوكي عبد الهادي كفيل إنه يجيب لك ححك....

قالت منة بابتسامة ممتنة:

- ربنا ما يحرمني منك أبدا يا عمي...

قالت زينب بابتسامة وهي تنقل نظراتها بين سيف الذي يتناول
طعامه في صمت وبرود ومنة التي تتلاعب بطعامها بشوكتها:

- منة غالية عندينا كلاتنا, صوح يا سيف!...

انتبه سيف الى سؤال والدته فأشار بالايجاب متمتما بنعم,
استمروا في تناول الطعام حتى سأل عبدالهادي منة:

- صحيح يا منة, أهلك ميتا هياجوا بالسلامة ان شاء الله؟

منة بهدوء:

- هيطلعوا بكرة الصبح ان شاء الله, انما أحمد هيجي بكرة
على آخر النهار كدا بإذن الله, احمد جاي من القاهرة وحضرتك
عارف القاهرة قريبة, لكن ماما وبابا جايين من اسكندرية وهي
اللي بعيدة فبابا فضل انهم ييجوا الصبح....

عبدالهادي باهتمام:

- همّا هياجوا من اسكندرية بالخطر؟...

وقف سيف عن تناول الطعام بينما ألقت منة نظرة خاطفة اليه
وهي تجيب:

- لا, جايين مع نادر ابن خالتي!...

زينب باندفاع:

- كتر ألف خيره, باين عليه جدع ابن حلال, اكيد مارضي شي
والدتك وبوكي يتبهدلوا في الخطر صوح؟؟
ابتسمت منة مطأطئة برأسها وهي تجيب:

- صح يا ماما الحاجة, نادر رفض انهم ييجوا بالقطر وصمم
يجيبهم بنفسه...

هز عبدالهادي رأسه باستحسان قائلا:

- والله شكله ولد خالتك ديه رجال صوح...., يطخ المشوار ديه
كلاته علشان خالته وزوجها ييجى بيهم في الاصول, واللي

بيفهم في الاصول أنا أشيله على راسي من فوج..
منة بابتسامة:

- تسلم يا حاج, حضرتك الواحد يشيلك فوق الراس وجوه العين
كمان...

صوت قرقة قطعت كلامها لتنتبه الى سيف الذي ترك ملعته
بحدة لتحدث صوتا عاليا في الطبق الصيني, نظر اليهم حيث
يتطلعون اليه بدهشة واجاب وهو يزيح كرسيه جانبا ليقوم:

- أنا شبعنا الحمدلله, عن إذكم ...

لم يستطع سيف تمالك نفسه, إن لم ينسحب في هذه اللحظة لا
يدري ما سيفعل بهذه العنيدة التي تقبع بجواره تأبى مجرد
النظر اليه, وكأن من يجاورها الى المائدة هواء أو خيال!!,
فأكثر ما اغاظه ابتسامتها وكلامها الرقيق الذي توجهه الى
والده وتحدث به عن ذاك الـ نادر, بينما تحرمه هو زوجها من
مجرد نظرة واحده الى عينيها الفاتنتين, ولكنه قد وعدا أنه لن
يحاول الاعتذار ثانية وأنه لن يتقدم خطوة أخرى اليها بعد ذلك,
كفاه ما قام به من اعتذار بل وتوسّل, وهي متشبثة بموقفها
الغبي ذلك!!...

شعر عبدالهادي بالتوتر الذي أصاب الجميع بعد قيام سيف بهذه
الطريقة ليتبعه عمر بعد أن شكرهم على الطعام, حاولت زينب
اضفاء المرح على الامسية, ولكن عبدالهادي قاطعها بنظرة

صارة وأمرها بابلاغ سيف أنه في انتظاره لأمر ضروري
بغرفته, وطلب من منة اصطحابه الى هناك....

=====

طرق على الباب قاطع حديث سيف وعمر, سمح سيف للطارق
بالدخول ليجد أنها مهجة تبلغه بطلب والده رؤيته على جناح
السرعة في جناحه الخاص, فصرفها قائلاً أنه سيلحق بها,
ونظر الى عمر الذي حرك كتفيه علامة الجهل....

وافى سيف والده الى غرفته, بعد أن طرق الباب طرقات
هادئة, أتاه صوت والده الرخيم يدعوهُ للدخول, دخل فشاهد
والده يجلس الى مقعد مريح في الزاوية وبجانبه تجلس منة على
أريكة ضخمة في جلسة بزاوية الغرفة, قال سيف:

- طلبتني يا حاج؟...

قال عبدالهادي بأمر:

- إجفل الباب وراك وتعالى أجعد أهنة....

فعل سيف مثلما طلب عبدالهادي وجلس حيث أشار له
عبدالهادي بالجلوس بجوار زوجته, ولكن على الطرف البعيد
من الأريكة, نظر اليه عبدالهادي بصرامة وقال فيما هو يدير
رأس عصاه الأبنوسية والمطعمة بالأحجار الكريمة:

- مالك يا سيف؟, فيه إيه يا ولدي؟...

رمى سيف منة بنظرة سريعة قبل ان يجيب وهو يهرب بعينه
من نظرات والده الثاقبة:

- ولا حاجه يا حاج, خير مافيش حاجه...

عبدالهادي بجدية:

- لاه... فيه!, وشي واعر جوي كُمان!, انت ما كنتش داريان
بروحك كنت عامل كيف?!, دلوك هتجولي يا سيف انت ليه
بتعامل مَرَتَكْ إكده?..

ألقى سيف بنظرة لائمة الى منة التي شحب وجهها وأجاب
ببرود:

- هي إشتاكتلك مني يا حاج?..

سارعت منة بالنفي:

- ابدأ...., ثم وجهت حديثها الى عبدالهادي قائلة في رجاء فهي
لا تريد الدخول في نقاشات أمام الحاج وقد يفقد أحدهما أعصابه
فيحدث ما لا يحمد عقباه وينكشف المستور أمامه وقلبه قد لا
يحتمل الصمود هذه المرة:

- أنا إشتكيت لك يا عمي الحاج?, يا عمي كل الحكاية انه سيف
بئالو مدة طويلة بعيد عن المكتب علشان كذا أكيد كان سرحان
في الشغل, ثم أشرق وجهها وكأنها وجدت الدليل لكلامها:

- وبعدين حضرتك شوفت بنفسك, عمر جِه انهرده علشان فيه شغل واقف على إمضة سيف, وطبعا منها يزور حضرتك!!!...

وجه عبدالهادي سؤاله الى سيف بصرامة:

- الكلام ديه صوح يا سيف؟...

زفر سيف بعمق بينما نظرت منة اليه حابسة أنفاسها منتظرة اجابته التي لم تتأخر وسمعته وهو يقول:

- تمام يا حاج, انا بالي مشغول بصفقة كبيرة داخلينها علشان كدا تلاقيني ساكت معظم الوقت, وعمر جِه انهرده علشان نراجع بعض بنود في العقد....., فأخرجت منة أنفاسها المحبوسة في صدرها مغمضة عينيها براحه, قبل أن تنتبه الى حديث عمّها فالتفتت مصغية اليه.....

عبدالهادي بحكمة:

- برضك يا ولدي لازم تفصل بين شغلك ومَرَتَك, ذنبها إيه مرتك تنشغل عنها بالطريجة دي؟...

نظرت منة الى سيف باضطراب ملاحظة أنه يحاول التحكم في غضبه بصعوبة وقد خانتة عضلة فكّه المقابلة لها والتي كانت تهتز بشدة دليل على انفعاله الواضح!, قالت منة بابتسامة متوترة بعض الشيء:

- يا عمي مافيش حاجة حصلت أنا...., قاطعها عبدالهادي
بهدوء:

- إسكتي أنتي يا بتي , أنتِ من أصل طيب وعمرِك ما هتشتكي
ولدي, بس هو كمان لازم يعرف انه لو كان حبيبك عسل ما
تلهطوش كلاته!!...!

ابتسم سيف ابتسامة صغيرة وقال بهدوء:

- حاضريا حاج, اللي تؤمر بيه...

الحاج بأسى:

- معلش يا ولدي, أني عارف اني السبب, من ساعة اللي
حوصلني وانت مِهْمَل حالك ومالك وجاعد انت ومرتك وبناتك
جاري إهنه, انما أنا بجيت عال العال والحمدلله, ما طعتلشي
مصالحك أكثر من إكده, لو عاوز تسافر مع نسايبك وهما
مروحين سافر يا ولدي, ما تعطلشي نفسك...,

نفى سيف بشدة واستنكار:

- لا لا لا لا , ازاي تقول كده يا حاج؟! , الشغل ماشي
والحمدلله, واي حاجة بتقف عمر بيتصرف, المهم إنت, أنا مش
ماشي من هنا دلوقتي خالص (ونظر الى منة نظرة مصممة)
الّا إذا كنت انت بقة اتضايقت مننا?...!

نهره عبدالهادي وهو يرفع العصا ناحيته وكأنه سيهم بضربه بها:

- باه! أنت بتجول إيه؟, اتجنيت يا سيف!... أنا الود ودي انك ما تفارجنيش واصل, أنا اتعلجت بيكم جوي, والبيت هيبجي طعمه عفش جوي من غيركم !!....

سيف بانشرأح:

- والله فكرة!, ثم نظر الى منة نظرة تحد وتابع:

- ايه رأيك أنقل شغلي ونيجي نعيش هنا؟!....

شحب وجه منة ولكنها في ذات الوقت لا تستطيع الاعتراض أمام الحاج, وكرهت سيف في هذه اللحظة فهو قد وضعها بين اختيارين أحلاهما مُر! , رسمت ابتسامة مزيفة على وجهها وقالت:

- وإيه المانع, بس فيه مشكلة صغيرة, البنات المفروض هيدخلوا المدرسة السنة اللي جاية ان شاء الله, وعلى ما أعرف ان المدارس اللغات هنا عددها محدود جدا, واحنا فعلا قدمنا لهم في مدرسة واتحدد معاد الانترفيو, انت نسيت يا سيف?...

قال عبدالهادي مستبقا سيف:

- طبعا مصلحة البنات أهم, خلاص انتو كل أجازة تجضوها معانا إهنه, ونهاية الاسبوع كُمان!!....

بعد أن فرح سيف لاقتراح والده بمكوئهم لديّه, شعر بالأسى والغضب لإستطاعة منة التنصّل من الموافقة, لقد شعر وكأن أبوه يمد له طوق النجاة باقتراحه ذلك, نعم فمكوئهم هنا سيجعل منة تتخلى عن عنادها شيئاً فشيئاً, أما عودتهم الى القاهرة سيجعلها تشعر بالقوة نظراً لوجودها بجانب أهلها, وستبدأ ذات الاسطوانة المشروخة مجدداً, ولكنه لن يتزحزح من هنا قيد أنملة قبل أن يُدخل الى رأسها العنيد هذا أنه ليس من المسموح به أصلاً العودة الى ذات الأمر مجدداً, وأكثر ما يغيظه أنه قد علمت من والدتهى أنه قد أنهى أمر هذه العاهرة تماماً, وفعل الشيء الصحيح, وقد بدا صادقاً في توبته, ومن كلام والدته أنها وان كانت لاح عليها الضيق لذكر هذا الموضوع مجدداً إلا أنها لم تستطع اخفاء ارتياحها لما فعله, بل إنه قد نشر خبر طلاقهما في ذات المجموعه التي قد نشرت فيها تلك البائسة خبر زواجهما سابقاً, ولكن منة لم تفتاحه بهذا الشأن, وقد نصحته والدته أن لا يناقشها في هذا الأمر مجدداً, ويحاول نسيانه تماماً, كأن لم يكن !!, ولكن موقف منة منه لا يستطيع تقبله, ولن يكون هو سيف إن لم يقضي على مقاومتها نهائياً والأيام بينهم!....

تنبه من شروده على نداء والده المتكرر له, نظر له بإعتذار قائلاً:

- أوامر يا حاج معلّش سرحت شوية!!....

ضحك عبدالهادي وعلّق:

- تسرح في الجومر وهو جاعد جارك؟, المهم.. جوم ياللا

نظر سيف بارتياح الى منة التي حركت كتفيها علامة الجهل,
ثم أعاد نظره الى والده مستفهما بابتسامة صغيرة:

- أقوم؟, أقوم أعمل ايه يا حاج؟, أمشي يعني؟

ضرب والده كفّا بكف وقال:

- شوف أجوله إيه يفهمها إيه!! , جوم صالح مَرَّتْكَ... ياللا حُبّ
على راسها!..

امتنع وجه منة خجلاً واضطراباً وسارعت بالقول:

- ما... مالوش لزوم يا حاج انا مش زعلانه!

الحاج بإصرار:

- هي كلمة واحده لازم يصالحك يعني لازم يصالحك, ولا
إنتي عاوزة تكسّري كلمتي؟...

ارتبكت منة وتلعثمت ونظرت الى سيف باستجداء والذي بادلها
نظراتها بأخرى مأكرة مما جعلها تسبّه في نفسها وقالت:

- لا أبدا يا حاج, ما عاش اللي يكسّرلك كلمة..

أشار لسيف بعصاه آمراً:

- تعالى جرّبك من مرتك شويّ, مالك جاعد بعيد عنيهـا ليه
إكده, ياللا حبّ على راسها!...

طوق سيف كتف منة بذراعه ونظر اليها هامسا بينما نظرت
اليه بتحذير:

- معلّش عبد المأمور!....

ومال مقبلا جبينها, و.....أطال القبلة, حاولت الفكاك منه ولكن
سيف كان كالمغيّب, همست بإسمه مرات عديدة, ولكنه كان
تائها في رائحتها الأنثوية العذبة, وانتقل بشفاهه الساخنة من
جبينها نزولا الى صدغها ثم الى الجهة الأخرى من وجهها,
ناثرا قبل صغيرة ملتهبة!, وعندما اقترب من شفاهاه لفحتها
رائحته الرجولية مختلطة برائحة أنفاسه العَبِقة, وقبل أن تتوه
هي الأخرى في دوامة حبه الذي يجرفها, وكزته في خاصرته
بقوة جعلته يتأوه بألم, وابتعد عنها ناظرا اليها بحنق ليفاجأ
بوجهها وقد غدا بحمرة ثمرة الطماطم الناضجة, كما أن
وشاحها قد إنزاح الى الخلف قليلا لتفلت بضعة خصلات من
شعرها, انتبه لوجوده بجوارها و.....أمام والده!! , طغى
الاحمرار على وجهه هو الآخر خجلا من والده, وتنحنح
مبتعدا عنها قليلا بينما تعالت ضحكات والده وقال:

- جرى ايه يا ولد؟, خفّ ع البنيّة!! , سكت قليلا ليتابع بحنو:

- ربنا يسعدكم يا ولدي...

استأذنت منة في الانصراف واتجهت سريعا بخطوات متعثرة
لتغادر غرفة عبدالهادي صاعدة الى غرفتها حيث ارتمت فوق
الفرش بينما تضع يدها اليسرى فوق قلبها لعلها تُبْطِئ دقاته
التي غدت كالمطرقة حتى إنها تظن أن صوتها مسموع لمن
أصاخ السمع قليلا, وقد شعرت أن قلبها سيخرج من بين جنبات
صدرها ليرتمي على ذاك الذي يجعله يدق بخفقات متتالية
سريعة بلاااااا... رحمة!!....

وصل والدي منة برفقة نادر ظهيرة اليوم التالي, رحبت بهم
زينب وعبدالهادي الذي أمر مهجة بسرعة إخبار سيف ومنة
بحضور والديها..

كانت منة تتجهز للنزول الى أسفل عندما طرق سيف الباب
ودخل, وقف متطلعا اليها بغموض قليلا...., لم تكن قد شاهدته
منذ جلوسها معه في غرفة عبدالهادي, فقد هربت الى غرفة
بناتها مرة, ثم جلست برفقة سلمى أخرى, الى أن حل الظلام
أخيرا فذهبت الى الغرفة حيث اصطنعت النوم ونامت, بينما
مكث سيف طوال ليله وهو يتقلب على جمر من نار الشوق الى
معذبتة يحاول ردع نفسه عن الذهاب اليها بينما هي ترقد على
بُعد خطوات منه!!...

تقدمت منة اليه مقطبة ووقفت أمامه متسائلة:

- فيه حاجه يا سيف؟...

تحدث سيف بهدوء ولكنها استشعرت نبرة الخطر في صوته:

- باباكي ومامتك جوم تحت, أشرققت أساريها وما إن همت
بالمروور أمامه للهبوط الى أسفل للترحيب بهم حتى أمسك
ساعدها بيده ومال عليها ناظرا اليها بقوة هاتفا من بين أسنانه:

- نادر تحت معهم!, إبعدي عنه خالص!, منة ... إنتي عارفاني
... مش عاوز قلق, لمصلحته هو, خليكي بعيد عنه, لو لاقيته
بيحوم حوالكي بأي شكل من الأشكال ما تلومنيش ساعتها!,
انتي هتنزلي معايا دلوقتي وهترحي بيه زي أي ضيف
غريب..., ونظر اليها بحدة مشددا:

- سامعاني يا منة ... غرييب !!..., جذبت منة ساعدها من
قبضته ونظرت اليه رافعة رأسها بعنفوان وقالت:

- نادر يبقى أكثر من أخ بالنسبة لي, وهو انسان محترم جدا,
عمره ما هيعمل حاجه من اللي بتقول عليها دي, وأظن عيب
أوي يبقى ابن خالتي مكلف نفسه مشوار زي دا علشان بابا
وماما وأنا في الآخر أقابله بالوشّ الخشب اللي عاوزني
أديهوله, مهما كان هو هنا يعتبر ضيف عندي, دا بإعتبار أنه دا
بيت جوزي يعني بيتي أنا كمان, عموما عن اذنك انا هنزل
أسلم على بابا وماما ماينفعش أتأخر عليهم أكثر من كدا!!!..

وخرجت تاركة إيّاه وهو ينظر في إثرها بغیظ وقد كوّر قبضته
ضاربا بها الحائط بجواره وهو يهتف بغضب:

- ماشي يا منة, أما أشوف ... أنا ولا .. نادر بيه !!...

اندفعت منة الى أحضان والدها ما إن رآته, ربتّ والدها
ضاحكا على وشاحها المغطي رأسها, شدتها أمها اليها وهي
تقول بابتسامة دامعه:

- يعني أبوكي بس اللي وحشك يا منون, أمك ما وحشتكيش!!

منة وهي تتلقى أحضان والدتها بحب مجيبة بمرح:

- إزاي دا؟, وحشتيني جدا جدا يا توفي.....

بعد ان رحّبت بوالديها نظرت الى نادر الواقف بعيد نسبيا
وهزّت رأسها بالتحية له قائلة بابتسامة مرحّبة:

- حمدلله على السلامة يا نادر, معلّش تعبناك معانا....

أجاب نادر بهدوء بينما عيناه طفقتا تنهلان من تقاسيم وجهها
بنهم شديد فقد إفتقدها بشدة في الأيام السابقة:

- تعبكم راحة يا بنت خالتي, وبعدين السكة مش طويلة أوي
يعني, 5 ساعات تقريبا....

قالت زينب بحبور:

- بس؟!.....

تمتم نادر بينه وبين نفسه:

- فداكي يا منة ...

أنتبه من شروده على عينيّن تطالعانه بغضب وحشي, قبل أن يتجه صاحبها للترحيب بوالديّ زوجته, ثم اقترب منه بخطوات واثقة ووقف أمامه ناظرا اليه بنصف عين قبل أن يمد يده قائلا ببرود:

- أهلا يا نادر.. حمدلله على السلامة... صافحه نادر وتمتم بالشكر....

كان نادر يرغب بالرحيل, فنظرات سيف كانت تجعله يشعر بالارتباك, كان مسلط نظراته عليه, وكان نادر يسترق النظر الى منة بين كل فينة وأخرى, وعندما يلتفت يُفاجأ بسيف وهو يطالعه بغضب شرس, فقرر الرحيل, هو لا يريد أن يكون السبب في أي أذى يلحق بها, فمن الواضح أن سيف قد وصل إلى أقصى درجات الغضب, ويخاف أن يصب جام غضبه على هذه المسكينة التي تتحدث بانطلاق وتتبادل العبارات المازحة مع والديها ووالديّ زوجها غير منتبهة لما يدور حولها من صراع الأعين بينه وبين زوجها !!!...

تنحنح نادر ثم قال موجهها حديثه الى عبدالهادي:

- ألف حمدلله على سلامة حضرتك, معلهش هضطر أقوم
علشان مشواري بعيد, والحمدلله انه صحتك حضرتك بنيت
كويسة.....

اعترض عبدالهادي على انصرافه بشدة, حاول نادر معه مرارا
فزاد عناده, كان سيف يراقب محاولات نادر لل فكاك من إلحاح
والده عليه بالمكوث, كان قد تنفس الصعداء وهو يسمعه يستأذن
بالرحيل ليأتي والده فيزيد من عذابه وهو يرفض رحيله بهذه
السرعة, تحدث عبدالعظيم:

- معلهش يا نادر استنى طيب شوية واحنا نروح آخر النهار
سوا, احمد هيبجي بالليل وشكله هيبات لبكرة, وبدل ما ترجع
لوحذك نرجع سوا...

قاطعهما صوت عبدالهادي مستنكرا:

- كيف دا؟... هي السكة جنب الرّجل؟, عاوزين تاجوا وترجعوا
في نفس اليوم؟, لاه , انتو هتجعدوا حدانا يومين, وفرصة الباش
مهندز أحمد جاي, البلد إهنة جوها جميل...

نادر بابتسامة:

- خلاص يا عمي عبدالعظيم, علشان الحاج عبدالهادي
مايز علش, خليك انت وطنط عواطف وأنا هقوم دلوقتي علشان
يدوب كدا...

وضع عبدالهادي يده على كتف نادر مانعا اياه من النهوض
وكان جالسا بجواره ونهره قائلا:

- رايح فين؟, أنا لمن جولت ما حدش مسافر كان جصدي الكل!

نادر بحيرة وابتسامة صغيرة بينما سيف يراقب الحوار بترقب:

- معلّش يا حاج, طيب هما هيباتوا مع بنتهم, أنا ماينفعش
أبات!, ثم هقعد بصفتي إيه؟...

عبدالهادي بجدية:

- بصفتك ضيف مَرّت ولدي, يعني ضيفي, وبعدين اعمل
حسابك انت ما هتباتش يوم ولّا..... تنين .. لاه !!....

نادر بارتباك:

- معلّش مش فاهم يا حاج؟..

عبد الهادي بثقة مفرطة:

- إنت ضيف, وواجب الضيافة ثلاث إيام, يعني إنت هتجعد
معانا إهنة ثلاث إيام بلياليهم, بعد إكده إنت حرّ, عاوز تدنّيك
معانا تنورنا, عاوز تعاود تاني براحتك, لكن مش جبل التلات
إيام بنص ساعه حتى !!....

لم يهتم نادر برد فعل أحد من الحاضرين سوى سيف, فنظر
اليه ما إن أنهى عبدالهادي إصدار أوامره ليفاجأ بشحوب وجهه

الشديد, بل وكأنه يرى ألسنة من اللهب تتطاير من رماد عينيه
المشتعل فيما سيف يتمم بينه وبين نفسه أن والده قد زاد من
شقائه وليس عذابه برفضه رحيل نادر!!..

- يتبع -

=====

الحلقة السادسة عشر:

وصل أحمد قرابة المغرب, وتم الترحيب به بشدة, وكانت الفرحة تملأ منة لوجود شقيقها, ورحّب به عبدالهادي شاكرًا له قدومه لزيارته, وقابل أحمد ترحيبه بامتنان, وعندما جاء دور سيف في السلام على أحمد, راعا الاثنان ألا يظهر عليهما أية علامات تدل على سوء العلاقة بينهما, .. أمرت زينب مهجة بوضع الحقايب في الجناح الشرقي الخاص بالضيوف, وهو عبارة عن غرفتي نوم بكل واحد حمامها الخاص, وردهة متوسطة ومطبخ صغير يقتصر فقط على وجود طبّاخ كهربائي والأدوات اللازمة لصنع المشروبات الساخنة... وقد تقرر أن يكون هذا الجناح خاص بعائلة منة والديها وشقيقها مع عائلته, أما نادر فتم اعداد استراحة صغيرة موجودة في حديقة المنزل, وتتكون من غرفة نوم متوسطة وصالة استقبال واسعة الى حد ما, وحمام ومطبخ, بينما استأذن عمر في الرحيل مبررا بأنه لا يستطيع الابتعاد عن المكتب كثيرا خاصة في عدم وجود سيف.....

بعد أن استقرّ الضيوف في غرفة الجلوس , توجه عبدالهادي بالحديث الى أحمد سائلا إياه عن أحوال رحلته الى البلدة , وعمّا إذا واجه صعوبة في الوصول, كان أحمد يتحدث بمنتهى التلقائية, وقد تناسى غضبه مع سيف لدى مشاهدته الأريحية التي تتعامل بها منة معه, كما أن والديها كانا يتعاملان معه بتلقائية شديدة كأن لم يكن يحدث شيء!.., دخلت منة وایناس الى غرفة الاخيرة, جلست منة على طرف الفراش بينما ایناس تقوم بوضع ثيابهم التي جلبوها معهم لقضاء ليلتهم في الخزانة, قالت ایناس وهي ترفع الثياب من الحقيبة الموضوعه فوق الفراش :

- ما شاء الله على حماكي وحمائك يا منون, بجد ناس في منتهى الطيبة والاحترام..

منة موافقة على كلامها:

- أكيد, وانا بحبهم جدا, إنتي عارفه لولا خوفي على زعلهم انا كنت مشيت من زمان...
اتجهت ايناس لوضع الثياب في الخزانة واستدارت وهي تستند على رف الثياب قائلة
بتقطيية:

- إلا صحيح يا منة, عمك عبدالهادي لسه ميعرفش باللي حصل؟...

نفت منة بهزة من رأسها وأجابت:

- لا طبعا, دا كان بين الموت والحيا, والحمدلله ربنا نجّاه, عمي ميعرفش حاجه كل اللي
يعرفه انه واحد بيكره سيف طلع الاشاعه دي وانا قلت له اننا كنا في اسكندرية بنقضي
يومين لما جالنا خبر تعب المفاجيء دا, ودا اللي خلاه يصدقني, بس اللي وقفت جنبي
بجد هي حماتي, الست دي فعلا اللي يتقال عليها سِتْ بميت راجل, عملت معايا اللي
متعملوش أم لبنتها !!!...

اتجهت ايناس الى منة بعد أن أنهت وضع الثياب في الخزانة الخاصة بهم , جلست
أمامها وقالت وهي تعقد جبينها متسائلة:

- هي عرفت؟, أوأت منة بالايجاب فتابعت ايناس متسائلة:

- وعملت ايه؟؟.., ضحكت منة واجابت:

- قولي معملتش ايه!!, دي ماسابتش حاجه معملتشاش, قومي قومي ياللا زمانهم
حضرُوا العشا.. مرام مع هنا وفرح وزمان سلمى عشيتهم مع عيالها, أهي سلمى دي
عليها حنيّة مش ممكن, ربنا يصلح لها الحال مع جوزها....

أمّنت ايناس على دعاء منة واتجهت معها ليلحقا بالباقيين في غرفة المائدة وهي تقول
ضاحكة:

- لا.. ياللا بينا , أحسن مش عارفة ليه عندي احساس كدا ان جوزك ممكن يأكلنا نادر
ع العشا!! , أنا شوفت نظراته ليه, كأنه بيتمنى الارض تتشق وتبلعه !!...

ابتسمت منة ابتسامة صفراء وعقّبت:

- هههه, ظريفة أوي!, طب ياللا يا خفيفة نلحقهم..., ضحكت ايناس وتابعا سيرهما الى غرفة المائدة للحاق بالباقيين...

كان الجو العام يسوده الهدوء أثناء تناولهم طعام العشاء, والذي تخلله بعض الاحاديث الخفيفة, كانت منة تجلس بجوار سيف والذي يجاور والدته التي تجلس يسار عبد الهادي , وعبد العظيم صمم عبدالهادي على أن يجلس هو الى يمينه, تجاوره عواطف ثم نادر فأحمد وأيناس..

لم يكن سيف متتبع للأحاديث التي تدور بين الجالسين, فكان منشغل باستراق النظرات الى نادر وهو يضغط على أسنانه بين كل حين وآخر, يتمنى لو أن بإمكانه ترك المكان مصطحبا منة معه وألا ينزلا من غرفتهما الا بعد رحيل هذا الـ..... نادر !!

لفت انتباهه كلمة جعلته تيبس في مكانه, فقد قال أحمد بتلقائية راداً على سؤال عبدالهادي عن مكتب نادر السياحي والذي حدّثه الاخير عنه:

- لازم تتعامل معاه يا عمي, بجد حضرتك لو ناوي تطلع عمرة مثلاً هتلاقي عنده عروض جميلة, أحسن من أي عروض ممكن تلاقيها في أي حنة تانية!! , ثم غمز منة مازحاً متابعا وهو يقول الكلمة التي خرقت سمع سيف وأوشك أن يغصّ بطعامه:

- وبعدين كفاية ان الباش مهندسة منة بنفسها هي اللي عملاله ديكور المكتب, أنا متأكد إن شغلها هيبقى وشّه حلو عليه!!!,,,

ابتسمت منة بخجل بينما التفت سيف اليها ناظرا اليها بحدة لم تنتبه لها وهي تعلق على كلام أحمد:

- هو أنا لسه عملت حاجه, انا ما لحقتش أرسم خط واحد حتى!

عبدالهادي متسائلاً:

- ليه يا بتّي؟, ديه شغلك برضك!..

منة بابتسامة:

- أبدا يا حاج, أصلي شوفت المكتب في نفس اليوم اللي جينا فيه هنا, فما لحقتش اعمل حاجه..

عبدالهادي بهدوء:

- واني خلاص بجيت منيح, يُبجى لازم تخلصي أشغال الناس المتعطلة دي...

أجاب نادر بابتسامة:

- حصل خير يا حاج, وبعدين أنا مش غريب ووقت ما منة تفضى تبقى تشتغل فيه براحتها..

عبدالهادي بلهجة قاطعه لا سبيل لمعارضتها:

- لاه يا ولدي, مش عشان إنت تُبجى ابن خالتها يُبجى تتعطل مصالحك , عموما فرصة إنك موجود إهنة, فمنة تجدر تخلص الشغل اليامين دول!!!...

تبادل الجالسون النظرات, منهم المتفهم لكلامه كعبدالعظيم وعواطف, ومنهم الغير مبال كأحمد, ومنهم المشفق على منة كإيناس, ومنهم المتردد بين الفرح لأنه سيكون بجوار من يهواها قلبه وبين الخوف من نظرات ذاك القابع بجوارها يكاد يفتك به بنظراته!, ومنهم الخائف من نتيجة هذا القرار كمنة ولكنها تحاول التماسك واصطناع الهدوء وبث الثقة في نفسها أنه لا يوجد ما يريب في الأمر فهذا عملها ولا بد من إنجازه!, ومنهم الذي يكاد يرقص جزلا لأن خطته تسير كما سبق ورسمها ك...زينب!, أما...سيف, فحدث ولا أهرج!, فما إن إنتهى والده من القرار الذي أدلى به بمنتهى الهدوء حتى كاد أن يقفز صائحا بغضب عنيف شرس يملأ دواخله, ولكنه تمالك نفسه بصعوبة شديدة, قابضا على يديه بقوة وضاعطا على أسنانه بشدة حتى أن وجهه قد أصبح بلون ثمرة الفراولة ولكن غضبا وكمدا, ومن يراه يكاد يقسم أنه يرى دخانا يخرج من أنفه وأذنيه, وقد إحمّرت عيناه بلون الدم, فغدا كالتنين الهائج الذي ينفث نارا من شدة غضبه الوحشي!!!....

بعد ثوان عاد الحديث ثانية بين الجالسين حول مائدة الطعام باستثناء شخصين, منة التي كانت تتلاعب بالطعام في انتظار انتهاء الباقيين من تناول طعامهم, وسيف الذي يجلس وكأنه يجلس فوق جمر من النار, يدعو الله أن تنتهي محنة تناول الطعام سريعا ليتحسّن الفرصة السانحة للإنفراد بمنة, فهو إن لم يواجهها بما يعتمل في داخله اليوم وينهاها عن القيام بهذا العمل, لا يضمن ما الذي سيفعله ان رآها بجوار هذا اللعين المتبجح!!!..

بعد الانتهاء من طعام العشاء طلبت زينب من الجميع الذهاب الى الحديقة حيث ستوافيهم مهجة بأكوام الشاي, وأكمل الجميع سهرتهم في الحديقة المزدانة بمصابيح صغيرة, بينما يعم الجو هدوءاً جميلاً, وتهب من آن لآخر نسمة هواء عليل, ويرتفع صوت صرصور الليل كالموسيقى التصويرية لتكمل هذا المشهد الريفي البديع, حيث يتناول الجميع الشاهي مع أكواز الذرة المشوي الطازجة والتي يقوم بشيها رماح !!...

استأذن عبدالعظيم للذهاب للنوم تبعته زوجته ثم بعد قليل لحق به أحمد وإيناس, فوجد نادر أنه من الأنسب انسحابه هو الآخر, ليقف سيف فجأة ما ان توارى نادر عن الانظار زافرا براحة وعمق وقال وهو يمد يده ليمسك بيد منة:

- احنا كمان هنستأذن يا حاج, عن اذنك, وقام بتقبيل يد والده ووالدته وهو يقبض على يد منة بقبضة محكمة حيث لم تستطع الافلات منها, فاصطنعت الابتسامة وأومأت برأسها متممة بتحية المساء لعبدالهادي وزينب والتي كانت تلاحقهم بنظراتها الماكرة ..!!

ما إن دخلا سيف ومنة غرفتهما حتى جذبت منة يدها بقوة من سيف والتفتت إليه تهتف بحلق بينهما كان يغلق الباب خلفه:

- أقدر أعرف ايه اللي انت عملته تحت دا؟, شدتني من ايدي زي ما أكون عيل صغير كدا ليه؟!!...

اقترب سيف منها عدة خطوات ووقف امامها واضعا يده في جيبه وقال بنظرات غامضة وبهدوء مريب:

- مزعلك أوي اللي انا عملته؟, والشو اللي اتعمل على العشا دا يبقى ايه؟, ما يزعلش؟! , أعرف بالصدفة حكاية الشغل بتاع سي...نادر دا؟, ...سكت قليلا وتابع ساخرا:

- أنا على كدا طلعت الزوج اللي آخر من يعلم !!...

نظرت اليه منة في برود مغيط وقالت بلامبالاة أشعلت النار في عروقه:

- ما جاتش مناسبة إنك تعرف!, عادي يعني, وبعدين الموضوع حصل زي ما قُلت لعمي, يوم ما روحت شوفت المكتب هو نفس اليوم اللي شوفت حضرتك فيه ونفس

اليوم اللي جالنا فيه ان عمي تعب ونقلوه المستشفى, يعني تسلسل الاحداث نفسه ما سابش أي فرصة لأي موضوع زي دا إنه يتفتح....

اقترب منها سيف ووقف على بُعد إنشات قليلة منها ومال برأسه تجاهها سائلا بريية وعقدة عميقة تحتل جبينه العريض:

- إني روحتي شوفتي المكتب معاه يوم ما انا لاقيتكم قاعدين في الكافيه اللي ع البحر،
صح؟، أومأت بالايجاب، فتابع بغيط من بين أسنانه وهو يقبض فجأة على ذراعها بقسوة
جعلتها تشهق متفاجئة:

- وإزاي يا مدام يا محترمة تسمحى لنفسك تروحي مع واحد غريب عنك لا هو اخوك ولا حد من محارمك مكتب عشان ايه؟ وتابع مقلدا اياها بسخرية:

- تشوفيه علشان تعملي الديكور بتاعه !!...

كادت ابتسامة أن تفلت منها ولكنها جعدت وجهها في تكشيرة عميقة وطالعتته ببرود
ثلجي وقالت وهي تحاول جذب ذراعها من قبضته:

- انا قلت لك 100 مرة يومها ان احمد كان معانا أنا ما بكذبش, وبعدين معلش بقه انا عارفة ديني كويس أوي, ومراعية حدود ربي, مش محتاجه حد انه يقولي ايه الصح وابه الغلط !!

ضيق سيف عينيهِ ومال عليها حتى أن أنفاسه اللاهبة قد لفحت وجهها فشعرت بسخونة شديدة تصفع وجهها:

- برود بتلّفي تَلْفِي وتفتحي نفس الموضوع!، وبردو هقولك انا غلطت ونبت
وندمت حظيتي الكلمتين دول في دماغك الناشفة ديه وفهمتيها واستوعبتيها هترتاحي في
عيشتك معايا يا بنت الناس، لكن فضلت راكمه دماغك وكل شوية تفتحي نفس
الموضوع يبقى عيشتك هتبقي نكد في نكد والنكد دا مش هيبيقى مَنِّي لأ، النكد دا هيبيقى
منك إنتي لأنك مش هتكوني راضيه عن حياتك معايا، وبصي بقه كلمة وتحتها مليون
خط بالاحمر انسي خاااالص أنك تبعدي عني ولو لحظة واحده، ولما نرجع مصر ان
شاء الله هترجعي معايا إنتي والبنات على بيتنا، أظن واضح؟؟!!..

نظرت اليه منة بقوة وقالت بثبات:

- بص يا سيف, إنت أكثر واحد عارف أنه لهجة الأمر دي ما تنفعش معايا, موضوع انى كل شوية ألف وافتح نفس السيرة صدقني مش من جمالها أوي بتكلم فيها, لكن أعملك إيه إذا كنت بتحاول توعظني وتعدل عليا, أما بقه حكاية اننا هنرجع من هنا على البيت عندك, فالكلام دا سابق لأوانه, ودلوقتي بقه لو سمحت ممكن تسبب دراعي, مش لعبة هي كل شوية تقفش فيه!!..

أجاب سيف وقد تصاعدت نيران الغضب بداخله لتنعكس على عينيهِ اللتان رمقتها بنظرات دخانية عاصفة:

- شوفي يا منة, حساب وهسابك, ولو شوفتك عاوزة تتقومي هقومك, أنا جوووزك يا هانم , حطي الكلمة دي حلقة في ودك, واسمه بيتنا مش بيتك, وكلمة أخيرة الشغل بتاع مكتب ابن خالتك دا تسيبيه, هتعتذري له انك مش قادرة تعمليه مفهوم؟..

نظرت اليه بحدة جعلت عينيها تلمعان وأجابت بحدة بينما صبغ لونها لون أحمر شديد , دليل على غضبها الذي يمور بداخلها لم تعلم أنه جعلها شديدة الفتنة واصطبغ صوتها برنة تحد لم يرق لسيف:

- بص بقه علشان أنا زهقت, شغلي اللي اتفقت عليه مع نادر هعمله, ولو كان فيه أي حاجه غلط ما كانش والدك أول واحد اتشجع له وصمم أني أخلصه, بس عارف ليه والدك عمل كدا؟.

سأل سيف ساخرا:

- ليه يا فيلسوفة زمانك؟

أجابت ببرود مستقز وعيناها تلمعان بالتحدي:

- لأنه ارتاح أوي لنادر, حاكم فيه ناس كدا ترتاح لها من أول ما تشوفها, ونادر ابن خالتي من الناس دي!!..

ضغط على ذراعها بقوة شديدة جعلتها تنن ألما وجذبها ناحيته حتى كادت رأسها ترتطم ب صدره وقال بينما نظرت اليه في دهشة وريبة:

- وأنا مش مستعد دمي يتحرق وأنا شايفك عماله تتكلمي معاه, ولو مصممة على الشغل دا يبقى أنا معاكي خطوة بخطوة, فاهمه يا منة؟, ولمصلحتك إنتي بلاش تختبري صبري أكثر من كدا!..

نظرت منة اليه مقطبة وهتفت محاولة افلات ذراعها من قبضته:

- انت اتجننت يا سيف؟, سيب دراعي!, إنت ازاى تسمح لنفسك تمسكني بالاسلوب الهمجي دا؟!...!

أمسك بذراعها الحر الآخر وشدها ناحيته وهو يجيب بصوت أجش بينما يرى وشاحها وقد انحلت ربطته لتتطلق خصلات شعرها تحيط بوجهها وقد انفلتت عقده المحكمة بينما كان يهزها بخفة:

- ايوه اتجننت يا منة!, إنتي أكثر واحده عارفة بُعادك عني بيجنني إزاى!, ماينفesch تستني مني أنك تكوني جنبي وبين ايديا ومعرفش ألمسك؟, أو أخذك في حضني!, أنا عارف أني وعدتك أني عمري ما هقربلك ثاني, لكن احساسى أنك ممكن تروحي من ايدي بيموتني, ويخليني أتجنن, إرجعي بقه, إرجعلي منة اللي حبيتها واتجوزتها, منة اللي قلبي دق لها من اول لحظة سمعت فيها صوتها قبل ما أشوف وشها كمان, منة اللي كنت هتجنن علشان توافق عليا , منة اللي عمري ما حبيت ولا هحب حد غيرها, ارجعلي أرجوكي!!.

لمعت عيناها بدموع محبوسة وقالت بابتسامة أسف:

- للأسف يا سيف, حتى لو رجعت لك زي ما إنت عاوز, منة اللي انت شوفتها وعرفتها وحبيتها واتجوزتها ماتت على إيدك, اللي إنت شايفها قودامك دلوقتي دي منة ثاني خالص, صُنع ايدك إنت, ما تستناش مني أني أرجع منة المسالمة البريئة اللي كانت عمرها ما فكرت إنها تشك في حبيبها وجوزها, ولما كانت بتسمع صحباتها وهما بيتكلموا ويقولوا انه لازم الواحده تفتش ورا جوزها بتضحك وتسخر منهم وتقول لهم الحياة يبقى شكلها ازاى وإنتي مخونه جوزك؟, كانت حاطة في بطنها شادر بطيخ صيفي, مش بطيخه واحده!,ابتسمت ساخرة وتابعت:

- لكن للأسف البطيخ طلع أقرع!, ودفعت تمن غباها بأقصى صورة, تفكر أنه ممكن منة دي ترجع ثاني؟, أنا أسفة يا سيف, اللي بيموت مش ممكن يرجع ثاني!!...!

خفف قبضته عن ذراعها فانتهزت الفرصة لتفلت من قبضته , وعندما همّت بالمرور من أمامه أمسك بساعدها رفعت نظراتها اليه لتشاهد عينيه يطالعانها باستجداء بينما يهمس بتساؤل قلق:

- أنما حبهم لبعض مامتش!، مش كدا يا منة؟، حبك ليا مامتش بدليل إنك لسه قودامي، معايا، حتى لو كان مش بإرادتك والظروف هي اللي خلّيتك تبقي هنا، لكن أنا متأكد أن حبي لسه في قلبك، لأنك عارفة ومتأكدته إني حبي ليكي عمره ما قلّ ولا هيقّل، ومهما عملتي فيا وز علتي مني وقسيتي عليّا عمري ما هقدر أبعد عنك، وكفاية عليّا دلوقتي انك قودام عينيا، بس عاوز أسألك سؤال ويا ريت تجاوبيني بصراحه، وصدقيني مش هفتح سيرة الموضوع دا تاني؟!..

منة بخفوت وهي تشيح بعينيها بعيدا:

- اسأل يا سيف...

سيف بصوت خشن يحمل نبرة توسل لا إرادي:

- تفتكري ان ربنا قبل توبتي؟، ويا ترى توبتي دي توبة نصوحة فعلا؟!..

تنهدت منة بعمق ونظرت اليه بعينين تمتلئان بدموع تسبح في مقلتيها قائلة بلهجة متسامحة محاولة إبعاد القلق التي تراه في عينيه بعيدا:

- ربنا بيقول في كتابه العزيز ما معناه : قل يا عبادي اللذين أسرفوا على أنفسهم لا تقنطوا من رحمة الله إن الله يغفر الذنوب جميعا إنه هو الغفور الرحيم، صدق الله العظيم ، والرسول عليه الصلاة والسلام بيقول : التائب من الذنب كمن لا ذنب له، بس تكون توبة نصوحة وشروطها واضحة ، التوقف عن الذنب والندم على ما فات، والعزم على عدم العودة الى ارتكاب الذنب، وإعادة الحق لأصحابه، وإنّ ندمت وتبت ورجعت عن الطريق اللي كنت ماشي فيه ، مش بس كدا ... لأ، انت أعلنت توبتك ، واخترت انك تبيري ذمتك منها وطلقتها في وجود شهود وأعلنت دا لكل اللي عرف موضوعكم، لأنك حابيت أن ربك يكون راضي عنك، فبإذن الله ربنا يقبل توبتك، ربنا مطّلع على القلوب يا سيف،سكتت قليلا لتتابع مجيبة التساؤل الصامت الذي يملأ عينيه:

- لكن ما تلومنيش أني مش قادرة أنسى وأسامح، أنا مجرد بشر يا سيف مش ملاك ...!!

ابتسم سيف ابتسامة أمل وأجاب وهو يحتوي يديها الصغيرتين بين راحتيه الضخمتين:

- وأنا متأكد إنك هتسامحيني، عارفة ليه؟، أجاب تسأولها بابتسامة حنان:

- علشان زي ما قلتي أنا توبت توبة نصوحة, ونفذت شروطها, وأنا متأكد إن ربنا هيمنّ عليّ بفضلله وهيحفظ لي مراتي وبناتي, لأنني كنت مخلص وصادق في توبتي وربنا شاهد عليّ, وكفاية عليّ أوي دلوقتي انك واثقة في توبتي, وأنا متأكد أنك هترجعي مُنايا اللي حبيتها واتجوزتها بس ليا طلب عندك, يا ريت تسيبي الباب موارب, ما تقفلهاوش, ما تخلينيش أحس باليأس, وعلشان تبقي عارفة عمر يأسِي ما هيخليني أبعد, لكن أنا اشتقت لك اوي, ووحشتني أيامنا الحلوة , ممكن توعديني أنك تديني فرصة وتدي لنفسك فرصة وما تقفليش الباب في وشّي؟!..

نظرت اليه منة وأجابت وهي تسحب يديها من قبضته:

- سيبها بظروفها يا سيف, اديني فرصة أنا كمان أني أتخلص من الغضب اللي جوايا, محدش عارف بكرة فيه إيه?...

ابتسم سيف ومال عليها مقبلا جبينها بعمق وهو يقول:

- وأنا مش هطمع في أكثر من كدا, ياللا علشان تنامي, تصبحي على خير.....

ابتعدت منة عنه وذهبت الى الخزانة متناولة منامتها واتجهت الى الحمام لتغتسل وتبدّل ثيابها, واتجه هو الى الحمام الخارجي للاغتسال وتغيير ثيابه, وعندما عاد ثانياً كانت منة تغط في نوم عميق وابتسامة ترتسم على شفّتيها جعلته يبتسم بدوره هو الآخر واتجه اليها بخفة ليميل فوقها مساويا الغطاء عليها مقبلا وجنتها برقّة هامساً في أذنيها بحب:

- تصبحي على خير يا مُنايا...

واتجه الى الاركة حيث فرش منامته ورقد على جانبه المواجه لمنة وابتسم قبل أن يغلق عينيه مستسلماً لنوم عميق لم ينلّه منذ أن هجرته منة!!..ولكن.....لم يعلم سيف أن هذه الابتسامة التي زيّنت وجهه لن تدُم سوى ساعات الليل فقط لتتقلب الى تجهم وغضب أسود يعتلي وجهه في الصباح الباكر ما إن يفتح عينيه!!.....

استيقظ سيف في الصباح الباكر وهو يشعر براحة عميقة لم يحس بها منذ فترة طويلة, حانت منه التفاتة الى الفراش ليجد أنه خالٍ ومُرتّب!! , قطب بحيرة, ثم قام لينظر الى ساعة يده الموضوعه جانبا فتطالعه عقارب الساعة التي تشير الى العاشرة صباحاً,

تعجب من نفسه, فهو لم يسبق له وأن نام كل هذا الوقت, ولكن لا بد أن مصارحته مع منة الليلة السابقة هي السبب فلقد نام مليء جفنيه كما لم يحدث معه منذ..... هز رأسه يمينا ويسارا بقوة نافضا عنه هذه الافكار فلقد عاهد منة أنه لن يعود الى ذكر ما حدث ثانية, توجه الى الحمام ليغتسل ويبدل ثيابه....

أنهى سيف تجهيز نفسه وأثناء تمشيته لخصلات شعره الناعمة بينما خصلته المتمرده لا تزال تقبع فوق جبهته بغرور وكأنه لا سبيل لإعادتها بجوار رفيقاتها من سائر الخصلات, إذ به يسمع صوت ضحكات عالية قادمة من الحديقة بالاسفل, ابتسم وتوجه الى النافذة التي تطل على حديقة المنزل وقد ميّز صوت ابنتيه الضاحك, اقترب من النافذة ليطلع ابنتيه وهما تركضان وتلهوان بينما تتعالى ضحكاتهما, وافترشت ابتسامة حانية وجهه ولكن... لتغيب هذه الابتسامة تماما وتتبدل الى تكشيرة عابسة ما إن طالع الشخص الذي يلاعبهما والذي لم يكن سوى نادر !!, أفلتت لعنة من بين شفثيه وهو يرى نادر يلاعب طفليته بينما تجلس منة تراقبهم ويكاد يقسم أنه رأى الابتسامة تلاعب شفثيهما الكرزتين !!, شتم من بين أسنانه وتوجه بخطوات سريعة مندفعة الى الخارج ليرى ما الذي يريده ذاك النادر تماما منه؟, من الواضح أن اهتمامه لا يقتصر على منة وحدها بل لقد إمتد الى ابنتيه أيضا وكأنه أخذ على عاتقه أن يسلبه عائلته كلها .. زوجته وطفلاته, إذن فقد آن الأوان لهذا النادر أن يعيد حساباته جيّدا فليس سيف من لا يدافع عن أثمن ما في حياته بل... إنهم هم حياته بأكملها!!.....

هبط ظلّ فوق منة الجالسة تراقب بنتيهما تلاعبان نادر بحبور, بينما تعمل هي على حاسوبها الشخصي, محاولة قدر الامكان الانتهاء من العمل على وضع التصميم الخاص بديكور مكتب نادر, كان يجالسهما احمد وايناس اللذان استأذنا منذ دقائق وذهبا لمهاتفة والديّ ايناس, بينما ذهبت زينب مع أمها لتتجول بها في أنحاء قصرهم الضخم, ورافق أباهما عمّهما عبدالهادي في جولته المعتادة على الأراضي الخاصة بالعائلة للوقوف على سير العمل...

رفعت منة عينيها مظلة لهما براحتها لتبتسم مرحبة بصاحب الظل الطويل قائلة:

- أهلا, صباح الخير, ناموسيتك كحلي, كل دا نوم؟!..

سكت سيف ولم يجبها وبدلا من ذلك طالعها بنظرات غريبة لم تفهمها فقطبت متسائلة وما أن فتحت فمها لسؤاله حتى قاطعها صوت بنّيتها وهما يصرخان بأبي راکضتان اليه, التفت سيف اليهما وسارع باحتوائهما بين ذراعيه رافعا اياهما الى أعلى, وهو

يقبلهما وقد أثلج صدره أنه لم يفقد بعد مكانته لدى طفلاتيه على الرغم من أنه انشغل
عنهما في الفترة السابقة, نظر اليهما وقال بابتسامة حانية:
- صباح الخير يا عيون بابا..

قالت هنا بابتسامة:

- ثباح الخيل يا بابا, أنا كنت عاودة أثحك بث ماما قالت لا...

لتكمل فرح وهي تضع يدها الصغيرة على وجهه لتديره ناحيتها:

- انت وحتتنا اوي اوي يا بابا, وكنا عاوذين نلعب معاك!...

سيف بابتسامة:

- وانتو كمان وحشتوني اوي حبايبي, بعد كدا عاوزين تصحوني في أي وقت ادخلوا
صحوني على طول, تابع وهو يرمق منة بنظرات متحدية استغربت لها:

- محدش هيقدر يمنعكم عني!, مش انا بابا اللي بتحبه!!?

سارع البنتان بالهمهمة ايجابا, بينما علقت منة بحيرة ودهشة وتقطيية خفيفة تعلي
وجهها:

- انت كان شاكل نايم وفي سابع نومة, ما رضيتش يقلقوك مش أكثر ...

عقبت هنا وهي تشير امامها بفرح:

- بث عمو نادي لعب معانا, عايف يا بابا عمو طيب اوي ويحبنا اوي, كل ماما ما
تقول كفاية لعب بقه علشان عمو مايتعبث, عمو يقولها ثيبهم يا منة, انا مث تعبان!..

وكان ابنتها بقولها ذاك قد صبّت الزيت المغلي فوق النار!, فقد انتفخت أوداج سيف
قهرا وغيظا وقد أحمر وجهه غضباً وحنقاً, ما جعل منة تستغرب في البداية ولكنها
سرعان ما فهمت السبب وراء مزاجه النزق هذا الصباح, وشردت بأفكارها فيما حدث
منذ سويعات عندما طلبت منها حمايتها بعد الافطار ان تلحق بها في جناحها الخاص
مستئذنة والديها, ما ان أغلقت زينب الباب خلفهما, حتى تحدثت وهي تشير الى منة
بالجلوس على الاريقة العريضة وهي تقول:

- ارتاحي يا بتي دجيجة واحده بس!، وسارت الى خزانة الثياب وفتحتها لتخرج منها حقيبة جلدية فاخرة، حملتها ووضعتها على الفراش أمامها وفتحتها وهي تقول بحبور بينما تشير الى الحقيبة المفتوحة بسعادة:

- شوفي إكده وجوليلي رايك إيه؟؟..

نظرت منة الى زينب بابتسامة حائرة ثم قامت وتوجهت الى الفراش ونظرت الى ما بداخل الحقيبة وهي تسأل دون أن تمد يدها:

- ايه دا يا ماما الحاجة؟؟، أشارت زينب لها بإلحاح قائلة:

- مدّي يدك يا بتي وجوليلي رايك إيه؟؟

مدت منة يدها لتتناول ما بالحقيبة ففوجئت بها ممتلئة بثياب مختلفة الأشكال والألوان، وجميعها مصنوع من الحرير الخالص، كما أنها ثيابا خفيفة تناسب الجلوس في المنزل بحرية، تشمل جميع الأنواع من شورتات الى بلوزات صيفية خفيفة، وثياب خاصة بالنوم، وقد احمر وجهها ما ان لمستهم، فقد كانوا كثياب عروس جديدة، رفعت نظرات متسائلة وقالت وهي تتلمس نعمة الحرير بين أصابعها:

- إيه دا يا ماما الحاجة؟...، جذبت زينب الثياب من بين يدي منة معيدة اياهم الى الحقيبة، وأمسكت بيدها لتجلسها فوق الفراش بعد أن أراححت الحقيبة جانبا وجلست بجوارها وقالت بحنان أمومي:

- شوفي يا بتي ربنا العالم انك بجيت كيف بتي الخامسة اللي بطني ما جابتهاش، وغلاوتك عندينا أني والحاج من غلاوة ولدنا أن ما كانش أكثر، الحاجات دي من أم لبثها، وأتعشم إنك ما تكسفينش وتجبليها!!..

منة بابتسامة حائرة:

- بس دا كثير اوي يا ماما الحاجة!!..

زينب وهي تربت على يدها بابتسامة حانية:

- ما فيش حاجة تكثر عليك يا بتي، شوفي يا منة أني في كلمتين علوزاكي تسمعيهم مني زين، سيف ولدي غلط وجرّ بغلظه وتاب لربنا وعمل كل اللي في مُجْدَرْتُهُ عشان يصلح الغلط ديه، لكن بردو لازم يتعلم الدرس لآخره، تمام كيف ما منعم زوج بتي

سلمى ما انتدم جد شعر راسه ع اللي عمله معاها ومعانا ودلوك بيسوج علينا طوب الارض علشان نجبل انها ترد له, حتى انه جامع كُبارات العيلة عنديه وجاي الليلة إهنيه يَحجُ نفسه لبوكِ عبدالهادي ويحب على راسه ورأس سيف ولدي جودام الخلايج كَلَاتها عشان يستسمحهم ويرضوا سلمى تعاود له مع العيال من ثاني, منع خد الدرس لآخره, وسيف كمانى لازم ياخذه كلاته, انتي كيف بتي سلمى تمام, وكيف منع ما تأدب وعرف ان الله حج, سيف ولدي برضيك لازم يعرف ان الله حج, وان زعلك وعرج جوي, وانه مش بالساهل إكده أنه يغلط ويتأسف لك تجومي مسامحاه في وجتها, علشان يفكر ألف مرة بعد إكده لو شيطانه وزّه على حاجه إكده ولا إكده!!....

ابتسمت منة وقالت وهي تحتضنها بحب خالص لهذه السيدة العظيمة:

- انا مش عارفة أقول ايه, ربنا يخليكي ليا يارب, وحضرتك كمان انت وعمي الحاج ربنا العالم غلاوتكم عندي من غلاوة بابا وماما...., ثم ابتعدت قليلا لتناظر زينب المبتسمة بسعادة ثم قطبت متسائلة بحيرة:

- لكن الهدوم دي هعمل بيها ايه وحضرتك عارفة العلاقة بيني أنا وسيف عامله ازاى, ولسه حالا حضرتك قايلالي ان سيف لازم يتعلم الدرس!!..

غمزتها زينب بخبث مجيبة وابتسامة مأكرة تتراقص على شفثيها:

- ما هي هيا دي لزوم التربية!, الخلجات دي هي اللي هتربي ولدي سيف وتخليه يجول حجي برجيتي صوح!, ويفكر بعد إكده ألف مرة جبل ما حتى عجله يوزّه انه يفكر في حاجه إكده ولا إكده!!....

ضحكت منة وسارعت باحتضان زينب وهي تقول بمرح:

- يا سلام عليكى يا زوزو, انتي المفروض تألفي كتاب في كدا, وصدقيني ستات كثير هيشكروكي على نصايحك الغالية دي!!

علّقت زينب بمرح وهي تشارك منة ضحكاتها:

- إيوة, بس الرجالة هتدعي عليّ, ويمكن يجدموا فيّ بتهمة تحريض نساوينهم عليهم!

انطلقت ضحكات منة وقد انتقل حماس زينب اليها وقد عزمّت على أن تربي سيف تربية كاملة وستبدأ أولى مراحل تربيته من اليوم!!..

انتبهت منة من شرودها على نظرات سيف المتهمه وابتسمت في سرها فلم تكن تعتقد أن اولى خطوات تربيته من جديد ستكون بهذه السرعة, انتبهت الى نادر المتجه ناحيتهم فتجاهلت سيف وقالت بابتسامة لنادر:

- معلش البنات تعبوك...

اجاب نادر باستنكار وهو يجلس في المقعد المواجه لها:

- لا .. اوعي تقولي كدا, دول بنات دمهم زي العسل, ربنا يباركلك فيهم,... ثم التفت الى سيف الذي لا يزال واقفا في مكانه يحمل ابنتيه:

- صباح الخير يا سيف...

أنزل سيف ابنتيه وهمس لهما في أذنهما فسارعا بالركض بحماس بعيدا لينادوا مرام لتأتي للعب معهم حيث سيشاركهم والدهم اللعب كما وعدهم, التفت سيف برأسه ونظر الى نادر مليًا قبل أن يرد تحية الصباح ببرود ويجذب الكرسي الملاصق لمنة ليجلس عليه, لم تعره منة اهتماما ونظرت الى نادر قائلة وهي تُدير حاسبوها الشخصي تجاهه دافعة به اليه:

- بص كدا يا نادر وقولي ايه رأيك في الديزاين دا؟؟..

نظر نادر حيث أشارت منة ومال قليلا ليستطيع أن يعلق على ما يراه, فكان أن اقترب من منة, وبطبيعة الحال لم يرقُ الوضع لسيف, الذي سارع بالامساك بساعد منة وابعادها عنه فقد كانت تميل قليلا لتستطيع رؤية ملاحظاته التي سيدلي بها, وأصقها بكرسيها ومال عليها هامسا من بين أسنانه:

- عارفة لو اتحركتي خطوة واحده بس من مكانك ولا اتوربتي هعمل فيه إيه؟...., مقرنا تحذيره بنظرة وعيد جعلتها تنكمش في مقعدها بالرغم منها , التفت سيف الى نادر وقال ببرود:

- بيتهياي تكتب ملاحظاتك في ورقة أفضل!, ثم دفع أمامه بمفكرة وقلم كانت منة قد جلبتهم تحسبا لمثل هذا, فقد كانت تعلم أن لا بد لنادر أن يبدي بملاحظاته عن العمل الذي قامت به...

نظر نادر الى سيف بابتسامة صغيرة وتناول المفكرة والقلم وهو يقول:

- الملاحظات بتاعتي مش محتاجه كتابه هي حاجه ولا اتنين بس, شغل منة مافيش غبار عليه, وعموما انا هكتب الملاحظتين علشان منة تعدلهم قبل ما تعرض عليا الشغل تاني!!,, وألقى بنظرة تحد الى سيف الذي كاد يجرُّ على أسنانه حنقا وغضبا من هذا المتحذلق الجالس أمامه والذي ما انفك ينادي بإسم زوجته بتلقائية من دون ألقاب, الأمر الذي جعله يشعر بالغضب وكأنه يغازل امرأته أمامه بمناداته لها بإسمها مجرداً!!....

قطع تخيلاته صوت والدته الضاحك وهو يقول موجها الحديث اليه:

- صباح الخيرات يا ولدي, ايه النوم ديه كلاته؟!...

نهض سيف من مكانه وهو يمد يده متناولا يد والدته مقبلا ظهرها وهو يقول:

- صباح الأنوار يا أم سيف...., ألقى سيف تحية الصباح على عواطف وجذب مقعدا لها لتجلس بينما رفضت زينب الجلوس قائلة:

- لاه, اجعد انت يا ولدي, أني هروح أجول لمهجة تحضر لك الفطور..

اعترض سيف قائلاً:

- معلش يا أم سيف ماليش نفس, بس لو كوباية شاي يبقى كتر خيرك...

استنكرت زينب هاتفة:

- باه, كيف دا؟, تشرب شاي على خلو بطن؟, جلبك يحرجك يا نضري!...

تمتم سيف بينه وبين نفسه:

- هو لسه هيجرقني يا أم سيف, ما حرق واللي كان كان!!,, انتبه من شروده على حديث والدته وهي تقول بتصميم:

- لاه, اذا ماكانيش ليك شوج في الفطور, يُبجى ع الأجل هجيلك طبج جراجيش وكوباية شاي بلبن, الجراجيش دي بالذات هتعجبك جوي, وما هتجدرش تجول لاه,غمزت بعينها متابعة بمكر:

- عارف مين اللي عاملها؟, لم تنتظر اجابته وتابعت وهي تشير الى منة الجالسة بجواره مشيخة برأسها بعيدا عنه:

- مَرَّتْكَ هي اللي عاملاهم, وماحدث كلٌ منها الا وعجبته, مش صوح يا ست أم أحمد,
لتوميء عواطف برأسها مجيبة:

- فعلا القراقيش جميلة, ووجهت زينب سؤالها الى نادر:

- مش إكده يا أستاذ نادر؟, حانت نظرة من نادر الى منة وأجاب بابتسامة صغيرة بينما
عيناه ترصدان تعبير وجه سيف فحّثه شيطانه على مشاغبته وزيادة حنقه الواضح عليه:

- طبعا يا حاجه زينب, ما فيش حاجه منة تعملها وتطلع وحشة أبدا, أي حاجه منة تحط
أيدها فيها لازم تطلع ممتازة!!!...

لم يُدهش جوابه سيف فقط, بل وجميع الجالسين, حتى أن زينب قلقت من أن الزمام
سيفلت من يدها ولا تستبعد أن يلقن ابنها نادر درسا كي لا يتحدث عن إمرأته بتلك
الطريقة مرة أخرى, بينما حانت التفاتة من منة الى وجه سيف لتكتم شهقة كادت أن
تفلت من التعبير الوحشي الذي ارتسم عليه مما جعلها على يقين أن هناك جريمة
سترتكب لا محالة في التوّ واللحظة إن لم يتدخل أحد لمنعها, فسارعت بالنظر في رجاء
لزينب التي التقطت اشارتها حيث سارعت بتغيير الموضوع قائلة بضحكة مصطنعه:

- هروح أجول لمهجة تجيب لك الجراجيش والشاي, تعالى معايا يا منة يا بّتي....,
ولحقت منة بحماتها تاركة سيف يرغي ويزبد بينما حاولت عواطف فتح حديث مع نادر
لكي تصرف انتباهه عن تعبير وجه سيف الاجرامي!!!.....

همست زينب لمنة وهما تتجهان للدخل:

- ربنا بيحب واد خالتك ديه, اتكتب له عمر جديد انهارده, سيف ولدي وأنا عارفاه
زين واللي شوقته على وشّه يخليني أجول ربنا يعدي اليامين اللي جايين دول على خير
وواد خالتك يسافر من عندينا وهو لساته حتّه واحده!!!, لم تستطع منة كتم ضحكتها
لتشاركها زينب الضحك بمرح!!!...

عادت منة تحمل صينية عليها طبق المعجنات وكوب من الشاي المزوج باللبن,
يرافقها زينب, لاحظت عدم وجود سيف فسألت والدتها بينما تضع الصينية على
الطاولة أمامها:

- أو مال سيف فين يا ماما؟...

أشارت عواطف أمامها وهي تقول:

- بناتك جوم مع مرام وولاد سلمى وصمموا يلعبوا كرة وشبطوا في نادر كمان, أهوم هناك بيلعبوا واحمد معهم, ايناس واقفة تصورهم بالموبايل هناك أهه.....

جلست زينب تراقب بحماس المباراة المقامة أمامها, بينما توجهت منة حيث تقف ايناس وتقوم بتصوير المباراة, انتبهت ايناس اليها فالتفتت لها وقالت بمرح:

- على آخر الماتش دا أنا متأكده إن وشّ ابن خالتك هيكون شوارع!!..

قطبت منة وهتفت متسائلة بينما تراقب اللعب الدائر أمامها:

- يا سلام, ليه ان شاء الله؟, هما بيحطوا أجوان في وشّه؟!

أجابت ايناس بمرح:

- لا وانتى الصادقة جوزك هو اللي بيحط أجوان في وشّه!, بيباصي الكورة في وشه تمام يخليه يلبسها!!..

قطبت منة غير مصدقة واقتربت منهم لتشهق بعنف وهي تشاهد وجه نادر وقد أصبح عبارة عن خريطة مجهولة المعالم!, استرعى انتباهها صافرة اخيها القائم بمهام حَكَم المباراة وهو يعلن عن ضربة جزاء مباشرة, ليقف نادر كحارس مرمى بينما يقف سيف امامه متجهزا لرمي الكورة في المرمى, حانت منها نظرة الى سيف لتعلم نيّته تماما!, وقبل أن تحاول لفت انتباه نادر كانت الكورة تنطلق كالقذيفة من قدم سيف لترتطم بوجه نادر تماما مما جعله يطلق صرخة الم قوية ويهتف صارخا بسيف:

- جرى ايه يا جدع اللاه!, انت بتباصي فين؟, انت المفروض تحط الكورة في الجون!, أجااب سيف ببرود بينما عيناه تشوبها نظرات غامضة:

- ومين اللي قالك أني ما حطتش الكورة في الجون؟, دا في الجون تمااااام!!.....

لم ينتنى لنادر استيعاب ما قاله, فقد قاطعهما أحمد معلنا نهاية المباراة, وقد تفرّق الجميع متجهين لغرفهم للاغتسال بينما صمم الاطفال على تكلمة لعبهم مع أطفال سلمى في جناح الأخيرة...

اتجهت منة الى جناحها وسيف غير ملتفتة الى نداءاته المتكررة لها, وما إن نجح في اللحاق بها حتى أوقفه صوت مهجة طالبة منه موافاة والده في الاستراحه فزفر حانقا

وغير اتجاهه الى الاستراحه ملقياً نظرة متوعدة الى منة وكأنه يخبرها أن مواجهتهما قد تأجلت فقط.....

تناولت منة منشفتها واتجهت للاغتسال, بعد أن أنهت حمامها اتجهت الى الخزانة لأخراج ثياب لها عندما حانت منها نظرة الى الثياب التي أهدتها إياها حماتها والموضوعة في جانب بعيد عن سائر ثيابها الأخرى, شردت قليلا لتبتسم ابتسامة مأكرة وهي تمد يدها مخرجة ثيابا صيفية خفيفة, فتحتهم أمامها لتبرق عيناها بخبت وهي تقول ببراعة مزيفة:

- اعمل ايه الجو حر هنا أوي, وانا مش هنزل تحت, يبقى مش معقول هقعد بالحجاب ولا بسة طويل في أودتي في الحر دا, وسارعت بارتداء ما أنتقته يداها قبل أن تبدل رأيها!!!....

نظرت الى نفسها في المرأة, لتطالعها صورة مختلفة كلية عن منة التي تعرفها, فقد أسبغت عليها الثياب التي ترتديها عمرا أصغر من عمرها, فهي بهذه الثياب لا يتجاوز عمرها الـ 18 عاماً, كانت ثيابها عبارة عن شورت قصير للغاية الى أعلى الفخذين, بلون أبيض, يلتصق بثناياها مبرزاً انحناءاتها الأنثوية الفاتنة, وبلوزة قطنية بحمالات رفيعة باللون الوردي, تلتصق بجزعها العلوي, تكاد تغطي خصرها, مظهره جزء كبير من صدرها لا يدع للمخيلة شيء!, حتى أنها اذا ما تحركت ظهر جسدها من أعلى ومن ...أسفل!!..., مشطت شعرها على هيئة ضفيرة عريضة ألقته على كتفها الأيمن, وأنهت زينتها ببضع قطرات من عطر الياسمين الخاص بها, والذي لا يستطيع سيف مقاومته, غمرت لنفسها بخبت في المرأة وهي تقول:

- أول درس في التربية يا سيف, وأنا أجدع من يربي بصراحه, خصوصاً وانا معايا الناظرة بجلالة قدرها, حماتي... حياتي!!!.....

دخل سيف جناحه بعد فترة طويلة, قضاها برفقة والده الذي أخبره بحضور منعم زوج شقيقته سلمى مساءً بصحبة كبار عائلته لتقديم الاعتذار المناسب لهم وترضيتهم طلباً للسماح منهم لرغبته بعودة سلمى وأولاده اليه....

سار سيف بعد أن اغلق الباب خلفه, حتى جلس على الاركة مطلقاً تنهيدة عميقة, ثم أسند ظهره الى الاركة خلفه مغمضاً عينيه, لينتبه بعد ثوان الى السكون السائد حوله,

ففتح عينيه متلفتاً حوله في ريبة, وحانت منه نظرة الى الفراش فوجده خال, فقطب بحيرة متسائلا عن مكان وجود منة, عندما سمع صوت مقبض الباب ثم ظهرت منة التي دخلت مغلقة الباب خلفها ولم تكن قد انتبهت لوجود سيف بعد, وكانت تدندن بخفوت, ليقف سيف مصعوقا مما يراه أمامه, وتحدث بصوت أجش متسائلا بينما عيناه تفصلانها من أعلى رأسها الى أخمص قدميها:

- إيه دا؟, انتي كنتي فين وانتي بالشكل دا؟, .. وقفت منة مكانها متافجة من وجوده فهي لم تلاحظ لدى دخولها, طوى سيف المسافة التي بينهما بخطوتين واسعتين وقبض على مرفقها هاتفا بحق من دون أن يعطيها الفرصة للاجابة على تساؤله السابق:

- انتي اتجننتي؟, ازاى تخرجي بالمنظر دا من الأوضة؟, وقد كاد يجن عندما طرأ بباله انها تتجول بحرية بهذه الهيئة الفاتنة بينما من الممكن أن يراها الآخرون والذي قد يكون ابن خالتها السمج هذا منهم!!, أطلقت منة أنف صغيرة من الألم وهتفت محاولة الفكاك من قبضته:

- سيب دراعي يا سيف, انت اتجننت؟, أنت واعي للي بتقوله؟, معقول أنا هخرج بالشكل دا قودام الناس؟!...

هدأ سيف قليلا وان كان لم يخف قبضته على ذراعها وقال بخشونة:

- أومال تقدري تقوليلي كنتي فين وانتي باللبس اللي انتي مش لابساه دا؟, في اشارة منه الى ثيابها القليلة التي بالكاد تستر مفاتيها, توقفت منة عن محاولة الافلات من قبضته و قد وعت الى نيران الغيرة التي ينفثها من فمه وأنفه على حد سواء, ابتسمت بداخلها بخبث ابتسامة لم تظهر على محياها وتوعدت في نفسها قائلة:

- إما ورّيتك يا سيف, بحق الليالي اللي نمتها ودمعتي ما نشفتش من على خدي وانا النار ماسكة فيا وكل كلمة وحرف قرينه مش بيفارق عقلي... والمناظر اللي انا شوقتها وكل ما أفكر انك شوقتها بالطريقة المقرزة اللي كانت عاملها في نفسها دي.. تخلي دماغي تغلي من الغيرة والغضب, بحق الايام والليالي دي.. لا أخلص منك حقي كامل وهخليك تحرّم انك تفكر مجرد تفكير في أي صيغة مؤنث غيري, وبكرة تشوف!! , تعمدت منة البرود وطالعتة بحدة وهي تتحدث بانفعال زائف:

- أنا كنت في المطبخ يا استاذ, المطبخ اللي في الجناح عندنا هنا, بشرب, ايه حرام أشرب؟! , وبعدين الجو حر نار وانا عارفة انه الوقت دا وقت عصاري الكل بيرتاح فيه, وانا قاعده في اوضتي براحتي, مش قاعده قودام حد غريب يعني!....

ازدرد سيف ريقه بصعوبة وأجاب بينما دمه اندفع يهدر في أذنيه, وقد شعر بسخونة تنتشر في أطرافه بينما قلبه يكاد يخرج من مكانه شوقا لأحتواء هذه الحورية الفاتنة, وذراعاه تحترقان لضم قدها الرشيق الى جسده العضلي لإشباع توقه الشديد اليها, فتحدث محذرا اياها فهي إن ظلّت على هيئتها هذه أمامه فهو غير مسؤول عما سيحدث لها !!, تحدث سيف بحسرة لشدة الانفعالات التي تمرور في نفسه:

- طيب, روعي حطي حاجه على نفسك, تبردي بعدين...

ونفض ذراعها من قبضته, واستدار مبتعدا عنها بينما قطبت منة وقالت بدهشة:

- أبردا!, أبردا إزاي في درجة حرارة ما تقلّش عن 40 زي اللي احنا فيها دي؟؟..

لف سيف بوجهه ناحيتها وزفر بحلق مجيبا:

- منة, قصّري وروحي غيري هدومك....

وقفت منة تتمايل في مكانها وأجابت بغرور:

- والله لو مش عجبك لبسي دي مش مشكلتي, ممكن انت تخرج بره في الصالة, أو تروح حتى تنام في اوضة البنات هما مع ولاد سلمى, انا مش هلبس غير كدا, الجو حر, وأنا في اوضتي وماحدش شايفني

التفت سيف بكليته اليها وعاجلها بكلمة خاطفة:

- لكن انا شايفك!, عقدت منة جبينها وهتفت:

- يعني ايه الجملة الغبية اللي انت قولتها دي؟, انت جوزي!, هو المفروض إنني أتجنب قودام جوزي !!?....

اقترب منها سيف ووقف أمامها مجيبا وهو يزفر بتعب:

- يا بنت الناس ما تلعبيش بالنار, أنا مش مستحمل!, لو في ظرف ثانية واحده ما اختفيتيش من قودامي وروحتي غيرتي هدومك ما تلوميش غير نفسك بعدين!!....

تخصّرت منة ونظرت اليه بتحد قائلة:

- وانا قلت لك عندك اوضة البنات اتفضل روح نام فيها, أنا بقه مش هسيب أوضتي
ومش هغير هدومي....

سيف بتهديد واضح:

- يعني دا آخر كلام عندك؟, سكنت منة قليلا قبل ان تجيب بتلعثم طفيف وما لبثت أن
تماسكت:

- أيوة , هز سيف كتفيه بلامبالاة وقال :

- انتي اللي اخترتي!, وانحنى ليحملها فوق كتفه بحيث أصبح رأسها متدلّياً خلف ظهره
بينما ساقها تضربان الهواء أمامه رغبة منها في الفرار من قبضته, صاحت منة وهي
تلكمه بقبضتيها الصغيرتين في ظهره:

- سيف, نزلني يا سيف, نزلني ما فيناش من كدا.....

رماها سيف فوق الفراش ثم سارع بقذف حذاءه بعيدا وهو يجيئها وهو مشرفا عليها:

- احنا فينا من كدا وأبو كدا وأم كدا كمان, وانا حذرتك وانتي اللي مسمعتيش كلامي,
أنا مش حجر, أنا انسان من لحم ودم..

همت منة بمجادلته لبيتلع سيف عباراتها التي كانت تنوي مهاجمته بها, مغرقا اياها في
عناق ساحق, رفرفت منة بين ذراعيه اللتان أطبقتا عليها كالكماشة محاولة الافلات من
قبضته ولكن كلما زادت مقاومتها زادت رغبته ضراوة, حتى أنه من شدة ضغطه على
شفتيها قد ذاق طعم الدماء في فمه, ابتعد عنها بينما كانت دموع الألم تغمر محياها,
احتواها بدفء وحنو بين ذراعيه مقبلا جبهتها وقد رقد فوق الفراش جاعلا إياها تتوسد
كتفه وقال بنبرة ندم صادق:

- أنا آسف, سامحيني, أنا... ما كنتش أقصد أوجعك, بس إنتي نرفزتيني وانا شايفك
رايحه جاية قودامي بالشكل دا, وانا في الأول والآخر انسان, وبحب!, بحبك لدرجة
الجنون...

كانت تشهق بغصات بكائها, والتي هدأت قليلا لتجيبه بصوت صغير باك:

- بس انا ما اتعودتش منك على ... على كدا يا سيف!, أبعدھا عنه مرقدًا اياھا فوق الفراش ومال علیھا هاتفًا :

- وأنا آسف, ما كنتش أقصد, أنتي عارفة أنا مش ممكن أقصد أني أتسبب لك في أي ألم !!, ولكن نظرات عينيها قالت له أنه قد سبق له بالفعل وكان السبب في إصابتها بالألم قوي أصاب قلبها حتى العمق, فأجابها بعينيها بدون كلام أنه يقسم لها أنه لم ولن يتكرر مثل هذا الألم وأنه يفضل الموت على أن يكون سببا في دمة تذرفها عيناها حزنا أو ألما يكون هو السبب فيه!, أفصح عما يجول بباله بكلمات صادقة:

- صدقيني يا منة الموت عندي أهون من أني أكون سبب لدمعة ألم أو حزن تنزل من عينيكي , سكت لينظر اليها قليلا متسائلا بتردد:

- مصدقاني يا منة?, نظرت اليه منة بغموض بينما انتظر جوابها على أحر من الجمر, ليسمعها وهي تقول بخفوت:

- مصدقك يا سيف, مصدقك...., تنهد سيف براحه عميقة , ثم انبطح فوق الفراش محتويا كتفيها بذراعه, واضعا رأسه فوق صدره مقبلا جبينها وهو يقول:

- نامي دلوقتي يا حبيبتي, ارتاحي, عاوز أنام نص ساعه بس وانتي في حضني كدا, علشان الناس اللي جايبين بعد المغرب, وسرعان ما أغمضا عينيهما ليغرقا في سبات عميق.....

تعالى أصوات المباركات والتهنئات, لتعلن زينب للحضور أنه قد تمت المصالحة بين منعم وعائلته والحاج عبدالهادي وسيف, وان سلمى ستعود الى منزلها بصحبة زوجها وأولادهما الليلة, تلقت زينب المباركات من عواطف ومنة وايناس وكانت أصوات الرجال بالخارج تصل اليهم والتي اصطبغت بالفرحة العارمة , تعالى صوت اطلاق أعيرة نارية قوية ما جعل منة تجفل واقتربت من زينب متسائلة بدهشة ووجل:

- ايه الصوت دا يا ماما الحاجة?... , التفتت زينب الى منة مجيبة بابتسامة فرح تعطي محياها لانتفاء مشكلة ابنتها:

- ديه عيارين تفاريح إكده, تلاجي حد حب يوجب إمعانا...

منة بعدم رضا ولا تدري لم هذه الانقباضة التي شعرت بها تمسك بتلايف قلبها فجأة:

- حد بیوجب بعیارین؟، أنا أعرف یوجب بفلوس، بدستة شربات، انما عیارین؟!..

زینب بتفہم:

- يا بَنِّي عوايدنا غير عوايدكم واصل، إهنة الرجالة بيوجبوا بعيارين في الجو،
أومال.....، ليقاطعها هتاف حاد ثم أبصرت رماح يدخل اليهم ركضا وهو يصرخ
فأوقفته زينب ناهرة إياه بقوة:

- باه، إنت اتجنيت ولا ايه يا رماح، داخل ترمح وسط الحريم إكده من غير لا إحم ولا دَستور....، صرخ رماح بينما دموعه تغرق وجهه الكالج:

- الحجينا يا كبيرة, الحجينا , زجرته زينب بشدة بينما بدأ قلبها يستشعر الخوف مما يحمله من أخبار:

- حوصلُ إيه يا واد إتحدث كاك خابط في نافوخك!..

قال رماح من بين شهقات بكائه العالية وبصراخ جمع كل الحاضرين، بينما قطبت منة بصدمة وخوف وتراجعت عدة خطوات الى الخلف كأن قلبها يهمس لها بما سيقوله رماح من أخبار مفرعة جعلت أنفاسها تختنق في صدرها بينما الكلمات تضرب سمعها قوية... عنيفة صادمة:

- سي سيف بيه انطخ بالنار ووجع سايح في دمه!!، لتصرخ زينب عاليا قبل ان تندفع الى الخارج لتري وحيدها:

- سيييف، وَلَدًاااااااي.....، بينما تسترجع منة آخر كلمات سمعتها منه أنه يفضل الموت على أن يكون السبب في دمة ألم تذرفها عيناها!.....أخذت منة تحرك رأسها مرارا من اليسار الى اليمين رافضة ما سمعته أذناها لتصرخ بعد ذلك صرخة مدوية هرعت على أثرها ايناس وعواطف اليها هاتفه بإسم حبيبها الوحيد:

- سيبببيبييف!، و..... تهوى منة لترطم بالأرض مغشيًا عليها، فاقدة لوعيها، بل
.....فاقدة الرغبة في حياة من دون...سيفها!!

انتظروني في أحداث الحلقة الأخيرة من " جوازة .. نت!", يوم السبت القادم بمشيئة الله تعالى.....

- يتبع -

الحلقة السادسة عشر والأخيرة:

وقفت منة مستندة على حائط ممر غرفة العمليات الجراحية المقابل لباب تلك الأخيرة وقد ساد وجهها الوجوم وتحجرت العبرات في عينيها, فمنذ أن أفادت بعد اغمائها على إثر سماعها نبأ إصابة سيف بطلق ناري وقد صممت على اللحاق بعربة الاسعاف التي نقلته الى المشفى الخاص الموجود بعاصمة المحافظة والذي كان والده من أكبر المستثمرين فيه حيث يملك بمفرده اكثر من ستون بالمائة من الأسهم, وقد رافقها احمد ووالدها ونادر, بينما رافق سيف في العربة والده, وقد جاءت زينب وعواطف في العربة الخاصة بعبدهادي يقودها سائقه الخاص, بينما جلست ايناس بالاطفال في المنزل, منذ ذلك الوقت وهي لم تجلس, فهي واقفة على عقبيها منذ أن وطئت قدمها أرض المشفى, فقد اتجهت من فورها الى الطابق الخاص حيث تتواجد غرفة العمليات الجراحية بعد أن استفسر والدها عن مكان تواجد سيف مدلياً بإسمه, كانت تهزول وهي تتجه حيث الغرفة يلحق بها احمد ونادر ووالدها والذي كان لسانه يلهج بالدعاء لزوج إبنته داعياً الله أن يكتب له السلامة وألاً يُذيقهم حزناً فيه

علمت أنه بالداخل لاجراء عملية جراحية دقيقة لاستئصال الرصاصة, غاب بالداخل مع فريق الاطباء اكثر من 3 ساعات وهي رافضة لألحاح والدتها عليها بالجلوس, فمنذ أن أنهارت

بين يديها وأمها تخشى عليها أن يصيبها الانهيار مجدداً, لم تنبس ببنت شفة, تكتفي بهز رأسها رفضاً فقط, وكأنها استحالَت الى تمثال من الشمع, فقد تحجرت جميع تعابير وجهها, وتجمدت دمعة خائنة تسبح في مقلتيها رافضة النزول, كانت تسمع بكاء حماتها وتعاطف أمها معها وهي تريد الالتفات اليها تنهاها عن البكاء, لم البكاء؟, فسيفها حيّ, هي تشعر بهذا في قلبها, من المُحال أن يكون قد أصابه مكروه وهي لا تزال واقفة على قدميها لم تلحق به بعد!, لقد شعرت بما أصابه من قبل أن تسمع بذلك الخبر المشؤوم!, فقد نغزها قلبها وشعرت وكأن قبضة قوية قد أمتدت لانتزاعه بقسوة من بين أضلعها قبيل سماعها نبأ إصابة سيف, فما إن سمعت دويّ إطلاق النار حتى علمت ماذا سيحدث!?, وهي الآن تدعو الله في سرّها أن يكتب له النجاة ولا يذيقها فيه مكروه أبداً, فهو سيفها, حبيبها, والد بناتها, علمت أنها لا تستطيع الحياة من دونه لحظة واحدة, وتمنّت من الله أن يمنّ عليه بالشفاء, أما هي فستنسى كل ما صار وكان, فكلما تتذكر كلماته الأخيرة لها قبيل نزولهم من غرفتهم لموافاة الضيوف بالأسفل, تشعر وكأنه كان لديه حدس بما سيحدث له, سؤاله المترجي عمّا إذا كانت توبته نصوحة فعلاً, وإذا كان الله قد قبلها منه؟, اهتمامه بأن يثبت لها أنه أبداً لن يفعل ما يغضب الله ثانية, كلمته الأخيرة من أنه يفضل الموت على أن يكون سبباً في نزول دمعة أخرى من عينيها, كل هذه العبارات كانت تجول في بالها , عندما رأت باب غرفة

العمليات الواجه لها يُفتح فاندفعت الى الطبيب الذي ظهر من ورائه يرافقه طبيب آخر شاب , اتجهت الى الطبيب في ذات اللحظة التي انتبه لها الباقيين لخروج الطبيب واندفاعهم نحوه , وقفت أمامه تسأله بصوت مرتعش وعينين ترتجفان:

- طمّني يا دكتور, ايه اخبار سيف؟...

زفر الطبيب عميقا وقال وقد لاح على وجهه الاجهاد فهو بالداخل يجري عملية جراحية دقيقة لمدة تقارب الأربع ساعات, تكلم بجدية وان لاح في وجهه حنان أبوي على هذه الزوجة الشابة التي يكاد خوفها على زوجها الراقد بالداخل يقتلها:

- اطمّني يا بنتي, جوزك ربنا كتب له عمر جديد, الرصاصة كان بينها وبين القلب 2 سم, لكن ربنا ستر, المشكلة دلوقتي انه نزف كثير جدا, فعاوزين نقل دم حالا, احنا بعتنا نستفسر في بنك الدم, أنتو مافيش حد فصيلته مناسبة ليه؟, اندفعت منة قائلة:

- خد مني دمي كله يا دكتور بس رجعهولي تاني, .. أوماً الطبيب ايجابا قائلاً:

- طيب اتفضلي حضرتك مع الممرضة علشان ياخدوا عينة من دمك يعاينوها قبل ما ياخدوا منك كمية الدم المناسبة , بس لسه عاوزين متبرعين تاني, الكمية اللي نزفها مش شوية, هتف عبد الهادي:

- أني يا دَكْتُورُ, هز الطبيب برأسه رفضا وأجاب بحسم:

- للأسف مينفعش يا حاج, حضرتك مريض ولسه قايم من دور جامد, احنا عاوزين كمية كبيرة مش هينفع ناخذها منك..

- انا عاوز أتبرع يا دكتور, هتف نادر بهذه العبارة فالتفت اليه الطبيب وقال باستحسان:

- ممتاز, اتفضل حضرتك مع المدام والمرضة, ولحق به أحمد قائلا:

- وأنا , أشار الطبيب للمرضة باصطحابهم للمعمل للتأكد من تطابق الفصائل وخلو الدم من أية أمراض معدية, نظرت منة الى نادر الذي يسير بجوارها وتمتمت:

- شكرا يا نادر, أجاب نادر بنظرة حزن تغشى عينيه فهو قد تأكد أن حبيبته أبدا لم ولن تكون له:

- أنا مستعد أعمل أي حاجة علشان سيف يقوم بالسلامة ليكي ولبناته, أسبلت جفניה في حركة شاكرة, ثم أكمل المسير متجهين الى المعمل...

- ولد يا رماح عرفتوا ميين ابن الأبالسة اللي طخ وَلَدِي؟

همس عبدالهادي بهذا السؤال الى رماح الواقف بجواره يبكي كالأطفال على ما أصاب سيّده, مسح دموعه بكُم جلبابه الصعيدي الكالح اللون وهتف:

- إيوة أومال يا سيدي الحاج, الواد مجاهد ولُد الفرطوس هو
اللي صابه بالغلط وهو بيضرب عيارين في الهوا تفاريح
برجعة ست سلمى لسي منعم...., سكت عبدالهادي قليلا ونظر
اليه رماح متابعا:

- أني فكرت أطخه عيارين حج اللي عَمَلُه ديه , لكن جولت
أشورك حضرتك الاول!...

شهق رماح عندما أمسك عبدالهادي بقبة جلبابه وهمس بحدة من
بين أسنانه :

- أنت اتجنيت إِيَّاك!, تطخه كيف?, عارف ديه هيبجي ايه?,
هيبجي بيننا وبين عيلة الغانم طار وبحور دم مالهاش آخر,
جوصر الكلام أي حد هيسأل هنجول الرصاصة أنضربت من
حدانا إحنا, لو حد في عيلة السوالمه شَمّ خبر أنه مجاهد غفير
كبير الغانم هو اللي طخ سيف ولدي مش عيسكتوا, وهتبجي
بحور دم مالها آخر, هنجول للناس رصاصة طايشة من اللي
الرصاص اللي كان بينضرب في الجو , حد شاف إِمجاهد
غيرك?

هز رماح رأسه بسرعة نفيا بطريقة كوميدية حتى أن صدغيه
الممتلئين قد ارتطما ببعضهما وهتف بذعر:

- لاه, ماحدش شاف ولُد الفرطوس ديه غيري, حتى هو
ميعرفش أني شوفته, أني كنت واجف جنبه وسي سيف

بيرجوص على الحصان لمن الغبيّ ضرب الرصاصة في
وجت ما سي سيف كان بيلف جوباله,....دفعه عبدالهادي دفعة
خفيفة وتنفس الصعداء قائلاً:

- أمنيح, يُبجى كيف ما جولتلك, الرصاصة كانت طائشة, لو
كان عندي أي شك انها مجسودة كنت خدت حج ولدي بيديّ,
لكنها مش مجسودة, والسوالمة مش هيفهموا إكده, هما اساسا
كان رافضين انه ولدهم يعاود بنتي تاني لوما سيف ولدي ربنا
يشفيه أتدخل في الكلام وراضى الكل... ما كانش منع هيشوف
ضوفرها واصل.....

أوما رماح قائلاً:

- أمرك يا سيدي الحاج....

ظهرت نتائج التحاليل وكانت فصيلة دم منة ونادر متطابقتين,
قال الطبيب عندما أبصر نتائج التحاليل:

- اممم, ممتاز يبقى استاذ نادر هيقدر يتبرع للمريض بس كمية
الدم هتكون كبيرة شوية, للأسف بنك الدم لسه ماردّش علينا,
واحنا بنسابق الوقت علشان حالة المريض الصحية ما
تتدهورش..

نادر بحزم:

- خذ الكمية الكافية يا دكتور, المهم تنقذ حياته....- وفي نفسه
أكمل وتنقذ حياتها هي الأخرى فحياتها موصولة بحياته –

اعترضت منة:

- بس يا دكتور انا كمان فصيلة دمي مناسبة يبقى ليه حضرتك
ما تاخدش مني؟...
الطبيب بتلقائية :

- حضرتك حامل يا مدام, ودا هيبقى فيه خطورة عليكي وعلى
الجنين!!.....

صُغقت منة وشحب وجهها فيما سمع احمد ما قاله الطبيب
فسارع بإسنادها قبل أن يغشى عليها , فيما شحب وجه نادر
وساتند الى الحائط خلفه, سار احمد بها حتى أجلسها على
كرسي ومال عليها هاتفًا:

- ثواني هروح اجيب لك عصير, أمسكت بيده قبل ان ينصرف
هامسة :

- ماما, علوزة ماما.....

أوماً ايجابا بلهفة وسارع لإحضار أمهما.....

كانت منة تجلس على كرسي بجوار الفراش الذي يرقد عليه سيف منذ أن استقرت حالته, وكان قد دخل غرفة العناية المركزة لمدة 24 ساعة لحين ثبات حالته الصحيّة ولكن ما أدهش الأطباء هو الغيبوبة التي دخلها, فلم يكن هناك سببا طبيّا لحدوث مثل هذه الغيبوبة, كانت منة تأتي يوميا في موعد الزيارة الصباحية وتمكث حتى يحل المساء تتحدث معه وتُذكره بأيامهما سوية وبناتهما, فقد أخبرها الطبيب أن الذي يتعرض لغيبوبة يكون هناك جزء من المخ في حالة وعيٍ , وأنه بالتحدث إليه وتذكيره ببعض الأحداث وأشخاص معينين قد يؤدي ذلك الى استيقاظ باقي أجزاء المخ, وهذا ما كانت تقوم به بالفعل بلا كلل أو ملل, فكانت تأتي يوميا للجلوس اليه والحديث معه ولكن دون أدنى استجابة منه أو بصيص أمل, حتى كان يوم

كانت تتحدث معه بهمس رقيق وقد مالت ناحيته وهى تقول
بالحاح:

- قوم بقه يا سيف, عجبك يعني رقدتك دي؟, الدكتور وكل اللي شافوك بيقلوا ان غيبوبتك دي متعمدة على فكرة!, قالتها بنصف عين ثم تابعت مهادنة وهى تتلمس أصابعه السمراء الموضوعه بجانبها موصول بها المحلول المغذي:

- قوم علشان خاطري, طيب بلاش خاطري أنا, هنا وفرح مش وحشينك؟, و....., ورفعت يده لتضعها على بطنها وقالت بحنو:

- والكابتن اللي مشرف جوه بئالو اكر من 3 شهور دا واحنا ولا احنا هنا مش وحشك؟, ربنت على خصلاته معيدة خصلته الثائرة الى الوراء وهي تطلع اليه بنظرات حب صادق ونبرة رجاء:

- علشان خاطري فتح عينيك, انا تعبانه من غيرك اوي يا سيف, الكل شايفني صامدة وقوية, لكن أنا لا قوية ولا حاجه أنا ضعيفة جدااا على فكرة, قوتي دي كنت بستمدها من وجودك جنبي, وانا مش هقدر اكمل من غيرك, علشان خاطر بناتنا, علشان خاطر أبنا اللي لسه في علم الغيب, سيف أنا انا بحبك يا سيف, بحبك ومش قادرة أعيش من غيرك, الفترة اللي فاتت عرفت فيها اني مش ممكن ابعد عنك ولو لحظة واحده حتى, ثم أعادت يده الى مكانها فوق الفراش ومالت عليها مقبلة أصابعه بحنان زائد وقد أفلتت دمعاتها بالرغم منها وهي تتابع وقد بدأ صوتها يعلوه نشيج البكاء:

- سامحتك والله سامحتك, بس افتح عينيك, ارحمني يا سيف.. انا بمووت بالبطيء...., لـ...تشعر باهتزازة في اصابعه ما جعلها تنتفض برأسها لترفعها وتتنظر غير مصدقة لأصابع يده التي تحركت حركة بسيطة, ثم رفعت عينيها اليه بأمل لاهف

لتصطدما بعينين أبنوسيتين تطالعانها بحب وصوت خرج
ضعيفا يهمس بمرح خفيف:

- أنا لو أعرف ان ضربي بالنار هيخليكي تسامحيني, كنت
انضربت بالنار من زمااان...

هتفت منة بإسمه وارتمت عليه تبكي وتضحك في آن واحد
مرددة إسمه مرارا, ولم تنتبه لألم سيف الذي شدّ عليه لإرتماؤه
على كتفه المصاب الا بعدما سمعت صوت أنينه, رفعت رأسها
وتحدثت بلهفة قائلة:

- وجعتك حبيبي؟, معلّش أنا متأسفة, ثم قامت وهي تتابع:

- ثواني هنادي الدكتور, لتعترضها يده التي تشبثت بثوبها
فطالعه باستفسار فأجابها بصوت ضعيف مهزوز:

- ما تسببيني!..., هزت رأسها نفيا وقالت بابتسامة مغلقة
بدموع الفرح:

- عمري..., ثم مالت عليه قاطفة قبلة خفيفة من شفثيه متابعة:

- ثواني حبيبي انادي الدكتور علشان أطمئن عليك...

وبالفعل حضر الطبيب وطمأنها على صحته وأن مؤشرات
الحوية في معدلها الطبيعي, قامت منة بالاتصال بالجميع
وزفت اليهم نبأ استيقاظ سيف من غيبوبته, وبعد اطمئنان
الطبيب عليه أمر بنقله الى غرفة خاصة وطلبت منة من

الطبيب أن تلازمه كمرافقة , فوافق الطبيب , وتم نقل سيف الى غرفة من غرف الدرجة الاولى.....

كان الجميع ملتفين حول فراش سيف , وكانت منة توزع العصائر عليهم احتفالاً بعودة سيفها اليهم , وكانت أمه تجلس بجواره عندما تحدثت قائلة وهي تميل عليه مقبلة جبهته:

- ألف سلامة عليك يا ولديّ , يا ريتها فيني ولا فيك يا حبيبي ,
أجاب سيف بضعف فهو لا يزال لم يسترد كامل صحته بعد:

- ألف بعد الشر عليك يا أمي , أنا فداكي.... , أجابت أمه وهي تشير الى منة التي وقفت مستندة على الحائط بجوار فراشه
سامحة لأمه بالجلوس اليه من ناحية ووالده من ناحية أخرى
بينما تعتلي شفتيها ابتسامة سعيدة راضية:

- مَرَّتْكَ , ما فانتكش واصل , كانت جارك طول السَّبُوع اللي
انت كنت فيه مِغْمِي عليك يا نضري , غُلُبْنَا فيها كلام انها حالتها
دلوك لازم تاخذ بالها من روحها بس هي دماغها يابسة كيف
الصعايدة , ما رضيتش واصل.... , ضحك الحضور وعلّقت منة
على كلام حماتها وعينيها تلمعان ببريق يخطف الأبصار:

- روعي هو سيف يا ماما الحاجة.... , ابتسم الموجودون , بينما
طالعاها سيف بنظرات عشق خالص ورغبة في احتوائها بين
ضلوعه تشدد بداخله ولكنه لا يملك القوة البدنية لذلك , وعوضاً
عن هذا رفع يده اليها فتقدمت اليه في حين نهضت زينب

مفسحة لها الطريق لتحتل مكانها بجوار زوجها, الذي قبّل يدها
وهو يقول بصوت مسموع:

- ربنا ما يحرمني منك ابدأ, انتي مُنايا يا حبيبتي, ومن غيرك
فعلا أنا من غير روح..

أراد احمد تبديل هذا الجو المشحون بالعواطف فصقّ بيديه
وقام متجها اليهما وهو يقول بمرح:

- بقول ايه يا عم الحبيب انت وهي , مش كدا!, راعوا مشاعرنا
بردو,ثم توجه الى سيف مربتا على كتفه وهو يتابع:

- ألف حمدلله على سلامتك يا أبو السيوف, ومال عليه هامسا
في أذنه ولا تزال الابتسامة ترتسم على وجهه ومن يراه يعتقد
يتبادل المزاح مع سيف في حين أنه كان يوجه اليه تحذيرا
هامسا, حيث قال:

- عارف لو سمعت انك زعلتها تاني ولا عملت حاجه تضايقها
تاني هعمل ايه؟, تابع من دون ان يعطيه الفرصة للجواب:

- انسى انك تشوفها هي وولادك تاني أبدأ, لأنها وقتها هتبقى
فعلا حلم وراح بالنسبة لك!.....

أجاب سيف بتأكيد وهو يشد على يد منة القابعة في يده بينما
تختلس النظرات المرتابة اليهما:

- عهد عليا يا احمد انى عمري ما هز عليها ولا هسمح لنفسي
اني أكون سبب في حزن يدخل قلبها ثاني...

شدّ احمد على كتفه قائلا والابتسامة قد اتسعت لسعادته بعودة
المياه الى مجاريها بين شقيقته الوحيدة وزوجها:

- كدا يبقى ألف حمد لله على سلامتك وأسافر وأنا مطمئن عليكم,
انا أجلت سفري مخصوص علشان حالتها كانت مش مطمئاني
خالص....

تحدث عبدالهادي قائلا لولده:

- ما تشد حيلك بجه يا ولدي وتجوم لنا بالسلامة, انت عجبك
رجدة المشتشفى ولا ايه؟؟

أجاب سيف بزفرة عميقة وهو يرنو بنظره الى منة الجالسة
بجواره من الناحية الاخرى للفراش:

- وانا أكره يا حاج!, بس الدكتور اللي مش راضي بيقول مش
قبل اسبوع كمان.....

تدخلت منة في الحوار هاتفة:

- وانا مع الدكتور, اعذرني يا بابا الحاج, سيف مش هيخرج الا
لما الدكتور يطمنا عليه خالص , وان الجرح مابقاش منه
خوف..

انتهاز سيف الفرصة وسأل والده باهتمام:

- إلا صحيح يا حاج معرفوش مين اللي ضرب عليّا نار؟؟..

غشت عينا الحاج نظرة غامضة وقال بهدوء وثبات:

- وهيعرفوا منين يا ولدي؟, العيار كان طايش, ومحدث عرف مين اللي طخّه.... المهم انك جومتلنا بالسلامة..

علقت منة بجدية:

- المفروض يا بابا الحاج حكاية ضرب نار في الهوا دي مجاملة تتمنع خالص, انت حضرتك شوفت سيف جراه ايه, انا من لحظة ما سمعت ضرب النار وانا قلبي اتقبض...

هز عبدالهادي برأسه ايجابا:

- صوح يا بتّي عنديك حج...

تحمّد لسيف عبدالعظيم وعواطف بالسلامة, وعلم أن ابنتيه برفقة سميحة شقيقته, وكانتا قد زارتاه مرة واحده فقط وأثرت منة ألا يحضرا الى المشفى ثانية حتى ينتهي شفاء سيف فقد كانتا مذعورتين من رؤية والدهما ممدد طريح الفراش وإن كان يحاول محادثتهما والمزاح معهما, ولكنه لم يكن في كامل لياقته المعهودة بالنسبة لهما.....

انصرف الموجودون وقد غادر والديّ منة مع احمد وعائلته الى القاهرة بعد أن سبقهما نادر الى الاسكندرية فهو ما ان اطمئن ان سيف قد استقرت حالته الصحية حتى غادر الى مدينته,

وكان يتصل يوميا للاستفسار عن حالته الصحية وفرح عندما علم بخبر استيقاظه من غيبوبته, سعادته بالخبر كانت من أجل منة, فلا بد أنها الآن في أقصى درجات سعادتها, وقرر طوي صفحة حبه المستحيل من حياته للأبد, وطلب من والدته البدء بالتفتيش عن عروس مناسبة له.....

بعد رحيل الجميع نظر سيف الى منة وأشار بيده هامسا:

- تعالي,.... تقدمت منة اليه وجلست بجواره حيث أشار, رفع يده اليمنى الطليقة وأمسك بها وجنتها في حين اليسرى كان يحركها بصعوبة حيث الضماد الذي كان يلتف على جذعه العلوي من ناحية اليسار حيث مكان الاصابة, نظر الى عينيها مليا قبل ان يرفع يده مزيحا وشاح رأسها الى الخلف لتتساقط خصلات شعرها المنفلت من ربطته لتحيط بوجهها الملائكي الفاتن, طفق ينهل من عذب ملامحها كما العطشان الذي عثر على واحة ماء عذبة رقراقة, همس متسائلا بينما نظرت اليه منة في حب وابتسامة سعيدة تزين ثغرها المكتنز:

- انتي قلتيلي سامحتك صحيح ولا أنا اللي كان بيتهيا لي وانا في الغيبوبة؟, أمسكت منة بيده التي تحيط بوجهها وأجابت بصدق استشعره في حروف كلماتها:

- لا, ماكانش بيتهيا لك ولا حاجه, انا فعلا سامحتك يا سيف, اللي حصل خلاني متأكده اني مقدرش أعيش من غيرك ثانية واحده, أنا بحبك يا سيف, عمري ما عرفت يعني ايه كلمة حب

الا على ايديك انت, انت جوزي وحببي وابني وصاحبي وأبو ولادي, إنت أهلي يا سيف, أنا لو كنت فعلا عاوزة أسيبك أو مسامحتكش ما فيش حاجة في الدنيا كانت هتخليني مثلا اني آجي معاك عندكو..مهما حصل!, لو بيعتك فعلا.. يبقى خلصت, لكن أنا ما كنتش عاوزة اللي بيننا ينتهي, كنت بجادل كثير وبعاند لكن أنا متأكده انك لا يمكن تسمع كلامي, كنت موجوده يا سيف, انت متعرفش أنت ايه بالنسبة لي؟!.. نظر اليها بتساؤل فيما تابعت ودموعها تترقرق في مقلتيها:

- انت كل حاجة يا سيف, احساسي أنك ممكن تبص لوحده تانية كان احساس بشع, عمري ما اتمنى لأي حد انه يحسه أبدا, كنت حاسة زي ما يكون قلبي اتدبح بسكينة باردة, وعمّال ينزف, واللي تعبني اني لا أنا قادرة أوقف النزيف ولا أنا قادرة أنضف الجرح, سيف أنا ... بعشقتك ... عمري ما تصورت اني ممكن أحب حد بالدرجة دي, حتى لو جوزي أبو ولادي, وانت في الغيبوبة دعيت ربنا أنه يرجعك ليا بالسلامة وانا هنسى اللي فات كله , انا بحبك أكثر من روحي يا سيف... وقبلت راحة يده المستريحة على وجهها ثم شدت بكلمات الاغنية التي تحمل نفس الاسم :

- أكثر من روحي بحبك, بحقيقي بحبك أكثر, وشعوري بحبك وبأنه دا شيء يتقدر, ولا كل لغات الدنيا تقدر عن حبي تعبر, وغنايا بانني بحبك ...أكثر من روحي بحبك, بالنسبة لدرجة

حبك... رمز صغير مش أكثر, وأكثر... أكثر..... أكثر من
روحي بحبك.....

لم يتمالك سيف نفسه وجذبها من نهاية رأسها على قدر ما
استطاع من قوة ليتناول فمها الذي تراقص لغناه قلبه في قبلة
عميقة أودعها خالص عشقه, وبادلته منة القبلة بأخرى أشد
عمقا وحرارة.....

ابتعدا بعد مدة طويلة يلهثان طلبا للهواء, احتضنها سيف الى
صدره بيده السليمة وقال وهو يلهث:

- بحبك, بحبك أوي, وعهد عليّا عمري ما هفكر مجرد تفكير
في أي حاجة تضيع حبك ليا, بس فيه مشكلة دلوقتي?...
قطبت منة ورفعت رأسها ناظرة اليه بتساؤل وهي تقول:
- مشكلة?, مشكلة ايه دي?...

نظر اليها سيف بخبت وأجاب باتسامة مأكرة تلوّن محياه:

- هصبر ازاي لغاية ما أطلع من هنا?, خليكى جدعه وقولي
للدكتور يكتب لي على خروج بكرة...

استهجنت منة قائلة:

- أفندم!, بكرة!, لا لا لا , انت بتهزر صح?, أجاب سيف
بتلقائية:

- لا , غلط! , أنا بتكلم جد , طيب بصي ايه رأيك تيجي تنامي
جنبي على السرير , انا هبقى مؤدب خالص ومش هعمل أي
حاجه تضايقك , بس عاوز أخذك في حضني وخالص ,
أرجوكي يا منة....

نظرت اليه منة في ارتياب وأجابت:

- بس جرحك... , لم يدع لها الفرصة لتكمل وهتف:

- انتي هتبقي بعيدة عن جرحي خالص , هتنامي على اليمين ,
علشان خاطري يا منة , وحشني أوي انى أخذك في حضني..

وقد اشتاقت الى أمان ذراعيه هي الأخرى فوافقت ولكن...
لتعلم خطأ انصياعها لرغبته بعد ذلك بسويعات !!....

كانت قد خلدت الى النوم بين ذراعيه مريحة رأسها على كتفه
الأيمن محيطة خصره بذراعها الأيمن , وقد غرقت في سبات
عميق , لتشعر بشيء يداعب بشرتها , فجعدت وجهها في نومها ,
لتفاجأ بلهاث حاد يطرق سمعها , رفرفت بعينيها وفتحتها وهي
تهمس ولم تزل في غياهب النوم:

- اممم , سيف , لتسمع صوتا أجشا خشنا يجيب:

- قلب سيف وعيونه... شعرت بلمس يده على بشرة جسدها ,
كانت قد أبدلت ثيابها بمنامة قطنية تصل الى منتصف ساقها
ذات اكمام قصيرة , ففوجئت بيده وقد تسللت أسفل رداء النوم

لنتلمس ساقها, شهقت بخفوت وقالت بدهشة وهي تحاول ازاحة يده جانبا بلا جدوى:

- ايه يا سيف انت بتعمل ايه؟!.., اجابها بصوت أجش من شدة الانفعالات التي تمر في داخله:

- الدنيا حر, وانتى كنت رافصة الغطا ورجليكي مكشوفة خفت لا تبردي فكنت بعدل هدومك!!... طالعتة منة مليا قبل ان تنطلق من فمها ضحكة خافتة ولكنها ناعمة جعلت سيف يبتسم تلقائيا, أجابته من بين شهقات ضحكتها:

- منين الدنيا حر ومنين خفت عليّا أبرد؟, ركّز يا سيف, انت المفروض كتفك بس اللي اتصاب مش دماغك!!....

أجاب سيف وهو يجذبها ناحيته بقوة بينما تدفعه براحتها في صدره محاولة ابعاده:

- ما هو الدنيا حر نار عندي أنا, لكن في الاساس بالليل بيكون فيه هوا وانا بخاف عليكى من الهوا.....

قالت منة وهي تحاول التحرر من قبضته بينما تحرك رأسها يمينا ويسارا للافلات من فمه المتطلب وتلك الرغبة المحرقة التي تنبعث من فحم عينيه المشتعل لتسيل دمها كالعسل الدافىء في أوردتها:

- فيك الخير والله, بس ابعده بقه شوية وإلا هروح أنام في سريري!!....

أجاب سيف بصوت متهدج:

- مش قادر أبعد, بجد مش قادر, طيب بصي بوسة واحده بس..

قطبت منة كمن يفكر ثم أشارت اليه بسبابتها وقالت بتحذير:

- واحده بس؟! , أوما بلهفة فتابعت امرأة:

- طيب غمّض عينيك, أنا اللي هقوم بالمهمة دي!..., لاحت علامات الأسف على وجهه وقال:

- خلّي عنك انتي خالص, قاطعته منة بتحذير ونظرة قوية:

- سيف..., فإنصاع لرغبتها وأغمض عينيه وهو يمتني نفسه بأنه سيقبض عليها ما أن يشعر بشفتيها الدافئتين, لوهلة لم يشعر بشيء وما إن همّ بالتذمر حتى شعر بمن يمسك بوجهه بقبضة قوية ثم قبلة خفيفة كرفرفة فراشة حطّت على وجنته اتبعها صوتها يقول ضاحكا:

- تصبح على خير يا سيفي!! , فتح عينيه سريعا وهمّ بالاعتراض عندما أبصرها وقد رقدت فوق فراشها الآخر, كشر غير راض وهتف بنزق:

- إنتي بتخمي على فكرة, احنا ما اتفقناش على كدا!!,,

ضحكت منه مجيبة:

- أنا لا أخو أمك ولا أخو أبوك!!، انا مراتك ونام بقه علشان أنا
تعبانه فعلا وعاوزة أنام، تصبح على خير، ولّفت الى الجانب
الآخر مولية اياه ظهرها في حين همس بيأس وزفرة عميقة
خرجت من قلبه:

- أنام!، هو انا هيجيلي نوم طول ما انا شايفك راичه جاية
قودامي وانا مش قادر أقرب لك، تمام زي العطشان لما يشوف
كوباية مائة ساقعه مشبّرة قودامه ومش عارف يشرب منها
وهي عماله تطلع له لسانها!، الصبر من عندك يارب.....

مر على تواجد سيف بالمشفى خمسة عشر يوما، ما بين شد
وجذب وكروفرّ بين وبين مُناه!!، فقد كان يتحيّن الفرص منتهزا
حاجته للمساعدة وما إن تقترب منه منه حتى يسارع لاستغلال
وجودها بجواره بأجمل طريقة ممكنة.....

- سيف، انت لو مش هتعقل انا هروّح وهخلي ماما الحاجة هي
اللي تيجي مرافق بدالي، هي عمالة تلحّ عليّا بنالها مدة
وخصوصا أنى حامل علشان ارتاح...

هتف سيف رافعا يده الى اعلى:

- لا لا لا، خلاص، حرمت، انما صحيح ازاي حامل 3 شهور
وما اخديش بالك طول الفترة اللي فاتت دي كلها؟...

اجابت منة وهي تطالعه بنصف عين:

- البركة في حضرتك, هو انت خلّتني عارفة راسي من رجلي,
حتى لما معادها فات قلت أكيد علشان حالتي النفسية مش
مضبوطة, ما كانش في دماغي خالص اني حامل..

نظر سيف الى وجهها الجالس بجواره وقال بابتسامة:

- ايه رأيك لو ولد عاوز أسميه على اسم كبير العيلة عندنا..

فرحت منة متوقعة انه يريد تسمية ولدهما بإسم والده هو
عبدالهادي فهتفت بحبور:

- وماله حبيبي, انت عارف انا بحب عمي عبدالهادي قد إيه..

قطب سيف وقال:

- اولا كلمة بحب دي قاتلك 100 مرة ما تطلعش لأي راجل
غيري ولو كان ابوكي ولا ابويا, ثانيا بقه مش عبدالهادي أبويا
أنا اقصد جدي الكبير كبير السوالمه, مخيمر السوالمي!!

غابت الابتسامة عن وجه منة وقالت بدهشة:

- نعم؟, مخيمر!, يعني أنا أبقى أم مخيمر!!...

اجاب سيف وهو يبتسم:

- آه, وأنا أبو مخيمر!, يا سلاام يا مُنايا!..., أجابت منة
مصعوقة:

- يا سلام يا منايا؟, انت بتتكلم بجد؟, أوماً ايجابا فتابعت:
- سحر ازاي وتسمي عبدالعال؟, يعني معلش سيف ازاي ويسمي مخيمر؟ عاوزة أفهم أنا!!...
- قال سيف وهو يكتم ضحكته بصعوبة فقد راق له مشاكستها:
- ومالو بس يا حبيبتي,....., أشارت منة بيدها وأجابت بجدية مصطنعه:
- سيف ريح روحك, يمكن ربنا يعديها على خير وتيجي بنت وأسميها على إسم ستّي الكبيرة...
- سيف بتساؤل وابتسامة عريضة:
- واسم ستّك الكبيرة كان ايه؟...
- مالت فوقه مجيبة بجدية زائفة:
- زليخة!! , أوماً سيف برأسه مبتسما:
- آه, زليـ... , وهتف بحلق متابعاً حينما استوعب الاسم جيداً:
- ز ... مين؟! , أجابت منة بتلقائية مصطنعه:
- زليخه بابا, زليييييخة, ايه ما سمعتش عنه قبل كدا؟..
- سيف وقد أسند ظهره الى مسند الفراش خلفه ناظراً امامه قائلاً بثقة:

- لا هو ان شاء الله مخيمر..

هتفت منة معترضة:

- زليخة, هتف سيف:

- مخيمر, لتتبعه منة:

- زليخة, وظلّ الاثنان يتراشقان بالإسمين حتى هتفا في وقت واحد:

- زليمر!!, وسكتا يطالعان بعضهما البعض لبرهة حتى انفجرا ضاحكين.. بضحكات سعيدة ملئت الأجواء بهجة وفرح....

=====

خرج سيف من المشفى بعربة اسعاف خاصة بناء على طلبه فورا الى منزله بالقاهرة, يرافقه منة في سيارة الاسعاف, يتبعهما والده ووالدته وابنتاه في سيارة والده الخاصة....

بعد أن اطمئنا كل من عبدالهادي وزينب الى حالة ولدهما صممت منة على أن يبيتا ليلتهما لديهما على أن يسافرا غدا بالنهار, قالت زينب مشيرة الى حفيدتيها:

- ياللا حبايبي, تاجوا معاي أحكيلكم حكاية الشاطر حسن وبدر البدور بنت السلطان, قفزا الفتاتين فرحا موافقتين, فدفعتهما زينب الى غرفتهما التي ستبيت فيها هي وعبدالهادي ليلتهما, اعترضت منة قائلة:

- لا يا ماما الحاجة, علشان تعرفي تنامي انتي وعمي الحاج,
هنا وفرح هيناموا في حضني أنا وسيف انهرده, أصرت زينب
قائلة:

- لاه, ولو صممتي يُبجى هנסافر دلوك, السواج موجود وبايت
تحت في العريبه, هنعس اننا مضيجين عليكم, خليكو كيف ما
انتو متعودين يا بتي, اساسا الحاج هينام ع السرير وأني هأخذ
الجُطّتين دول في حضني ونفرشو في الارض ونجد نَحْكي
حواديت للصّبح, زفرت منة وهمت بالاعتراض حين أسكتها
سيف قائلا:

- خلاص يا منة, سيبي الحاجه براحتها متزعهاش...

ودخل كل منهم الى غرفته للنوم...

ساعدت منة سيف في تبديل ثيابه وكان جرحه قد تمت ازالة
الضمادة الكبيرة عنه واستعاض عنها بأخرى صغيرة, وكان
الجرح قد جفّ تماما, وغدا في طُور الشفاء الاخير, ارتاح
سيف فوق الفراش ودخلت منة الى الحمام الملحق بغرفتهما
حيث اغتسلت وابدلت ثيابها الى منامة حريرية مكونة من
بنطال حتى الركبة, وفوقه بلوزة بكم قصير للغاية وقبة واسعة
تكشف عن عنقها المرمرى وتتسع البلوزة الى الاسفل حتى
منتصف الفخذين, مشطت شعرها وقد وضعت مرطب الجسم
الذي تضعه عادة, ورقدت بجوار سيف وهي تتمتع بثبات لا
تشعر به:

- انا هنام عاوز حاجه يا سيف؟, شرد سيف قليلا لينتبه على ندائها له فأجاب:

- ها.. لا ابدأ, فرقدت مولية اياه ظهرها وهي تغمض عينيها بقوة قائلة:

- تصبح على خير....

نظر الى ظهرها قليلا ثم مد يده فوق رأسها الى المصباح المعلق فوقهما ليجذب حبل الانارة الخاص به الى اسفل فساد الغرفة الظلام, رفع الغطاء قليلا واندس أسفله وهو يتمتم:

- وانتى من أهله... بعد ثوان انتفضت منة في رقدتها والتفتت تحاول النظر الى سيف في الظلام الذي لم تعتد عليه عيناها بعد وهي تقول بلؤم:

- انت بتعمل ايه يا سيف؟, كان سيف يعتصرها بين ذراعيه بقوة حتى انها بصعوبة استدارت إليه, ضربت أنفاسه الساخنة صفحة وجهها القشدية وأجاب بصوت أجش بينما يتشمم رائحتها الأنثوية العذبة وهو يهمس بخفوت:

- اشششش, بينا وبين الحاج والحاجة حيطة واحده, فمش عاوز صوت, بلاش فضايح....

نظرت اليه منة وكانت عيناها قد اعتادت الظلام فسُهل عليها رؤية وجهه وأجابت وهي تحاول دفعه بعيدا بلا فائدة:

- انت اللي هتجيب الفضايح دي لنفسك! , أعقل يا سيف , ابوك وأمك انت بنفسك قلت بيننا وبينهم حيطة واحده , فعيب اللي انت بتفكر فيه دا!! , أجاب سيف بحنق:

- عيب! , وايه العيب اللي فيه بقه ان شاء الله؟ , تفتكري هما دلوقتي فاكريننا بنعمل ايه؟ , بنلعب صلح؟ , ولّا نايمين عاقلين هاديين كل واحد فينا مديّ زهره للتاني؟! , لا يا حبيبتي , هما عارفين احنا بنعمل ايه فمينفعش يبقى صيت ع الفاضي , وبعدين انتي وحشتيني أوي , أنا ما وحشتكيش؟! , سكتت منة وقد هدأت مقاومتها وأجابت بخفوت وتردد:

- وحشتني بس.... , همس سيف أمام شفتيها وهو يضع سبابته على فمها المكتنز:

- إششش , من غير بس , ليشعر بنعومة شفتيها تحت إصبعه , فمال برأسه متناولا شفتيها في قبلة عميقة محتويا جسدها بقوة أشاعت الحرارة في أوصاله , ولم تستطع منة المقاومة فهو حبيبها التي أوشكت على فقدّه وتبادلا عهود الحب بأجمل طريقة بين المحبين , وليست مرة واحدة بل....مرّاتٍ ومرّاتٍ !!.....

استقرت صحة سيف وعاد الى عمله ثانية بينما تفرغت منة الى ابنتيها وحملها الجديد , واستقرت حياتهما والتي لم تخلو من غيرة منة الشديدة....

- سيف أنت فين؟... سألت منة بغضب سيف وهي تحدّثه هاتفيا وتنقر بقدمها الارض , أجاب سيف بتلقائية:

- هكون فين يعني يا حبيبتي؟, في الشغل طبعا!!..

منة بحدة قاربت الصراخ:

- شغل؟, انا اتكلمت من ساعه جلال السكرتير رد عليا وقاللي انك جيت ونزلت على طول, وعماله أطلبك على الموبايل مقفول, تقدر تقوللي كنت قافله ليه, وكنت فين؟... (كانت منة قد أصرت على وجود سكرتير رجل وليس أنثى, كما أن طاقم المهندسين جميعهم من الذكور فلم يكن هناك أي مؤنث في الجوار من سيف)... أجاب سيف بصبر فهو مقدّر لغيرتها الشديدة والتي تقارب الشك ولكنه أخذ على عاتقه ألا يتذمر منها أبدا وان كان في بعض الأحيان تكاد تفلت أعصابه لشكّها المفرط:

- حبيبتي أنا كنت في مشوار والشبكة في المكان اللي انا كنت فيه وحشة, دا كل الموضوع!!..

منة بإصرار:

- مشوار؟, مشوار ايه دا؟, زفر سيف مجيبا وهو يحاول تمالك نفسه:

- أما آجي هقولك, قاطعها وهي تهم بملاحقته بالاسئلة من جديد:

- معلش يا منة انا داخل على اشارة هقفل علشان العسكري ما ياخذنيش مخالفة, ... واغلق الهاتف....

كانت منة ترغي وتزبد وتروح وتجيء في المكان, كانت قد شارفت على شهرها الثامن, وضعت يدها أسفل ظهرها حيث شعرت بألم بسيط, ... نفخت بغیظ متممة:

- ما انا هلاقيها منك ولا من ابوك, شكلك هتطلع متعب زي اللي خلفك !!!, لتسمع صوتا يأتيها من خلفها يقول بمزاح خفيف:

- واللي خلفه ماله بس؟, التفتت اليه وقد ثارت خصلات شعرها الذي استطال حتى ركبتها وسيف يرفض رفضا باتاً أن تقصّ منه ولو إنشأ واحدا, هتفت بنزق بينما كانت ابنتيها تلعبان في غرفتهما:

- تاعبني!, اللي مخلفه تاعبني ومش عاوز يريحني, كنت فين يا سيف؟, سار سيف اليها وتناول يدها ليسير بها حتى الاركة الجلدية الفخمة حيث أجلسها وجثا على ركبتيه أمامها وهو يقول:

- ممكن تقفلي عينيكي بس؟, همّت بالرفض عندما ألحّ قائلاً:

- علشان خاطري, هقولك والله كل حاجه بس الاول اقفل عينيكي, فعلت كما طلب منها لتسمعه وهو يطلب منها أن تفتح عيناها, فتحتهما لتبصر سلسال ذهبي عريض يتدلي منه قلب مغلق, شهقت فمال ناحيتها وفتح القلب مشيراً لها لتقرأ ما حُفر بداخله " الى مُنايا....بحبك سيف", في احدى جانبي القلب بينما يحمل الجانب الآخر صورة لهما معهما من صور زفافهما, ترقرت الدموع في عينيها في حين همس:

- كل 5 شهور وانتي طيبة, زي انهرده انتي سامحتيني, وانا فتحت عينا من تاني, زي ما أكون كنت رافض انى أرجع للحياة طول ما إنت زعلانه مني, وأول ما سمعت كلمة سامحتك كانت نفس اللحظة اللي انا سامحت فيها نفسي وقبلت انى ارجع للحياة تاني, لأنه من غيرك ومن غير قلبك الدنيا كلها مالهاش طعم... وصيّت عليها الجواهر جي وانهرده كنت عنده بستلمها, وتقريبا الشبكة عنده واقعه, ومرضيتش اقولك علشان محرقش المفاجأة!!... وان شاء الله من هنا ورايح كل شهر لازم هحتفل باليوم دا مش كل 5 شهور!!....

نظرت اليه منة ملياً قبل ان تشهق عاليا منخرطة في بكاء عميق وهي تدفن وجهها في راحتيها, قبض سيف على معصمها وهتف وهو يحاول ازاحة يديها بعيداً:

- منة حبيبتي, منة انت بتعيطي؟! , منة كلميني فيه ايه؟,

أبعدت منة يديها عن وجهها وصرخت في حدة أدهشته وهي
تبكي بحرقة عالية:

- بعيط عليك وعليا، أنا .. أنا بنيت شخصية زبالة، شكّ وغيره،
بعيط علشان ظلمتك... بعيط علشان عمري ما كنت أتصور اني
اتحول لواحد شكاكة بالشكل دا، عرفت بعيط ليه يا سيف؟، بس
للأسف دا مش بإيدي، دا زرعك إنت يا سيف!، إنت اللي
زرعت ... إحصد بقه!!، وانخرطت في نحيب عال يقطع نياط
القلب...

تركها سيف حتى هدأت نوبة بكائها، جلس بجوارها وقال بهدوء
وهو يحتضنها بينما لا تزال تنتفض إثر شهقات بكائها الحاد:

- ومين اللي قالك اني زعلان ولا متضايق ولا معترض على
حاجه أنا اللي اتسببت فيها؟، اعملي ما بدالك، غيري عليا، شُكي
فيّا، اخنقيني، بس....و أبعدھا عن ذراعيه ناظرا لها بعشق
صاف متابع:

- ماتسيبينيش!، أي حاجه مستعد أستحملها الا أنك تبعدي عني!،
وأعاد احتوائها بين ذراعيه مجددا وهو يهمس:

- اوعي تسبييني يا منة اوعي، لتجيبه منة بخفوت ممائل:

- ولا دقيقة ولا ثانية يا سفي!!، ليغرقها في عناق قوي ثم
حملها بين ذراعيه متجها الى غرفتهما وهو لا يزال معانقا لها،

ليتابع بث حبه وعشقه السرمدى لها حاملا إياها الى عالم لا
تصله الا مع سيفها وحده !!....

=====

الخاتمة:-

- أنا مش فاهم ازاي طاوعتك اننا نسافر اسكندرية وانتى فى
حالتك دي؟, تساءل سيف بنزق وهو يقود سيارتهم متجها الى
الاسكندرية لحضور حفل زفاف نادر ابن خالتها وقد سافر
عبدالعظيم وعواطف قبلهما بعدة أيام لتستطيع عواطف مساعدة
شقيقها فى تجهيزات الفرح, أجابت منة بهدوء بينما تقبع ابنتيها
فى المقعد الخلفى تتطلعان من النافذة الى الطريق حولهما:

- فيها ايه يا حبيبي بس؟, ما أنا سألت الدكتورى وقالت لى لسه
اسبوعين تقريبا على ولادتي, وبعدين طالما الطريق كويس
وانت بتسوق هادى خلاص, وبعدين ازاي ما احضرش فرح
نادر , انت عاوز طنط سهام تزعل؟, ونادر جميله هيفضل فى
رقبتي طول عمري...

اجاب سيف ببرود:

- أنا ماقولتش حاجه, وانا بنفسي سافرت لنادر أشكره على
وقوفه جنبى, بس انا بتكلم على حالتك.. انتى على وش ولادة,
وأنا مش بالغ حكاية السفر فى الظروف دي, ومتأكد ان خالتك
كانت هتقدر ظروفك, كنا ببعدين جينا باركناله فى شقته..

منة منهية النقاش:

- خلاص يا سيف اللي حصل.. حصل, ربنا يوصلنا بالسلامة
وان شاء الله مش هيحصل حاجه...

كانت منة تجلس في مقعدها حول احدى الطاولات المتناثرة في
قاعة الزفاف, كانا ابنتيهما بصحبة والدتها عواطف لشدة تعلقهما
بالأخيرة... عندما همس سيف لها للتوجه للعروسين للمباركة,
بعد أن باركا لهما واثناء عودتهما لطاولتهما مجددا , نادى
صوتا أنثويا على سيف, نظرت منة الى سيف شذرا فرفع كتفيه
بمعنى انه لا علم له عمّن تناديه, التفتت منة خلفها لتفاجأ بأنثى
وكانها خارجة من مجلة للأزياء بفستانها الذي يلتصق بها وكأنه
جلد ثانٍ لها, بلونه البرونزي , يصل الى فوق الركبة, ويبرز
مفاتها فلا يدع شيئا للخيال, تقدمت منهما وقد تطاير شعرها
البنّي اللون الذي يصل الى كتفها خلفها, وقفت امامهما لتنبعث
رائحة عطر ثقيل يزكم الأنوف, فقارنت منة بين وضعيهما!,
هي بعباءتها المطرزة على الحواف والأكمام والتي تتسع الى
أسفل فلا تبرز حملها, ووشاحها المعقود بربطة أنيقة خلف
عنقها ليخفي خصلاتها الناعمة, بينما تعلو قبة عباءتها لتستر
عنقها الطويل كعنق اليمامة, والأخرى بتلك اللاتياب التي
ترتديها!!, تحدثت تلك الانثى التي أعطتها منة عمرا لا يزيد
عن عشرين عاما بصوت به بحة جذابة:

- انت سيف عبدالهادي صاحب المكتب الهندسي للانشاءات
مش كدا؟, أوما سيف برأسه بينما عيناه تنظر الى منة التي
يحتل وجهها تعبير اجرامي وهي ترمق تلك الفتاة من أعلى الى
أسفل بقرف واضح, تابعت الفتاة وهي تزيح شعرها جانبا
بغرور أنثى تعلم مجى فتنتها وجمالها:

- انا نانسي سليمان, انت كنت عملت ديكور شقة اخويا عادل
سليمان وبصراحه الديكور حلو اوي وانا كنت عاوزاك تعملي
ديكور, لم تمهلها منة لتتابع وجذبت سيف من يده مزيجة
اياها جانبا لتتصدر هي الموقف مواجهة لها وهي تقول بأبتسامة
صفراء:

- ايوة يا آنسة, بس للأسف معلوماتك قديمة, سيف قفل المكتب!
حدقت الفتاة غير مصدقة وهتفت بينما سيف يطالع منة في
دهشة:

- قفله؟, خسارة .. طيب ليه؟, هم سيف بالكلام لتقاطع منة
متحدثة بجدية شديدة:

- مزيين!!, حدق فيها سيف بشدة وكتم ضحكته بصعوبة حتى
أنه اصدر صوتا فسارع للسعال حتى لا تنتبه اليه الفتاة التي
حولت انظارها اليه معلقة بدهشة:

- مزيين؟. يعني ايه مزين دي؟, أجابت منة وهي تأبط ذراع
سيف وتستدير مبتعدة:

- يعني قلبه مزين!! , مزين... اللي بيزين الروس, ومش أي
روس, مزين رجالي يا آنسة, حلاق من الآخر!! , لو عاوزة حد
يزين لبابي راسه ممكن ما تقوليلناش!....

وانصرفت منة مبتعدة متأبطة ذراع سيف الذي انطلقت
ضحكاته عاليًا, بينما نفخت منة بضيق والتي شعرت
بالانقباضات التي أتنها في وقت سابق وقد عادت بقوة عن ذي
قبل, قالت منة بنزق:

- آه, اضحك انت ولا همّك, أجااب سيف وابتسامة واسعه تحتل
وجهه:

- حبيبتي يا منايا, ما تتصوريش فرحتي وانتي غيرانه عليا أد
ايه! , أد كدا بتحبيني يا منة?..

هتفت منة وهي تفتح عينيها على وسعهما:

- آه, ... فهتف سيف:-

- بجد? ,.... لتجيب منة بصوت أعلى وهي تمسك بطنها من
أسفل :

- آآآه.., شعر سيف بشيء مريب في صوت منة فمال ناحيتها
ممسكا يدها التي تقبض بها على أسفل بطنها وهو يتساءل في
ريبة عاقدا جبينه:

- منة حبيبتي مالك؟, انتي تعبانة؟. فصرخت من بين أسنانها
ولم تستطع احتمال ألمها أكثر من ذلك:

- آآآه, الحقني يا سيف, شكلي هولد!!.....

في الساعات اللاحقة لا يتذكر سيف تماماً ما حدث, فهو لا يذكر
سوى حمله لها وذهابه سريعا الى والدتها التي سارعت
بتوجيهه أن يذهب رأسا الى المشفى وانها ستلحق به مع والدها
تاركة البننتين مع سهام..

لا يعلم سيف كيف وصل المشفى وسط صرخات الألم المستمرة
من فم منة, صفّ سيارته أمام المشفى وخرج سريعا تاركا
الابواب مشرعة, وحمل منة, توجه اليه حارس أمن المشفى
ليخبره ان وقوف السيارة ممنوع بهذا الشكل فهتف سيف به:
- المفاتيح في العربية اركنها انت في الحطة اللي تعجبك...

تم ادخال منة فورا الى الشمفى واستدعاء طبيبة التوليد, التي
عاينتها مؤكدة انها قد دخلت في مرحلة المخاض بالفعل....

بعد سويغات من الألم والعذاب وكان سيف قد أصر على
حضور الولادة, حضر " زياد سيف عبدالهادي", الذي ما إن
نزل حتى ملأ الدنيا صراخا, حمله سيف وتوجه به الى منة
الراقدة فوق فراش التوليد وكان سيف قد ارتدى الزي الخاص
بغرفة العمليات, مال فوقها وهو يحمل وليدهما الذي لم يكن
أكبر من راحة الكف وقد احمرت بشرته لشدة صراخه, وضعه

على صدرها وهو يهمس من بين دموعه التي انهمرت رغما عنه:

- حمد الله على السلامة يا أم زياد, فاحتضنت منة وليدها هامسة بفرح أمومي وهي تتطلع الى كتلة الزغب الصغير الذي يتحرك بنشاط زائد بين يديها:

- زياد؟!..., مال عليها سيف هامسا امام شفتيها:

- شكله كدا هيطلع مطرب, شوفتي ببسلك الحنجرة عنده ازاي؟, اطلقت ضحكة ضعيفة فيما احتضنت وليدها الى صدرها بينما احتواهما سيف الى صدره وعيناه تدمعان ولسانه يلهج بالشكر لله بأن حفظ عليه أسرته بل وقد زاد عدد أفرادها بفضل من الله سبحانه, وعاهد الله أن يحاول الحفاظ على سعادة تلك الاسرة الصغيرة التي هي حياته بأكملها.....

- تمت بحمد الله -

